

भजनसंग्रहया सफू म्हसीका

थ्व भजनया सफू बाइबलया पवित्र म्ये व प्रार्थना मुनातःगु सफू खः। थीथी ईया च्वमिपिन्सं च्वयातःगु थुपि पवित्र म्ये व प्रार्थनायात इस्त्राएलीतय्सं अश्शूर व बेबिलोनय् कैदी जुयाः च्वंबलय् मुनाः थःपिनिगु आराधनाया इलय् छ्यलेगु यात। लिपा थ्व हे भजन मुनायात इमिसं थःपिनिगु धर्मशास्त्रय् नं दुथ्याकल।

थुकी थीथी कथंया धर्मया चिनाखँ दु। थुकी परमेश्वरया प्रशंसा, आराधनाया म्ये, ग्वाहालि, सुरक्षा, उद्धारया निंति प्रार्थना, क्षमा या निंति इनाप, परमेश्वरया आशिषया निंति सुभाय्या म्ये, शत्रुतय्त सजाय बीत इनाप दु। थुपि प्रार्थनात मनूतय् थः याकःचिगु व फुक्क इस्त्राएलीतय्गु नितां कथंया खः। गुलि प्रार्थनाय् छम्ह मनूया नुगलय् दुने च्वंगु नुगःखँत प्वंकातःगु दुसा गुलि प्रार्थनाय् परमेश्वरया सकल मनूतय्गु नुगःखँत प्वंकातःगु दु।

थ्व पवित्र भजनयात येसू ख्रीष्टं नं छ्यलादीगु दु। न्हगु नियमया च्वमिपिन्सं नं न्ह्यथनातःगु दु। अले थुपि मण्डलीइ शुस्निसें हे आराधनाया सफू जुयावःगु खः।

भजन मुनाया न्यागुलि हे ब्व परमेश्वरयात तःधंक प्रशंसा यानाः क्वचाय्कातःगु दु। उपि ब्वत थथे दु—

धलः पौ

न्हापांगु ब्व १-४१

निगूगु ब्व ४२-७२

स्वंगूगु ब्व ७३-८९

प्यंगूगु ब्व ९०-१०६

न्यागूगु ब्व १०७-१५०

भजन न्हापांगु ब्व

1

भज १-४१

धातर्थेयागु लसताया लँपु

- 1 धन्य खः व मनु,
 गुम्ह दुष्टतयगु खँय जुइ मखु,
 गुम्ह पापीतयगु लँय दनी मखु,
 अले गुम्ह कर्पिन्त क्वह्यंका
 जुइपिनिगु पुचलय च्वनी मखु।
- 2 बरु व परमप्रभुया व्यवस्थाय हे
 लयतायाच्वनी।
 चान्हि वय्कःयागु हे व्यवस्थाय
 ध्यान यानाच्वनी।
- 3 व खुसि सिथय पिनातःगु
 सिमा थें खः।
 वं न्ह्याबलें थःगु इलय फल बी।
 अले वयागु हः नं गुबलें
 सुकूगनावनी मखु।
 वं याःगु न्ह्यागु ज्या नं पूवनी।
- 4 दुष्टत अथे जुइ मखु,
 इपि छवसँ थें खः।
 फसं इमित पुइकायंकी।
- 5 उकिं न्याय बीगु इलय
 दुष्टतयत दण्ड बी।
 न त पापीत हे
 धर्मीतयगु सभाय च्वने फइ।
- 6 छायधाःसा परमप्रभुं
 धर्मीतयगु लँयात
 रक्षा यानादी।
 तर दुष्टतयगु लँ
 नाश जुयावनी।☆

2

परमप्रभुं अभिषेक यानादीम्ह जुजु

1 जाति जातित छाया ग्वसाः
ग्वयाजुइ?

मनूतयसं छाया म्वाःमदुगु जाः
ग्वयाजुइ?

2 पृथ्वीया जुजुत व शासकत
परमप्रभुया विरोधय्

व वय्कलं अभिषेक याःम्ह☆
मनूयागु विरोधय् दं वइ,
अले शासकत जानाः
जाः ग्वयाजुइ।

3 इपिं हाला जुइ,
“इमिगु सिखः चप्फुना छव
अले न्यवः इमिगु त्वयाः
वान्छवया ब्यु।”

4 स्वर्गय् सिंहासनय् च्वंम्ह
न्हिलादी,
परमप्रभुं इमित च्यूताः तं
तइ मखु।

5 वय्कलं इमित तं ख्यानादी,
तं वय्कलं इमित
थरथर खाकादी।

6 “जिं थःम्ह जुजुयात
थःगु पवित्र पर्वत सियोनय्
पलिस्था याये धुनागु दु।”

7 जुजुं परमप्रभुं धयादीगु खँ
न्ह्यथनी,
“परमप्रभुं जितः धयादिल,

‘छ जिमि काय् खः,
थनिनिसैं जि छिमि बाः जुल।’☆

8 जिके फ्वैं जक,
फुक्क जातितय्त जिं
छंगु सर्वय यानाबी,
फुक्क पृथ्वीयात छंगु यानाबी।
9 छं नँया दण्डी इमित शासन याइ,
छं इमित चाया थलयात थें
तछ्याइ।’”☆

10 उकिं, हे जुजुपिं, बुद्धि दय्कि!
पृथ्वीया शासकत, होश या!

11 परमप्रभुया भय कयाः
वय्कःयात तःधंकि।

अले थरथर खानाः न्ह्यइपुकि।

12 वय्कःया काय्यात हनाबना ति।

मखुसा वय्कः तंम्बयादी
अले वय्कलं छिमित
नाश यानादी।
वय्कःया शरणय् वंपि धाःसा
धन्य जुइ।

3

ग्वाहालिया निंति सुथसिया प्रार्थना

दाऊदया भजन, दाऊदं थःकाय् अब्शालोमया थासं बिस्सुं वंबलय् हाःगु भजन

1 हे परमप्रभु!

जिमि शत्रुत गुलि यक्व दुगु।

जिगु विरोधय् गुलि मनुत
दनावःगु।

☆ 2:7 २:७ प्रे १३:३३; हिब १:५; ५:५

☆ 2:9 २:९ प्रका २:२३-२७; १२:५; १९:१५

2 यक्वसिनं धयाच्चन,
 “परमेश्वरं वयात गुबलें नं
 रक्षा यानादी मखु।”☆

सेला

3 तर हे परमेश्वर!
 छि जिगु जवंखवं
 ढाल जुयाच्चनादीगु दु।

छि जिगु गौरव खः,
 छिं हे जिगु छ्यं
 धस्वाका तयादीगु दु।

4 जिं तःसलं परमप्रभुया नां काये,
 अले वय्कलं जितः
 थःगु पवित्र पर्वतं
 लिसः बियादी।

सेला

5 जि ग्वारातुलाः घने
 अले हानं दने,
 छायाःसा परमप्रभुं जितः
 रक्षा यानादीगु खः।

6 जितः प्यखेरं
 हय्कायेत स्वयाच्चंपिं
 द्वलंद्रः शत्रुत खनाः नं
 जि मग्याः।

7 हे परमप्रभु, झासैं!
 हे जिमि परमेश्वर,
 जितः बचय् यानादिसैं।
 जिमि शत्रुतय्गु न्यतालय्
 दायादिसैं।
 दुष्टतय्गु वा त्वथुलादिसैं।

8 परमप्रभुं रक्षा यानादी।
छिगु सुवाः
छिकपिनि मनूतयत्
दयाचवनेमा।

सेला

4

ग्वाहालिया निति
सन्ध्याकाः ईया प्रार्थना
दाऊदया भजन, लय् तइम्हसिया लागि
तार बाजा
1 जिं सःतेबलय्
जितः लिसः बियादिसँ।
जितः दोषं मुक्त यानादीम्ह,
हे जिमि परमेश्वर,
जितः जिगु दुःखं पार
यानाबियादिसँ।
जितः दया यानादिसँ,
अले जिगु प्रार्थना न्यनादिसँ।

2 हे मनूत!

गुबलय् तक छिमिसं जिगु महिमायात
मछालापुसे च्वंकाचवनेगु?
गुबलय् तक छिमिसं म्वाःमदुगु
दोष बियाः जुयाचवनेगु?
गुबलय् तक छिपिं मखुगु खँया
ल्यूल्गु जुयाचवनेगु?

सेला

3 परमेश्वरं धर्मीतयत् थःगु हे निति
ल्ययातःगु खः धकाः
छिमिसं थुइकि।
जिं सःतेबलय् परमेश्वरं जितः

लिसः बियादी!
 4 तमय् पाप याये मते,
 लासाय् ग्वारातुलेबलय्
 नुगलय् वालास्व!✧

सेला

5 पाय्छिगु बलि छा।
 अले परमेश्वरयाके भलसा ति।

6 यक्वसिनं न्यनाच्चंगु दु –
 “झीत सुनां भिंगु लँ क्यनाबी?”
 हे परमप्रभु! छिगु ख्वाःया जः
 जिमिके थीकादिसँ।

7 इमिगु अन्न व दाखमघ
 यक्व दइबलयया लसता स्वयाः
 छिं जिगु नुगलय्
 अज्ज यक्व लसता तयादीगु दु।

8 जि याउँक ग्वारातुले, अले घने।
 छायाःसा छि हे छम्ह जक दु,
 हे परमप्रभु,
 जितः रक्षा यानादीम्ह।

5

रक्षाया निंति प्रार्थना
 दाऊदया भजन, लय् तइम्हसिया निंति –
 बाँसुरीनापं हालेगु भजन
 1 हे परमप्रभु!
 जिगु खँ न्हाय्पं बियाः
 न्यनादिसँ।
 जिगु झसुकाःयात बिचाः
 यानादिसँ।

2 जिगु नुगःया खँ न्यनादिसँ,
 हे जिमि जुजु, जिमि परमेश्वर।
 छायाःसा जिं छि हे
 छम्हसित जक
 प्रार्थना यानाच्चना।

3 हे परमप्रभु,
 सुथय् छिं जिगु सः न्यनादी।
 सुथय् सुथय् जिं छितः
 प्रार्थना याये,
 अले लिसः पियाच्चने।

4 छि मभिंगु ज्याय् लयतायादीम्ह
 परमेश्वर मखु।
 दुष्टतयगु मभिंगु ज्या यात
 छिं सह यानादी मखु

5 घमण्ड याइपि छिगु न्ह्यःने
 च्वने फइ मखु।
 मभिंगु ज्या याइपिन्त
 छिं यय्कादी मखु।

6 मखुगु खँ ल्हानाजुइपिन्त
 छिं नाश यानादी।
 मनू स्यानाजुइपि
 व झंगःलानाजुइपि
 परमप्रभुयात तसकं मयः।

7 छिगु तःधंगु दयां यानाः
 जि धाःसा छिगु छैय् दुहां वये।
 जिं छिगु पवित्र देगलय्
 पुलि चुयाः छितः भागियाये।

8 हे परमप्रभु!
 जितः भिगु लैय् यंकादिसँ।
 जिगु न्ह्यःने छिगु लँ
 तप्यंकादिसँ।

मखुसा जि शत्रुतयसं जितः

त्याकी।

9 इमिगु म्हुतुइ खःगु खँ

धयागु हे मदु।

इमिगु नुगलय् स्यंकेगु खँ

जक दु।

इमिगु कथुप्वाः

चालाच्चंगु चिहान थें खः

इमिगु में च्वछायाः जक

खँ ल्हाना जुइ।☆

10 हे परमेश्वर!

इमित दोषी ठहरय् यानादिसँ।

इमित इमिगु हे जालय्

तक्कंकादिसँ।

इमिगु यक्व अपराधया कारणं

इमित पित छ्वयादिसँ।

छाय्धाःसा इपिं छिगु विरोधय्

जूगु दु।

11 छिगु शरणय् वःपिं धाःसा

लय्तायाच्चवेनेमा।

अले न्ह्याबलें लसतां

म्ये हालाच्चवेनेमा।

छिं हे इमिगु रक्षा यानादिसँ।

अले छिगु नांयात माया याइपिं

लसतां जायाच्चवेनेमा,

12 छाय्धाःसा परमप्रभु,

छिं धर्मीतय्त् सुवाः बियादी।

छिं थःगु मायां इमित प्यखें

ढालं थें रक्षा यानादी।

6

दुःखया इलय्
 ग्वाहालिया निति प्रार्थना
 दाऊदया भजन, लय् तइम्हसिया निति –
 तार बाजानापं हालेगु

1 हे परमप्रभु!

जितः तमय् ब्वःबियादी मते।

थःगु तच्चःगु तमय् जितः

सजाय् बियादी मते।☆

2 जि तसकं न्यले धुंकूगुलि

जितः दया यानादिसँ।

जिगु क्वय् तसकं स्याये धुंकूगुलि

जितः लायकादिसँ।

3 जिगु नुगः तसकं स्यानाच्चंगु दु।

हे परमप्रभु, जिं गुबलय् तक

पियाच्चनेगु?

4 हे परमप्रभु, जिपाखे फहिलादिसँ।

अले जितः बचय् यानादिसँ।

छिगु तःधंगु दयां जितः

बचय् यानादिसँ।

5 सीधुंकाः छिगु नां सुनां काइ?

सीगालं छितः सुनां तःधंकी?

6 झसुकाः ततं जि त्यानुइ धुंकल।

चच्छिं ख्वयाः जिं थःगु लासा

प्याकाच्चना।

7 ख्वख्वं जिगु मिखा बलुइ धुंकल।

जि शत्रुतयसं यानाः

ख्व जक ख्वयाः

जिगु मिखा मनावये धुंकल।

- 8 अय् दुष्टत! जिथाय् च्वने मते।
छाय्धाःसा परमप्रभुं जिगु ख्वःसः
न्यनादी धुंकल।☆
- 9 परमप्रभुं जिगु प्रार्थना
न्यनादी धुंकल।
परमप्रभुं जिगु प्रार्थनाया लिसः
बियादी।
- 10 जि शत्रुत फुक्कसिनं
लज्या चायेमाली, अले ग्याइ।
इपि फुक्कं थत्थें मछालाः बिस्सुं वनी।

7

न्यायया निति प्रार्थना

दाऊदया भजन, बेन्यामीनी कूशया विषयलय् दाऊदं परमप्रभुया न्ह्यःने हाःगु भजन

- 1 हे परमप्रभु जिमि परमेश्वर,
जि छिगु हे शरणय् वया।
जितः लिनाजुइपि फुक्कपाखें
जितः बचय् यानादिसँ।
- 2 मखुसा सिंहं थें इमिसं जितः
चिचित्याइ।
जितः सुनानं बचय् याये मफयेक
इमिसं कुचा कुचा थली।
- 3 हे परमप्रभु परमेश्वर,
जिगु ल्हाति छुं मभिगु ज्या
जूगु दुसा,
- 4 थः पासायात जि मभि
यानागु दुसा,
छुं म्वायेक जिं थः विरोधीतयत
हयकयागु दुसा,
जिं थज्याःगु छुं यानागु दुसा

☆ 6:8 ६:८ मत्ती ७:२३; लूक १३:२७

5 जिमि शत्रुतयसं जितः लिनाः
ज्वनेमा,
इमिसं जितः बैय् न्हुतुमनु न्हुयाः
स्यायेमा।

सेला

6 हे परमप्रभु, दनाः थःगु तं
क्यनादिसँ।
जिमि शत्रुतयगु तंया विरोधय्
दनादिसँ।
हे परमेश्वर, न्ह्यलं चाय्कादिसँ,
अले न्याय यानादिसँ।
7 जाति जातित छिगु प्यखें मुनेमा,
अले च्वंनिसँ इमित शासन
यानादिसँ।
8 परमप्रभुं फुक्क जातिया मनूतय्त
न्याय यानादी।
हे परमप्रभु, जिगु
न्याय यानादिसँ,
अले जि गुलि भिंम्ह
व दोष मदुम्ह खः धकाः
क्यनादिसँ,
हे दक्वसिबय् तःधंम्ह परमेश्वर!
9 नुगः व बुद्धि दुवालादीम्ह
हे परमेश्वर,
छिं न्ह्याबलें भिंगु यानादी।
दुष्टतयगु मभिगु ज्या न्हंकादिसँ,
अले भिंगु याइपिन्त
बचय् यानादिसँ।✧
10 जिगु ढाल दक्वसिबय् तःधंम्ह
परमेश्वर खः,
गुम्हय्सिनं थःगु खँ न्यनीपिन्त

बचय् यानादी।

11 परमेश्वर ख्वाः स्वयाः
न्याय मयाइम्ह न्यायाधीश खः,

गुम्हयसिनं मभिं गु ज्या याइपिन्त
थः गु तं न्हियान्हिथं क्यनादी।

12 इमिसं थः गु मन महीकल धाः सा
वय्कलं थः गु तरवार
ज्वय्कादी।

वय्कलं थः गु धनुषय् वाण तथाः
सालादी।

13 वय्कलं थः गु ग्यानापुगु ल्वाभः
ज्वनादी।
वय्कलं थः गु मियागु वाण
ल्हनादी।

14 गुम्हयसिनं मभिं गु खँ बिचाः याइ,
अले मभिं गु ग्वसाः ग्वयाजुइ,
वं छलकपट जक याना जुइ।

15 सुनां कर्पिनिगु निंति गाः म्हुइ
व थः म्हुं म्हुगु गालय्
थः हे दुनी।

16 वं याः गु मभिं गु ज्या
वयागु हे छैनय् लाः वनी।

वं याः गु अत्याचार वयागु हे
कपालय् लाः वनी।

17 वय्कः यागु धार्मिकताया कारणं
जिं परमप्रभुयात तः धक्के।

जिं दक्व शक्ति दुम्ह परमप्रभुया
म्ये हाले।

8

परमेश्वरयागु नां संसार न्यंक तःधं
दाऊदया भजन, लय् तइम्हसिया निति –
गित्तिया कथं

1 हे परमप्रभु, जिमि प्रभु।

संसार न्यंक छिगु नां

गुलि तःधं।

छिगु महिमा आकाशय् थ्यंगु दु।

2 छिं थः विरोधीतयगु कारणं यानाः

शत्रुतयगु म्हुतुप्वाः तिकेत

मस्त व ह्याउमस्तयगु म्हुतुं

थःत तःधंकादिल।☆

3 गुबलय् जिं छिगु ल्हाःया ज्या –

आकाश, तिमिला

व नगुतयत् स्वये,

अले जिं बिचाः याये,

4 मनू छु हे खः धकाः

छिं वयात बिचाः यानाच्चवेनेत?

मनू छु हे खः धकाः

छिं वयात लुमंकाच्चवेनेत?☆

5 छिं वयात स्वर्गया दूतत स्वयाः

भचा जक क्वय् तयादिल।

नापं छिं वयात इज्जत व मान नं

बियादिल।

6 छिं वयात दयकादीगु फुक्कयागु

अधिकार नं बियादिल।☆

7 सा द्रुहं, फै-च्वलय्नापं फुक्क

जंगली पशुत नं,

☆ 8:2 ८:२ मत्ती २१:१६

☆ 8:4 ८:४ अयू ७:१७-१८; भज १४४:३; हिब २:६-८

☆ 8:6 ८:६ १ कोर

१५:२७; एफि १:२२; हिब २:८

8 आकाशय् ब्वइपिं झंगःत
 व लखय् जुइपिं न्यात,
 अज्ज ला समुद्रया फुक्क
 जन्तुत नं।

9 हे परमप्रभु, जिमि प्रभु,
 छिगु नां संसार न्यंक
 गुलि तःधं।

9

परमेश्वरया न्यायया लागिं सुभाय्
 दाऊदया भजन, लय् तइम्हय्सिगु निंति –
 “मुथ लाब्बन” लय्कथं

1 हे परमप्रभु, जिं दुनुगलंनिसें
 छिगु प्रशंसा याये।
 जिं छिं यानादीगु अजू चायापुगु
 फुक्क ज्या कनाजुये।

2 जि छिलिसे लयतायाच्चने,
 हे दक्कसिबय् तःधंम्ह परमप्रभु,
 जिं छिगु नामय् भजन हाले।

3 छिगु न्ह्यःने लायेवं
 जिमि शत्रुत लिफः स्वयाः
 बिस्युं वन,
 अले लुफि हानाः नाश जुयाः वन।

4 छिं थःगु सिंहासनं
 पक्षपात मजुइक न्याय यानाः
 जितः त्याकादीगु दु।

5 जातितय्त छिं ख्याच्चः
 बियादीगु दु।

अले मभिंपिन्त
 नाश यानादीगु दु।

- छिं इमिगु नां सदांया निति
हुयाछ्वयादीगु दु।
- 6 जिमि शत्रुत सदांया निति
नाश जुइ धुंकल।
छिं इमिगु शहर नं
नाश यानादी धुंकल।
आः इमिगु नां तक हे
मल्यने धुंकल।
- 7 परमप्रभुं सदांया लागि
राज्य यानादी।
वय्कलं न्याय यानादीत
थःगु सिंहासन
तयार यानादीगु दु।
- 8 वय्कलं ख्वाः स्वयाः न्याय
यानादी मखु।
वय्कलं पक्षपात मज्जुक
मनूतय्त शासन यानादी।
- 9 क्वत्यय्का च्वनेमाःपिनिगु निति
परमप्रभु शरण कायेगु थाय् खः,
दुःखकष्टया इलय् नं
शरण कायेगु थाय्।
- 10 छिगु नां स्यूपि सकसिनं
छिगु हे भलसा काइ,
छाय्धाःसा, हे परमप्रभु,
छितः मालाजुइपिन्त
छिं त्वःतादी मखु।
- 11 सियोनय् च्वनादीम्ह परमप्रभुयात
भजन हालाः तःधकि।
वय्कलं यानादीगु ज्या
फुक्क जातियापिन्त न्यंकि।
- 12 परमेश्वरं दुःख सियाच्चंपिन्त

लुमंकादी,
छाय्धाःसा हिया ब्वला
साइम्हय्सिनं
इमिगु ख्वःसः ल्वःमंकादी मखु।
वय्कलं इमित मभिकूपिन्त
सजौय बियादी।

13 हे परमप्रभु, जितः दया यानादिसँ।
स्वयादिसँ, जिमि शनृतय्सं जितः
गज्याःगु दुःख बियाच्चन।

छिं जितः कालया म्हुतुं
बचय् यानादिसँ।

14 अले जिं सियोनया
ध्वाखाय् च्वनाः

छिगु प्रशंसाया

खँ ल्हाये फइ।

छिं जितः बचय् यानादीगुलि
जि लय्तायाच्चने।

15 जाति जातित थःम्हं म्हगु गालय्
थः हे लानाच्चंगु दु।

इपिं थःपिन्सं ग्वयातःगु जालय्
थः हे तक्यनाच्चंगु दु।

16 परमप्रभुयात वय्कःया न्यायया
हुनिं म्हसीकी।

दुष्टत धाःसा थःगु हे जालय्
तक्यनाच्चनी।

17 दुष्टत फुक्कं पातालय्
कुतुं वनी,

परमेश्वरयात ल्वःमंकूपिं
फुक्क जातित नं।

18 चीमिपिन्त धाःसा

हिग्गायेन सेला

न्ह्याबलें ल्वःमंकी मखु,
मगाःमचाःपिनिगु आशा
न्ह्याबलें तनावनी मखु।

19 हे परमप्रभु, झासैं।
मनूत मत्यायेमा।

जात जातिया न्याय
छिगु न्ह्यःने जुइमा।

20 हे परमप्रभु, इमित ख्यानादिसैं!
जाति जातियापिन्त
थःपिं सीमानिपिं खुः धकाः
सीकेबियादिसैं।

सेला

10

क्वत्यलातःपिनिगु न्यायया निति

प्रार्थना

दाऊदया भजन

1 हे परमप्रभु,

छि छाय् तापाक

चवनादियागु?

जिमिगु दुःखया इलय्

छि छाय् फहिलादियागु?

2 दुष्ट व घमण्ड याइपिं मनूतय्सं

चीमिपिन्त लितुलिनाजुइ

इपिं थः हे थःपिन्सं

ग्वःगु जालय् तक्वनेमा।

3 दुष्टतय्सं थःपिनिगु मभिंगु

इच्छाय् हे

थःपिन्त तःधं ताय्काजुइ।

- इमिसं लोभीतयत् तःधंकाः
 खँ ल्हाइ,
 अले परमप्रभुयात क्वह्यंकी।
- 4 दुष्टतयस् तःधंछ जुयाः
 परमप्रभुयात माली मखु।
 इमिगु बिचालय्
 परमेश्वर धयाम्ह द हे मदु।
- 5 दुष्ट मनूत थःपिनिगु ज्याखँय्
 न्ह्याबले ताःलाःसां,
 इमिसं छिगु न्यायया खँ
 थुइके फइ मखु।
 इमिसं थः शत्रुतयत्
 हिस्यानाजुइ।
- 6 इमिसं मतिइ तइ, “जिमित
 छुकिं नं थी फइ मखु।
 जिमित गुबले नं
 दुःख जुइ मखु।”
- 7 इमिगु म्हतु सराः, मखुगु खँ
 व ख्याच्चलं जक जायाच्चनी।
 इमिगु मेच्चकाय् स्यंकेगु
 व दुष्ट खँ जक दयाच्चनी।☆
- 8 इमिसं गांया पिने पिने सुलाः
 लँय् वःपि सोझापि मनूतयत्
 स्यानाजुइ।
 इमिसं सुलाः सुलाः
 थुमिगु चिवा कयाजुइ।
- 9 सिंह थें इपि दुःखय् लाःपिन्त
 हयकायेत सुलाच्चनी।
 अले इमिसं दुःखय् लाःपिन्त
 थःगु जालय् लाकाः
 लुतुलुयायनी।

10 इमिसं थुमित क्वथली,
अले इमिगु बलं थुमित बुकी।

11 इमिसं मतिइ तइ,
“परमेश्वरं थुक्रिया च्यूता:
तइ मखु।

वयक्कलं थःगु ख्वा:
फहिकादीगु दु,
अले छुनं खनी मखु।”

12 हे परमप्रभु!
हे परमेश्वर, ल्हाः ल्हनादिसँ,
दुःखय् लानाच्च्वंपिन्त
ल्वःमंकादी मते।

13 दुष्टतयसं छाय् परमेश्वरयात
क्वह्वांकीगु?
इमिसं छाय् “परमेश्वरं जिमित
सजॉय बी मखु” धका:
मतिइ तइगु?

14 अयनं परमेश्वर,
छिं दुःखय् लाःपिन्त स्वयादी,
अले ग्वाहालि यानादी।
दुःखय् लानाच्च्वंपिन्सं थःपिन्त
छिगु ल्हातिइ हे त्वःताबी।
छिं मांबौ मदुपिन्त न्हाबलें
ग्वाहालि यानादी।

15 दुष्ट व मभिंगु ज्या याइपिनिगु ल्हाः
त्वथुलादिसँ।
इमिगु मभिंगु ज्या न्हा मवंतले
इमित उक्रियागु सजॉय
बियादिसँ।

16 परमप्रभु सदांयाम्ह जुजु खः।

- मेपि घःत पुज्याइपिं मनूत
 वय्कःया देशं तनावनी।
 17 छिं दुःखय् लानाच्चंपिनिगु सः
 न्हाय्पं बियाः न्यनादी।
 छिं इमिगु नुगःयात बल्लाकादी।
 18 छिं मांबौ मदपिं
 व क्वत्त्यय्काच्चंपिनिगु
 रक्षा यानादी।
 अले पृथ्वीइ सुनानं सुयातं हानं
 ख्याये फइ मखु।

11

- परमेश्वरयागु भलसा
 दाऊदया भजन
 1 जि परमप्रभुया शरणय् वने,
 उकि छिमिसं जितः
 गथे धाये फइ,
 “झंगः थें ब्वयाः गुँच्चकाय् हूँ!”
 2 स्व, दुष्टतय्सं सुलाः
 भिं मनूतयत्त कय्केत
 थःपिनिगु धनुषय् वाण तयाः
 साले धुंकल।
 3 सारा संसार हे नाश जुइगु खःसा,
 भिं मनूतय्सं
 छु याये फइ धकाः?
 4 परमप्रभु थःगु पवित्र देगलय् दी,
 परमप्रभु स्वर्गया थःगु
 सिंहासनय् च्वनादीगु दु,
 वय्कलं मनूतय्सं याःगु ज्या
 फुक्कं स्यु

छाय्धाःसा वय्कलं
फुक्कं स्वयाच्चनादीगु दु।

5 परमप्रभुं भिपिं व मभिपिं
सकसितं जाँचय् यानादी।
वय्कलं मभिपिं व मनू
स्यानाजुइपिन्त
ययकादी मखु।

6 वय्कलं दुष्टतय्थाय्
मि व गन्धक गाय्कादी।
तच्चक्कं क्वाःगु फय् छवयाः
इमित सजाँय बियादी।

7 परमेश्वर धर्मी खः,
उकिं वय्कलं
भिगु ज्या ययकादी।
भिगु ज्या याइपिन्सं
वय्कःयात खंके फइ।

12

ग्वाहालिया निति प्रार्थना

दाऊदया भजन, लय् तइम्हसिया निति –
“शिमिनिथ” लय्कथं

1 हे परमप्रभु!
जिमित ग्वाहालि यानादिसँ।
भिपिं मनूत छम्ह हे मदये धुंकल।
विश्वास यायेबहःपिं सुं हे मन्त।

2 सकसिनं थःथवय्
मखुगु खँ ल्हानाजुइगु,
म्हुतु जक पिचुकाः
थवंथवय् झंगः लानाजुइगु।

3 परमप्रभु, पिचुगु मे फुक्क

धयनाबियादिसँ,
अले तःधंछया जुइगु म्हुतुप्वाः
तिनाबियादिसँ।

4 इमिसं धयाजुइ,
“जिमिसं थःगु खं
थःत माःगु पूवंके।
जिमि थः मंदु थें धयाजुये।
जिमित सुनानं पने फइ मखु।”

5 परमप्रभुं धयादी,
“आः जि वये।
छाय्धाःसा चीमिपिन्सं
क्वत्यय्काः च्वनेमाःगु दु,
दुःखय् लानाच्च्वंपिन्सं झसुकाः
तयाच्च्वंगु दु।
जिं इपि फुक्कसित इमित
दुःख बियाच्च्वंपिनिपाखें
बचय् याये।”

6 परमप्रभुया वचन न्हयकः तक
मिइ छुयातःगु वहः थें शुद्ध जू।

7 हे परमप्रभु,
छिं जिमित रक्षा यानादी।
जिमित न्ह्याबलें
थज्याःपिं मनूतपाखें
बचय् यानाः तयादी।

8 मनूतयगु दथुइ मभिसूयात
इज्जत दइबलय्
दुष्टत न्याकुं कयाः
लैय् न्यासि जुइ।

13

ग्वाहालिया निति प्रार्थना

दाऊदया भजन

1 हे परमप्रभु!

छिं जितः गुबलय् तक

ल्वःमंकाच्चनादी?

सदां ल्वःमंकाच्चनेगु ला?

छि गुबलय् तक

जिपाखें फस्वयाच्चनादी?

2 गुबलय् तक जिं दुःखकष्ट

सह यानाच्चनेगु?

गुबलय् तक जिं चान्हि

नुगः मछिकाच्चनेगु?

गुबलय् तक जिमि शत्रुतयसं

जितः बुकातइगु?

3 जितः स्वयादिसँ,

हे परमप्रभु जिमि परमेश्वर,

अले लिसः बियादिसँ।

जिगु मिखायात जः बियादिसँ,

मखुसा जि सी।

4 जिमि शत्रुतयत थथे धकाः

जितः लायबुइके बियादी मते,

“जिमिसं वयात बुकेधुन।”

जि बूगुलिइ इमित लय्तायके

बियादी मते।

5 जितः छिगु सदां दइगु

दया मायाय् विश्वास दु,

अले जि छिं

बचय् यानादीगुलिइ

लय्तायाच्चने।

6 जिं परमप्रभुया भजन हाले
छाय्धाःसा परमप्रभुं
जितः स्वयादीगु दु।

14

परमेश्वर मदु ला?

दाऊदया भजन

1 मूर्खतयसं नुगलय्

“परमेश्वर द हे मदु”

धकाः धाइ।

इमिगु मति मभिंगु दु।

इमिसं घच्चाइपुगु ज्या जक

यानाच्चवंगु दु।

भिंगु ज्या याइपिं सुं हे मदु।

2 भिंपिं सुं दु ला,

अले परमेश्वरयात मालाजुइपिं

सुं दु ला धकाः

परमेश्वरं स्वर्ग क्वय्

मनूतयथाय स्वयादी।

3 इपिं मखुगु लैय् वने धुंकल।

इपिं स्यनावने धुंकल।

भिंगु याइपिं छम्ह हे

मदये धुंकल।☆

4 थुपिं मभिंगु यानाजुइपिन्सं

गुबलें हे सय्की मखु ला?

इमिसं जिमि मनूतयत्

मरि नये थें नयाच्चन।

अले परमप्रभुया नां हे काइ मखु।

- 5 इमिके भय दयाच्चनी
छाय्धाःसा परमेश्वर थःत
मानय् याइपिलिसे जक दी।
- 6 दुष्टतयसं मगाःमचाःपिनिगु
ग्वसाः स्यंकाबी
तर परमप्रभु इमित
शरण बीम्ह खः।
- 7 इस्राएलया मनूतयगु उद्धार
सियोन पर्वतं वःगु जूसा
गुलि बांलाइ!
गुबलय् परमप्रभुं
थःमनूतयगु दुःख मदय्कादी,
उबलय् इस्राएलया मनूत
लय्तायाः हाली।☆

15

- परमप्रभुयात
सुनां तःधंके फइ?
दाऊदया भजन
- 1 हे परमप्रभु!
छिगु पवित्र थासय्
सु दुहां वने फइ?
छिगु पवित्र पर्वतय् वयाः
सुनां छितः तःधंके फइ?
- 2 व मनूखं फइ,
गुम्ह दोष मदय्क म्वानाच्चनी,
अले न्ह्याबलें भिंगु जक याइ,
अले गुम्हय्सिनं दुनुगलंनिसें
खःगु खँ ल्हाइ,

- 3 गुम्ह मेपिन्त मभिकाः जुइ मखु,
 थः जःलाखःलायात नुगलय्
 स्याकाः जुइ मखु
 थः पासापिन्त
 मखुगु खँ ल्हाना जुइ मखु,
- 4 गुम्हय्सिनं मभिपिं मनूतय्त
 इज्जत याइ मखु,
 परमप्रभुया ग्याःभय
 काइपिन्त धाःसा
 हनाबना तइ,
 थःत न्ह्याक्व हे थाकुसां
 थःगु बचं पूवंकी।
- 5 गुम्हय्सिनं ब्याज मकासे
 त्यासाबी।
 अले सुनां घुस कयाः
 दोष मदुपिं मनूतयगु
 विरोधय् बयान बी मखु।
 थज्याःपिं मनूत गुबलें नं
 लिचिले माली मखु।

16

- जीवनया लँपु
 दाऊदया भजन
- 1 जितः रक्षा यानादिसँ,
 परमेश्वर,
 जि छिगु शरणय् वयागु दु।
- 2 जिं परमप्रभुयात धयागु दु –
 “छि जिमि प्रभु खः।
 जिके दुगु फुक्कं भिंगु खँ
 छिगुपाखें हे वःगु खः।”
- 3 देशय् दुपिं पवित्र मनूत फुक्कं

तःधके बहःपि जु,
 इपिलिसे च्वनेदयाः
 जि लयताः।
 4 मेपि घःतयगु ल्यूल्यू ब्वाँय्
 जुइपि मनूतय्सं
 थःगु दुःख थःम्हं
 अप्वय्काजुइ।
 जिं इमिगु बां बीगु ज्याय्
 ब्वति काये मखु
 अले जिं थःगु म्हुतुं
 इमिगु नां हे काये मखु।

5 परमप्रभु, छि हे जिगु सर्बय खः,
 जितः माःगु फुक्कं
 छिं बियादीगु दु।
 छिं जिगु भाग्य
 सुरक्षित तयादीगु दु।

6 जितः बियादीगु थाय्
 गुलि न्ह्याइपुसे च्वं
 गपाय्स्कं तःजिगु सर्बय!

7 जितः लँ क्यनादीगुलि
 जिं परमप्रभुयात तःधके,
 चान्हय् नं जिगु नुगलं
 जितः न्वानाच्चवनी।

8 जिं स्यु, परमप्रभु
 जिलिसें न्ह्याबलें दु।
 जितः छुकिं नं संके फइ मखु,
 छायाःसा परमप्रभु
 जिलिसें दु।

9 उकिं जिगु नुगः लयताः,

अले चंचं धाः।
 जिं थःत प्यखें
 सुरक्षित तायका,
 10 छायाधाःसा छिं
 जिगु आत्मायात
 सीपिनिगु दथुइ
 त्वःतादी मखु।
 अले छितः विश्वास
 याःम्हयसित
 छिं सीगालय्*
 ध्वगिकेबी मखु।☆
 11 छिं जितः जीवनया
 लेंपु क्यनादी
 छिनापं च्वनाः जितः
 लयतायकेबी।
 अले थ्व लसता जितः
 सदां सदां बियादी।☆

17

न्यायया नितिं इनाप
 दाऊदया भजन
 1 हे परमप्रभु!
 न्यायया नितिं यानागु
 जिगु इनापयात न्यनादिसँ।
 जिगु प्रार्थनायात
 ध्यान बियादिसँ।
 जिं भिं नुगलं यानागु
 प्रार्थनायात न्यनादिसँ!
 2 जितः दोष मदुम्ह धकाः
 क्यनाबियादिसँ,

* 16:10 १६:१० हिब्रू भाषां “सिओल”

☆ 16:10 १६:१० प्रे १३:३५

☆ 16:11 १६:८-११ प्रे

छाय्धाःसा छिं जक
खःगु खँ स्यू।

3 छिं चान्हय् जिगु बिचाःयात
वालाः स्वयादीगु दु।

अले जिगु नुगःयात
दुवालादीगु दु।

छिं जितः बांलाक जाँचय्
यानादीगु दु।
अले जिगु छुं दोष मदु धकाः
सीकादीगु दु।

जिगु म्हुतुं मखुगु व मभिंगु खँ
पिहां वइ मखु धकाः
जितः विश्वास दु।

4 जिं छिगु आज्ञा न्यनागु दु।
थुकिं जितः स्याये पाले
यानाजुइपिं मनूतपाखें
तापाकाब्यूगु दु।

5 जिगु पलाः छिगु लँय हे दु।
अले गुबलें लिचिलागु मदु।

6 हे परमेश्वर!
जिं छितः प्रार्थना याये
छाय्धाःसा छिं जितः
लिसः बियादी।

जिपाखे स्वयादिसँ
अले जिगु प्रार्थना न्यनादिसँ।

7 थःगु अजू चायापुगु माया
क्यनादिसँ,
अले जिमित बचय् यानादिसँ।
छिनापं च्वनेबलय् जिमित

जिमि शत्रुतयसं
छुं याये फइ मखु।

8 मिखाया नानिचायात थे
जिमित बचय् याना: तयादिसँ।

छिगु पपूया किचलय्
जिमित सुचुका: तयादिसँ।

9 दुष्ट मनूतयपाखें
व जिगु प्यखें च्वंपि ग्यानापुपि
शत्रुतयपाखें जित:
बचय् यानादिसँ।

10 इमिके दया धयागु
भ्या:भचा हे मदु
अले त:धंछया: खँ ल्हाना जुइ।

11 इमिसं पला: पतिकं जिमित
घेरय् या:गु दु।
इमिसं जिमित बैय् बस्वायेत सुला:
पियाच्वंगु दु।

12 इपि नयेपित्याना:
शिकार पियाच्वंपि
सिंह थे जूगु दु।
छम्ह ल्याय्म्हम्ह सिंह थे
इपि शिकार यायेत
सुलाच्वंगु दु।

13 हे परमप्रभु! झासँ,
जिमि शत्रुतयगु विरोधय्
छुं यानादिसँ
अले इमित बुकादिसँ।
दुष्टतपाखें जित: छिगु तरवारं
बचय् यानादिसँ।

14 जीवनय् थ:त य:गु फुक्क खँ

धायेफु धकाः
 जुइपि मनूतपाखें जितः
 बचय् यानादिसँ।
 इमिगु लागिं छिं मुंकातयादीगु
 दुःखं इमित सजॉय बियादिसँ।
 अज्याःगु सजॉय इमि
 सन्तान तकयात यक्व दयेमा,
 अले इमि छय्-छुइपिनिगु लागिं नं
 छुं ल्यनेमा।
 15 जिं धाःसा छुं मभिगु मयानागुलि
 छिगु ख्वाः खनी।
 जि दनावयेबलय् छितः स्वयेदयाः
 तसकं लय्ताये।

18

छुत्काराया भजन

दाऊदया भजन, लय् तइम्हय्सिया निति –
 शत्रुत व शाऊलया ल्हाति छुत्कारा जूगुलि
 1 हे परमप्रभु!

जिं छितः गुलि यय्का।
 छि जिगु बल खः।

2 परमप्रभु जिगु निति
 ल्वहंधी थें खः,
 परमप्रभु जिगु किल्ला खः,
 जितः उद्धार याइम्ह खः।
 जिमि परमेश्वर जिगु निति
 ल्वहंधी थें खः,
 गुकि जितः रक्षा याइ।
 वय्कः जिगु ढाल खः,
 जितः बचय् याइगु शक्ति खः,

शरण कायेगु थाय् खः।

3 जिं परमप्रभुयात प्रार्थना याये।

वय्कलं जितः जिमि

शत्रुतयपाखें बचय् यानादी।

वय्कःया प्रशंसा याये।

4 कालया खिपतं

जितः स्वतुमतु स्वय्कल।

दुःखया खुसिबालं

जितः चुइके यंकल।

5 नरकया खिपतं

जितः प्यखें हीन।

कालया म्हुतुं

जितः पियाच्चन।

6 दुःख जूबलय्

जिं परमप्रभुयात लुमंका,

जिं ग्वाहालिया लागि

परमेश्वरयात प्रार्थना याना।

जिगु प्रार्थना वय्कःया

देगलय् थ्यन

वय्कलं न्हाय्पं बियाः

जिगु सः न्यनादिल।

7 परमेश्वर तम्बयादिल,

अले उबलय् भ्वखाय् ब्वल,

पृथ्वी खात,

पहाडया जग हे वारावारा सन।

8 वय्कःया न्हाय्प्वालं

कुँत्याः पिहां वल।

वय्कःया म्हुतुप्वालं

भस्म याइगु मित्याः

व च्यानाच्चंगु कोइला

पिहां वल।

9 वय्कः आकाश ह्खनाः

- कुहां झाल।
 वय्कःया पालि तःलय्
 हाकुगु सुपौय् दु।
- 10 वय्कः कस्बया म्हय् च्वनाः
 ब्वयाः झाल।
 वय्कः फय्या पपुतिइ च्वनाः
 ब्वयाः झाल।
- 11 वय्कलं थःत खिउँनं
 त्वपुयातःगु दु।
 अले हाकुगु सुपौचं
 थःत भुनातःगु दु।
- 12 वय्कःया न्ह्यःने
 हाकुगु सुपौय् तज्यानाः
 हावलासा त्वल,
 अले प्वेवा व मिवा गात।
- 13 अले स्वर्ग परमप्रभु
 हालाहयादिल,
 दक्वसिबय् तःधंम्हय्सिगु सः
 ताये दत।
- 14 वय्कलं थःगु वाण त्वःताः
 थः शत्रुतय्त उखेंथुखें
 यानादिल।
 वय्कलं मलखं कय्काः
 इमित बुकादिल।
- 15 हे परमप्रभु!
 छिं तमं ब्वःबियादीगुलिं
 अले छिगु न्हाय्प्वालं
 पिहां वःगु मित्यालं
 समुद्रया बें व पृथ्वीया जग
 खनेदत।
- 16 वय्कलं स्वर्ग कुहां वयाः
 जितः ज्वनादिल।

वय्कलं जितः तःजाःगु समुद्रं
थकयादिल।

17 वय्कलं जितः जिमि
बल्लाःपि शत्रुतयपाखें
बचय् यानादिल,
अले जितः महीपि जि स्वयाः
बल्लाःपि फुक्कपाखें नं
बचय् यानादिल।

18 जितः थाकुगु इलय्
इमिसं जितः
हयक्काः वल,
अयनं परमप्रभुं जितः बचय्
यानादिल।

19 वय्कलं जितः सुरक्षित
थासय् यंकादिल,
छाय्धाःसा वय्कः जिलिसें
लय्तायादीगु दु।

20 जिं भिगु यानाजुयागुलि
परमप्रभुं नं जितः भिगु
यानादिल।

अले जि दोष मदुम्ह जूगुलि
वय्कलं जितः आशिष
बियादिल,

21 छाय्धाःसा जि परमप्रभुया
लैय् जुयाच्चवनागु दु।

अले जि जिम्ह परमेश्वरपाखें
गुबलें नं फहिलामवना।

22 जिं न्ह्याबलें वय्कःया
व्यवस्था मानय् यानागु दु,
वय्कःया उजंयात
न्ह्याबलें न्यनागु दु।

- 23 जि दोष मदुम्ह धकाः
वयक्लं स्यू
अले पापं चिलाच्चनागु दु।
- 24 जि दोष मदुम्ह धकाः स्यूगुलि
व जिं भिगु यानाजुयागुलि
परमप्रभुं नं जितः भिगु यानादिल।
- 25 हे परमप्रभु! भलसा दुपिलिसे
छि थः नं भलसा दुम्ह हे जुयादी।
अले इमान्दारपिलिसे
इमान्दार हे जुयादी।
- 26 शुद्ध नुगः दुपि मनूतयत्
छिं दया माया क्यनादी,
अले परमेश्वरया आज्ञा मानय्
मयाइपिनि
छि विरोधी जुयादी।
- 27 क्वमिलुपिन्ति छिं
बचय् यानादी,
तःधंछुया जुइपिन्ति धाःसा
क्वह्याकादी।
- 28 हे परमप्रभु परमेश्वर!
छिं जिगु निंतिं मत च्याकादी
छिं खिउं मदयकाः
जितः जः क्यनादी।
- 29 हे परमप्रभु! छिगु ग्वाहालि
जिं शत्रुतयग् पुचलय् नं
हय्काये फु
अले परमेश्वरया ग्वाहालि
जिं न्ह्याथे ज्याःगु पःखाः नं
गये फु।
- 30 परमेश्वरया लँपु

सिद्धिगु लैपु खः।
 वयकःया वचन सत्य खः।
 वयकःया शरण्य वंपिनिगु निति
 वयकः ढाल खः।

31 परमप्रभु बाहेक
 मेम्ह सु परमेश्वर दु?

झी परमेश्वर बाहेक
 मेम्ह सु ल्वहंधी दु?

32 व हे परमेश्वर,
 सुनां जितः बल्लाकल,
 अले सुनां जिगु लैपुयात
 तप्यंकाबिल।

33 वयकलं जिगु तुतियात
 चल्लायागु तुति थें यानादी।
 अले जि ततःजाःथाय् नं
 तुति चुयाच्चवे फइ।☆

34 वयकलं जिगु ल्हाःयात
 ल्वायेगु कलाः स्यनादी
 वयकलं जिगु लपुयात
 कैय्यागु धनु साले फय्केत
 बल्लाकादी।

35 हे परमप्रभु!
 छिं जितः थःगु ढाल बियाः
 बचय् यानादीगु दु।
 छिगु जव ल्हाति जितः
 तिबः बियाच्चंगु दु।
 छिगु ग्वाहालिं
 जितः तःधंकादीगु दु।

36 छिं जिगु तुतिया निति
 गाक्क थाय् बियादीगु दु।

अले जि गुबलें नं क्वःदःगु मदु।

37 जिं थः शन्नृतयत्

लित्तुलिनाः ज्वने

अले इपि फुक्कसित

नाश मयातले

जि लिहां वये मखु।

38 जिं इमित दने हे मफयेक

क्वथले

इपि जिगु तुतिइ क्वदली।

39 छिं जितः ल्वायेत बल

बियादीगु दु।

अले जिमि शन्नृतयत् जिगु तुतिइ

तयादीगु दु।

40 छिं जिमि शन्नृतयत्

जिगु न्ह्यःनें ख्यानाछवत।

जितः महीपिन्त जिं नाश याना।

41 इपि ग्वाहालिया निति हाल,

अयनं इमित सुनानं

बचय् याः मवः।

इमिसं परमप्रभुयात सःतल,

अयनं वयकलं

लिसः बियामदी।

42 जिं इमित धू जुइक दाया।

मनूतयसं लैय् ध्याचःयात

न्हुतुन्हुगु थें

जिं इमित न्हुतुन्हुया।

43 छिं जितः विद्रोहीतय्पाखें

बचय् यानादिल,

जाति जातितय् जुजु यानादिल।

जिं म्हमस्यूपि मनूत नं

आः जिगु अधीनय् जुल।

- 44 मेगु जातियापिं मनूत नं
जिगु न्ह्यःने क्वछुइ
अले जिं धाःथे च्वनी।
- 45 थःगु साहस तंकाः
इपिं थःपिनिगु किल्लां ग्याग्यां
पिहां वल।
- 46 जिगु किल्ला परमप्रभुया
प्रशंसा या,
वय्कः म्वानाच्चंम्ह
परमप्रभु खः।
जितः बचय् यानादीम्ह
परमेश्वरयात तःधंकि।
- 47 वय्कलं जितः
जिमि शत्रुतलिसे
बदला कयादी।
वय्कलं जाति-जातियात
जिगु अधीनय् तयादी।
- 48 अले जितः जिमि
शत्रुतय्पाखें त्वःतकादिल।
जितः जिमि शत्रुत स्वयाः
तःधंकादिल।
जितः मनू स्याना जुइपिनिपाखें
बचय् यानादिल।
- 49 उकिं जिं जात जातियापिनि
दथुइ छिगु प्रशंसा याये।
छिगु नामय् भजन हाले।☆
- 50 छिं थःम्हं ल्यःम्ह जुजुयात
ततःधंगु ल्वापु त्याके
बियादिल।
छिं थःम्हं अभिषेक
यानादीम्हयसित

न्द्वाबले माया यानादी –
दाऊदयात व वया सन्तानतयत्।☆

19

परमेश्वरया महिमा
सृष्टिं नं क्यं
दाऊदया भजन
1 आकाशं गुलि बांलाक
परमेश्वरया महिमा
कनाच्च्वंगु दु!
गुलि अःपुक आकाशं
वयकःया ल्हाःया कलाः
क्यनाच्च्वंगु दु।
2 न्हियान्हिथं थ्व खँ थौया न्हि
कन्हय्या न्हियात
न्ह्यथनाच्च्वनि,
अले थौया चां
कन्हय्या चायात
ध्वाथुइकाच्च्वनि।
3 गनं छसः मदुसां
गनं छग्वः आखःग्वः मदुसां
4 इमिगु सुचं संसार न्यंक
न्यनाच्च्वंगु दु,
अले संसारया कुंकुलामय् थ्यंक
ताये दयाच्च्वंगु दु।
परमेश्वरं सूर्यया लागि आकाशय्
च्चनेत थाय् दय्कादीगु दु।☆
5 सुथ न्हापां नकतिनि
ब्याहा याःम्ह मिजं थें

व लयतातां पिहां वइ,
 कासाय् त्याकेत लयतायाः
 ब्वाँय् वःम्ह कासामि थें
 व पिहां वइ।

6 व आकाशया छगू कुनं
 पिहां वयाः
 मेगु कुनय् तक थ्यनी,
 वयागु क्वाःजलं छुं नं
 सुलाच्चनेफइ मखु।

7 परमप्रभुया स्यनातःगु खँ
 पक्का खः,
 थुकिं झीत न्हगु बल बी।
 वय्कःयागु नियम
 विश्वास यायेबहः जू,
 थुकिं छुं मस्यूपिन्त ज्ञां बी।

8 परमप्रभुया उपदेश खःगु खः,
 थुकिं नुगःयात लयताय्की।
 परमप्रभुया स्यनातःगु खँ
 पाय्छिगु खः,
 थुकिं मिखायात जः बी।

9 परमप्रभुया भय कायेगु बांलाः
 थ्व न्ह्याबलें दयाच्चनी।
 परमप्रभुया न्याय सत्यं जाः।
 थ्व न्ह्याबलें उतिग्यं।

10 थुपिं लुँ स्वयाः
 अप्वः यइपुसे च्वं
 भिंगु लुँ स्वयाः अप्वः,
 अले कस्ति स्वयाः
 अप्वः चाकुसे च्वं,
 हाप्बलं पिहां वःगु कस्ति स्वयाः
 अप्वः चाकुसे च्वं।

11 हे परमप्रभु!
 थुकिं जि छिकपिनि दासयात
 ज्ञां बी।
 थुकियात मानय् यानाः
 जितः तःधंगु सिरपाः दत।

12 वाःमचायेक जूगु पापयात
 सुनां खनी?
 हे परमप्रभु!
 थथे वाःमचायेक जूगु पापपाखें
 जितः क्षमा यानादिसैं!

13 चायेक चायेकं जुइगु
 पापपाखें नं जि दासयात
 तापाक तयादिसैं।
 थुमित जितः त्याके बियादी मते
 अले जि छुं दोष मदुम्ह जुइ।
 अले जि तःधंगु पापं मुक्त जुइ।

14 हे परमप्रभु!
 जितः बचय् यानादीम्ह,
 जितः शरण बीम्ह!
 जिगु म्हुतुं पिहांवइगु खँग्वः
 व जिगु नुगःया प्रार्थना
 छितः ययेमा!

20

जुजु लडाईलय् वने न्ह्यःया प्रार्थना
 दाऊदया भजन
¹ दुःखया इलय् छन्त
 परमप्रभुं लिसः
 बियादीमा।
 याकूबया परमेश्वरं छन्त

बचय् यायेमा।

2 वय्कलं थःगु पवित्र थासं
छन्त ग्वाहालि
छवयाहयादीमा।

अले सियोनयागु पर्वतं
छन्त तिबः बियादीमा।

3 वय्कलं छं छाःगु
फुक्क अन्नबलियात
लुमंकादीमा।

वय्कः छंगु होमबलि
लयतायादीमा।

सेला

4 वय्कलं छं मनंतुंगु फुक्कं
पूवंकादीमा।

अले छंगु ग्वसाः फुक्कं
ताःलाकादीमा।

5 छि त्याःगुलि
जिमिसं ततःसलं लयतायाः
भजन हाले

अले झी परमेश्वरया नामय्
ध्वाँय् ब्वय्के।

परमेश्वरं छंगु फुक्क प्रार्थना
न्यनादीमा।

6 आः जिं सिल,
परमप्रभुं थःम्हं
अभिषेक यानादीम्ह जुजुयात
ग्वाहालि यानादी।

वय्कलं पवित्र स्वर्ग वयात
लिसः बियादी।

अले थःगु शक्ति वयात
बचय् यानादी।

- 7 गुलि मनूत थःगु रथया
 भलसाय् च्वनी,
 गुलि मनूत थःगु सलया
 भलसाय् च्वनी,
 झी धाःसा परमप्रभु
 झी परमेश्वरया
 भलसाय् च्वने।
- 8 इपिं लुफि हानाः क्वदली
 तर झी बल्लानाः
 धस्वानाच्वनी।
- 9 हे परमप्रभु,
 जिमि जुजुयात त्याकेबियादिसँ,
 अले जिमिगु प्रार्थना न्यनाः
 लिसः बियादिसँ।

21

- जुजु लडाइँन लिहां वये धुंकाः
 ब्यूगु सुभाय्
 दाऊदया भजन
- 1 हे परमप्रभु,
 छिं बल बियादीगुलि
 जुजु लयताःगु दु।
 वयात त्याकेबियादीगुलि
 तसकं लयताःगु दु।
- 2 वं मनंतुंगु फुक्कं छिं
 पूर्वकादीगु दु।
 वं फ्वंगु छुं नं
 छिं मब्यू धयागु मदु।
- 3 छिं तःधंगु आशिष बियाः
 वयात लसकुस यानादिल।

छिं वयागु छेनय्
 भिंगु लूँयागु श्रीपेच
 पुइकादिल।

4 वं छिके जीवन फ्वन,
 अले छिं वयात
 जीवन बियादिल,

छिं वयात ताःहकःगु आयु
 व गुबलेँ मफुइगु जीवन
 बियादिल।

5 छिगु विजय इमिगु निंति
 तःधंगु इज्जत जूगु दु।

छिं इमित नां
 व इज्जत बियादीगु दु।

6 छिगु आशिष वयाके
 सदां दयाच्चनी,
 अले छिनापं च्वनेदयाः
 व तसकं लयताःगु दु।

7 जुजुं परमप्रभुयाके
 भलसा तःगुलि
 अले दक्वसिबय् तःधम्हसिया
 सदां दइगु दया मायां यानाः
 व गुबलेँ लिचिले माली मखु।

8 जुजुं थःगु शक्तिं
 शत्रुत फुक्कसित
 मातुमालाः ज्वनी।

जुजुं थःत महीपि फुक्कसित
 जव ल्हातं ज्वनी।

9 जुजुं थः खनेदय्कः वइबलय्
 मिप्वालं कय्काः
 इमित नाश याइ।

परमप्रभुं तमय् इमित मिं
 भस्म यानादी।

- 10 इमि मचाखाचा
सुं नं ल्यनी मखु,
जुजुं इपि फुक्कसित
सिधयकी।
- 11 इमिसं जुजुया विरोधय्
जा: ग्व:सां
इमिगु मभिगु ग्वसा:
पूवनि मखु।
- 12 जुजुं इमित वाणं कयकी।
अले इपि लिफ: स्वया:
बिस्युं वनी।

- 13 हे परमप्रभु!
छिगु त:धंगु शक्तिया नितिं
जिमिसं छिगु प्रशंसा याये।
छिगु शक्तियात त:धका:
जिमिसं भजन हाले।

22

दु:खय् या:गु प्रार्थना

दाऊदया भजन, लय् तइम्हय्सिगु नितिं
“सुथया चल्ला” लय्कथं

- 1 हे परमेश्वर!
जिमह परमेश्वर,
छिं छाय् जित: त्व:तादियागु?
जिं छित: गुलि प्रार्थना याना नं
छि जिपाखें छाय्
तापाना च्वनागु?*
- 2 हे जिमि परमेश्वर, न्हिनय् जिं छित: प्रार्थना
यानाच्वना,

* 22:1 २२:१ मत्ती २७:४६; मर्क १५:३४

तर छिं लिसः बियामदी।

चान्हय नं

जितः सुख शान्ति मदु।

3 अथेसां छि पवित्रम्ह

परमेश्वर खः

इस्पाएलं छितः तःधक् धकाः

जिं स्यू।

4 जिमि तापाः बाज्यापिन्सं

छिगु हे भलसा काःगु खः।

अले छिं इमित बचय्

यानादीगु खः।

5 इमिसं छितः प्रार्थना यात,

अले इपि बचय् जुल।

इमिसं छिगु भलसा काल,

अले गुबलें मछालाच्चने

म्वाःल।

6 जि ला छम्ह की जक खः,

मनू मखु,

सकसिनं क्वह्वांकाः

व हेपंख्याकाच्चने माःम्ह!

7 खँक्वसिनं जितः

हेबायचबाय् याइ

इमिसं थःगु म्हुतु स्यंकाः

छयं क्वानाः थथे धाइ—☆

8 “परमप्रभुयागु भलसा काइम्ह

थ्व हे मखु ला?

आः परमप्रभुं हे वयात

बचय् याकेब्बु।

परमप्रभुं वयात अपायसकं

माया याः धयागु खःसा

परमप्रभुं छाया ग्वाहालि

☆ 22:7 २२:७ मत्ती २७:३९; मर्क १५:२९; लूक २३:३५

यानामदीगु?"☆

9 छिं हे जितः मांया प्वाथं
बुइकादिल।

अले मांया मुलनिसें हे
छिं जितः छिके भलसा
तइम्ह यानादिल।

10 बूखुन्हुनिसें हे
जितः छिगु ल्हातय् लःल्हात,
बूसांनिसें
छि जिम्ह परमेश्वर खः।

11 जिपाखें तापानादी मते,
दुःख जिगु न्ह्यःने हे
वयाच्चंगु दु।

जितः ग्वाहालि याइपि
सुं हे मदु।

12 द्रहंतय्सं थें
जितः शत्रुतय्सं
घेरय् यानातःगु दु।

बाशान देशया
ग्यानापुपि द्रहंतय्सं थें
जितः घेरय् यानातःगु दु।

13 सिंह थें हालाः
इपि जितः कुचा कुचा थलेत
म्हुतुप्वाः चाय्काः
न्ह्याःवयाच्चंगु दु।

14 जिगु तागत लः थें
ज्वयावने धुंकल।
जिगु क्वय्या फुक्क साहा साहा
ब्यनावने धुंकल।

सी थें जिगु नुगः
नायावने धुंकल।

- 15 जिगु कथुप्वाः धू थें
 गने धुंकल,
 जिगु मे थक्वय्
 प्यपुने धुंकल,
 छिं जितः सित धकाः
 धुलय् वांछवयादिल।
- 16 जिमि शन्नृतयगु पुचलं खिचात थें
 जिगु प्यखें मुंवःगु दु।
 इमिसं जिगु ल्हाःतुति
 त्यात्यायाये धुंकल।
- 17 जिगु म्हय् च्वंगु क्वैय्
 फुक्क खनेदये धुंकल।
 जिमि शन्नृतयसं जितः स्वयाः
 “हः” धयाच्वंगु दु।
- 18 इमिसं जिगु लं चिष्टा तयाः
 थःथवय् इनाकाइ।✧
- 19 हे परमप्रभु!
 जिपाखें तापानादी मते।
 छि हे जिगु तागत खः।
 जितः ग्वाहालि याः झासैं।
- 20 थ्व तरवारपाखें जितः
 बचय् यानादिसैं।
 थ्व खिचातयपाखें जिगु प्राणयात
 बचय् यानादिसैं।
- 21 सिंहया म्हुतुं जितः
 पिकयादिसैं
 द्वहंया न्यकुर्ति जितः
 बचय् यानादिसैं।

22 जिं जिमि मनूतयत

✧ 22:18 २२:१८ मत्ती २७:३५; मार्क १५:२४; लूक २३:२४; यूह १९:२४

छिं यानादीगु खँ कने,
 जिं छितः इमिगु पुचलय्
 तःधके।☆
 23 हे परमप्रभुया ग्याःभय काइपिं,
 वय्कःया प्रशंसा या!
 हे याकूबया सन्तान, वय्कःयात
 हनाबना ति!
 हे इस्राएलया मनूत,
 वय्कःयागु आराधना या!

24 परमप्रभु मनूतय्गु
 दुःखयात च्यूताः मतसे
 जुयादीम्ह मखु,
 अले इमित
 क्वह्वांकादीम्ह नं मखु।
 छायाःसा जिं वय्कःयात
 प्रार्थना यानाबलय्
 वय्कलं न्यनादिल।
 वय्कः जिपाखें फस्वया मदी।

25 छिं यानादीगु ज्याया निति
 जिं तःधंगु सभाय्
 छितः सकसिगु न्ह्यःने
 तःधके।
 छिगु ग्याःभय काइपिनिगु न्ह्यःने जिं थःगु बचं पूवके।

26 नये मखं पिन्सं लुधंक नयेखनी
 परमप्रभुयात मालाजुइपिन्सं
 वय्कःयात तःधकी।

इमिगु नुगः
 न्ह्याबलें लसतां जायाच्चनी।

27 फुक्क जातियापिन्सं
 वय्कःयात लुमंकी,

अले परमप्रभुयाथाय् वइ।
 फुक्क जातिया मनूतय्सं
 वय्कःयात भागि याइ।

28 परमप्रभु जुजु खः।
 वय्कलं फुक्क जातियापिन्त
 शासन याइ।

29 तःधंछुया जुइपिं
 फुक्कसिनं वयाः
 वय्कःया न्ह्यःने
 छयं क्वछुकी।

सीमानिपिं फुक्कसिनं वयाः
 वय्कःया न्ह्यःने
 छयं क्वछुकी।

30 लिपा वइपिं सन्तानतय्सं नं
 परमप्रभुयागु सेवा याइ।
 लिपा वइपिन्सं नं
 वय्कःयागु खँ न्यना काइ

31 बु हे मबूनिपिं मनूतय्त नं न्यंकी-
 “परमप्रभुं थः मनूतय्त बचय्
 यानादिल।”

23

परमप्रभु जिमि जवाः
 दाऊदया भजन

1 परमप्रभु जिमि जवाः खः,
 जितः छुं मगाःमचाः
 जुइ मखु।

2 वय्कलं जितः
 वाउँगु घाँसय् थ्यनादी,

वय्कलं जितः

सफागु लःया पुखुलिइ
यंकादी।☆

3 वय्कलं जितः

न्हगु जीवन बियादी,
वय्कलं थःगु नांया नितिं
जितः धार्मिकताया लँय्
यंकादी।

4 न्ह्याथे हे तसकं खिउँसे च्वंगु लं

वनेमाःसां
जि छतिं हे ग्याये मखु, प्रभु!
छाय्धाःसा छि जिलिसें दी,
छिगु कथिं व तुतामं नं
जितः ब्वलंकाबी।

5 जिमि शत्रुतय् न्ह्यःने

छिं जिगु नितिं
भवय् ज्वरय् यानादी,
छिं जिगु छ्यं चिकनं
अभिषेक यानादीगु दु,
जिगु ख्वला जायाः भय्बी।

6 जिं स्यू जिगु पलाः पतिकं

छिं जितः माया
व भिं यानाच्चवनी।
अले परमप्रभुया छँय्
जि सदां च्वने दइ।

24

तःधंम्ह जुजु
दाऊदया भजन

- 1 पृथ्वी व पृथ्वीइ च्वंगु
 फुक्कं परमप्रभुयागु खः।
 संसार व संसारय् च्वपिं फुक्कं
 परमप्रभुयागु खः।☆
- 2 वय्कलं संसारयात पृथ्वीया
 तःलय् च्वंगु लःया च्वय्
 दय्कादिल।
 अले थुकिया जग समुद्रया क्वय्
 स्वनादिल।
- 3 सुनां परमप्रभुया पर्वत
 गये फइ?
 वय्कःया पवित्र थासय्
 सु दने फइ?
- 4 थथे इमिसं जक याये फइ,
 सुयागु नुगः व ल्हाः शुद्ध जुइ,
 सुनां मूर्तियागु पुजा याइ मखु,
 सुनां मखुगु बचं याइ मखु।☆
- 5 इमित बचय् यानादीम्ह
 परमप्रभुं
 इमित आशिष बियादी।
 अले दोष मदुपिं ठहरय् यानादी।
- 6 थज्याःपिन्सं जक
 छितः लुइके फइ।
 अले छिगु न्ह्यःने सेवा याये फइ,
 हे याकूबया परमेश्वर!
- 7 पुलांगु ध्वाखात चालाहुँ!
 पुलांगु लुखात चालाहुँ!
 अले तःधंम्ह जुजुयात
 दुहां वयेब्यु!

सेला

8 तःधंम्ह जुजु सु खः?

झी परमप्रभु,

गुम्ह तसकं बल्लाः,

लडाईलय् सुनानं बुकेमफुम्ह

झी परमप्रभु!

9 पुलांगु ध्वाखात चालाहुँ!

पुलांगु लुखात चालाहुँ!

अले तःधंम्ह जुजुयात

दुहां वयेब्यु!

10 तःधंम्ह जुजु सु खः?

दक्व शक्ति दुम्ह

परमप्रभु!

वय्कः तःधंम्ह जुजु खः।

सेला

25

कष्टया इलय्

ग्वाहालिया निंति प्रार्थना

दाऊदया भजन

1 हे परमप्रभु!

जिं थःगु मन छिपाखे ल्हने।

2 हे जिमि परमेश्वर, जिं छिगु हे भलसा कयागु दु!

जितः मछालेपुके मते।

जितः जिमि शत्रुतय्सं

त्याके बियादी मते।

3 छिगु भलसा काइपि सुं नं

मछालेमालि मखु।

मेपिन्त ध्वंलाये स्वइपि

मनूत जक मछालेमालि।

4 हे परमप्रभु!

जितः छिगु लँपु क्यनादिसँ,
अले उकी जुइगु नं
स्यनादिसँ।

5 छिगु सत्यया लँपुइ
जितः यंकादिसँ,
अले स्यनादिसँ,

छाय्धाःसा छि
जितः बचय् यानादीम्ह
परमेश्वर खः।
न्हियान्हिथं जिं छिगु भलसा
कयागु दु।

6 हे परमप्रभु! छिं जितः
यक्व न्ह्यः क्यनादीगु
गुबलें मफुइगु दया माया
लुमंकादिसँ।

7 जिं ल्याय्म्हबलय् यानागु
पापयात ल्वःमंकादिसँ।
जितः लुमंकादिसँ,
अले छि धात्थें गुलि दया माया
दुम्ह खः धकाः क्यनादिसँ।

8 परमप्रभु भिंम्ह व धर्मीम्ह खः
उकिं वय्कलं पापीतयत नं
भिंगु लँय् जुइगु स्यनादी।

9 वय्कलं क्वमितुपिन्त
भिंगु लँय् यंकादी,
अले इमित थःगु लँपुइ जुइत
स्यनादी!

10 वय्कःयागु बाचाकथं जुइपि
व व्यवस्था मानय् याइपिन्त
वय्कलं गुबलें
मफुइगु दया माया

व विश्वास क्यनादी।

11 हे परमप्रभु!

थःगु नांयात तःधकेत

जिगु पाप न्ह्याक्व हे तःधंसां

क्षमा यानादिसँ।

12 परमप्रभुया ग्याःभय

काइपिं सु दु?

वयक्लं इमित इपिं वनेमाःगु

लँपु क्यनादी।

13 इमिगु न्ह्याबलें भिं जुइ

इमि मस्तयसं

देशय् अधिकार याइ।

14 परमप्रभुया ग्याःभय काइपिन्त

वयक्लं थः पासा थें यानादी,

अले वयक्लं इमित बाचायागु खँ

कनादी।

15 जिगु मिखा न्ह्याबलें

परमेश्वरयाके दु,

छाय्धाःसा वयक्लं जितः

न्ह्याबलें शत्रुतय्गु जालं

त्वःतकादी।

16 जिपाखे स्वयादिसँ,

अले जितः दया यानादिसँ,

छाय्धाःसा जि याकःचा जुल,

अले जितः तसकं कष्ट

जुयाच्चवंगु दु।

17 जिगु नुगःया कष्ट झन झन

तच्चयावनाच्चवंगु दु।

जितः थ्व फुक्कपाखें

बचय् यानादिसँ।

18 जिगु फुक्क दुःख

- व कष्टयात
 बिचाः यानादिसँ,
 अले जितः जिगु फुक्क पापं
 क्षमा यानादिसँ।
 19 स्वयादिसँ, जिमि शत्रुत
 गुलि दये धुंकल,
 अले इमिसं जितः
 गपाय्सकं मही।
 20 जि छिगु शरणय् वयागु दु,
 जितः छुत्कारा यानादिसँ
 जितः मछालापुकादी मते।
 21 जिगु इमान्दारी
 व भिंगु पहलं यानाः
 जितः बचय् यानातयेमा।
 छायाःसा जिं छिगु भलसा
 कयागु दु।
 22 हे परमेश्वर,
 थ्व फुक्क दुःखकष्टपाखें
 इस्राएलीतय्त
 बचय् यानादिसँ।

26

- छम्ह भिम्ह मनूया प्रार्थना
 दाऊदया भजन
 1 हे परमप्रभु,
 जि दोष मदुम्ह खः धकाः
 सकसितं क्यनादिसँ।
 छायाःसा जिं भिंगु
 व खःगु जक ज्याखँ
 यानागु दु।
 अले छफुति हे लिमच्युसे

परमप्रभुयागु भलसा
कयागु दु।

2 हे परमप्रभु,
जि गज्याःम्ह खः धकाः
जिगु नुगः व बिचाःयात
जाँचय् यानादिसँ।

3 छिगु तःधंगु दया माया
न्द्वाबले जिगु नुगलय् दु।
अले छिगु हे विश्वासय्
जि न्द्वाःवनाच्चनागु दु।

4 जि कर्पिन्त हयकाजुइपि
मनूतलिसे मजुया,
जि निपा ख्वाःपाः दुपि
मनूतलिसे नं मजुया।

5 जि मभिगु ज्या यानाजुइपिनिगु
पुचलय् नं मवना,
अले दुष्ट मनूतलिसे
नं मजुया।

6 जिं थः दोष मदुम्ह धकाः
क्यनेत ल्हाः सिले,
हे परमप्रभु!
छिगु वेदीइ वयाः चाःहुलाः

7 जिं ततःसलं छितः
तःधकाः म्ये हाले
अले छिगु अजू चायापुगु
ज्यायागु खँ कने।

8 हे परमप्रभु, जितः
छिगु महिमा झःझः धाय्क
खनेदइगु छि च्वनादीगु
पबित्र थाय् यः।

9 जितः पापीतय्त थें

नाश यानादी मते।
अले ज्यानमारातयूत थें
जितः सज्जय बियादी मते।

10 इमिगु ल्हाति ला
मभिगु ज्या जूगु दु,
अले इमिसं घुस कायेगु ज्या नं
यानाच्चवंगु दु।

11 तर जि ला अथे मखु,
भिगु व खःगु ज्या जक
जिं यानागु दु।

उकिं जितः दया यानाः
बचय् यानादिसँ।

12 जि माथवंथाय् दनाच्चनागु दु,
अले जिं सभाया न्ह्यःने
परमप्रभुया प्रशंसा याये।

27

जः व मुक्ति बीम्ह परमप्रभु
दाऊदया भजन

1 परमप्रभु जिगु जः
व जितः मुक्ति बीम्ह खः।
जि सु खनाः ग्यायेगु?

परमप्रभु हे जिगु किल्ला खः।
जि सुलिसे ग्यायेगु?

2 गुबलय् दुष्टत जिगु ला नयेत
न्ह्यज्याः वइ,

जितः महीपि व जिमि शत्रुत जितः
हयक्काः वइ,

इपि लुफि हानाः क्वःदइ।

3 फुक्क सिपाइँत जिगु विरोधय्

दनावःसां
 जि ग्याये मखु।
 सुनानं जितः हयक्कावःसां
 जि लिचिले मखु।

4 जिं न्ह्याबले माला च्वनागु
 छता हे जक खँ
 परमप्रभुयाके जिं
 छता हे जक फ्वने,
 जिं व हे मालाच्वने,
 परमप्रभुयागु हिसिलाःगु ख्वाः
 स्वयेत
 व वय्कःयात
 म्हसीकेत
 वय्कःयागु देगलय् सदां
 च्वनेदयेमा।

5 छायाधाःसा दुःखकष्टयागु
 इलय्
 वय्कलं जितः
 थःथाय् हे सुचुकादी
 वय्कलं जितः
 थःगु पालय् सुचुकादी।
 वय्कलं जितः
 तःजाःगु ल्वहँतय् तयादी।

6 आः जिगु छ्यं
 जिमि शत्रुतयगु न्ह्यःने धस्वाइ।
 अले जि वय्कःयागु
 पवित्रगु थासय् बलि बियाः
 लय्तायाच्वने।
 जिं भजन हाले,
 जिं परमप्रभुया प्रशंसा याये।

7 हे परमप्रभु!

जिं तस्सलं सःतेबलय्
छिं न्यनादिसँ।

जितः दया यानादिसँ,
अले लिसः बियादिसँ!

8 छिं “जिथाय् वा”

धयादीबलय्,

जिं लिसः बिया,

“जि वये परमप्रभु।”

9 जिपाखें थःगु ख्वाः

फहिकादी मते, परमप्रभु।

तमय् थः दासयात थःपाखें

तापाकादी मते,

छि जितः ग्वाहालि

यानादीम्ह खः।

जितः मुक्ति बियादीम्ह प्रभु,

जितः त्वःतादी मते!

जितः गुबलें त्यागय् यानादी मते!

10 जितः जिमि मांबौनं त्वःतूसां

परमप्रभुं जितः त्वःतादी मखु।

11 हे परमप्रभु,

जितः छिगु लँपु क्यनादिसँ।

जिमि शत्रुत यक्व दुगुलि

जितः खःगु लँय् यंकादिसँ।

12 जितः इमिगु ल्हातय्

त्वःतादी मते

छाय्धाःसा इमिसं

मभिंगु मतिइ तयाः

जिगु विरोधय्

मखुगु साक्षी बियाच्च्वंगु दु।

13 परमप्रभुयागु भिंगु ज्या

जिं थ्व हे जीवनय्
 स्वये दइतिनि धकाः
 जितः विश्वास दु।
 14 परमप्रभुयागु लैँ स्वयाच्चैँ।
 साहस या,
 थःगु नुगः बल्लाकि।
 परमप्रभुयागु लैँ स्वयाच्चैँ।

28

ग्वाहालिया नितिं प्रार्थना
 दाऊदया भजन
 1 हे परमप्रभु,
 जितः रक्षा यानादीम्ह!
 जिं छितः प्रार्थना याये,
 जिगु खँ न्यनादिसँ
 छिं जिगु खँ न्यनामदिल धाःसा
 जि ला याकनं हे सी।
 2 ग्वाहालिया नितिं
 जिं प्रार्थना यायेबलय्
 अले छिगु पवित्र थाय्पाखे
 ल्हाः ब्वय्केबलय्
 जिगु खँ न्यनादिसँ।
 3 मभिंगु ज्या याइपिं दुष्टतलिसें
 जितः सजॉय बियादी मते।
 इमिसं म्हुतुं ला
 थः जःलाखःलापिलिसे
 नाइक खँ ल्हाइ,
 इमिगु नुगलं धाःसा
 मभिंगु जाः ग्वयाच्चनी।
 4 इमिगु ज्या

व इमिसं याःगु मभिंगु ज्याकथं
 इमित सजॉय बियादिसँ,
 इमिगु ल्हातं याःगु ज्याकथं
 इमित पलेसा बियादिसँ,
 अले इमित बीमाःगु सजॉय
 बियादिसँ।✧

5 परमप्रभुं छु छु यानादिल,
 वय्कलं थःगु ल्हातं छु छु
 दय्कादिल धयागु खँय
 इमित छुं हे च्यूताः मदु।
 उकिं वय्कलं इमित
 सदां सदांया निति
 नाश यानादी।
 अले हाकनं इपि खनेदइ मखु।

6 परमप्रभुया प्रशंसा जुइमा!
 छायाःसा ग्वाहालिया निति
 जिं यानागु प्रार्थना
 वय्कलं न्यनादीगु दु।

7 परमप्रभु जिगु बल खः,
 अले जिगु ढाल नं।
 जिं दुनुगलंनिसैं
 वय्कःयागु भलसा कयागु दु।
 वय्कलं जितः ग्वाहालि यानादी,
 अले जिगु नुगः लसतां जाः।
 जिं वय्कःयात तःधंकाः
 म्ये हाले।

8 परमप्रभुं थः मनूतयत
 शक्ति बियादी
 वय्कः अभिषेक जूम्हय्सित

रक्षा याइगु किल्ला खः।
 9 हे परमप्रभु,
 थः मनूतय्त बचय् यानादिसँ।
 थः सर्बययात
 आशिष बियादिसँ।
 अले इमि जवाः जुयाः
 इमिगु बिचाः यानादिसँ।

29

परमप्रभुया सलं
 न्हागु नं याये फु
 दाऊदया भजन
 1 हे स्वर्गदूतत,
 परमप्रभुया प्रशंसा या!
 परमप्रभुया महिमा
 व शक्तिया प्रशंसा या।
 2 परमप्रभुया नां तःधंगुलि
 वय्कःयागु प्रशंसा या।
 परमप्रभु खनेदय्कः झाइबलय्
 वय्कःया न्हाःने
 वय्कःयागु पवित्रताय्
 पुलि चुयाः वय्कःयात
 आराधना या।☆

3 परमप्रभुया सः समुद्रय् थ्वइ।
 तसकं तःधंम्ह परमेश्वर
 न न्याः थें हाली।
 वय्कःया सः समुद्रय् लिथ्वइ।
 4 परमप्रभुया सलय्
 तःधंगु शक्ति दु।
 परमप्रभुया सः

- तसकं तःजि।
 5 परमप्रभुया सलं
 देवदास्या सिमात
 नं क्वदली।
 लेबनानया देवदास्या सिमात
 नं क्वदली।
 6 परमेश्वरं लेबनानया पहाडयात
 साया मचायात थें
 तिन्हुकाबी फु।
 अले हेर्मोन पहाडयात*
 द्वहंचायात थें तिन्हुकाबी फु।
 7 परमप्रभुया सलं
 हाबलासा त्वय्काबी फु
 8 परमप्रभुया सलं मरूभूमियात
 क्वारा क्वारा संकाबी फु,
 परमप्रभुं कादेशया मरूभूमियात
 संकाबी फु।
 9 परमप्रभुया सलं स्वंसिमायात
 संकाबी फु,
 उकिया हः हाय्काबी फु।
 अले वय्कःया देगलय्
 सकसिनं वय्कःया प्रशंसा याइ।
 10 परमप्रभुं खुसिबाः
 वःगु लःयात कःघाये फु।
 परमप्रभुं जुजुं थें
 सदां सदांया निंति
 शासन याइ।
 11 परमप्रभुं थः मनूतय्त
 बल बियादी
 परमप्रभुं थः मनूतय्त

* 29:6 २९:६ हेर्मोन पहाड थुकियात “सिरिओन पहाड” नं धाः

शान्तिया सुवाः बियादी।

30

सुभाय्या प्रार्थना

दाऊदया भजन

1 हे परमप्रभु,

जिं छितः तःधंके,

छाय्धाःसा छिं जितः

बचय् यानादिल।

अले जिमि शन्नृतयत्

जितः लाय्बुइके

मफय्काबिल।

2 हे परमप्रभु जिमि परमेश्वर!

जिं ग्वाहालिया नितिं

छितः प्रार्थना याना।

अले छिं जितः लाय्कादिल।

3 हे परमप्रभु,

छिं जितः सीगालं थकयादिल।

अले कालया म्हुतुइ

थ्यने धुंकूम्ह जितः

लिगना हयादिल।

4 परमप्रभुयात विश्वास याइपिं

फुक्कसिनं वय्कःयात

तःधंकि।

भजन हालाः

वय्कःया पवित्र नांयात

तःधंकि।

5 वय्कःया तं धयागु

घौपलखया नितिं जक खः,

वय्कःया दया माया

मसीतले दयाच्चवनी।

चच्छि ख्वये माःसां
सुथय ला जितः सुख दइ।

6 जिं थः बचय् जुइ धुंकाः धया,
“आः जितः सुनानं
छुं याये फइ मखुत।”

7 हे परमप्रभु,
छिं जितः स्वयादिल।
छिं जितः पहाड थें
बल्लाकादिल!
तर गुबलय् छि जिपाखें
फस्वयादिल,
उबलय् धाःसा जि ग्यात।

8 हे परमप्रभु,
जिं छितः प्रार्थना याना,
परमप्रभुयात हे जिं दयाया निति
प्रार्थना याना,

9 “जि सिनाः छितः छु दइ?
सीधुंकाः छितः सुनां
तःधुंकी?
धू जुइ धुंकाः सुनां छि
विश्वास याये बहःम्ह
धकाः धाइ?”

10 हे परमप्रभु,
जिगु खँ न्यनादिसँ।
जितः दया यानादिसँ।
जितः ग्वाहालि यानादिसँ।”

11 जिगु दुःखयात
छिं लसताया प्याखनय्
हिलादिल।
जिगु दुःखयात न्हंकाः

छिं लसतां जायकादिल।
 12 उकिं जि सुम्क च्वने मखु,
 छितः तःधंकाः म्ये हाले।
 हे परमप्रभु, जिमि परमेश्वर!
 जिं छितः सदां सदां
 सुभाय् बियाच्च्वने।

31

दुःखया इलय्
 परमेश्वरयागु भलसा
 दाऊदया भजन
 1 हे परमप्रभु,
 जिं छिके शरण
 काःवयागु दु।
 जि गुबलें मछाले म्वाःलेमा।
 छि धर्मींम्ह परमेश्वर खः,
 जितः बचय् यानादिसँ।
 2 जिगु प्रार्थना न्यनादिसँ।
 अले जितः याकनं बचय्
 यानादिसँ।
 जिगु निति ल्वहंधी जुयादिसँ
 अले किल्ला जुयाः
 जितः बचय् यानादिसँ।
 3 छि हे जिगु ल्वहंधी
 व किल्ला खः।
 उकिं थःगु नांया निति
 जितः लँ क्यनादिसँ।
 4 जितः जिमि शत्रुतय्सं
 खने मदयेक तयातःगु जालं
 बचय् यानादिसँ।
 जितः शरण बियादीम्ह छि हे

- छम्ह जक दु।
 5 जिं थःत छिगु हे ल्हातिइ
 लःल्हायेधुन।
 हे परमप्रभु,
 विश्वास याये बहःम्ह परमेश्वर!
 जितः उद्धार यानादिसँ।☆
- 6 म्वाःमदुगु मूर्ति पुजा यानाजुइपि
 जितः मयः।
 जिं ला परमप्रभुयागु जक
 भलसा कया।
- 7 मदिकक दयाच्चनीगु
 छिगु मायाय्
 जि लय्तायाच्चने।
 छिं जिगु दुःख व कष्ट स्यू।
- 8 छिं जितः जिमि
 शत्रुतय्गु ल्हातिइ
 लाकेबिया मदी।
 छिं जिगु तुतियात चक्कंगु थासय्
 तयादीगु दु।
- 9 हे परमप्रभु,
 जितः दया यानादिसँ।
 छायाःसा जि दुःखकष्टय्
 लानाच्चंगु दु।
 ख्वख्वं जिगु मिखा
 बुल्लुसे च्वने धुंकल।
 जिगु म्ह व आत्मा नं
 न्यले धुंकल।
- 10 जिगु जीवन दुःखं जाः।
 दँदनिसें जिं झसुकाः जक
 तयाच्चना।

पीरं यानाः जि बमलायेधुन।
जिगु क्वँय् नं न्यले धुंकल।

11 जिमि शन्नृतयसं जक मखु,
जिमि जःलाखःलां
झन दकलय् अप्वः
जितः क्वह्यंकाच्चन।
पासापि जिगु न्ह्यःने वये हे ग्याः।
लँय् नापालाःसां
इपि बिस्सुं वनी।

12 सी धुंकूम्ह मनूयात थें
सकसिनं जितः ल्वःमंके
धुंकल।

तज्याःगु थल थें
सकसिनं जितः वांछवये
धुंकल।

13 जिं जिगु बारे यक्व हे खँ
न्यनागु दु।
जितः प्यखें ग्यानापुयाच्चंगु दु।
जिमि शन्नृतयसं जिगु विरोधय्
जाः ग्वयाः
जितः स्यायेत स्वयाच्चंगु दु।

14 अयनं हे परमप्रभु, जिं
छिगु भलसा कयागु दु।
छि जिम्ह परमेश्वर खः।

15 जिगु आयु छिगु ल्हातिइ दु।
जितः जिमि शन्नृत व जितः
दुःख बीत स्वया च्वंपिनिपाखें
बचय् यानादिसँ।

16 थः दासयात दया यानाः
स्वयादिसँ।
छिगु सदां दयाच्चनीगु मायां

जितः बचय् यानादिसँ।

17 हे परमप्रभु,

जिं छितः ग्वाहालिया निति

प्रार्थना यायेबलय्

जि मछाले म्वाःलेमा।

बरु जिमि शत्रुतय्त मछालापुसे

च्वंकाः पातालय् वनाः

सुम्क च्वनेमाय्कादिसँ।

18 घमण्ड यानाः तःधंछुयाः

धर्मीं मनूतयगु विरोधय्

मखुगु खँ ल्हानाजुइपिनिगु

म्हत्तुप्वाः तिकादिसँ।

19 छिगु भय काइपिनिगु निति

छिं तयातयादीगु भिंगु खँ

गुलि तःधं।

अले थःगु शरणय् वइपिन्त

सकसिगुं न्ह्यःने

माक्व बियादी।

20 छिं इमित जाः

ग्वयाजुइपिनिपाखें

थःगु हे न्ह्यःने सुचुकादी।

छिं इमित दोष बियाजुइगु

मेपाखें तापाक्क थःथाय् हे

शरण बियादी।

21 परमप्रभुयात तःधंकि,

छाय्धाःसा वय्कलं जितः थःगु

सदां दयाच्चनीगु अजू चायापुगु

माया क्यनादीगु दु।

जिगु शहरय् हमला यायेत

वःबलय्

वय्कलं जितः बचय् यानादिल।

22 जि छत्थुं ग्यानाः हाला,
 “जितः परमप्रभुपाखें
 तापाकल।”
 तर जिं ग्वाहालिया निति छितः
 प्रार्थना यानाबल्य
 छिं जितः लिसः बियादिल।☆

23 वय्कःयात विश्वास याइपि
 फुक्कसिनं वय्कःयात
 माया या।
 परमप्रभुं वय्कःयात विश्वास
 याइपिन्त रक्षा यानादी।
 घमण्डी जुइपिन्त धाःसा
 वय्कलं सजाँय बियादी।

24 उकिं परमप्रभुयागु
 भलसा काइपि फुक्कं बल्ला,
 अले साहसी जु!

32

पाप क्षमापाखें दइगु सुख
 दाऊदया मश्किल
 1 धन्य खः व मनु,
 गुम्हय्सिगु पाप व मभिंगु ज्या
 क्षमा जूगु दु।
 2 धन्य खः व मनु,
 गुम्हय्सिगु मभिंगु ज्या यात
 परमप्रभुं दोष मबिल।
 अले गुम्हय्सिगु मति मभिं मजू।☆

3 जिं थःगु पाप मानय
 मयानाबल्य

न्हिच्छि ख्वयागुलि
जिगु म्ह न्यल।
4 चच्छि न्हिच्छि छिगु ल्हाः
जिगु म्हय् इयातुक्क
लानाच्चन।
जिगु बल फुक्कं निभालय्
लः सू थें सुनावन।

सेला

5 अले जिं छिगु न्ह्यःने जिगु
पाप मानय् याना।
जिं जिगु मभिंगु ज्याखँ
छिगु न्ह्यःने मसुचुका।
जिं थःम्हं थःत धया,
“जिं परमप्रभुया न्ह्यःने
थःगु पाप मानय् याये।”
अले छिं जिगु फुक्क पापया दोष
क्षमा बियादिल।

सेला

6 उकिं ई दनिबलय् हे
छितः विश्वास याइपिन्सं
छिगु प्रार्थना यायेमाः।
अले दुःखकष्टया खुसिबाः वःसां
इमित स्यंके फइ मखु।
7 छि जिगु शरण कायेगु थाय् खः।
छिं जितः दुःखं बचय् यानादी।
अले जिगु प्यखें
छिं मुक्तिया म्ये थ्वय्कादी।

सेला

8 छिं जितः धयादिल,
“जिं छन्त छ वनेमाःगु लँ
क्यनाबी।
जिं छन्त स्यनेकने यानाः
बिचाः यानाच्चने।”

9 लकय् यायेत लगाम
 व खिपः माःपि सल
 व गधा थें छुं मस्यूपिं
 जुयाच्चने मते।

10 दुष्टतय्सं यक्व दुःखकष्ट
 फयेमाली,
 परमप्रभुयात विश्वास
 याइपिन्त धाःसा
 सदां दयाच्चनीगु दया माया दइ।

11 उकिं परमप्रभुयात विश्वास
 याइपिं फुक्कं
 परमप्रभुलिसे लयताया च्वाँ!
 नुगः यचुपिं फुक्कं लसतां चंचंधा!

33

सृष्टि यानादीम्हय्सिगु प्रशंसा
 दाऊदया भजन

1 परमप्रभुयात विश्वास
 याइपिं फुक्कं
 परमप्रभुलिसे लयताया च्वाँ।
 नुगः यचुपिन्सं वय्कःया
 प्रशंसा याये ल्वः।

2 वीणा थानाः
 परमप्रभुयात तःधकिं!
 सारंगी थानाः
 वय्कःयागु भजन हा!

3 वय्कःया नितिं न्हगु भजन हा।
 यइपुक तार बाजं थानाः
 म्ये हालाः लय्ता।

4 छायाधाःसा परमप्रभुया वचन
सत्य खः

अले वयक्ःया ज्या फुक्कं
विश्वास यायेबहः जू।

5 वयक्कलं भिंगु व न्यायया खँ
जक ययकादी।

वयक्ःया मदक्क दयाच्चनीगु
दया मायां पृथ्वी जाइ।

6 परमप्रभुं उजं बियाः
आकाश दयकादिल,
अले सासलं फुक्क नगुत।

7 वयक्कलं फुक्क समुद्रयात
छथाय् मुंकादिल,
अले ततःजाःगु समुद्रयात थःगु
धुकुतिइ तयादिल।

8 संसारय् च्वंपिं फुक्कसिनं
परमप्रभुयागु ग्याःभय कायेमा,
अले वयक्ःयात हनाबना तयेमा।

9 वयक्कलं धयादिसैलि
संसारया सृष्टि जुल।

वयक्ःया उजं दयेवं
फुक्कं खनेदयावल।

10 परमप्रभुं जातितय्गु फुक्क
ग्वसाः चुंदकाबी,
अले इमिसं क्वःछिनातःगु
ज्याखँयात पनादी।

11 परमप्रभुया ग्वसाः धाःसा
सदा दयाच्चनी।
वयक्ःया बिचाः गुबलें नं
हिली मखु।

12 धन्य खः व जातिया मनूत,
गुगु जातिया परमेश्वर
परमप्रभु खः।

इपि धन्यपिं खः, सुयात परमप्रभुं
थः सर्वय जुइत ल्ययादिल।

13 परमप्रभुं स्वर्ग क्वय् स्वयादी,
अले फुक्क मनूतयत् खनी।

14 वय्कलं थः च्वनाच्चंगु थासं
पृथ्वीइ च्वपिं फुक्क मनूतयत्
स्वयादी।

15 वय्कलं इपि फुक्कसित
नुगः बियादी,

उकिं वय्कलं इमिसं याइगु
फुक्क ज्याखँ सीकादी।

16 सुं नं जुजु बल्लाःपिं सिपाइँत
दयेवं जक त्याइ मखु।

अले सुं नं सिपाइँनं थःगु बलं
जक त्याकेफइ मखु।

17 सल दयेवं जक नं लडाइँलय्
त्याकेफइ मखु,

थुमिगु फुक्क बल मुंकाः नं
बचय् याये फइ मखु।

18 तर सुनां परमप्रभुया
भय काइ

अले वय्कःया सदां दयाच्चनीगु
दया मायाय् भलसा तइ,

वयात वय्कलं बिचाः यानादी।

19 वय्कलं इमित कालया म्हुतुं
बचय् यानादी,

अले अनिकालया इलय् नं
वय्कलं इमित म्वाका तइ।

20 झीसं परमप्रभुयागु हे

भलसा काये

वय्कः हे झीगु ग्वाहालि
व ढाल खः।

21 वय्कःलिसे

झीगु नुगः लयताइ

छाय्धाःसा झीसं वय्कःया
पवित्र नांयागु भलसा
कयागु दु।

22 हे परमप्रभु,

छिगु सदां दयाच्चनीगु

दया माया जिमिके

दयाच्चनेमा,

छाय्धाःसा जिमिसं छिगु हे जक
भलसा कयागु दु।

34

परमेश्वरया भिंगु खँयात

तःधंकाः हाःगु भजन

दाऊदया भजन

1 परमप्रभुयात जिं धन्य

धयाच्चने न्ह्याबलें

वय्कःयात हे तःधंकाच्चनी

जिगु में न्ह्याबलें।

2 वय्कलं यानादीगु ज्याखँयात

जिं तःधंके

दुःख सियाच्चं पि थ्व न्यनाः

लयतायेमा।

3 जिलिसें परमप्रभुयात तःधंकि!

झीपिं फुक्कं जानाः

वय्कःयागु नां तःधंके!

- 4 जिं परमप्रभुयात माला,
वयक्कलं जितः लिसः
बियादिल।
नापं वयक्कलं जिगु फुक्क
भय नं मदय्काबिल।
- 5 सुनां वयक्कःपाखे स्वइ,
लसतां इमिगु ख्वाः
झःझः धाइ,
अले गुबलें नं मछालाः ख्वाः
क्वछुके माली मखु।
- 6 थ्व दुःखीम्ह मनुखं सःतल,
परमप्रभुं न्यनादिल,
अले फुक्क दुःखकष्टपाखें
वयात बचय् यानादिल।✧
- 7 वयक्कःयागु ग्याःभय काइपिन्त
परमप्रभुया दूततय्सं रक्षा याइ,
अले वयक्कलं इमित
बचय् यानादी।
- 8 परमेश्वर गुलि भिं धकाः
थःम्हं हे सीकि,
धन्यम्ह खः व,
सुनां वयक्कःयाके शरण काइ।✧
- 9 परमप्रभुया पवित्रपिं मनुत,
वयक्कःयागु ग्याःभय का,
वयक्कःयागु ग्याःभय काइपिं
सुयातं मगाःमचाः जुइ मखु।
- 10 बल्लाःपिं सिंहत नये मखनाः
गंसि जुइ
तर परमप्रभुयात
विश्वास याइपिन्त

भिंङु छुं हे खँया मगाःमचाः
जुइ मखु।

11 वा, अय् ल्याय्म्हत!
जिगु खँ न्यँ!

जिं छिमित परमप्रभुयागु भय
कायेगु स्यनाबी।

12 सुयां न्ह्यइपुक व ताःई तक
म्वाये मंदु ला?

13 दुसा, थःगु मेयात
मभिंङु व मखुगु खँ
ल्हाकेबी मते।

14 मभिंङु खं तापाक च्वँ,
अले भिंङु ज्या या।

फुक्कलिसे मिलय् जुयाः
च्वनेगु स्व।☆

15 भिंङु ज्या याइपिन्त
परमप्रभुं स्वयाच्चंगु दु,
अले इमिगु प्रार्थना न्यनेत
वय्कलं न्हाय्पं बियाच्चंगु दु।

16 मभिंङु ज्या
याइपिनिपाखें धाःसा
वय्कः फस्वयादी,
अले इमिगु नां तक हे
मल्यंक नाश यानादी।☆

17 भिंङु ज्या याइपिन्सं
परमप्रभुयात प्रार्थना याइबलय्
परमप्रभुं न्यनादी,
अले इमिगु फुक्क दुःख

मदय्कादी।

18 नुगः ख्वःपिं सकसिगुं न्ह्यःने
परमप्रभु दी,
अले नुगः क्वतुंपिन्त वय्कलं
बचय् यानादी।

19 भिं मनूतयत् यक्व दुःख वयेफु,
अयनं परमप्रभुं इपिं फुक्कसित
फुक्क दुःखं उद्धार यानादी।

20 परमप्रभुं इमित बांलाक तयादी,
इमिगु क्वैय् छपु नं
त्वधुकेबी मखु।☆

21 दुष्टत इमिगु मभिंगु ज्यां हे
सिनावनी,
परमप्रभुया मनूतयत् महीपि
दोषी ठहरय् जुइ।

22 परमप्रभुं थः दासतयत्
बचय् यानादी।
वय्कःयागु शरणय् वइपि
दोषी ठहरय् जुइ मखु।

35

ग्वाहालिया नितिं प्रार्थना

दाऊदया भजन

1 हे परमप्रभु!

जिगु विरोध याइपिनिगु
विरोध यानादिसँ।
जिलिसें ल्वाःवइपिलिसे
ल्वानादिसँ।

- 2 ढाल व ल्वाभः ज्वनादिसँ,
अले जिगु ग्वाहालिया निति
झासँ।
- 3 जितः लिनाजूपिनिगु विरोधय्
थःगु भाला ल्हनादिसँ,
अले जितः धयादिसँ,
“जिं छन्त बचय् याये।”
- 4 जितः स्यायेत स्वयाच्चपिन्त
व स्यंकेत स्वयाच्चपिन्त
मछालापुसे च्वंक
लिनाछवयादिसँ।
- 5 फसं पुइके यंकूगु सुपः थें
परमप्रभुया दूतं इमित
लिनाछवयेमा।
- 6 परमप्रभुया दूतं इमित
लिनायंकीबलय्
इमिगु लँ खिउँसे व चुल्लुसे
चवनेमा।
- 7 जिं छुं मयाकं
इमिसं जितः जाः ग्वल
जिं छुं मयाकं
इमिसं जिगु निति गाः म्हुल।
- 8 उकिं इमिसं थाःगाः
कायेमफयेक आकाझाकां
इमिगु नाश जुइमा।
- इपिं थःम्हं ग्वःगु जालय्
थःपिं हे लायेमा,
इपिं थःम्हं म्हुगु गालय्
थःपिं हे लायेमा।
- 9 अले जि परमप्रभु खनाः
लय्ताये वय्कलं जितः बचय्

यानादीगुलि
 जि वयक्: खना: लय्ताये।
 10 जिं दुनुगलनिसें वयक्:यात
 त:धंका: धाये,
 “हे परमप्रभु! छि थें ज्या:म्ह
 सुं नं मदु।
 छिं बमला:पिन्त बल्ला:पिपाखें
 बचय् यानादी।
 अले चीमि व ग्वाहालि मदुपिन्त
 इमित क्वत्यलेत स्वइपिपाखें
 बचय् यानादी।”

11 मभिंपिं मनूतय्सं जिगु विरोधय्
 साक्षी बियाजुइ।
 जिं सि हे मस्यगु खँय्
 इमिसं जित: दोष बी।
 12 इमिसं जिगु भिंगु ज्याया पलेसा
 जित: मभिं याइ।
 जिगु नुग: तसकं क्वतुनी।
 13 अयनं इपिं उसाँय् मदुबलय्
 जि दु:खं च्वना,
 जिं नयेगु त्व:ता,
 जिं इमिगु निति प्रार्थना याना।
 14 जिं थ: पासा व
 दाजुकिजाया निति थें
 प्रार्थना याना,
 जिं थ: हे मांया दु:खं च्वना थें
 इमिगु निति दु:खं च्वना।
 15 अयनं जित: दु:ख जूबलय्
 इपिं फुक्कं लय्ताल
 इपिं फुक्क जाना: जित:
 लायबुयाजुल।

महमस्यूपिन्सं तकं जितः
दिपाः मदयेक
हयक्काः वयाच्चन।

16 इमिसं जितः हेस्यानाः
क्वह्यका जुल।
इमिसं जितः बेक्वः मिखां
स्वयाजुल।

17 हे परमप्रभु,
गुबलय् तक थथे छुं मयासैं
स्वया जक च्वनेगु?
जितः इपिपाखें बचय् यानादिसैं।
जितः थुपिं सिंहपाखें
बचय् यानादिसैं।

18 अले जिं तःधंगु सभाय्
छितः सुभाय् बी।
जिं सकसिगुं न्ह्यःने छितः
तःधंके!

19 जिमि शत्रुतय्त जि बूगुलिइ
लय्ताय्के बियादी मते।
म्वाय्कं म्वाय्कं जितः
महीपिं मनूतय्त जिगु दुःखय्
लाय्बुइके बियादी मते।✧

20 इमिसं मिलय्चलय्
जुयाच्चनेगु ला
खैं हे ल्हाइ मखु।
बरु मिलय्चलय् जुयाच्चपिनिगु
विरोधय् मखुगु मखुगु
खैं ल्हाना जुइ।

21 इमिसं ततःसलं जितः
दोष बियाः धाइ,

“छं छु यात धकाः जिमिसं
थःगु हे मिखां स्वयेदत,
बल्ल लात का!”

22 हे परमप्रभु,
छिं थ्व फुक्क खँ स्यू,
उकिं सुम्क च्वनादी मते
जिपाखें तापाक झायादी मते।

23 हे परमप्रभु, जि परमेश्वर!
दनादिसँ,
जितः बचय् यानादिसँ।
जिगु पंलिनाः नवानादिसँ।

24 हे परमप्रभु, छि धर्मीम्ह खः,
जि दोष मदुम्ह खः धकाः
क्यनादिसँ।
जिमि शत्रुतयसं जितः लायबुइ
मफयेमा।

25 “आहा! झीसं मनंतुना थें
झीत दत” धकाः
इमित धाय्केबियादी मते।
“झीसं वयात म्वाःम्वाकं नुनेधुन”
धकाः इमित धाय्केबियादी मते।

26 जितः दुःख जूबलय्
लायबुयाजूपिं फुक्कं
आशां घायेमा,
थःपिन्त जि स्वयाः तःधं धकाः
जूपिं फुक्कं न्हाय् वंकाः
मछाला जुइमालेमा।

27 जि दोष मदुम्ह खः धकाः
न्याय जूगु स्वयेत पियाच्चंपिं
फुक्कं लय्तायेमा,

अले लिसा लिसा कयाः
 धयाच्चनेमा,
 “परमप्रभु गुलि तःधं!
 थःदासया भिं जूगुलिइ
 वयकः लयतायादिल।”

28 अले जिं सकसितं
 छिगु न्यायया खँ कने।
 न्हियान्हिथं छितः तःधंके।

36

न्ह्याबले दयाच्चनीगु माया
 दाऊदया भजन
 1 दुष्टतयगु दुनुगलंनिसें
 पाप हाला हइ।
 इमिके परमेश्वरयागु ग्याःभय भ्याः
 भचा हे दइ मखु।☆
 2 इमिसं थःपिन्त तसकं तःधं
 तायकाजुइगुलि
 परमेश्वरं इमिगु पाप खनी मखु,
 अले दोषी ठहरय् यानादी मखु
 धकाः च्वनी।
 3 इमिगु न्ह्यागु खँ नं
 मभिंगु जुयाच्चनी।
 इमिसं भिगु व गतिलाःगु ज्या
 धयागु हे याइ मखु।
 4 लासाय् ग्वारातुलीबलय् तक नं
 इमिसं मभिंगु ग्वसाः ग्वयाच्चनी।
 इमिगु ज्या छुं नं भिंगु मदु।
 मभिंगु यायेत धाःसा
 इपिं छपलाः हे लिचिली मखु।

5 हे परमप्रभु!

छिगु न्ह्याबलें दयाच्चनीगु माया

आकाश थें तःधं।

अले छि विश्वास याये बहःम्ह खः

धयागु खँ

सुपाँय स्वयाः नं पुलाः वं।

6 छि धमींम्ह खः धयागु खँ

पहाड थें धिसिलाः,

छिगु न्याय समुद्र थें तःजाः।

छिं मनू व पशुतय्गु बिचाः यानादी।

7 हे परमप्रभु! गुलि तःजि

छिगु मदिक्क दयाच्चनीगु माया!

छिगु पपूया किचलय्

मनूतय्सं शरण कयाच्चंगु दु।

8 छिं इमित गाक्क

नकेबियाच्चनादीगु दु।

छिं थःगु लसताया खुसिं

इमित लः त्वंकेबियाच्चंगु दु।

9 छि फुक्क जीवनया मुहान खः।

छिगु जलं हे जिमिसं

खंकाच्चना।

10 छितः माया याइपिन्त

छिगु सदां दइगु माया

प्वंकादिसँ।

छितः मानय् याइपिन्त न्याय

बियादिसँ।

11 तःधंछुना जुइपिन्त जितः

हय्क्काय्के बियादी मते,

अले दुष्टतय्जितः

लिकेबियादी मते।

12 स्वयादिसँ इपि क्वःदल।

इपि आः गुबलें नं
दनावये मफयेक क्वःदल।

37

भिं गु व मभिं गु ज्याया लिच्चः

दाऊदया भजन

1 मभिपि खनाः

हीमी चाये मते

मभिं गु ज्या याइपिलिसे

नुगः मुइके मते।

2 घाँय् थें इपि याकनं गनावनी,

स्वां थें इपि याकनं

इवाः जुयावनी।

3 परमप्रभुयात विश्वास या,

अले भिं गु या

अले परमेश्वरं बियादीगु देशय्

चवनाः सुरक्षित जुयाच्वै।

4 परमप्रभुनापं लयताया च्वै!

परमप्रभुं छं मनंतुंगु पूर्वकादी।

5 थः गु जीवन परमप्रभुयात

लःल्हानाब्यु,

वयकःयात विश्वास या,

अले वयकलं छन्त

ग्वाहालि यानादी।

6 वयकलं छंगु विश्वासयात जः थें

अले छ सत्यम्ह खः धकाः

न्हिनयसिया निभाः थें

क्यनादी।

7 सह यानाः परमप्रभुयात

पियाच्चँ
मनूतयसं याना जूगु ज्याखँ
व इमिगु मभिंगु ग्वसाः खनाः
हीमी चाये मते।

8 तंचाये मते,
तंयात त्वःताछ्व।
हीमी चाये मते,

थुकिं मभिंपाखे न्ह्याकी,

9 मभिंपि मनूतयत
नाश यानाछ्वइ।

परमप्रभुयागु लँ स्वयाच्चंपि
परमप्रभुं बियादीगु देशय्
च्वने दइ।

10 मभिंपि याकनं मदयावनी,
छिमिसं मालाः स्वःसां
खंके फइ मखु।

11 क्वमिलुपिन्सं धाःसा
देशय् अधिकार याइ,
अले इमित तःधंगु सुख
शान्ति दइ।☆

12 मभिंपिन्सं भिंपिन्त स्युंकेत
जाः ग्वयाजुइ, अले इमित
बेक्वः मिखां स्वयाजुइ।

13 परमप्रभु मभिंपिं खनाः न्हिलादी,
छाय्धाःसा वय्कलं स्यु,
इपि याकनं नाश जुयावनी।

14 मभिंपिन्सं नये मखंपिं
व चीमिपिन्त न्हंकेत
व भिंगु लँय् जुयाच्चंपिन्त स्यायेत

- थःगु तरवार ल्हनी,
अले धनुष वाण तप्यंकी
- 15 तर इमिगु तरवारं
इमिगु हे छातिइ सुइ,
अले धनुष वाण त्वधुली।
- 16 मभिंपिन्के यक्व दुगु स्वयाः
भिंपिन्के भतिचा जक
दुगु हे बालाः,
- 17 छायाःसा मभिंपिनिगु शक्ति
नाश जुयावनी।
परमप्रभुं भिंपिन्त बल्लाकादी।
- 18 परमप्रभुं भिंपि मनुतयत्
न्हियान्हिथं बिचाः
यानातयादीगु दु,
इपि परमप्रभुं बियादीगु सर्बय
सदां च्वने खनि।
- 19 आपतया इलय्
इमित दुःख जुइ मखु,
अनिकालया इलय्
इमिसं लुधंक नयेदइ।
- 20 मभिंपि मनुत नाश जुयावनी।
परमप्रभुयात महीपि मनुत
गुँस्वां थें तनावनी,
अले कुँ थें इपि मदयावनी।
- 21 मभिंपि मनुतयसं त्यासा कयाः
गुब्बसं पुली मखु
भिंपिन्सं दुनुगलनिसें बी।
- 22 परमप्रभुं आशिष बियातःपिन्सं
पृथ्वीइ अधिकार याइ,

वय्क्लं सराः बियातःपि धाःसा
नाश जुइ।

23 परमप्रभुयात मनूतय्गु लैपु
यल धाःसा
वय्क्लं इमिगु पलाः
धिसिलाकादी।

24 इपि लुफि हाःसां
ग्वतुलि मखु,
छाय्धाःसा परमप्रभुं इमित
ल्हाः ज्वनाः थकयादी।

25 जि बुयाः बुरा जुइ धुन
जिं आः तक नं
भिं मनूयात
परमप्रभुं त्वःतादीगु मखंनि,
न त इमि मस्तय्सं फ्वनाः
नयेमाःगु हे खना।

26 इपि न्हाबलें नुगः हःपि
व दुनुगलं बीपिं खः,
इमि मस्तयत् सुभाय् दइ।

27 मभिंगु ज्या त्वःति,
भिंगु ज्या या।
छिपिं न्हाबलें
परमेश्वरं बियादीगु देशय्
च्वने खनि।

28 छाय्धाःसा परमप्रभु
सत्य यःम्ह खः,
वय्क्लं थःत विश्वास याइपिन्त
गुब्सं त्वःतादी मखु।

वय्क्लं इमित न्हाबलें

बचय् यानादी।
 मभिपिं मनूतय् सन्तान धाःसा
 नाश जुइ।
 29 भिपिं मनूतय्सं
 परमेश्वरं बियादीगु देशय्
 अधिकार याइ।
 अले अन न्ह्याबले च्वनी।

30 भिंम्ह मनूया म्हुतुं
 न्ह्याबले ज्ञानया खँ पिहां वइ,
 वयागु मेचं
 न्ह्याबले सत्य नवाइ।

31 परमेश्वरयागु व्यवस्था
 वयागु नुगलय् दयाच्चनी,
 वयागु पलाः गुब्सं चुलुइ मखु।

32 मभिंम्ह मनुखं
 न्ह्याबले भिंम्ह मनूया
 चेवा याना जुइ,
 अले वयात स्यायेत स्वयाच्चनी।

33 परमेश्वरं मभिंम्ह मनूयागु ज्या
 ताःलाके बियादी मखु,
 अले न्याय याइबलय्
 भिंम्ह मनूयात
 दोषी ठहरय् यानादी मखु।

34 परमेश्वरयागु लँ स्व,
 वयकलं धाःथें जु,
 वयकलं छिमित देश बियाः
 तःधंकी।
 अले मभिपिं मनूत नाश जूगु
 छिमिसं स्वये खनि।

35 जिं छम्ह तसकं ग्यानापुम्ह
व दुष्टम्ह मनू खना।

व मनू सिमा थें
थःगु थासय् तःधनाजुल।

36 छन्हु जि उखे वनाबलय्
जिं वयात स्वयाबलय्
व ला अन मदु।

जिं वयात मालां नं लुइके मफुत।

37 दोष मदुम्ह मनूयात बिचाः या,
अले भिंम्ह मनूयात
बांलाक स्व,
मिलय्चलय् जुयाच्चनिपिं मनूतय्
सन्तान दइ।

38 मभिंपिं मनूत धाःसा
फुक्क नाश जुयावनी,
इमिगु सन्तान फुक्कं मदयावनी।

39 भिंपिं मनूतय्त परमप्रभुं
स्वयादी,
दुःखया इलय् वय्कलं इमित
उद्धार यानादी।

40 परमप्रभुं इमित
ग्वाहालि यानादी
अले बचय् यानादी,
वय्कलं इमित मभिंपिं मनूतय्पाखें
बचय् यानातयादी,
छाय्धाःसा इपिं
वय्कःया शरणय् वइ।

38

दुःखय् लानाच्चम्ह मनूया प्रार्थना
दाऊदया भजन

1 हे परमप्रभु,

जितः तमय्

ब्वःबियादी मते।

थःगु तच्चःगु तमय्

जितः सजाँय बियादी मते।

2 छिं जितः थःगु वाणं

घाःपाः यानादीगु दु।

छिं थःगु ल्हाः

जिगु म्हय् तयादीगु दु

3 छि तंम्बयादीगुलि

जि म्हंमफय् धुंकल।

जिगु पापं यानाः

जिगु क्वँय् न्यले धुंकल।

4 जि म्ह छम्हं पापय् दुने धुन।

ल्हनां ल्हने मफय्क

थ्व इयातुइ धुंकल।

5 जि मूर्ख जुयागुलि

जिगु घाः ध्वगिनाः

नवये धुंकल।

6 जि थस्वये मफये धुन,

जिगु म्ह छम्हं स्याये धुंकल।

न्हिच्छि न्हिच्छिं जि ख्वयाः

सनाजुयाच्चना।

7 जिगु म्ह छम्हं ज्वर वयाः

पुनाच्चंगु दु।

जि सी थें च्वने धुंकल।

8 जिगु म्ह छम्हं न्यले धुंकल,

म्ह छम्हं चाःतुलावने धुंकल,

जिगु स्याः नुगलं
झसुकाः पिज्वयाच्चंगु दु।

9 हे परमप्रभु,
जिं छु मनंतुनागु खः धकाः ला
छिं सि हे स्यु,
जिगु झसुकाः नं
छिं न्यनादीगु दु।

10 जिगु नुगः भारा-भारा
मिनाच्चंगु दु,
जिगु बल तनावने धुंकल,
जिं मिखां नं मळुयावने धुंकल।

11 जि पासापि व थःथितिपि नं
जिगु ल्वचं ग्यानाः
तातापानाजुइ धुंकल,
जिगु छेंजःपि हे नं
सत्तीक मवये धुंकल।

12 जितः स्यायेत् स्वयाच्चंपिन्सं
थुबलय हे जाः ग्वयाच्चंगु दु,
जिगु मभिं तुनाच्चंपिन्सं
जितः सिधय्केगु ख्याच्चः
बियाच्चंगु दु।

न्हियान्हिथं इमिसं जिगु विरोधय्
जाः ग्वयाच्चंगु दु।

13 इमिगु ख्याच्चः न्यैन्नं
जि ख्वाँय् जुयाबी धुन।

इमिगु न्ह्यःने
जि नवाये मफुम्ह पाकः
जुयाबी धुन।

14 सुयागुं खँ मन्यनेगु हे
बांलाः ताये धुंकल,

अले सुयातं छुं हे
लिसः मबी धुन।

15 हे परमप्रभु,
जिं आः छितः हे जक
पियाच्चवनागु दु।

हे परमप्रभु, जि परमेश्वर!
छिं जितः लिसः बियादी।

16 जिमि शन्नृतयत जिगु दुःखय्
लायबुइके बियादी मते,
जि बमलाःगुलिइ
इमित लयतायके बियादी मते।

17 जि क्वदलेत्यंगु दु,
मदिक्क जितः स्यानाच्चंगु दु।

18 जिं जिगु पाप नालाकाये,
जिं यानागु ज्याख्वैय्
जितः दुःख ताः।

19 जिमि शन्नृत जि स्वयाः
यक्व बल्लाः,

गुलिखे शन्नृत ला
म्वाय्कं म्वाय्कं
जितः महीपि नं दु।

20 इमिसं जिगु भिंगु
ज्याया पलेसा
जितः मभिं यानाच्चंगु दु।
अले जिं भिंगु ज्या यानागुया
विरोधय् जुयाच्चंगु दु।

21 हे परमप्रभु,
जितः त्वःतादी मते
हे परमेश्वर,

जिपाखें तापानादी मते
 22 जितः बचय् यानादीम्ह
 जि परमप्रभु!
 याकनं झायाः जितः
 ग्वाहालि यानादिसँ।

39

मनूतयगु आयु चिहाकः
 दाऊदया भजन, लय् तइम्ह यदूतूनया निंति
 1 जि थःम्हं थःत धया,
 “जिं थःम्हं यानागु ज्या यात
 बांलाक दुवाले,
 अले जिगु म्हुतुं
 पाप नवाकेबी मखु।
 मभिंपिं मनूत न्ह्यःने दइबलय्
 जिं पिचा तयाः म्हुतुप्वाः तिनाच्चने।”
 2 जि अथे नमवासे च्वनाबलय्
 अज्ज ला भिंगु खँ तक नं
 नमवासे च्वनाबलय्
 जितः झन सह याये
 थाकूयावल।
 3 जितः झन छु याये छु याये
 जुयावल।
 गुलि बिचाः यात
 उलि हे मिं प्थें जुयावल।
 अले जिं थ्थे मधासे
 च्वने मफुत,
 4 “हे परमप्रभु!
 जिगु जीवन गुबलय् फुइ धकाः
 क्यनादिसँ।

जि गुबलय् तक म्वानाच्चनी,
 अले जिगु जीवन पलखया लागि
 जक खः धकाः
 जितः सीकेबियादिसँ।
 जितः धयादिसँ, जि गुबलय् सी?
 5 छिं जिगु जीवनयात
 गुलि चिहाकः यानादियागु!
 छिगु न्ह्यःने ला
 जिगु आयु छुं हे खः धकाः!
 छिगु न्ह्यःने ला
 जिगु आयु छुं हे मखु।
 मनूतयगु जीवन ला
 छम्ह सासः जक हे खनि।”

सेला

6 मनूत ला किचः थें हे
 थुखे उखे जुइ।
 इमिगु ज्याया छुं हे मू मदु।
 इमिसं धन-सम्पत्ति मुंकी,
 तर सुनां काइ धकाः
 इमिसं मस्यू।
 7 उकि हे परमप्रभु,
 जिं छुकियागु आशा यायेगु?
 जिगु आशा धयागु ला
 छि हे जक खः।
 8 जिगु पापपाखें
 जितः बचय् यानादिसँ।
 मूर्खतयसं जितः हिस्याये
 मफयेमा।
 9 जि सुम्क हे च्वने,
 जिं छसः नं नवाये मखु।
 छायाधाःसा जितः
 छिं हे थथे यानादीगु खः।

- 10 अयनं आः जितः
 मेगु सजॉय बियादी मते।
 छिगु ल्हाःया च्वतं जि सीन।
- 11 छिं मनूतयत इमिसं याःगु
 पापया नितिं ब्वःबियादी,
 अले सजॉय बियादी।
 इमिगु सम्पत्तियात किलं नः थें
 नाश यानादी।
 मनूत धयापिं ला धात्थें हे
 छम्ह सासः जक खनि।

सेला

- 12 हे परमप्रभु,
 जिगु ख्वःसः न्यनादिसँ।
 जिं ग्वाहालिया नितिं यानागु
 प्रार्थना न्यनादिसँ।
 छायाःसा छिगु नितिं
 जि नं जिमि तापाःबाज्यापिं थें
 निन्हुप्यन्हुया पाहां जक खः।
- 13 जि सिनावने न्ह्यः,
 जिगु नां मदयावने न्ह्यः हे
 जिपाखें छिगु तं चीकादिसँ।
 अले जि हाकनं लय्ताये फयेमा।

40

- ग्वाहालिया नितिं प्रार्थना
 दाऊदया भजन
- 1 जिं आयम्बुसे ग्वाहालिया नितिं
 परमप्रभुयात पिया।
 अले तिनि वय्कलं जिपाखे
 न्हाय्पं बियादिल,
 अले जिगु प्रार्थना न्यनादिल।

2 वय्कलं जितः

ग्यानापुगु गालं थकयादिल,

वय्कलं जितः

भ्यातनालं लिकयादिल,

वय्कलं जितः

हयाः ल्वहँतय् थनादिल,

अले धस्वानाच्चनेत

धिसिलाःगु थाय् बियादिल।

3 वय्कलं जितः

छपु न्हगु म्ये स्यनादिल,

झी परमेश्वरयात तःधकाः

हालेगु म्ये।

यक्वसिनं हे थ्व खनी,

अले भय काइ।

अले इमिसं परमप्रभुयाके

भलसा तइ।

4 धन्य खः व मनु,

गुम्हयसिनं परमप्रभुयाके भलसा तइ,

गुम्हयसिनं मूर्ति पुजा याइ मखु,

अले गुम्ह मखुपि घःतय्त

पुजा यानाजुइपिलिसे जुइ मखु।

5 हे परमप्रभु जि परमेश्वर!

छिं जिमिगु नितिं यक्व हे

अजू चायापुगु ज्या यानादीगु दु।

छिं जिमिगु नितिं ल्याः खानां

ल्याः खाये मफयेक

अजू चायापुगु ग्वसाः

ग्वयादीगु दु।

छिं थें ज्याःम्ह सुं हे मदु।

छिं यानादीगु ज्या कन धाःसा

गुबलें नं सिधइ मखु।

6 छिं जितः श्व खँ
 थुइके बियादिल,
 जिगु न्हायपं चायकादिल,
 बलि बीगु व छायल्ली यायेगु ज्यां
 छि लय्मताः,
 छिं होमबलि व पापबलि नं
 ययकामदी।
 7 उकिं जिं लिसः बियाः धया,
 “जि वये धुन, व्यवस्थाय्
 जिगु बारे च्वया तः थें।

8 जि परमेश्वर!
 छितः यःकथं
 ज्या यायेगुलिइ हे
 जि लय्ताः।

छिं स्यनादीगु खँ
 जिं थःगु नुगलय् तयागु दु।”☆

9 हे परमप्रभु,
 तःधंगु सभाय् जिं सकसितं
 छि जिमित बचय् यानादीम्ह खः
 धकाः न्यक्।
 छिं सि हे स्य, श्व खँ कनेत
 जि गुबलें नं लिचिले मखु।

10 जिं छिं बचय् यानादीगु
 भिंगु खँ जिगु नुगलय् जक
 सुचुका मतया।
 जिं न्ह्याबलें छि विश्वास
 याये बहःम्ह
 व मुक्ति बीम्ह खः धकाः
 कनाजुयागु दु।

तःधंगु सभाय् नं जिं
 छिगु सदां दयाच्चवनीगु
 दया माया

व छि विश्वास याये बहःम्ह खः
धयागु खँ कनाजुयागु दु।

11 हे परमप्रभु!

छिं जितः दया माया यानादीगु

गुबलें त्वःतादी मते।

छिगु सदां दयाचवनीगु

दया माया व विश्वासं

जितः सदां बचय् यानातयेमा।

12 जिगु प्यखें ल्याः खानां

ल्याः खाये मफयेक

दुःखत दु।

जिगु पाप थुलि अप्वये धुंकल,

जिं आः छुं हे मखने धुन।

जिगु छेनय् दुगु सँ स्वयाः

अप्वः दु थ्व।

जिगु नुगः हे क्वतुने धुंकल।

13 हे परमेश्वर!

जितः बचय् यानादिसँ।

हे परमप्रभु!

जितः ग्वाहालि यायेत

याकनं झासँ

14 जितः स्यायेत स्वःपिं

लज्या चाये मालेमा,

अले इतिमिति कनेमा।

जिगु दुःखय् लय्तायाजूपिं

लिज्यां वनेमा,

अले मछालाः जुइमा।

15 “हः” धकाः

जितः लायबुयाजूपिं मछालाः

आछु-आछु कनाजुइमा।

16 छितः मालाजुइपिं धाःसा

छिके लयतायाच्चवेमा।
 अले छिं मुक्ति बीगु यःपिन्सं
 सदा थथे धयाच्चवेमा—
 “परमप्रभु गुलि तःधं!”

17 तर जि ला चीमिम्ह
 व छुं मदुम्ह मनू खः।
 हे परमप्रभु,
 छि जितः उद्धार याइम्ह
 व जिम्ह परमेश्वर खः।
 जितः ग्वाहालि यायेत
 याकनं झासँ।☆

41

उसाँय् मदुम्ह मनूया प्रार्थना
 दाऊदया भजन
 1 धन्य खः इपिं,
 गुपिन्सं छुं मदुपिनिगु च्यूताः काइ।
 इमित दुःख जुइबल्य
 परमप्रभुं ग्वाहालि यानादी।
 2 परमप्रभुं इमिगु रक्षा यानादी,
 अले इमिगु ज्यान
 बचय् यानादी।
 वय्क्लं इमिगु जीवनयात
 सुथालाकादी।
 अले इमि शत्रुतय्पाखें
 इमित बचय् यानादी।
 3 परमप्रभुं इमित उसाँय्
 मदइबल्य
 सुसाःकुसाः यानादी।

अले लाय्कादी।

4 जिं धया, “हे परमप्रभु,
जिं छिगु विरोधय् पाप याना।
जितः दया यानादिसँ,
अले लाय्कादिसँ।”

5 जिमि शत्रुतयसं
जि याकनं सीमा,
अले सकसिनं जितः ल्वःमंका
छवयेमा धकाः धयाजूगु दु।

6 जिमि पासापि धकाः
स्वःवइपिन्सं नं जिगु
मभिंगु खँ जक मुंकाः यंकी,
अले न्ह्याम्हय्सितं न्यंका जुइ।

7 जितः महीपिन्सं नं थवंथवय्
जिगु खँ स्वांपुया जुइ।
इमिसं जिगु मभिंगु
बिचाः याना जुइ,

8 “वयात तःल्वचं कःगु दु,
व आः लासां हे दनावये
फइ मखुत।”

9 छपाः हे भुइ नयाम्ह जिमि
छम्ह स्याःन्याःम्ह पासा तकं
जिगु विरोधय् वन।
वयात जि तसकं विश्वास
यानातयागु खः।☆

10 हे परमप्रभु!
जितः दया यानाः
हाकनं लाय्कादिसँ।

☆ 41:9 ४१:९ मती २६:२३; १४:१८; लूक २२:२९; यूह १३:१८

- अले जिं जिमि शत्रुतय्के
पलेसा काये।
11 जिं स्यू छि जिलिसें
लयतायादीगु दु,
छाय्धा:सा छिं इमित
जित: त्याकेबिया मदी।
12 छिं जित: ग्वाहालि यानादिल,
छाय्धा:सा जि दोष मदुम्ह ख:।
छिं जित: सदांया निति
थ:लिसें तयादिल।
13 परमप्रभु,
इस्त्राएलया परमेश्वरया
प्रशंसा या।
आ:, अले न्ह्याबले।
आमेन! आमेन!✧

निगूगु ब्व

42

भज ४२-७२

- परमेश्वरया नितिं प्या:चा:
कोरह वंशयापिनिगु मश्किल,
लय तइम्हयसिगु नितिं
1 हे परमेश्वर!
गथे चल्ला
खुसिया ल:या नितिं
प्या: चाइ,
जि नं छिगु नितिं अथे हे
प्या: चायाच्चवनागु दु।
2 जि परमेश्वरया नितिं,
म्वा:म्ह परमेश्वरया नितिं

प्याःचायागु दु।
 जि गुबलय् वनाः परमेश्वरयात
 नाप लाये दइ?
 3 ख्वबि हे जिगु चान्हिया
 नसा जुयाबी धुंकल।
 मनूतय्सं जितः न्ह्याबलें थथे
 धयाः हाय्कीगु,
 “छं परमेश्वर गन दु?”

4 न्हापाया खँ लुमंकीबलय्
 जिगु नुगः तज्यानावइ।
 उबलय् जि मनूतयगु पुचःलिसे
 जुइगु खः।
 मनूतय् न्ह्यलुवाः जुयाः
 प्रशंसाया म्ये हा हां,
 लयतातां परमेश्वरया देगलय्
 वनेगु।

5 जिगु नुगः छाया थपाय्सक क्वतुंगु?
 जि छाया थपाय्सकं नुगः मछिंगु?
 जिं अज्ज नं परमेश्वरयाके
 आशा तयाः वय्कःयात,
 जितः बचय् याइम्हयसित तःधंके।

6 जिगु नुगः तसकं क्वतुंगु दु।
 उकिं जिं छितः यर्दनया लागां,
 हेर्मोन पर्वत व मिसार डाँडाया
 च्वकां लुमंकागु दु।

7 ग्यानापुसे च्वंगु
 क्वब्बाःलःया सः
 जिगु न्ह्यःने दु।
 छिगु समुद्रया तःधंगु लबुं नं
 जितः नुनाब्यूगु दु।

8 न्हिनय् ला परमप्रभुं जितः
 थःगु माया क्यनादी,
 अले चान्हय् जिं जितः
 जीवन बियादीम्ह परमेश्वरयात
 तःधंकाः वय्कःया म्ये हाले।

9 जिं जिगु ल्वहंधी
 परमेश्वरयात धाये,
 “छिं जितः छाय्
 ल्वःमंकादियागु?
 शत्रुतय्सं क्वत्यय्काः,
 जिं छाय् ख्वयाजुइमाःगु?

10 इमिसं नागःतुगः याइबलय्
 जिगु बपिक्वय् हे
 त्वःधू थें जुइगु,
 इमिसं हिस्यानाः जितः न्यनी,
 ‘ग्व, छं परमेश्वर गन दु?’ ”

11 हे जिगु मन छाय् थपाय्सकं
 क्वतुंगु?
 छाय् जितः थुलिमछि नुगः मछिंसे
 च्वंगु?
 जिं परमेश्वरयाके आशा तये,
 हाकनं जिं थः परमेश्वर
 व थःत बचय् याइम्हय्सित
 तःधंके।

43

छुत्काराया लागि प्रार्थना

1 हे परमेश्वर,
 जिं दोष मदुम्ह खः धकाः
 क्यनादिस्।

छितः म्हमस्यूपि
 सकल मनूतपाखें
 जितः रक्षा यानादिसँ।
 मखुगु खँ ल्हाइपि व
 दुष्टपि मनूतपाखें
 जितः बचय् यानादिसँ।

2 हे परमेश्वर,
 छि हे जिगु शरण खः।
 छिं जितः छाया त्वःतादियागु?
 शत्रुतयसं क्वत्ययकाः जि छाया
 ख्वयाजुइमाःगु?
 3 छिगु जः व सत्ययात
 छ्वयाहयादिसँ,
 उमिसं हे जितः लँ क्यनेमा।
 अले छिगु पवित्र पर्वत सियोनय्,
 छि च्वनादीगु देगलया
 जितः हयेमा।

4 अले हे परमेश्वर,
 जि छिगु वेदीइ वने।
 छि जिगु लसताया मुहान खः।
 जिं वीणा थानाः छिगु
 प्रशंसा याये।
 हे परमेश्वर, जिमि परमेश्वर!

5 हे जिगु मन
 छाया थपायसकं क्वतुंगु?
 जि छाया थपायसकं
 नुगः मछिगु?
 जिं परमेश्वरयाके आशा तये,
 हाकनं जिं थः परमेश्वर व
 थःत बचय् याइम्हयसित तःधके।

44

रक्षाया लागि प्रार्थना
कोरह वंशयापिनिगु मश्किल,
लय् तइम्हय्सिगु निति

1 हे परमेश्वर, छिं यक्व न्हापा
जिमि पुर्खातयगु पालय्
यानादीगु खँ
इपिपाखें जिमिसं
थःगु हे न्हाय्पनं न्यनागु दु।

2 छिं थःगु हे शक्तिं
जाति जातियापिं मनूतय्त
पितिनाः
इमिगु थासय् जिमि पुर्खातय्त
तयादिल।

छिं इमि शत्रुतय्त क्वत्यलाः
इमित ब्वलंकादिल।

3 इमिसं तरवारया बलं देश
त्याकाकाःगु मखु,
इपिं थःगु शक्तिं त्याःपिं
नं मखु।

छिगु हे जव ल्हातं, छिगु हे लप्पां
व छिगु ख्वाःया जलं
इपिं त्याःगु खः।
छाय्धाःसा छिं इमित
यय्कादिल।

4 हे परमेश्वर,
छि हे जिमि जुजु खः,
छिं याकूबयात त्याके बियादी।

5 छिगु हे बलं जिमिसं
थः शत्रुतय्त ख्यानाछ्वये,
जिमि विरोधीतय्त जिमिसं

छिगु हे नामं न्हयातये।

6 जिं थःगु धनुख्य्
भलसा तये मखु,

जिगु तरवारं जितः
त्याकाबी मखु।

7 तर छिं जिमित
जिमि शत्रुतपाखें
बचय् यानादिल,
अले जिमित मयय्कीपिन्त
लज्या चाय्कादिल।

8 जिमिसं न्हिच्छिं परमेश्वरया
प्रशंसा याये,
अले छितः न्ह्याबलें
सुभाय् बियाच्चने।

9 अयनं छिं जिमित त्वःतादिल,
अले जिमित क्वह्यंकादीगु दु।

आः छि जिमि सिपाईतनापं
न्ह्यःने झाइ मखु।

10 छिं जिमित जिमि शत्रुतय्
न्ह्यःनें लिचिके बियादिल।

अले जिमिगु फुक्कं
जिमि शत्रुतय्
लाकायंके बियादिल।

11 छिं जिमित
मेपिनिगु आहार जुइत
फैतय्त् थें त्वःतादिल,

अले जातितय् दथुइ जिमित
उखेलाः थुखेलाः
मदय्काबिल।

12 छिं थः मनूतयत्
दंक मियादिल।

इमित मियाः छितः
छुं नं फाइदा मजुल।

13 छिं जिमित जिमि
जःलाखःलातयूत
हेस्याके बियादीगु दु,
जिमि जःखः च्वंपिन्सं
जिमित हेपं ख्यानाः
हेबाय्चबाय् याइगु।

14 छिं जिमित
मेगु जातितय् दथुइ
ख्यालिम्बः यानादिल।
मनूतयसं जिमित खन कि
हेस्यानाः छ्यं संकीगु।

15 न्हियान्हिथं जि
क्वह्याकाच्चने माःगु दु,
जिगु ख्वाः लज्यां त्वपूगु दु।

16 कुंखिनिपिं
व हेस्याइपिनिगु वचनं
अले बदला काइपिन्सं यानाः
जितः थथे जूगु खः।

17 छिगु बाचायात
त्वथुलागु मदुसां
जिमिसं छितः
ल्वःमंकागु मदुसां
थ्व फुक्क जिमित जूवल।

18 जिमिगु नुगः छिपाखें
फह्यूगु मदु,
जिमिगु पलाः
छिपाखें लिच्यूगु मदु।

19 अयनं छिं जिमित

ध्वंचातयथाय् त्वःतादिल।
छिं जिमित तसकं खिउँथाय्
वानाथकादिल।

20 जिमिसं परमेश्वरया नांयात
त्वःमंकागु दुसा
अले मेपिं घःतयत् प्रार्थना यायेत
ल्हाः ल्हनागु दुसा,

21 परमेश्वरं थ्व खँ सि हे सी।
छाय्धाःसा वय्कलं

फुक्कसिगु नुगलय्
दुने च्वंगु खँ स्यु।

22 अयनं जिपिं छिगु लागि
न्हिथं सी मालाच्च्वंगु दु।

स्यायेत हःपिं फैतयत् थें
जिमित व्यवहार याइगु।*

23 हे परमप्रभु दनादिसँ!
छि छाय् घनाच्च्वनादिया?
दनादिसँ!

जिमित सदांया लागि
त्वःतादी मते।

24 छाय् छिं मेखेपाखे
स्वयादियागु?

अले जिमित जूगु दुःख व सास्ती
छाय् त्वःमंकादियागु?

25 जिपिं ला धुलय् ल्वाकबुक
जुइ धुंकल।

जिमिगु म्ह
चाय् प्यपुने धुंकल।

26 दनादिसँ,
जिमित ग्वाहालि यानादिसँ।

छिगु दयाया कारणं
जिमित त्वःतकादिसँ।

45

जुजुयागु ब्याहाया म्ये
कोरह वंशयापिनिगु भजन,
लय् तइम्हय्सिगु निति
1 जुजुया निति थ्व म्ये
च्वयाबलय्
जिगु नुगलय् बाबांलाःगु खँग्वः
भय्बियावःगु दु।
जिगु मेचु नं छम्ह बांलाःम्ह
कविया कलम थें जुयाब्यूगु दु।

2 छि मनूत मध्ये दकले
बांलाःम्ह खः।
छिगु म्हुतुसिइ दया जाःगु दु।
उकिं परमेश्वरं छितः
न्हाबलेया लागि
आशिष बियादीगु दु।
3 हे दकले बल्लाःम्ह जुजु!
थःगु महिमा व प्रतापनापं
थःगु तरवार जँय् घानादिसँ।
4 सत्य व न्यायया निति
थःगु साहसनापं
सवारी जुयादिसँ।
छिगु जव ल्हाति
अजू चायापुगु ज्या क्यनेमा।
5 छिगु च्वापुगु वाणं
छिकपिनि शत्रुतय्गु नुगलय्
सुइ मा!

जाति जातियापिन्सं
छिगु तुतिइ भवपुइमा!

6 हे परमेश्वर,
छिगु राज्य न्हाबलें दयाच्चनी।
छिं थः मनूतयूत न्याय यानाः
राज्य यानादी।

7 छिं भिंगु खँ ययकादी,
मभिंगु खँयात
छिं ययकादी मखु,
उकिं परमेश्वर, छिकपिनि परमेश्वरं
छितः ल्ययादीगु दु
अले छिकपिनि पासापिन्त
स्वयाः अप्वः
लयता बियादीगु दु।☆

8 छिगु वसतं मूर्
व तेजपातयागु थें नस्वाः
पिहां वः।
किसिया धँवानं
छायेपियातःगु लायकुलिइ
बाजं थाइपिन्सं छितः
लयतायकी।
9 छिगु लायकुलिइ
हनेबहःपिं मिस्तयगु दथुइ
जुजुपिनि म्हायपिं नं दु,
छिगु जवपाखे
ओपीरया लुँया तिसा
तियातःम्ह भम्चा दु।

10 न्यँ, हे राजकुमारी,
बिचाः या, न्हायपं ब्यु,
अले थः मनूत

व थःछैं नं ल्वःमंकी।

11 छंगु हिसि खनाः

जुजु लयतायादीगु दु।

वय्कः छिमि मालिक खः,

उकिं वय्कलं धाःथें या।

12 टुरोसया राजकुमारी

देछा ज्वनाः वइ,

तःमिपिन्सं छंगु कृपा

कायेत स्वइ।

13 राजकुमारी लायकुलिइ दु,

व गुलि बांलाः।

वयागु वसः लुँयागु कां

थानातःगु दु।

14 वयात झःझः धाःगु वसतय्

समिलुत ल्यूल्यू तयाः

जुजुयाथाय् यंकी।

15 इपिं जुजुया लायकुलिइ लयतातां

दुहां वनी।

16 छिकपिनि काय्पिन्सं

छिकपिनि पुर्खातय्गु

थाय् काइ,

इमित छिं सारा संसारयापिं

राजकुमार दय्कादी।

17 जिं पुस्तां पुस्ता तक

छिगु नांयात तःधंकातये

थुकिं जाति जातियापिन्सं

छितः न्ह्याबलें तःधंकी।

46

परमेश्वर

झीगु शरण कायेगु थाय् व बल
कोरह वंशयापिनिगु भजन, लय् तइम्हय्सिगु निंति –
अलामोत* धाःगु रागय् हालेगु

1 परमेश्वर झीगु शरण

कायेगु थाय् व बल खः,
अले दुःखया इलय्
अःपुक दइगु ग्वाहालि खः।

2 अथे जुयाः पृथ्वी हे

लिंगिलिगि संसां
अले पर्वतत समुद्रय् कुतुं वंसां
झीपिं ग्याये मखु।

3 समुद्र ध्वयक हाःसां

अले ब्वाइंया वःसां
उकियागु किसिदुम्बलं पहाडत
वाराक्वारा संसां
झीपिं ग्याये मखु।

4 छगू खुसि दु

गुकियागु लःधालं
परमेश्वरया शहर,
दक्कसिबय् तःधंम्ह च्वनादीगु
थाय्यात लयताय्की।

5 परमेश्वर व शहरय्

च्वनादीगु दु
व गुबलें नाश जुइ फइ मखु।
सुथ न्हापां हे परमेश्वरं उकियात

ग्वाहालि बियादी।

6 जाति जातियापि मनूतय् दथुइ
तसकं हल्लाखल्ला जुल,

सेला

* 46: ४६:० अलामोत छगूकथंया राग खः

राज्य-राज्य लिगिलिगि सनाः
 क्वःदल
 वयक्कलं थःगु सः पिकयादिल,
 पृथ्वी नायावन।

7 दक्क शक्ति दुम्ह
 परमप्रभु झीलिसे दी,
 याकूबया परमेश्वर
 झी शरण कायेगु थाय् खः।

8 वा, परमप्रभुया ज्या स्व,
 वयक्कलं संसारय्
 गुकथं नाश हयादिल।

9 वयक्कलं संसारया
 फुक्क थासय् लडाइँ दिकादी।
 वयक्कलं धनुष व भाला
 त्वथुलादी।
 अले ढालयात मिइ
 छवय्काबी।

10 “सुम्क च्वै!
 जि परमेश्वर खः धकाः सीकि!
 जितः फुक्क जातियापिन्सं
 तःधंकी,
 संसारय् न्यंकभनं जितः तःधंकी।”

11 दक्क शक्ति दुम्ह
 परमप्रभु झीनापं दी,
 याकूबया परमेश्वर झीगु
 शरण कायेगु थाय् खः।

47

परमप्रभु पृथ्वी न्यंकया जुजु
 कोरह वंशयापिनिगु भजन,
 लय् तइम्हय्सिगु निति
 1 हे जाति जातियापिं
 फुक्क मनूत, ल्हाःपा था।
 ततःसलं परमेश्वरया जयजय या!
 2 दक्वसिबय् तःधम्ह
 परमप्रभुलिसे झी गयायेमाः,
 वय्कः पृथ्वी न्यंकया
 तःधम्ह जुजु खः।
 3 वय्कलं जाति जातियात
 झीगु अधीनय् हयादिल
 अले मनूतय्त झीगु पालि
 तःलय् लाकादिल।
 4 वय्कलं झीगु लागि
 सर्बय ल्ययादिल।
 अले थ्व वय्कःया
 यःपिनिगु निति
 गर्वया खँ खः।
 5 परमेश्वर प्रशंसाया सःलिसे
 सिंहासनय् च्वनादीगु दु,
 परमप्रभु तुरहीया सःलिसें
 सिंहासनय् च्वनादीगु दु।
 6 परमेश्वरया प्रशंसा या,
 भजन हा!
 झी जुजुया प्रशंसा या,
 भजन हा!
 7 परमेश्वर पृथ्वी
 न्यंकया जुजु खः,
 वय्कःयात प्रशंसा यानाः

सेला

म्ये हा!
 8 परमेश्वर थःगु
 पवित्र गद्दीइ च्वनादी,
 वय्कलं जाति जातियात
 शासन यानादी।
 9 अब्राहामया परमेश्वरया
 मनूतनापं जाति जातिया
 शासकत मुंगु दु।
 छायाधाःसा पृथ्वीइ च्वपि
 फुक्क जुजुत
 परमेश्वरया ल्हातय् दु।
 वय्कः तसकं तःधंम्ह खः।

48

परमेश्वरया शहर, सियोन
 कोरह वंशयापिनिगु भजन, लय् तइम्हसिगु निंति
 1 परमप्रभु तःधंम्ह खः,
 परमेश्वरया शहरय्,
 वय्कःया पवित्र पर्वतय्
 वय्कः प्रशंसा याये बहःम्ह खः।
 2 परमेश्वरया पर्वत सियोन
 तःजाः अले बालाः।
 तःधंम्ह जुजुया थ्व शहरं
 संसार न्यंक लसता हइ।
 3 परमेश्वर थः हे यरूशलेमया
 किल्ला खः,
 उकिया रक्षा याइम्हकथं
 वय्कलं थःत क्यनादीगु दु।
 4 जुजुतयसं जानाः
 सियोन पर्वतय्
 हमला याः वल।
 5 तर उकियात खनाः

इपि अज् चाल।

इपि ग्यानाः बिस्वुं वन।

6 ग्यानाः इपि अन हे मूहाल।

मचाब् ब्यथा जूम्ह मिसा थें

इपि वाथा वाथा कन।

7 पुर्बयागु फसं

तशींशया जहाजत

कुचा कुचा दः थें

छिं इमित नाश यानादिल।

8 झीसं दक्व शक्ति दुम्ह

परमप्रभुयागु शहरय्,

झी परमेश्वरया शहरय् गथे

न्यनागु खः

अथे हे जूगु नं खना।

वय्कलं थ्व शहरयात

न्हाबले रक्षा याना तइ।

सेला

9 हे परमेश्वर! छिगु देगलय्

जिमिसं छिगु दया मायाया खँय्

ध्यान बियेगु याना।

10 हे परमेश्वर फुक्क थासय्

छिगु प्रशंसा जू।

पृथ्वीया फुक्क थासय्

छिगु नां थ्यंगु दु।

छिं खःकथं न्याय यानादी।

11 सियोनयापि मनूत लय्तायेमा!

छिं यानादीगु न्यायया हुनि

यहदाया फुक्क शहर

लसतां जायेमा!

12 हे परमेश्वरया मनूत,

सियोनया प्यखेरं चाःहिलाः

- ग्वःगः धरहरा दु ल्याःखा!
 13 छं अन दनातःगु पःखाः
 व किल्लायात
 बालाक दुवालाः स्व,
 अले छं लिपाया पुस्तायात
 कने फइ।
 14 छायाःसा परमेश्वर न्ह्याबलें
 झी परमेश्वर खः।
 वय्कलं झीत न्ह्याबलें
 लँ क्यनादी।

49

- धन सम्पत्तिइ
 भलसा तइम्ह मूर्ख मनू
 कोरह वंशयापिनिगु भजन,
 लय् तइम्हयसिगु नितिं
 1 फुक्क मनूतय्सं न्यँ,
 संसारया फुक्क
 मनूतय्सं न्हाय्पं ब्यु,
 2 तःधंपि व चिधंपि,
 तःमि व चीमि,
 फुक्कसिनं थ्व खँ न्यँ!
 3 जिगु म्हुतुं बुद्धियागु खँ
 पिहां वइ,
 अले जिगु बिचाः ज्ञानं जाः।
 4 जिं हितोपदेशय् ध्यान बी।
 अले वीणा थानाः
 जिं उकिया अर्थ कने।
 5 शत्रुतय्सं जितः
 घेरय् याइबलय्

दुःखया इलय् नं
जि गयाये मखु।

6 इमिसं थःगु जक सम्पत्तिइ
भरोसा तइ,
अले धनयागु फुईं क्यनी।

7 धात्थें सुं नं मनूखं
मेम्हय्सित गुबलें मू पुलाः
त्वःतके फइ मखु,

इमिसं परमेश्वरयात
थःगु प्राणया
मू पुले फइ मखु।

8 मनूया प्राण तसकं मू वं
वं गुलि पुले फइ,
उकि गाइ मखु।

9 व न्ह्याबलें म्वानाच्चनी मखु,
व ध्वगिना मवनी मखु।

10 मूर्ख व बुद्धि मदुपि मनूत थें
बुद्धि दुपि मनूत
नं सिनावने हे माः,

इमिगु धन-सम्पत्ति
थः सन्तानया लागि
त्वःतावनेमाः।

11 इमिसं न्ह्याक्व हे
थःगु नामय् जमिन मुंकूसां
इमिगु सदांया छें धयागु
चिहान हे खः।

इपि सदांया निति अन हे च्वनी।

12 धनसम्पत्ति दुसां
मनूत सदांया लागि
दयाच्चनी मखु।

इपि पशु थें जुयावनी,
अले पशु थें सिनावनी।

13 थःके हे जक
भरोसा तइपिन्त थथे हे जुइ,
थःगु धन सम्पत्तिइ जक
लुधंकाच्चंपिन्त थथे हे जुइ।

सेला

14 इपि फै थें सिनावनी
कालं इमित नुनाछवइ।
धर्मीपिन्सं इमित शासन याइ।
इमिगु म्ह थःगु छैनं तापाक
चिहानय् ध्वगिनावनि।

15 तर परमेश्वरं जितः मू पुलाः
त्वःतकादी,
वय्कलं जितः मृत्युयागु शक्तिं
बचय् यानादी।

सेला

16 सुं मन् तःमि जुल,
वयागु छैया गौरव
अप्वयावल धकाः
ग्याये मते।

17 व सीबलय् वं
थःनापं छुं नं यंकी मखु,
वयागु गौरव वं चिहानय् यंकी मखु।

18 म्वाना च्वंतले लुधनाच्चंसां,
अले मनूतय्सं बांलानावःगुलि
इमित तःधंकूसां

19 सीधुंकाः इपि थः पुर्खापिनापं
मिलय् जू वनी।
अन इमिसं गुबलें नं
जः खनि मखु।

20 सम्पत्ति दयाः नं
 दुग्यां मदुपि मनूत
 पशुत थे सिनावनी!

50

धातृथेगु आराधना

आसापया भजन

1 दक्व शक्ति दुम्ह

परमप्रभु परमेश्वरं

पुर्बनिसें पच्छिम तक

संसारय् च्वंपिं

फुक्क मनूतलिसे नवानादीगु दु,

अले सःतादीगु दु।

2 तसकं बांलाःगु सियोन पर्वतं

परमेश्वर थिनावइ।

3 झी परमेश्वर झाइतिनि,

अले वय्कः सुम्क

च्वनादी मखु,

वय्कःया न्ह्यःने

भस्म याइगु मि दु,

अले वय्कःया छचाःखेरं

ग्यानापुगु ग्वःफय् दु।

4 थः प्रजाया न्याय यायेत

वय्कलं आकाश

व पृथ्वीयात सःतादी,

5 “बलि छायाः

जिनापं बाचा च्यूपिं

जिमि विश्वास यायेबहःपिं

मनूतय्त जिथाय् मुंकि।”

6 परमेश्वर थः हे न्यायाधीश खः।

आकाशयात वय्कःया

धार्मिकता घोषणा याकेब्यु!

सेला

- 7 “हे जिमि मनूत न्यँ,
जिं नवाये,
हे इस्राएल,
जिं छंगु विरोधय् साक्षी बी,
जि परमेश्वर खः,
छिमि परमेश्वर।
- 8 छं जिथाय् छायेहःगु
होमबलि व बलिदानया खँय्
जिं छन्त ब्वःबी मखु।
- 9 अयनं छंगु सागःयाम्ह द्रहं
वा छंगु बथांयाम्ह दुगुचा
जितः म्वाः।
- 10 दक्व गुँपशु
व द्रलंद्रः डाँडयापि पशुत
जिगु हे खः।
- 11 पहाड पहाडयापि दक्व
झंगःपन्छितयत्
जिं म्हस्यू
अले ख्यलय् च्वपि
फुक्क प्राणीत जिगु हे खः।
- 12 नयेपित्याःम्ह जूगु जूसां
जिं छन्त धायेगु मखु।
संसार व उकी दुगु फुक्क
जिगु हे खः।
- 13 छु जि द्रहंया ला नयेगु?
वा दुगुचाया हि त्वनेगु?
- 14 परमेश्वरयात सुभाय्या
बलि छा,
अले दकलय् तःधंम्हय्सिगु लागि

थःगु भाकल पूर्वकि!

15 दुःखया इलय्
जितः प्रार्थना या!
जिं छन्त बचय् याये,
अले छं जितः तःधंकी।”

16 दुष्टयात धाःसा परमेश्वरं
धयादी,
“जिगु आज्ञा न्यकेगु
छंगु छु अधिकार?
थःगु म्हुतुं जिगु बाचाया खँ
छाय् ल्हायेगु?
17 छन्त जिं स्यनेकने
याःगु मयः,
अले छं जिगु वचनयात
क्वह्मंकीगु।

18 खुँयात नापलाइबलय्
छ खुँया हे पासा जुइगु,
अले छ व्यभिचारीतनापं
मिलय् जुयाः जुइगु।

19 छ मभिगु खँ ल्हायेत
न्ह्याबले न्ह्यज्याः।
अले मखुगु खँ ल्हायेत
छ भचा नं मछाः मजू।

20 छं थः हे दाजुकिजाया
विरोधय् खँ ल्हाइगु,
छं थः हे मांया काय्या बारे
मखुगु खँ ल्हाइगु।

21 छं थथे याःसां
जिं छं मधया।
जि नं छ थें हे खः धकाः
छं मतिइ तल।
आः जिं छन्त द्रुपं बी,

अले छंगु छता छता दोष
 उलाः क्यने।
 22 हे परमेश्वरयात ल्वमंकीपि न्यँ,
 छिमिसं जितः वास्ता मयाः।
 जिं छिमित कुचा कुचा
 थलाः बी।
 छिमित बचय् याइपिं
 सुं हे दइ मखु।
 23 सुभाय्या बलि
 छाइम्हयसिनं हे
 जिगु महिमा याइ,
 अले जिगु लँय् जूपिन्त
 जिं परमेश्वरयागु मुक्ति क्यने।”

51

क्षमा या नितिं प्रार्थना
 दाऊदया भजन, लय् तइम्हय्सिगु नितिं, नातान अगमवत्तां ब्वःबी धुंकाः दाऊदया
 पश्चातापया नितिं हाःगु भजन☆
 1 हे परमेश्वर!
 जितः दया यानादिसँ।
 छाय्धाःसा छि सदां दया
 यानादीम्ह खः।
 जिगु पाप हुयाछवयादिसँ!
 छाय्धाःसा छि सदां मदिक्क
 माया यानादीम्ह खः।
 2 जिगु फुक्क अधर्मयात
 सिलादिसँ,
 अले जिगु पापं
 जितः शुद्ध यानादिसँ।

3 जिं थःगु अपराध मानय् याये,
अले जिगु पाप न्ह्याबलें
जिगु हे न्ह्याःने दु।

4 हे परमेश्वर,
छिं मभिं धकाः धयादीगु ज्या हे
जिं यानागु दु,
जिं छिगु विरोधय् जक
पाप यानागु दु,
उकिं छिं जिगु न्याय
यानादीगु पाय्छि जू
अले जितः दोषी ठहरय् यानादीगु
पाय्छि ताय्के।☆

5 स्वः, जि बूबलय् हे पापी खः।
मांया प्वाथय् दुबलय् निसें
पापं जाःम्ह खः।

6 छितः बूसांनिसें
भिं मनू जूगु यः।
उकिं जितः छिगु बुद्धि बियादिसँ।

7 जि शूद्र मजुतले
जितः हिसप घाँयूनं सिलादिसँ,
अले जि च्वापु स्वयाः
तुयुसे च्वनी।

8 जितः लसता व आनन्दया खँ
हाकनं न्यंकादिसँ
अले छिं त्वाथुलादीगु क्वय्त
लय्तायेमा।

9 जिगु पापपाखें छिगु ख्वाः
फहीकादिसँ,
अले जिगु फुक्क अधर्म
हुयाछ्वयादिसँ।

10 हे परमेश्वर,
जिगु नुगःयात शुद्ध यानादिसँ।
अले जिके हाकनं न्हगु यानाः
क्वातूगु आत्मा दय्कादिसँ।

11 जितः छिगु न्ह्यःनं
तापाक तयादी मते,
अले थःगु पवित्र आत्मायात
जिपाखें लित यंकादी मते।

12 छिगु मुक्तिया लसता जितः
हाकनं बियादिसँ।

अले जितः
छिगु आज्ञा मानय यायेगु मन
बियाः कःघानादिसँ।

13 अले जिं पापीतय्त
छिगु लें क्यने,
इपिं छिपाखे लिहां वइ।

14 हे परमेश्वर,
हे जिम्ह उद्धारकर्ता परमेश्वर,
जितः मनू स्याःगु अपराधपाखें
बचय यांनादिसँ।

अले जिं छिं बियादीगु
धार्मिकताया नितिं
लयतायाः म्ये हाले।

15 हे परमप्रभु,
जिगु म्हुतु चायेकादिसँ,
अले जिं छितः प्रशंसा याये।

16 बलि छाःगुलिइ
छि लयतायादी मखु,
होमबलिइ नं
छि लयतायादी मखु।

17 ख्वःगु नुगः हे

परमेश्वरया नितिं
 ल्वःगु बलि खः।
 हे परमेश्वर,
 ख्वःगु व पस्ताय् चाःगु
 नुगःयात
 छिं मयय्कादी मखु,
 18 हे परमेश्वर,
 सियोनयात भिं यानादिसँ,
 उकियात ग्वाहालि बियादिसँ।
 यरूशलेमया पःखाः
 हाकनं दयकादिसँ।
 19 अले छि पाय्छिगु बां बीगुलिइ
 लयतायादी,
 व होमबलि बीगुलिइ लयतायादी,
 मनूतयसं हाकनं छिगु वेदीइ
 द्रहं बां बी।

52

परमेश्वरया दया माया व न्याय
 दाऊदया भजन, लय् तइम्हय्सिगु नितिं – एदोमी दोएगं शाऊलयाथाय् वनाः “दाऊद
 अहीमेलेकया छैय् वन” धकाः खँ कं वंगु इलय् दाऊदं च्वःगु भजन।
 1 अय् बल्लाःम्ह मनू!
 छं छाया् मभिगु ज्या यानाः
 फुइँ यानाजुइगु?
 परमेश्वरया दया माया ला
 सदां दयाच्चनी।✧
 2 न्हिच्छिं छं स्यंकेत
 ग्वसाः ग्वया जुइगु,
 छंगु मे ला ज्वःगु छुरि थें च्वं,
 छं मखुगु खँ ल्हायेगुलिइ
 तसकं जाः।

3 छं भिंगु स्वयाः

मभिंगु यय्काजुल,

खःगु खँ स्वयाः

मखुगु खँ यय्काजुल।

सेला

4 हे बेइमान मे,

छन्त फुक्क स्यंकीगु खँ यः।

5 छन्हू छन्त ज्वनाः

परमेश्वरं सदांया निति

नाश यानादी,

वय्कलं छन्त छंगु छँनं

पित हयादी।

अले म्वाःपिनिगु थासं

छन्त हानापं ल्यहें थनाः

वान्छवयादी।

सेला

6 थ्व खनाः धर्मीत गयाइ,

इमिसं हेस्यानाः थथे धाइ,

7 “स्व, थ्व व हे मनू खः

गुम्हय्सिनं परमेश्वरयात

थःगु किल्ला मदय्क्,

तर थःगु धनय् भलसा तल,

मेपिन्त स्यंकाः थः बल्लात।”

8 जि ला परमेश्वरया छँय् च्वंगु

जैतूनया सिमा थें खः।

परमेश्वरयागु दया मायाय्

न्हाबलें विश्वास याना।

9 जिं न्हाबलें छिं

यानादीगु ज्याया निति

छितः तःधंके, हे परमेश्वर!

छिकपिनि विश्वास यायेबहःपि

मनूतय् न्ह्यःने

जिं छिगु नांयात तःधके,
छाय्धाःसा छिगु नां भिं।

53

परमेश्वर मदु ला?

दाऊदया मश्किल, लय् तइम्हय्सिगु निंतिं
महलत लय्कथं*

1 मूर्खतय्सं नुगल्य्

“परमेश्वर द हे मदु”
धकाः धाइ।

इमिगु मति मभिंगु दु।

इमिसं घच्चाइपुगु ज्या जक
यानाच्चवंगु दु।

भिंगु ज्या याइपिं सुं हे मदु।☆☆

2 बुद्धि दुपि सुं दु ला,

अले परमेश्वरयात मालाजुइपिं
सुं दु ला धकाः

परमेश्वरं स्वर्गं क्वय् मनूतय्थाय्
स्वयादी।

3 इपिं मखुगु लैय् वने धुंकल।

इपिं स्यनावने धुंकल।

भिंगु याइपिं छम्ह हे
मदये धुंकल।

4 थुपि मभिंगु यानाजुइपिन्सं

गुबलें हे सय्की मखु ला?

इमिसं जिमि मनूतय्त्त मरि नये थें
नयाच्चन।

* 53: ५३:० महलत छगु कथंयागु भजन खः।

☆ 53:1 ५३:१-६ भज १४

☆ 53:1 ५३:१-३ रोम

अले परमेश्वरया नां हे
 काइ मखु।
 5 थन इमित गुबलें हे मजूकथं
 ग्याःचिकुं भुनी।
 छायाःसा परमेश्वरं
 थःमनूतयगु विरोधय्
 घेराबियाच्चर्पिनिगु क्वैय्
 उखेंथुखें हलाबी।
 वय्कलं इमित मछालापुकाबी,
 छायाःसा वय्कलं
 इमित त्वःतादी।

6 इस्राएलीतयगु उद्धार
 सियोनं वःगु जूसा
 गुलि बांलाइ!
 गुबलय् परमेश्वरं
 थःमनूतयगु अवस्था
 हाकनं बांलाकादी,
 उबलय् इस्राएलया मनूत
 लयतायाः हाली।

54

शत्रुपाखें छुत्काराया नितिं प्रार्थना

दाऊदया मश्किल, लय् तइम्हय्सिगु नितिं — तारं थाइगु बाजं थानाः हालेगु।
 जीफितयसं शाऊलयाथाय् वनाः “दाऊद गन सुलाच्चंगु दु जिमिसं स्यू” धकाः
 धाःबलय्।

1 हे परमेश्वर!

छिं थःगु नामं जितः

बचय् यानादिसँ!

छिगु शक्तिं

जितः छुत्कारा बियादिसँ।

2 हे परमेश्वर!

जिगु प्रार्थना न्यनादिसँ!

जिगु सः न्यनादिसँ!

3 शत्रुत जिगु विरोधय्

जुयाच्चंगु दु।

ग्यानापुसे च्वपिं मनूतय्सं

जितः स्यायेत स्वयाच्चंगु दु।

इमिसं परमेश्वरयागु

भय मकाः। ☆

सेला

4 स्व, परमेश्वरं जितः

ग्वाहालि यानादी।

परमप्रभु जितः

लिधंसा बीम्ह खः।

5 परमेश्वरं जिमि शत्रुतयगु

मभिंगु ज्या इमित हे

लित बियादीमा।

छिं थःम्हं धयादी थें

इमित नाश यानादिसँ।

6 जिं छितः लय्तायाः

मेलबलि छाये हये।

जिं छिगु नांयात तःधंके,

हे परमप्रभु!

छाय्धाःसा छि भिंम्ह खः।

7 वय्कलं जितः

फुक्क दुःखकष्टं छुत्कारा

बियादिल।

अले वय्कलं जिमि शत्रुतयत्

बुकादीगु जिं खनागु दु।

55

पासां धोखा ब्यूह

मनूया प्रार्थना

दाऊदया मशकिल, लय् तइमहय्सिगु निति – तार दुगु बाजं थाना: हालीगु।

1 हे परमेश्वर,

जिगु प्रार्थना न्यनादिसँ।

ग्वाहालिया निति यानागु

जिगु इनाप

मन्यंसे च्वनादी मते।

2 जिगु सः न्यना:

लिसः बियादिसँ।

जितः तःधंगु दुःखकष्टं

ल्हाःवयाच्चंगु दु।

3 शत्रुतयगु ख्याच्चलं

जि ग्यानाच्चनागु दु

मभिंपिं मनूतयगु बेक्वः मिखां

जितः दुःखकष्ट बियाच्चंगु दु।

इपिं जि खनाः तंचाःगु दु

अले जितः तसकं मयय्कूगु दु।

4 जिगु नुगः ग्याःचिकुं

जाये धुंकल।

सी धकाः नं ग्याये धुन।

5 ग्यानाः जि थुरथुर खाये धुन

जिगु म्हाय् ज्यू मदये धुंकल।

6 अले जिं धया,

“जिके सुकुभत्तुयाके थे

पपू दुगु जूसा

ब्वयावनाः मन याऊँक

च्वनेगु खः।

7 तापाक्क ब्वयावनाः

मरुभूमिइ च्वंवेनेगु खः।”

सेला

8 ग्वःफय् व वाफसं बिस्युं वनाः
थःगु बासय् च्वनेगु खः।

9 इमित नाश यानादिसँ,
हे परमप्रभु।
इमिगु दथुइ थवंथवय् खँ
ल्वाकःबुकः यानाबियादिसँ।
छाय्धाःसा जिं शहरय्
ल्वापु व घाराघुरु जूगु
खनागु दु।

10 चान्हि इमिसं
शहरया पःखालय् गयाः
पाः बी।
शहरया दुने धाःसा
ल्वापुख्यापु व मभिं मज्यु
फुक्कं जुयाच्चनी।
11 शहरया दुने फुक्क थासय्
नाश जक दु,
अनया लँय् ल्वापु
व ख्यापु धयागु गुबलें मप्वं।

12 जितः महीपिं
जिमि शत्रुत मखु,
इमित ला
जिं सहयाना च्वने फु।
जितः मभिकाच्चपिं
जिमि शत्रुत मखु,
इपिलिसे ला
जि बिस्युं जुइफु।

13 व ला छ खः,
जि हे ज्वलिज्वःम्ह,
जिमि पासा,

जिमि स्याःन्याःम्ह पासा।

14 जिमि दथुइ

फुक्क खँ ब्या।

जिपि न्ह्याबले नापं

परमेश्वरया छैय् वनेगु खः।

15 जिमि शत्रुतयत

आकाझाकां कालं काःवयेमा,

म्वाःम्वाकं हे

इपि पातालय् वनेमा।

छाय्धाःसा इमिगु नुगः

मभिगु खं जाः।

16 जिं परमेश्वरयात

ग्वाहालिया नितिं प्रार्थना याये।

वय्कलं जितः बचय् यानादी।

17 सुथय्, न्हिनय्, बहनी

जिं ततःसलं जिगु दुःख न्यंकाः

प्रार्थना याये।

अले परमप्रभुं जिगु सः न्यनादी।

18 यक्व शत्रुत दःसां

वय्कलं जितः छुं हे मजुइक

ल्वानाच्चवनागु लडाइँनं

बचय् यानादी।

19 न्हापांनिसें राज्य

यानावयाच्चवंम्ह परमेश्वरं

जिगु सः न्यनादी।

सेला

अले वय्कःया भय मकाइपिं

व थःपिनिगु लँपु महिलीपिं

जिमि शत्रुतयत बुकादी।

20 जिमि पासां

जिगु विरोधय् वनाः
थःगु बचंयात त्वाथल।

21 वयागु सः घ्यः थें पिचुसे च्वं,
नुगः धाःसा ल्वापुं जाः
वयागु खँ घ्यः थें नाइसे च्वं,
तरवार स्वयाः ज्वः।

22 थःगु दुःखकष्टयात
परमप्रभुयाथाय् त्वःताथकि,
वय्कलं छिमित स्वयादी
वय्कलं धर्मीं मनूतय्त गुबलें नं
बुकेबी मखु।

23 तर हे परमेश्वर, छिं दुष्टतय्त
विनाशया गालय् क्वफानादी।
मनू स्यानाजुइपिं व फताहात
मत्यवं हे सिनावनी।
तर जिं ला छितः विश्वास
यानाच्चने,
हे परमेश्वर!

56

परमेश्वरयागु भरोसाया प्रार्थना
दाऊदया भजन, लय तइम्हयसिगु निति, “तापाक स्वंसिमाय् च्वनाच्चंम्ह सुकुभतु”
या रागय पलिशतीतय्सं गात शहरय् ज्वंबलय्।

1 हे परमेश्वर,
जितः दया यानादिसँ।
जिमि शत्रुतय्सं जितः न्ह्याबलें
लितुलिनाच्चन।

इमिसं जितः हय्क्कायेत

स्वयाच्चन।☆

2 जितः महीपिन्सं जितः
 न्हिच्छि हे लिनाच्चन।
 गुलि गुलिसिनं ला घमण्ड यानाः
 हयक्कायेत नं स्वयाच्चन।

3 ग्याइबल्य जिं थःगु भरोसा
 छिके हे तये।

4 जिं परमेश्वरयागु वचनयात
 तःधंकाच्चना,
 व हे परमेश्वरयात जिं
 भरोसा यानागु दु।

जि ग्याये मखु।
 मनूतयसं जितः छु याये फइ?

5 इमिसं न्ह्याबलें जिगु खँयात
 अःखतं थुइकाच्चनी।
 अले न्ह्याबलें जितः दायेगु
 ग्वसाः ग्वयाच्चनी।

6 इमिसं न्ह्याबलें जितः स्यायेगु
 त्वह दइ ला धकाः
 पलाः पलाः पतिं
 चिवा कयाच्चनी।

7 हे परमेश्वर!
 इमिगु मभिंगु ज्याया निंति
 इमित सजाँय बियादिसँ।

थःगु तमय् जात जातितय्त
 क्वथलादिसँ।

8 छिं स्यू जिं गुलि दुःखकष्ट
 फये धुन।

छिं जिगु ख्वबिया ल्याःचाः

तयादीगु दु।

छिं थ्व फुक्क थःगु सफुलिइ
च्वयादीगु दु।

9 जिं ग्वाहालिया निंतिं छितः
प्रार्थना यायेबलय्
जिमि शत्रुत बिस्युं वनी।

परमेश्वर जिलिसें हे दु धकाः
जिं स्यू।

10 जिं परमेश्वरया वचनयात
तःधंका।

जिं परमपप्रभुया वचनयात
तःधंका।

11 जिं परमेश्वरयात भरोसा याना।
जि गयाये मखु,

मनूतय्सं जितः छु याये फइ?

12 हे परमेश्वर!

जिं यानागु भाकल पूर्वके।
जिं छितः सुभायया
बलि छाये हये।

13 छायाःसा छिं जितः मृत्युपाखें
बचय् यानादीगु दु।

छिं जितः लुफि हानाः
दय्केबिया मदी।

उकिं जि छिगु न्ह्याःने
जीवन बीगु जलय् जुइफुगु दु।

57

ग्वाहालिया निंति प्रार्थना

दाऊदया भजन। लय् तइम्हय् सिगु निंति, “स्यंके मते” धाःगु रागय् हालेगु।
शाऊलपाखें बिस्सु वनाः गुफाय् सुलाच्चंबलयागु खः।

1 जितः दया यानादिसँ,
हे परमेश्वर!

जितः दया यानादिसँ!

जि छिगु शरणय् वयागु दु।

थ्व आपत् चिलामवंतले
जि छिगु पपूया किचलय्
शरण कयाच्चने।☆

2 जिं दक्वसिबय् तःधंम्ह
परमेश्वरयात् प्रार्थना याये।
वय्कलं जिगु सकतां पूवकादी।

3 वय्कलं जिगु निंति स्वर्ग
ग्वाहालि छवयाहयादी,
अले जितः बचय् यानादी।
वय्कलं जितः लितुलिनाजूपिन्त
बुकाछवयादी।

सेला

वय्कलं गुब्सं मफुइगु
थःगु दया माया
व वय्कः विश्वास याये
बहःम्ह खः धकाः क्यनादी।

4 जि मनू नइपिं सिंह थज्याःपि
शत्रुतयगु दथुइ च्वंच्वनागु दु।
थुमिगु वा भाला व वाण थें च्वं।
थुमिगु मे ज्वःगु तरवार थें च्वं।

5 हे परमेश्वर!

छि आकाश स्वयाः नं तःधनेमा।
 छिगु महिमा
 पृथ्वी ब्याक्क न्यनेमा।

6 जिमि शत्रुतयस्सं जिगु नितिं
 जाः ग्वयातःगु दु।
 जि दुःखं न्यलेधुन।
 इमिसं जिगु लँय् गाः म्हुयातल,
 तर इपिं थःपिं हे
 व गालय् कुतुंवन।

सेला

7 जिगु नुगः क्वातु, हे परमेश्वर,
 जिगु नुगः क्वातु।
 जिं म्ये हालाच्चवे,
 छितः तःधंकाच्चवे।
 8 अय् जिगु आत्मा, दँ।
 अय् वीणा दँ,
 अय् सारंगी दँ।
 जिं सुथयात नं थनाबी।

9 हे परमप्रभु,
 जिं फुक्क मनूतय्गु न्ह्यःने
 छितः सुभाय् बी।
 जिं जात जातियापिनिगु न्ह्यःने
 छितः तःधंकाः म्ये हाले।

10 छायाःसा छिगु
 सदां दयाच्चनीगु दया माया
 स्वर्ग स्वयाः तःधं,
 छिगु विश्वास याये बहःसू
 आकाश स्वयाः तःजाः।

11 हे परमेश्वर!
 छि आकाश स्वयाः नं तःधनेमा।
 छिगु महिमा

पृथ्वीया फुक्क थासय् न्यनेमा।☆

58

मभिं गु ज्या याइपिनिगु निंति प्रार्थना

दाऊदया भजन, लय् तइम्हय्सीगु निंति – “स्यंके मते” धाःगु रागय् हालेगु।

1 हे शासकपि! छिमिसं

छु न्याययागु हे खँ

ल्हाना च्वनागु दु ला?

छु छिमिसं मनूतय् खःकथं

न्याय यानाच्वनागु दु ला?

2 मदु, छिमिगु नुगलं

मभिं गु ग्वसाः जक ग्वयाजुइ।

छिमिगु ल्हाति संसारय्

ल्वायेगु व स्यायेसीगु ज्या

जक जुयाच्वंगु दु।

3 मभिं पिं मनूतय् सँ मसीतले

मभिं गु ज्या जक यानाच्वनी।

बूसांनिसें हे इमिसं

मखुगु खँ ल्हायेगु

व बेक्वःगु लैय् जुइगु याइ।

4 इपिं सर्प थें बिखं जाइ,

गोमन सर्पया बिख थें,

सुनां थःगु न्हाय्पंप्वाः तिनातइ।

5 उकिं जादु क्यनीम्हय्सीगु

सःयात नं इमिसं

वास्ता याइ मखु।

न्हाक्व हे तन्त्रमन्त्र सःम्हय्सीगु

मन्त्रयात नं

इमिसं वास्ता याइ मखु।

6 हे परमेश्वर,
 इमिगु धँवा त्वथुलाब्यु!
 हे परमप्रभु,
 थुपि सिंहतयगु वाकुधी हे
 ल्यहेंथनाब्यु!

7 खुसिबाः वनीगु लः थें
 इपि तनावनेमा
 इमिगु ल्वाभः इमिगु ल्हातिइ हे
 ज्याख्यलय् मदयेमा।

8 संखकी थें लँय् वँव हे
 इपि तनावनेमा।
 अले निभाः हे स्वये मखंम्ह
 बूबलय हे सीम्ह मचा थें
 जुइमा।

9 कंया मिइ देछुइगु थल
 क्वाये न्ह्यः
 व वाउँगु जूसां गंगु जूसां
 उकियात फसं पुइकायंकु थें
 वय्कलं दुष्टतयत्
 पुइकायंकदी।

10 पापीतयत् सजौय ब्यगु खनाः
 धर्मी मनूत लय्ताइ।
 इमिसं दुष्टतयगु हिं
 थःपिनिगु तुति सिली।

11 अले मनूतयसं धाइ,
 “धर्मीतयसं आः नं
 सिरपाः कायेखनि तिनि।
 परमेश्वर धात्थें हे दनि,
 अले वय्कलं
 पृथ्वीइ न्याय यानादी।”

59

सुरक्षाया निंति प्रार्थना

दाऊदया भजन, लय् तइम्हय्सिगु निंति — “स्यंके मते” धाःगु रागय्, शाऊलं
दाऊदयात स्यायेत वयागु छैय् मनूत छवयाहःगु

1 हे परमेश्वर,

जितः जिमि शत्रुतय्पाखें

बचय् यानादिसँ।

जितः हय्क्काः वःपिपाखें

जितः बचय् यानादिसँ।

2 मभिंपिं मनूतय्पाखें

जितः बचय् यानादिसँ।

मनू स्याना जुइपिपाखें

जितः बचय् यानादिसँ।

3 जिं छुं मभिंगु व पाप

यानागु मदुसां

इमिसं जितः स्यायेत

स्वयाच्चंगु दु।

ज्यानमारात जिगु विरोधय्

मुनाच्चंगु दु।☆

4 जिं छुं अपराध यानागु मदुसां

इपिं जितः हय्क्काः वयेत तयार

जुयाच्चंगु दु।

हे परमप्रभु,

जितः बचय् यायेत दनादिसँ।

जितः जुयाच्चंगु दुःख

स्वयादिसँ।

5 हे दक्व शक्ति दुम्ह

परमप्रभु परमेश्वर,

हे इस्राएलया परमेश्वर,

फुक्क जातियापिन्त सजाँय बीत
 दनादिसँ।
 ध्वखा बीपिन्त दया माया
 क्यनादी मते।

सेला

6 बहनिइ इपि लिहां वइ।
 अले खिचात थें हालाः
 शहरया प्यखें चाःहिला जुइ।

7 इमिसं म्हुतु ल्हाना जूगु व ख्याच्चः
 बियाजूगु न्यनादिसँ।
 इमिगु मे तरवार थें ज्वः।

उमिसं धयाजुइ,
 “सुं दु ला न्यनीपिं?”

8 तर हे परमप्रभु!
 छि इपि खनाः न्हिलादी।
 अले अज्याःपि फुक्कसित
 हिस्यानादी।

9 छि जिगु बल खः।
 छिं जितः बचय् याःवइ धकाः
 जि पियाच्चने।
 छि जिगु किल्ला खः।

10 परमेश्वरं जितः माया यानादी।
 अले वयकः जिथाय् झाइ।
 परमेश्वरं जितः जिमि शत्रुत बूगु
 क्यनादी।

11 हे परमप्रभु, हे जिमिगु ढाल।
 इमित याकनं स्यानादी मते।
 मखुसा जिमि मनूतय्सं इमिगु
 मभिंगु खँ ल्वःमंका छवइ।
 थःगु शक्तिं छ्यालब्याल यानाः

इमित बुकादिसँ।

12 इमिगु म्हुतुइ पाप दु

इमिगु खँ पापं जाः

इपिं इमिगु हे घमण्डया जालय्
लायेमा।

छाय्धाःसा इमिसं सराः बीगु

व मखुगु खँ ल्हानाजुइगु
यानाच्चन।

13 उकिं इमित थःगु तमय्

नाश यानादिसँ।

इमित न्हंक हे

नाश यानादिसँ।

अले सकसिनं सी-

परमेश्वरं इस्राएलय् राज्य यानादी।

अले वयकःया राज्य

पृथ्वी न्यंकं न्यनावनी।

सेला

14 जिमि शत्रुत बहनिइ लिहां वइ।

अले खिचात थें हालाः

शहरया प्यखें चाःहिला जुइ।

15 इपिं नसाया नितिं

उखेंथुखें चाःहिला जुइ।

अले लुधंक नये मखन कि

खिचात थें हाला जुइ।

16 तर जिं ला छिगु शक्तिया

म्ये हाले।

छिगु मदिकक दयाच्चनीगु

मायाया म्ये जिं सुथ न्हापां

न्हाबलें हाले।

छिं जितः जिगु दुःखकष्टया इलय्

शरण बियादीगु दु।

17 छि जिगु बल खः,

जिं छितः तःधंकाः म्ये हाले।
 छि जिगु किल्ला खः,
 परमेश्वरं जितः
 सदा माया यानादी।

60

लडाइँलय् बुनाः याःगु प्रार्थना

दाऊदया भजन, लय् तइम्हयसिगु निति – स्यनेकने यायेत दाऊदं आराम नहैरैम व
 आराम सोबाहलिसैं लडाइँ याःबलय् अले योआबं लिहां वनाः चिया गालय् झिनिद्रः
 एदोमीतयत् स्याःबलय्यागु, साक्षीया “लिली स्वां” या रागय्

1 हे परमेश्वर!
 छिं जिमित त्वःतादिल।
 जिपिं खनाः छि तंम्बयादीगु दु।
 उकिं जिमिगु रक्षा यायेगु नं
 त्वःतादिल।
 जिमित हाकनं स्वयादिसैं।☆
 2 छिं जिमिगु बँयात
 लिगिलिगि संकाब्यूगु दु,
 जिमिगु बँयात चिरिफायाब्यूगु दु।
 आः थुकियात
 जाय्काबियादिसैं,
 छायाःसा थ्व आः नं
 सनाच्च्वगु दु।

3 छिं थः मन्तयत्
 तःधंगु दुःखकष्ट बियादिल
 अले जिमित अय्लाःगुलुत थें
 लिगिलिगि संकाबिल।

4 छिं छिगु भय काइपिन्त

☆ 60:1 ६०:१ २ शमू ८:१३; १ इति १८:१२

ख्याच्चः बियाः नाश जुइपाखें
बचय् यानादिल।

सेला

5 छिं बल्लाःगु जव लहातं
जिमित बचय् यानादिसँ,
जिमिगु प्रार्थनाया
लिसः बियादिसँ।
छिं माया यानातःपिं मनूत
बचय् जुइमा।☆

6 परमेश्वरं थःगु पवित्र थासं
थथे धयादीगु दु -

“जिं त्याकेधुंकाः
शकेमयात ब्वथले।
अले सुक्कोतया गाःयात
थः मनूतयूत इनाबी।

7 गिलाद व मनश्शेनं
जिगु हे खः।
एफ्राइम जिगु छ्यंया
सुरक्षा खः।

यहदा जिगु
राजदण्ड खः।

8 मोआब जिगु
ल्हाः सिलेगु थल खः।

एदोमय् जिं थःगु
लाकां वांछवये।
थुकथं थ्व जिगु खः
धकाः क्यने।

पलिशत देशयात त्याकाः
जि चिल्लाय् दनाः हाले।”

9 हे परमेश्वर,
सुनां जितः प्यखें पःखाः दुगु

- शहरय् यंकाबी?
 सुनां जितः एदोमय् थ्यंकाबी?
- 10 हे परमेश्वर,
 छु धात्थें हे छिं जिमित
 त्वःतादियागु ला?
 आः छि जिमिगु सेनालिसे
 जुइ मखुत ला?
- 11 शत्रुतलिसे ल्वायेत जिमित
 ग्वाहालि यानादिसँ
 छाय्धाःसा मनूतय्गु ग्वाहालि
 ज्याख्यलय् मदु।
- 12 परमेश्वरया ग्वाहालि
 जिमिसं त्याके,
 वय्कलं जिमि शत्रुतय्
 बुकादी।

61

- सुरक्षाया निंति प्रार्थना
 दाऊदया भजन, लय् तइम्हय्सिगु निंति – तार बाजं थानाः हालेगु
- 1 हे परमेश्वर!
 जिगु ख्वःसः न्यनादिसँ।
 जिगु प्रार्थना न्यनादिसँ।
- 2 जि नुगः मछिन कि
 पृथ्वीया ताताःपाःगु थासं
 जिं छितः ग्वाहालिया निंति
 बिन्ति याये।
 जितः सदां सुरक्षित जुइगु
 ल्वहधिकय् यंकादिसँ।
- 3 छाय्धाःसा छि
 जिगु शरण कायेगु थाय् खः।

अले बल्लाःगु किल्ला नं खः।
जिमि शत्रुत अन थ्यंके
फइ मखु।

4 छिगु थासय् जितः सदांया नितिं
च्वने बियादिसँ।

छिगु पपूया किचलय् जितः
सुरक्षित यानाः तयादिसँ।

सेला

5 हे परमेश्वर,
छिं जिगु भाकल न्यनादीगु दु।

छिं जितः छिगु भय काइपिन्त दइगु
भिंगु खँ बियादीगु दु।

6 जुजुयागु आयु ताहाकः
यानादिसँ,

व पुस्तां पुस्ता तक
म्वानाच्वनेमा।

7 हे परमेश्वर,

छिगु न्ह्यःने वं न्ह्याबलें
राज्य यानाच्वनेमा।

छिगु सदां दयाच्वनीगु माया
व विश्वासं
वयात सुरक्षा बियादिसँ।

8 थुकथं जिं न्ह्याबलें

थःगु भाकल पूर्वकाः
छिगु नांयात तःधंकाच्वने।

62

सुरक्षाया निंति परमेश्वरया भलसा
दाऊदया भजन, लय् तइम्हय्सिगु निंति –
यदतून रागय्

1 जिगु मनं परमेश्वरयाके
जक झासु लनी।

जिगु उद्गार
वय्कःयापाखें जक जुइ।

2 वय्कः जक जिगु ल्वहंधी खः,
अले वय्कलं
जितः उद्गार यानादी।

वय्कः जिगु किल्ला खः,
जि गुबलें बुइ मखु।

3 क्वदलेत्यंगु पःखाः थें च्वंम्ह
याकःचाम्ह मनूयात
छिमिसं गुबलय् तक
हयकायाच्चनेगु?

4 छिमिसं जितः जिगु थासं
क्वफायेत स्वयाच्चंगु दु।

छिपिं मखुगु खँ ल्हायेगुलिइ हे
लयतायाच्चन!

छिमिसं म्हुतुं सुवाः बियाच्चंसां
नुगलं धाःसा
सराः बियाच्चंगु दु।

सेला

5 हे जिगु मन,
परमेश्वरयाके जक झासु लंकि।
छाय्धाःसा जिं परमेश्वरपाखें हे
जक आशा यानागु दु।

6 वय्कः जक जिगु ल्वहंधी खः,
अले वय्कलं जितः

उद्धार यानादी।
 वय्कः जिगु किल्ला खः,
 जि गुबले बुइ मखु।
 7 जिगु उद्धार परमेश्वरपाखें
 जक जुइ।
 परमेश्वरपाखें
 जक जितः इज्जत दइ।
 वय्कः जिगु शरण कायेगु
 थाय् खः।
 वय्कः जिगु किल्ला खः।

8 हे मनूत! वय्कःयात
 न्ह्याबले विश्वास या।
 थःगु नुगः वय्कःयात
 चाय्काः क्यँ।
 छायाःसा परमेश्वर झीगु शरण
 कायेगु थाय् खः।

सेला

9 चिधंपि मनूत छम्ह सासः
 जक खुः।
 तःधंपि मनूत पिनें खने दु थें मदु।
 लनास्वल धाःसा
 इपि याउँसे च्वं,
 निम्हु फय् स्वयाः याउँसे च्वं।

10 मभिंगु ज्याखँय्
 विश्वास याये मते
 खुयाहयागु सम्पत्तिइ
 घमण्ड याये मते।
 धिबा यक्व दयावःसां
 उकी नुगः क्वसाय्के मते।

11 परमेश्वरं तःकः हे
 थथे धयादीगु जिं न्यनागु दु,

“शक्ति जिगु खः,
 12 सदां दयाच्चनीगु माया
 नं जिगु हे खः।”
 हे परमप्रभु
 छिं मनूतयगु ज्या स्वयाः
 सिरपाः बियादी।☆

63

परमेश्वरया माया
 जीवन स्वयाः तःधं
 दाऊदया भजन, यहूदाया मरुभूमिइ च्वनाच्चंबलय्
 1 हे परमेश्वर,
 छि जिम्ह परमेश्वर खः।
 जिं छितः दुनुगलनिसें
 मालाजुया।
 गंगु, झिजांमिझां दंगु व लः मदुगु बैं थें
 जिगु नुगः छि मदयाः प्याःचाः।☆

2 जिं छितः पवित्र थासय्
 खनागु दु।
 अले छिगु शक्ति व महिमा
 नं खना।
 3 छिगु माया जीवन स्वयाः तःधं।
 उकिं जिं न्ह्याबलें
 छितः तःधंके।
 4 उकिं जिं मसीतले
 छितः तःधंके।
 छिगु ना कयाः जिं थःगु
 ल्हाः ल्हने।
 5 जिगु नुगः तःजिगु भवय् नये थें
 लुधंगु दु।

☆ 62:12 ६२:१२ अयू ३४:११; यर १७:१०; मत्ती १६:२७; रोम २:६; प्रका २:२३

☆ 63:1 ६३:१ १ शम्

जिगु म्हुतुं छिगु म्ये हालाः छितः
तःधंकाच्चनी।

6 जिं लासाय् नं छितः लुमंके।
चच्छिं जिं छिगु ध्यान
यानाच्चने।

7 छायाधाःसा छिं जितः न्हाबले
ग्वाहालि यानादीगु दु।

छिगु पपूया किचलय्
जिं लसताया म्ये हाले।

8 जिगु आत्मा छिलिसे
प्यपुनाच्चंगु दु।

छिगु जव ल्हाति जितः
तिबः बियाच्चंगु दु।

9 जितः स्यायेत स्वयाच्चपिं
नाश जुयावनी।
इपि पातालय् कुतुं वनी।

10 इपि तरवारं पालाः सी।
अले ध्वंतयगु आहार जुइ।

11 जुजु परमेश्वरलिसे
लयतायाच्चनी।

वय्कःयात विश्वास याइपिन्सं
वय्कःयात तःधंकी।

मखुगु खँ ल्हानाजुइपिनिगु
म्हुतुप्वाः धाःसा ति।

64

शत्रुतपाखें रक्षाया नितिं प्रार्थना
दाऊदया भजन, लय् तइम्हय्सिगु नितिं
1 हे परमेश्वर,

- जि दुःखय् लाःगु दु,
जिगु प्रार्थना न्यनादिसँ।
जिमि शत्रुतयगु ख्याच्चलं
जितः बचय् यानादिसँ
- 2 मभिपिनिगु ग्वसाःपाखें व
मखुगु ज्या यानाजुइपिनिगु
पुचःपाखें
जितः सुचुकादिसँ।
- 3 इमिसं थःपिनिगु मेयात
तरवार थें ज्वय्कातइ।
इमिसं नवाइबलय् नं
वाणं कय्क् थें नवाइ।
- 4 इमिसं द्वं मदुपिन्त सुलाः
कय्की,
आकाझाकां इमिसं
वयात मग्यासँ कय्की।
- 5 इमिसं थवंथवय् मभिगु
ग्वसाः ग्वयाजुयेत
तिबः बियाजुइ।
गय् यानाः जाः ग्वयेगु धकाः
इमि सल्लाह याना जुइ।
इमिसं धयाजुइ,
“झीगु ग्वसाः सुनां सीके फइ?”
- 6 इमिसं मभिगु ग्वसाः
ग्वयाः धाइ,
“झीसं धिसिलाक्क ग्वसाः
ग्वयागु दु।”
मनूतयगु नुगः व मन
थुइकां थुइके थाकु।
- 7 तर परमेश्वरं थःगु वाणं

इमित कयकादी।
 आकाझाकां हे इपिं
 घाःपाः जुइ।
 8 इमिगु थःपिनिगु हे खं
 इपिं नाश जुइ।
 इमित खंपिं सकसिनं
 छ्यं फस्वकाः वनी।

9 मनूत सकलें गयाइ।
 इमिसं परमेश्वरं यानादीगु
 ततःधंगु ज्या लुमंकी।
 अले वय्कलं यानादीगु ज्या
 कनाजुइ।
 10 धर्मीं मनूत सकलें
 परमप्रभुया ज्यां लयताइ।
 अले वय्कःया शरण्य वनी।
 वय्कःयात दुनुगलं मानय् याइपिं
 सकसिनं वय्कःयात तःधंकी।

65

प्रशंसा व सुभाय्
 दाऊदया भजन, लय् तइम्हयसिगु निंति – छपु म्ये
 1 हे परमेश्वर,
 जिमिसं छितः सियोनय्
 तःधंकेत पियाच्चवना।
 अले जिमिसं छिगु नामय्
 यानागु भाकल नं पूर्वंके।
 2 हे जिमिगु प्रार्थना न्यनीम्ह
 परमेश्वर,
 फुक्क मनूत छिथाय् वइ।
 3 जिपिं पापं बिलिबिलि

जायाच्चने धुंकूसां
छिं जिपिं फुक्कसित
क्षमा यानादिसैं।

4 धन्य खः छिं ल्ययाः
थःनापं पवित्र थासय्
हःपिं मनूत।
छिगु पवित्रगु देगःया आशिषं
जिपिं तसकं लुधं।

5 हे जिमित उद्धार याइम्ह
परमेश्वर,
छिं जिमिगु प्रार्थनाया लिसः
अजू चायापुगु ज्या
यानाक्यनाः बियादी।
पृथ्वीया कुंकुलामय् च्वंपिं मनूत
व समुद्रया तापाक्क तापाक्क
च्वंपिं मनूतय्सं नं
छितः विश्वास याःगु दु।

6 छिं थःगु शक्तिं च्वापुगुँतय्त दय्काः
थथःगु थासय् तयादिल

7 छिं समुद्रया किसिद्रुम्बः
व मनूतयगु हाःह्यात नं
दिकादिल।

8 छिगु अजू चायापुगु ज्या खनाः
पृथ्वीया कुंकुलामय् च्वंपिं
मनूत ग्याःगु दु।

छिं थःगु ज्यां निभाः लुइगु थासंनिसैं
निभाः बीगु थासय् थ्यंक
लसतां भय्बिका ब्यूगु दु।

9 छिं पृथ्वीयागु च्युताः कयादी,
अले उकियात लः बियाः
सय्कीगु यानादी।

- बुँइ अन्न सयकेत
 परमेश्वरया खुसि लखं जाः।
 छिं थथे थुकथं यानादी –
- 10 छिं क्वानातःगु बुँयात लखं
 गाक्क प्याकादी,
 वा वय्काः चायात नाइकादी
 अले अन्नमा सयकादी।
- 11 छिगु कृपां गुलि यक्व अन्न सइ।
 छिं गन पलाः तयादी,
 अन गाक्क अन्न सइ।
- 12 मरुभूमिया ख्यःत वाउँसे च्वं
 अले पहाडत लसतां भय् ब्यू।
- 13 ख्यःत फै व च्वलयतय्सं जाः
 बुँत अन्नं जाः।
 फुक्कं मिलय् जुयाः
 लसतां म्ये हाला जुइ।

66

- प्रशंसा व सुभाय्या भजन
 लय् तइम्हय्सिगु नितिं- छपु भजन
- 1 पृथ्वीइ च्वंपिं फुक्कसिनं
 परमेश्वरयात लयतायाः
 जयजय या।
- 2 वय्कःया नांया
 महिमा यानाः म्ये हा।
 वय्कःयात महिमा यानाः
 तःधंकि।
- 3 परमेश्वरयात धा,
 “छिं यानादीगु ज्या
 गपायसकं अजू चायापु।
 छिगु शक्ति नं थुलि तःधं,

शत्रुत छिगु न्ह्यःने ग्यानाः
कय्कुनी।

4 पृथ्वीइ च्वंपि फुक्कसिनं छितः
आराधना याइ।

इमिसं छितः तःधंकाः
भजन हाली

इमिसं छिगु नांयात तःधंकाः
म्ये हाली।”

सेला

5 परमेश्वरं छु यानादिल धकाः
स्वः वा,

वय्कलं मनूतयथाय्
गज्याः गज्याःगु

अजू चायापुगु ज्या यानादिल।

6 वय्कलं समुद्रया दथुइ
लँ दय्कादिल,

झी तापाःबाज्यापिन्सं
न्यासि वनाः हे
समुद्र छितः,

उकिं झी वय्कःया ज्याय्
लयतायाच्चवे।☆

7 वय्कलं थःगु शक्तिं
सदां राज्य यानादी,

वय्कलं जाति जातियापिं
फुक्कसित स्वयाच्चनी
वय्कःया विरोधय् सुं हे मदनेमा।

सेला

8 हे फुक्क जातियापिं मनूत,
झी परमेश्वरयात प्रशंसा या!
छिमिसं याःगु प्रशंसा सकसिनं
तायेमा।

9 वय्कलं झीत म्वाकातःगु दु,
वय्कलं झीत लुफि हाये
बियामदी।

10 हे परमेश्वर,
छिं जिमित जाँचय् यानादीगु दु,
छिं जिमित वहःयात
जाँचय् याःथें
जाँचय् यानादीगु दु।

11 छिं जिमित जालय्
लाकेबियादिल,
अले ब्वहलय् इयातुगु कु
क्वबिकादिल।

12 छिं जिमित जिमि शत्रुतय्पाखें
न्हुकेबियादिल।
जिपि लः व मिआ दथुं जुयाः वना।
तर छिं जिमित आः
सुरक्षित थासय् हयादीगु।

13 जि छिगु देगलय् होमबलि
ज्वनाः वये।
अले जिं थःगु भाकल पूर्वके।

14 जि तःधंगु दुःखय् लाःबलय्
जिं थःगु म्हुतुं यानागु
भाकल खः, थ्व।

15 जिं छिगु वेदीइ होमबलिकथं
स्यल्लाःपि फैत बलि बीहये।
अले द्रहं व दुगुया बलि बीहये।

सेला

16 परमेश्वरया भय काइपि
फुक्कं वयाः न्यै,
जिं वय्कलं जिगु निंति

- छु छु यानादिल धकाः कने।
 17 जिं ग्वाहालिया निति
 वय्कःयात प्रार्थना याना।
 जिं भजन हालाः
 वय्कःयात तःधंका।
 18 जिगु नुगः पापं जाःगु जूसा
 परमेश्वरं जिगु प्रार्थना
 न्यनादी मखुगु जुइ।
 19 तर परमेश्वरं न्यनादिल।
 वय्कलं जिगु प्रार्थनाया लिसः
 बियादिल।
 20 परमेश्वरयात तःधंकि,
 वय्कलं जिगु प्रार्थनायात
 न्यनादिल,
 अले जितः थःगु
 सदां दयाच्चनीगु माया
 बियाच्चन।

67

- लयतातां सुभायया भजन
 लय् तइम्हय्सिगु निति – तारया बाजंनापं।
 1 हे परमेश्वर,
 जिमित दया यानादिसँ,
 अले सुवाः बियादिसँ।
 जिमित थःगु ख्वाःया दयाया
 जलं खय्कादिसँ।☆

- 2 छिगु लँपुइ पृथ्वीइ च्वपिं
 फुक्कं जुइफयेमा।
 छिगु उद्धारया शक्ति

सेला

फुक्क जातियापिन्सं सीमा।

3 हे परमेश्वर,
जात जातितय्सं छितः तःधंकेमा,
खः, फुक्क जात जातितय्सं
छितः तःधंकेमा।

4 देश देशयापि मनूत लय्तायेमा,
अले लसतां म्ये हालेमा
छाय्धाःसा छि जाति जातियापिन्त
उत्थे यानाः शासन यानादी।
अले देश देशयात लँ क्यनादी।

सेला

5 हे परमेश्वर,
जात जातितय्सं छितः तःधंकेमा,
खः, फुक्कसिनं छितः
तःधंकेमा।

6 पृथ्वीं अन्न सयक्कु दु।
परमेश्वर, झी परमेश्वरं
झीत आशिष बियादीगु दु।

7 परमेश्वरं झीत आशिष
बियाच्चवनादीमा।
अले पृथ्वीया कुंकुलामय् च्वपि
सकल मनूतय्सं
वय्क्कःयागु भय काइ।

68

बिजयया म्ये

दाऊदया भजन, लय् तइम्हयसिगु निंति – छपु म्ये

1 परमेश्वरं दनाः
थः शत्रुतयत् छ्यालब्याल
यानादीमा।

वय्कःयात महीपिं मनूत
वय्कःया न्ह्यःनें बिस्युं वनेमा।

2 फसं कुंयात व्वयक्कू थें
वय्कलं इमित व्वय्कादीमा,

मिइ मैन नायावं थें
परमेश्वरया न्ह्यःने दुष्टत
नाश जुयावनेमा।

3 तर धर्मीं त लय्तायाच्चनेमा।
इपिं परमेश्वरया न्ह्यःने
लय्तायेमा,

अले लसतां हालाजुइमा।

4 परमेश्वरया भजन हा!
वय्कःया नांयात तःधकि!
सुपाँय्या च्वं वइम्हयसिगु नितिं
छपु भजन हा।

वय्कःया नां परमप्रभु खः
वय्कःया न्ह्यःने लय्ता।

5 पवित्र देगलय् च्वनीम्ह परमेश्वर
मांबौ मदुपिनि बौ खः

अले भाःत मदुपिन्त
रक्षा यानादीम्ह खः।

6 याकःचापिन्त
वय्कलं परिवार दय्कादी।

वय्कलं कुनातःपिन्त
त्वःतकादी,
अले इमित लय्ताय्कादी।

विद्रोह याइपिं धाःसा
गंगु व लः मदुगु थासय्
च्वनेमाली।

7 हे परमेश्वर,

छि थः मनूतय् न्ह्यः न्ह्यः
 झाःबलय्,
 छि मरुभूमिया लँ जुयाः
 न्ह्यांवनादीबलय्,

सेला

8 इस्राएलया परमेश्वर,
 सीने पर्वतय् खनेदयकः
 झाःम्ह परमेश्वरया न्ह्यःने
 पृथ्वी लिंगिलिगि सन
 व स्वर्ग वा गात। ☆

9 हे परमेश्वर,
 छिं गाक्क वा वयकाः
 गना च्वंगु थःगु सर्बययात
 वाउँसे च्वंकादिल।

10 छिकपिनि मनूत वयाः
 अन च्वन।
 अले गाक्क अन्न सयकाः
 छिं मगाःमचाःपिन्त लुधक
 बियादिल।

11 परमप्रभुं आज्ञा बियादिल,
 तःम्ह हे मिसातय्सं
 थ्व खँयात न्यंका जुल।

12 “जुजु व सिपाईत बिस्सुं वन।
 छँय् च्वंपिं मिसातय्सं इमिसं
 त्वःताथकूगु इना काल।

13 कैगल्य् कै स्वयाच्चंपिन्सं नं
 वहःयागु सुकुभनु काये खन।
 थ्व सुकुभनुयागु पपू वहःयागु
 व पा लँयागु खः।”

14 दक्वसिबय् बल्लाःम्हय्सिनं
 सल्मोन पहाडय् च्वापु

गाः थें च्वंक
जुजुतयत् छ्यालब्ब्याल
यानादिल।

15 बाशान पहाड गुलि तःधं,
थ्व पहाडय् यक्व च्वकात दु।

16 हे छ्वांछ्वांवःगु पहाड,
छं छाया परमेश्वर थः च्वनेत
ल्ययादीगु पर्वतयात
नुगः मुइकाः स्वयेगु?

परमप्रभु अन सदांया नितिं
च्वनादी।

17 परमेश्वर थःगु बबल्लाःगु
द्वलंद्रः रथया दथुइ च्वनाः
परमेश्वर सीनै पहाडं पवित्र
थासय् झाइ।

18 हे परमप्रभु परमेश्वर,
छि तःजाःथाय् थाहां झाःबलय्
छिं कैदीतयत् ज्वनाः झाल।
छिं मनूतयगु देछा कयादिल,
विद्रोहीतयगु देछा तर्क कयादिल,
हे परमप्रभु परमेश्वर,
छि अन सदांया नितिं च्वनादी।☆

19 परमप्रभुयात तःधंकि,
वय्कः झीत बचय् यानादीम्ह
परमेश्वर खः।
वय्कलं न्हियान्हिथं झीगु
कु क्वबियादी।

20 झी परमेश्वर झीत बचय्

सेला

यानादीम्ह परमेश्वर खः।
परमप्रभुं झीत मृत्युपाखें बचय् यानादी।

21 परमेश्वरं वयक्ःया शत्रुतय्गु
छ्यं चुंदकाबी
अले थःगु हे लैय् जुइपिं पापीतय्गु
छ्यं नं।

22 परमप्रभुं धयादी,
“जिं इमित बाशानं लित हये।
जिं इमित समुद्रया दुनें नं लित हये।

23 थथे हे जिमि मनूतय्सं
इमिगु हिं थःपिनिगु तुति सिली,
इमि खिचातय्सं तकं
ब्व कायेखनी।”

24 हे परमेश्वर, छिगु विजय यात्रा
सकसिनं खंगु दु,
परमेश्वर जिमि जुजुयागु
पवित्र थासय्
न्ह्याःगु विजय यात्रा।

25 म्ये हालीपिं न्ह्यःने न्ह्यःने,
बाजं थाइपिं ल्युने ल्युने,
दथुइ दम्फु थानावःपिं मिसात दु।

26 परमेश्वरयात वयक्ःया
मनूतय्गु सभाय् तःधंकि।
याकूबया सन्तान फुक्कसिनं
परमप्रभुयात तःधंकि।

27 दक्कसिबय् न्हापां दक्कसिबय्
चिधंगु बेन्यामीन
कुलयापिं मनूत,
अनंलि यहदा कुलया न्ह्यलुवाःत
व इमिगु पुचः,

वयां ल्यू जबूलून व नप्ताली
कुलया न्ह्यलुवाःत।

28 हे परमेश्वर,
छिं थःगु शक्ति क्यनादिसँ,
न्हापा क्यनादी थें
थःगु शक्ति क्यनादिसँ,

29 यस्शलेमय् दुगु छिगु
देगःया कारणं
जुजुपिन्सं छिगु नितिं देछा हइ।

30 तिकथिया दथुइ सुलाच्च्वंपि
पशुतय्त ब्वःबियादिसँ।
द्वहंत व इमि मस्तय् बथां थें
च्च्वंपि जातियात ब्वःबियादिसँ,
वहःया कुचात ज्वनाः
तुति भ्वपू मवतले
इमित ब्वःबियादिसँ।

ल्वापुइ लय्ताइपिं जात जातितय्त
उखेलाः थुखेलाः मदय्कादिसँ।

31 मिश्र देशं दूतत वइ
कूशं परमेश्वरया न्ह्यःने
पुलि चुयाः इमिगु देछा बी।

32 पृथ्वीइ च्वंगु राज्यत फुक्कसिनं
परमेश्वरयागु म्ये हा,
परमप्रभुयागु भजन या।

सेला

33 न्हापांनिसें दुगु आकाशय् जुइम्ह
परमप्रभुयात तःधकि।
वय्कः थःगु शक्तिशाली सलं
हाःगु न्यँ।

34 परमेश्वरयागु शक्तियागु बारे

सकसिनं न्यंकि।
 इस्राएल न्यंक वय्कः च्वजाः।
 वय्कःयागु शक्ति आकाशय्
 थ्यंक न्यं।
 35 इस्राएलया परमेश्वर
 वय्कःयागु देगलय्
 तसकं हनेबहःम्ह खः।
 वय्कलं थः मनूतय्त शक्ति
 व बल बियादी।
 परमेश्वरयात प्रशंसा या।

69

ग्वाहालिया निंति बिन्ति
 दाऊदया भजन, लय् तइम्हय्सिगु निंति – “लिली स्वां” रागय्
 1 हे परमेश्वर,
 जितः बचय् यानादिसँ।
 जिगु गःपतय् थ्यंक लः
 थाहां वये धुंकल।
 2 जि तःजाःगु ध्याचलय्
 दुनावनाच्चनागु दु।
 जिगु तुति बैय् चुइ मफया च्वन।
 जि तःजाःगु लखय्
 लानाच्चनागु दु।
 किसिद्वम्बलय्
 जि दुनावनाच्चनागु दु।
 3 ग्वाहालिया निंति
 हा हां जि न्यलेधुन,
 जिगु सः सुइधुंकल।
 परमेश्वरयागु लँ स्वस्वं
 जिगु मिखा त्यानुइ धुंकल।
 4 जितः म्वाय्कं म्वाय्कं

मययकाच्चपिं
 जिगु छेनय् च्वंगु सँ स्वयाः
 अप्वः दु।
 इमिसं मखुगु मखुगु द्रपं बियाः
 जितः स्यंकेत स्वयाच्चंगु दु।
 जिं का हे मकयागु नं
 लित हिं धकाः
 जिलिसें त्वापु थःवयाच्चन।✧

5 हे परमेश्वर,
 जि गुलि मूर्ख धकाः छिं स्यू।
 जिगु पाप छिगुपाखें
 सुलाच्चंगु मदु।

6 जिगु कारणं
 छितः विश्वास याइपिन्त
 मछालापुके मते,
 हे दक्व शक्ति दुम्ह
 परमप्रभु!
 हे इस्राएलया परमेश्वर, छितः
 मालाजुइपिं जिगु कारणं
 क्वह्यांकाच्चने म्वाःलेमा।

7 छिगु हे निति
 जिं क्वह्यांका च्वनेमाल,
 अले मछालापुके माला च्वन।
 8 जिमि थः हे दाजुकिजापिन्सं
 जितः म्हमस्यू थें याइगु।
 जि थःगु हे परिवारय्
 परदेशी थें जुयाच्चनागु दु।

9 छिगु देगःया जोशं जितः
 छवय्कूगु दु।

छितः क्वह्यंकिपिन्सं

जितः क्वह्यंकाहःगु दु।☆

10 जि अपसं च्वनाः ख्वयेबलय्

मनूतयस् जितः हिस्याइ।

11 भांग्रा लं फिनाः दुःखं

च्वनेबलय् नं

इपि जितः खनाः न्हिली।

12 लँय् लँय् हे इमिसं जिगु खँ

ल्हाना जुइ।

अय्लाःगुलुतयस् जितः

ध्याचू नकाः म्ये हाला जुइ।

13 जि धाःसा छिगु प्रार्थना

यानाच्वना, हे परमप्रभु।

जितः छिं ल्ययादीगु इलय् लिसः

बियादिसँ, हे परमेश्वर!

छिगु न्ह्याबलें दयाच्वनीगु

मायाया कारणं

छिगु धात्थेया उद्धारं जितः

लिसः बियादिसँ।

14 जि दुना मवनेमा धकाः जितः

तःजाःगु ध्याचलं थकयादिसँ।

जिमि शत्रुतय्पाखें

बचय् यानादिसँ

जितः लःया किसिद्रुम्बलं

बचय् यानादिसँ।

15 खुसिबालं जितः चुइके मयनेमा

जि लखं दुना मवनेमा

जि सीगालय् दुसुना मवनेमा।

16 हे परमप्रभु,

जितः लिसः बियादिसँ।
 छाय्धाःसा छिगु
 सदां दयाच्चनीगु माया तःधं।

जिगु सः न्यनादिसँ
 छाय्धाःसा छि धात्थें
 दयां जाःम्ह खः।

17 जिपाखे स्वयादिसँ।
 जि तःधंगु दुःखय् लानाच्चंगु दु,

जितः आः हे
 लिसः बियादिसँ।

18 जितः वयाः बचय् यानादिसँ
 जितः जिमि शत्रुतय्पाखें
 त्वःतकादिसँ।

19 जितः मनूतय्सं गुलि
 क्वह्यांकातःगु दु धकाः
 छिं स्यू।

जि गुलि हेला याकाः
 मछालापुक च्वने मालाच्चंगु दु
 धकाः छिं स्यू।

जिमि शत्रुतय्सं छु छु
 यानाच्चन धकाः
 छिं फुक्कं स्यू।

20 हेलां जिगु नुगः
 तज्यायेधुंकल।

छम्हयसिनं धकाः जितः
 हःपाः व लिधंसा ब्यू मवः।

21 नये पित्याःबलय् इमिसं
 जितः बिख नकेहल।

प्याःचाःबलय् इमिसं
 जितः चुपाउँ त्वंकेहल।✧

- 22 इमिगु भ्वजं इमित
 नाश यायेमा,
 इमिगु पवित्र भ्वय्
 इमिगु निति लिच्चः व स्वःतिपाँय् जुइमा।
- 23 इमिगु मिखा कां जुइमा,
 इमिगु दुगःक्वँय् चाःतुइमा।☆
- 24 छिगु तं इमित प्वंकादिसँ
 छिगु तमं इमित भस्म यायेमा।
- 25 इमिगु छाउनी नाश जुइमा
 इमिगु पालय् सुं हे मदयेमा।☆
- 26 छाय्धाःसा छिं सजाँय्
 ब्यूम्हय्सित इमिसं लितुली।
 छिं घाःपाः याःम्हयसिगु
 दुःखया बारे खँ ल्हाइ।
- 27 इमिगु पापया ल्याःचाः
 तयादिसँ।
 छिं उद्धार यानादीबलय्
 इपिं दुमथ्यायेमा।
- 28 जीवनया सफुलि
 इमिगु नां हुयादिसँ।
 धर्मीतयगु धलखय्
 इमिगु नां च्वयादी मते।☆
- 29 तर जि ला दुःखय्
 लानाच्च्वगु दु,
 अले जितः सास्ती
 जुयाच्च्वगु दु।
 हे परमेश्वर,
 जितः थःगु शक्तिं
 बचय् यानादिसँ।

☆ 69:23 ६९:२२-२३ रोम ११:९-१० ☆ 69:25 ६९:२५ प्रे १:२० ☆ 69:28 ६९:२८ प्रस ३२:३२; प्रका
 ३:५; १३:८; १७:८

30 जिं परमेश्वयागु नांयात
तःधंकाः भजन हाले
दुनुगलंनिसे सुभाय् बियाः
वय्कःयात तःधंके।

31 शुकिं परमप्रभु शुसा,
न्यक् व तुतिख्वः
दये धुंकूम्ह द्रहंचिया
होमबलि बीबलय् स्वयाः
अप्वः लय्ताइ।

32 क्वत्यय्काः च्वनेमाःपि
थ्व खनाः लय्ताइ,
परमेश्वरयात माला जुइपिनि
नुगःयात हःपाः दइ।

33 परमप्रभुं मगाःमचाःपिनिगु
सः न्यनादी।
अले कुना तःपि थः मनूतय्त
ल्वःमंकादी मखु।

34 स्वर्ग, पृथ्वी, समुद्र
व अन दुपि सकसिनं
वय्कःयात प्रशंसा या।

35 छायाःसा वय्कलं
यस्शलेमयात बचय् यानादी
यहदाया शहरत हानं दय्कादी।
वय्कःया मनूत अन च्वनी,
अले उकियात अधिकार याइ।

36 अले व थाय् वय्कःयागु
आज्ञा मानय् याइपिनि
सन्तानयागु हे जुइ।
वय्कःयात माया याइपि
अन च्वनी।

70

ग्वाहालिया निति प्रार्थना

दाऊदया भजन, लय् तइम्हयसिगु निति

1 हे परमेश्वर!

जितः बचय् यानादिसँ।

हे परमप्रभु,

जितः ग्वाहालि यायेत

याकनं झासँ।☆

2 जितः स्यायेत स्वःपि

लज्या चाये मालेमा,

अले इतिमिति कनेमा।

जिगु दुःखय् लयतायाजूपि

लिज्यां वनेमा,

अले मछालाः जुइमा।

3 “हः” धकाः

जितः लायबुयाजूपि मछालाः

आछु-आछु कनाजुइमा।

4 छितः मालाजुइपि धाःसा

छिके लयतायाच्चनेमा।

अले छिं मुक्ति बीगु यःपिन्सं

सदां थथे धयाच्चनेमा,

“परमेश्वर गुलि तःधं!”

5 तर जि ला चीमिम्ह

व छुं मदुम्ह मनू खः।

हे परमप्रभु,

छि जितः उद्धार याइम्ह

व जिम्ह परमेश्वर खः।

जितः ग्वाहालि यायेत

याकनं झासँ।

71

बुराम्ह मनूया प्रार्थना

- 1 हे परमप्रभु,
जि छिगु शरणय् वयागु दु,
जितः गुबलेँ मछाले म्वाःलेमा।
- 2 छिगु धार्मिकतां यानाः
जितः बचय् यानाः
उद्धार यानादिसँ!
जिगु प्रार्थना न्यनादिसँ
अले जितः बचय् यानादिसँ।
- 3 जितः सदां सुलेजीक ल्वहंधी
जुयादिसँ।
जितः बचय् यायेत उजं बियादिसँ,
छाय्धाःसा छि जिगु किल्ला
व शरण कायेगु थाय् खः।
- 4 हे परमेश्वर,
जितः दुष्ट मनूतयगु ल्हातं
बचय् यानादिसँ।
नुगः मदुपिं व मभिपिं मनूतयगु
ताकतं जितः बचय् यानादिसँ।
- 5 हे परमप्रभु,
छि हे जक जिगु आशा खः।
हे परमप्रभु,
जिं मचांनिसें छिगु भरोसा
कयागु दु।
- 6 बूसांनिसें हे जि छिगु
भरोसाय् दु।
मांया प्वाथंनिसें हे छिं जितः
बिचाः यानाच्चवनादीगु दु।
उकिं जिं सदां छिगु

प्रशंसा याये।

7 यक्व मनूतयगु निति जि छम्ह नमूना
जुयाब्बुगु दु।

छाय्धाःसा छि जिम्ह बल्लाःम्ह
रक्षक खः।

8 उकिं जिं मदिव्वक छिगु प्रशंसा
यानाच्चनागु दु।
न्हिन्हि जिं छिगु महिमा
न्यंकाच्चने।

9 आः जि बुरा जुइ धुंकाः
जितः त्वःतादी मते।
जि बमलायेधुन
जितः वानादी मते।

10 जिमि शत्रुतयसं जितः स्यायेत
स्वयाच्चंगु दु।

इमिसं थवंथवय् सल्लाह यानाः
ग्वसाः ग्वयाजूगु दु।

11 इमिसं धयाजूगु दु,
“परमेश्वरं वयात त्वःते धुंकल।
वयात लितुलिनाः ज्वँ।
छाय्धाःसा वयात बचय् याइपिं
सुं मदये धुंकल।”

12 हे परमेश्वर,
जिपाखें तापानादी मते
जितः ग्वाहालि यायेत
याकनं झासँ।

13 जितः द्रुपं बियाजूपिं
मछालापुक बुइमा
अले नाश जुइमा।

जितः स्यायेत स्वयाजूपिं
क्वह्वांकाः च्वनेमालेमा,
अले मछालाः जुइमा।

- 14 तर जिं ला छिगु ग्वाहालिया
 आशा कयांच्वने।
 जिं छिगु प्रशंसा
 अज्ज अप्वः याये।
- 15 छिं यानादीगु धार्मिकताया खँ
 जिं सकसितं कनाजुइ।
 छिं यानादीगु मुक्तियागु खँ
 जिं न्हिन्हिं कने।
 अथे ला छिं यानादीगु ज्या
 जिं कनां कने मफु।
- 16 हे परमप्रभु परमेश्वर,
 छिं यानादीगु तःधंगु ज्याया
 जिं प्रशंसा याये।
 जिं सकसित छिगु हे जक
 धार्मिकताया खँ न्येके।
- 17 हे परमेश्वर,
 छिं जितः मचांनिसें स्थनादीगु दु।
 अले जिं आः तकं
 छिं यानादीगु अजू चायापुगु ज्या
 मेपिन्त कनावयाच्च्वनागु दु।
- 18 हे परमेश्वर,
 आः जि बुरा जुइ धुन
 जिगु सँ तुयुसे च्वने धुंकल।
 अयनं आःया
 न्ह पुस्तायापि मनूतय्त
 जिं छिगु अजू चायापुगु
 ज्यायागु खँ मन्यंकुतले
 जितः त्वःतादी मते।
- 19 हे परमेश्वर,
 छिगु धार्मिकता स्वर्ग स्वयाः
 च्वजाः।
 छिं गुलि अजू चायापुगु ज्या

यानादीगु दु,
हे परमेश्वर,
छि थें ज्याःम्ह सु दु धकाः?

20 छिं जितः तःकः हे दुःखय्

लाकादिल
तर छिं जितः हानं जीवन
बियादीतिनि,
अले मृत्युया गालं
थकयादीतिनि।

21 छिं जिगु इज्जत हानं
अप्वयकादी तिनि।

अले जिगु दुःखकष्ट
चीकाछवइतिनि।

22 हे जिम्ह परमेश्वर,
जिं वीणा थानाः छि
विश्वास याये बहःम्ह खः
धकाः प्रशंसा याये।

हे इस्राएलया पवित्र परमेश्वर,
सारंगी थानाः जिं छिगु
प्रशंसाया म्ये हाले।

23 जिं छिगु प्रशंसाया म्ये
हालेबलय्
लयतायाः ततःसलं हाले,
छाय्धाःसा छिं जितः मू पुलाः
त्वःतकादीगु दु।

24 जिं न्हिन्हि सकसितं छिगु
धार्मिकताया बारे कने,
छाय्धाःसा जितः स्यायेत स्वयाजूपिं
सकलें मछालेमाःगु दु,
अले इमिगु इज्जत वंगु दु।

72

जुजुया निति प्रार्थना

सोलोमनया भजन

1 हे परमेश्वर,

जुजुयात न्याय

गथे याना:

यायेगु स्यनाबियादिसँ।

जुजुया काय्यात धर्मी जुइगु खँ

स्यनाबियादिसँ।

2 छिकपिनि मनूतय्त

वं धार्मिकतां

शासन याये फयेमा,

अले क्वत्यय्काच्चपिन्त नं

उतिग्यंक न्याय याये फयेमा।

3 पहाड पहाडं मनूतयगु निति

भिं हयेमा!

जमिन जमिनय् न्ह्याथासं

धार्मिकतां जायेमा।

4 जुजुं चीमिपिन्त नं

उतिग्यंक बिचा: यायेमा,

मगा:मचा:पिन्त ग्वाहालि यायेमा

अले इमित क्वत्यलात:पिन्त

न्हंकाछवयेमा।

5 सूर्य व तिमिला दत्तले

छिकपिनि मनूतय्सं सदां सदां

छिगु भय कयाच्चवेनेमा।

6 घाँय् लयात:गु ख्यलय्

वा वये थें

जुजुं राज्य यायेमा,

इवारं वा वया: बैयात प्याक् थें

जुजुं राज्य यायेमा।

7 वं राज्य यातले

धर्मीत च्वन्द्धाना च्वनेमा।
 गुबलय् तक
 तिमिला दयाच्चनी,
 उबलय् तक
 शान्ति जुयाच्चनेमा।

8 वयागु राज्य छगू समुद्रं
 मेगु समुद्र जुयाः न्यनावनेमा
 यूफ्रेटिस खुसिनिसें
 पृथ्वीया कुनय् तक।☆

9 मरुभूमिया जातितय्सं
 वयागु न्ह्यःने क्वछ्छ वइ।
 वया शत्रुत बँय् चातुवाः वनी।

10 तर्शीश व तापाक तापाक च्वंगु
 समुद्रया सिथय् च्वपिं जुजुतय्सं
 वयात कर पुलेहइ।

शेबा व सेबाया जुजुपिन्सं
 वयात देछा छाःवइ।

11 फुक्क जुजुपिं वयागु न्ह्यःने
 क्वछ्छ वइ।
 फुक्क जातियापिन्सं वयागु
 सेवा याइ।

12 वयाके ग्वाहालि फ्वंपिं
 चीमिपिन्त
 व हाःनाः मदुपिं व मगाःमचाःपिन्त
 बचय् याइ।

13 वं मगाःमचाःपिं
 व नये मखंपिन्त दया याइ,
 अले इमिगु उद्धार याइ।

14 इमित अन्याय व अत्याचारं
 लिगना हइ।

इमिगु ज्यान वयागु निंति
अतिकं मू वं।

15 जुजु ताःई तक म्वाना
च्वनेमा!
शेबाया लुँ वयात दयेमा।

मनूतय्सं वयागु निंति सदां
प्रार्थना यायेमा।
सदां मनूतय्सं वयात
धन्य धायेमा।

16 देशय् यक्व अन्न सयेमा,
पहाडत बालि जायेमा
लेबनानय् थें फलफुलं जायेमा
घाँसं ख्यः जाः थें
मनूतय्सं शहर जायेमा।

17 वयागु नां न्ह्याबलें
लुमनाच्वनेमा।
सूर्य दतले
वयागु नां जायाच्वनेमा।
फुक्क जातियापिन्सं वयापाखें
परमेश्वरया
आशिष कायेमा।
सकसिनं वयात
धन्य धायेमा।

18 परमप्रभुयात प्रशंसा या,
इस्त्राएलया परमेश्वरयात!
अजू चायापुगु ज्या वय्कलं हे
जक यानादी।

19 वय्कःयागु महिमां जाःगु नांया
सदां प्रशंसा जुयाच्वनेमा।
पृथ्वी न्यंक वय्कःयागु महिमां
जायेमा।
आमेन! आमेन!

20 यिशैया काय दाऊदया प्रार्थना
क्वचाल।

स्वंगूगु ब्व

73

भज ७३-८९

परमेश्वरया न्याय

आसापया भजन

1 इस्राएलया निति

व शुद्ध नुगः दुपिनिगु निति,
परमेश्वर धात्थें हे भिम्ह खः।

2 तर जिगु तुति ला
खाये धुंकूगु खः।

जिगु पलाः
चुलुबिये धुंकूगु खः।

3 छायाधाःसा दुष्टतयगु
जियावःगु स्वयाः
इपिं घमण्डीत खनाः
जिगु नुगः मूगु खः।

4 इमिसं दुःख सी मखु,
इपिं बल्लाः व स्वये नं ज्यू।
अले इमिगु उसाँय् नं बांलाः।

5 मेपिन्त थें इमित दुःख जुइ मखु,
मेपिन्सं थें इमिसं कष्ट नं
फये म्वाः।

6 उकिं घमण्ड इमिगु तिसा खः
ल्वापुख्यापु इमिगु वसः खः।

7 इमिगु नुगलं मभिंगु खँ
जक पिहां वइ,

- इमिगु नुगलं मभिंगु मभिंगु
 जक ग्वसाः ग्वयाच्चनी।
 8 इमिसं मेपिन्त हेस्याना जुइ,
 अले मभिंगु खँ ल्हाना जुइ
 इमिसं घमण्ड याना जुइ,
 अले मेपिन्त क्वह्वांकाजुइ।
 9 इमिसं म्हुतु तःप्वाः यानाः
 स्वर्ग व पृथ्वीयागु
 खँ ल्हाना जुइ।
 10 मनूतयत् इमिसं थःपाखे
 फहिकाकाइ।
 मनूतयस् इमिसं धाःगु खँ
 अःपुक पत्याः याइ।
 11 इमिसं धयाजुइ,
 “परमेश्वरं गथे यानाः सी?
 दक्वसिबय् तःधंम्हय्सिनं
 छु जुयाच्चन धकाः स्यू ला?”
 12 दुष्टत धयापिं
 थज्याःपिं का स्व।
 इपिं न्हाबलें याउँक च्वनी,
 अले धनसम्पत्ति जक मुंका जुइ।
 13 अयसा छु जिं थःगु नुगः
 शुद्ध याना जुयागु
 सिंति वन ला?
 जिं मभिंगु ज्या मयासें जुयागु नं
 सिंति वन ला?
 14 जिं न्हियान्हिथं दुःख जक
 फयागु दु!
 सुथंनिसें जिं सजौय
 फयावयाच्चना।
 15 जिं थथे धयाजूग जूसा

जिं छिकपिनि मनूतयत्
धोखा बीगु जुइ।

16 जिं थ्व फुक्क खँ
थुइकेगु कुतः याना।

तर थ्व तसकं हे
थाकुगु ज्या जुयाबिल।

17 जि परमेश्वरया पवित्र थासय्
दुहां वना जक,
जिं दुष्टतयगु छु गति जुइ
धकाः सिल।

18 धात्थें छिं इमित चुल्लुसे च्वंगु
थासय् तयादी तिनि,

अले विनाशया
गालय् क्वफानादी।

19 इपिं मिखा पीमलावं
नाश जुयावनी।

इपिं ग्यानापुक्क हे
नाश जुयावनी।

20 सुथय् न्ह्यलं चाल कि
तनावनीगु म्हगस थें।

हे परमप्रभु,

छि दनादीबलय्
छिं इमित किचःयात थें
वास्ता यानादी मखु।

21 जिगु नुगः हीसे
च्वनाच्चंबलय्

जितः दुःख जुयाच्चंबलय्

22 जि छम्ह पशु थें
मूर्ख जुयाच्चवनागु खः।

जिं छितः थुइके मफुगु खः।

23 अयनं जि ला न्ह्याबलें
छिनापं हे दु।

छिं जिगु जव ल्हाः ज्वनादीगु दु।

24 छिं जितः सल्लाह बियाः
लँ क्यनादी

अले लिपा जितः तःधंकाः
थःथाय् दुकयादी।

25 स्वर्गय् छि बाहेक
जि सु हे दु धकाः?

पृथ्वीइ जितः छि बाहेक
छु हे माःगु दु धकाः?

26 जिगु म्ह व मन
बमलाना वने फु

तर जिगु शक्ति सदांया लागि
परमेश्वर खः।

अले वय्कः न्ह्याबलें
जिम्ह खः।

27 छिपाखें तापाःपि
नाश जुयावनी।

छितः विश्वासघात याःपिन्त
छिं नाश यानादी।

28 परमेश्वरया लिक्क च्वनेगु
जिगु निंति गुलि भिं।

जिं परमप्रभुयात शरण कायेगु
थाय् यानागु दु।

जिं छिं यानादीगु
फुक्क ज्यायागु खँ कनाजुये।

74

देशया रक्षाया निति प्रार्थना

आसापया मश्किल

1 हे परमेश्वर,

छिं छाया थथे

जिमित सदांया निति

मययकादीयागु?

छि थथे छाया छिकपिनि मनु,

छिकपिनि फैतयगु बथांलिसे

तंम्वयादीगु?

2 छिं तःदँ न्ह्यः

थः सर्बय यायेत ल्ययादीपिन्त

लुमंकादिसँ।

अले थःगु जाति यायेत मू पुलाः

त्वःतकादीपि मनुतयत

लुमंकादिसँ।

छि थः च्वनादीगु सियोन पर्वत

व यरूशलेमयात नुं

लुमंकादिसँ।

3 शत्रुतयसं देगलय् च्वंगु फुक्कं

नाश यानाबिल।

थुखेपाखे नं

थःगु पलाः न्ह्याकादिसँ।

4 छिं जिमित नापलानादीगु थासय्

वयाः शत्रुतयसं सः

थ्वयक्कूगु दु।

थःपिं त्याःगु चिंकथं

इमिसं अन थःपिनिगु ध्वाँय्

व्वय्काथक्कूगु दु।

5 जंगलय् सिं पालिपिन्सं थें

इमिसं स्यंकाथकल।

6 बुट्टा कियातः गु फुक्क सिंपौयात
इमिसं थःपिनिगु पा व मुगलं
कुचा कुचा थलाबिल।

7 छिगु देगःयात स्यंकाः
मि तयाबिल।
छिगु पवित्र थाय्यात
अशुद्ध यानाथकल।

8 इमिसं पाच्चुक हे
न्हंकाछवयेगु
मतिइ तःगु खः।
देशय् दक्व पवित्र थाय्यात
इमिसं च्याकाबिल।

9 आः अजू चायापुगु चिं
नं खने मन्त
अगमवत्तात
नं छम्ह हे मन्त।
थथे गुबलय् तक
जुयाच्चनी जिपि सुनानं मस्यू।

10 हे परमेश्वर,
शत्रुतय्त गुबलय् तक
न्हीकातयेगु?
इमित सदां छिगु नांयात
क्वह्यके बियातयेगु ला?

11 छाय् छिं थःगु
बल्लाःगु जव ल्हाः
प्वः चिनाच्चनादियागु?
थःगु ल्हाः फ्यनाः
इमित नाश यानादिसँ।

12 शुरुनिसें छि जिमि जुजु खः।
छिं तःकः मछि हे
जिमित बचय् यानादीगु दु।

13 छिं थःगु शक्तिं
समुद्रयात ब्वथलादिल।
छिं समुद्रया राक्षसतय्गु छ्यं
नच्चुक तछ्यानादिल।☆

14 छिं लिव्यातन् नांयाम्ह
समुद्रया राक्षसया छ्यं
तछ्यानाः
वयागु ला
मरुभूमिया पशुतय्
नकेबियादिल।☆

15 छिं हे लःया मूल तछ्यानाः
खुसि व इवाला हाय्कादिल।
छिं ततःधंगु खुसित
गंकादिल।

16 छिं न्हि व चा सृष्टि यानादिल
छिं सूर्य व तिमिलायात दयकाः
इमिगु थासय् तयादिल।

17 छिं हे पृथ्वीया लागा चिनादिल
छिं हे ताल्ला व चिकुला
सृष्टि यानादिल।

18 हे परमप्रभु,
छकः लुमंकादिसँ,
छिकपिनि शत्रुत
छि खनाः गथे न्हिल।
मूर्ख मनूतय्सं छिगु नांयात
गुकथं क्वह्वांका जुल।

19 छिं थः बमलाःपिं
मनूतय्गु ज्यान
इमि शत्रुतय्गु ल्हातिइ

लःल्हानादी मते
 दुःख सियाच्चंपि थः मनूतयत्
 सदांया निंति
 ल्वःमंकादी मते।
 20 छिं जिपिलिसें चिनादीगु
 बाचा लुमंकादिसँ
 देशया फुक्क खिउँगु थासय्
 ल्वापुख्यापु जुयाच्चंगु दु।

21 क्वत्यय्काच्चनेमाःपि मनूत
 मछालापुकाच्चने म्वाःलेमा
 चीमिपिं व मगाःमचाःपिन्सं
 छिगु नायात तःधंकेमा।

22 हे परमेश्वर, दनादिसँ,
 थःगु खँयात कयाः
 नवानादिसँ
 छकः लुमंकादिसँ,
 मूर्खतय्सं छितः न्हिन्हि
 हेस्यानाच्चंगु दु।

23 छिकपिनि शत्रुतय्सं
 तसलं हाःगु सःयात
 ल्वःमंकादी मते।
 इमिगु सः झन झन तस्सः
 जुया वयाच्चंगु दु।

75

न्याय यानादीम्ह परमेश्वर

आसापया भजन, लय तइम्हयसिगु निंति – “स्यंके मते” धाःगु रागय् हालेगु म्ये।

1 जिमिसं सुभाय् बी हे परमेश्वर,

जिमिसं सुभाय् बी।
 छाय्धाःसा छि जिमिगु
 तापाक मदु।
 मनूतयस्सं छिगु अजू चायापुगु ज्या
 कनाजुइ।

2 छिं धयादीगु दु,
 “जिं न्यायया निंतिं
 ल्वःगु ई ल्ययागु दु।
 जिं पक्षपात मजुइक
 न्याय याये।”

3 भ्वखाय् ब्वयाः
 मनूत व पृथ्वी
 वाराक्वारा संसां,
 जिं धाःसा थुकिया जगयात
 लिधंसा बियातये।

सेला

4 घमण्डीतयूत जिं धाये,
 “घमण्ड याये मते।”
 दुष्टतयूत जिं धाये,
 “फुर्ति याये मते।

5 स्वर्गया विरोधय् ल्हाः
 ल्ह्वने मते।
 अले विरोधी खँ
 ल्हाना जुइ मते।”

6 सुं मनुखं, न पुर्बं, न पच्छिमं,
 न उत्तरं, न दच्छिनं जुइमा
 सुनानं मनूयात थछवये फइ मखु।

7 न्याय याइम्ह ला परमेश्वर खः।
 सुयात क्वफायेगु
 सुयात थछवयेगु धकाः

वयक्लं हे क्वःछिनादी।
 8 परमप्रभुया ल्हातिइ ख्वला दु,
 थ्व ख्वला
 वयक्कःया तमं जाः।
 वयक्लं थ्व हे
 ख्वलां त्वंकादी।
 दुष्टत फुक्कसिनं
 थ्व हे ख्वलां त्वनी,
 भ्याःभचा हे मल्यंक।

9 तर जिं ला न्ह्याबलें
 परमेश्वरं यानादीगु ज्याया
 खँ कनाजुये
 जि ला न्ह्याबलें याकूबया
 परमेश्वरया भजन हालाजुये।

10 परमेश्वरं धयादी,
 “दुष्टतयगु शक्ति जिं न्हंकाबी।
 अले धर्मीतयगु शक्ति
 अप्वय्काबी।”

76

न्ह्याबलें त्याकादीम्ह परमेश्वर

आसापया भजन, लय् तइम्हयसिगु निंति – तारं थाइगु बाजनय् हालेगु

1 परमेश्वरयात
 यह्दाय् सकसिनं म्हस्यु।
 इस्राएलय्
 वयक्कःया नां तःधं।

2 शालेमय्
 वयक्कः च्वनीगु खः।
 सियोन पर्वतय्
 वयक्कःया छँ दु।

3 वय्कलं अन थः शत्रुतय्गु
 च्यानाच्चंगु वाण, ढाल,
 तरवार,
 व फुक्क ल्वाभः
 त्वथुलादिल।

सेला

4 छि न्ह्याबलें दयाच्चनीगु
 पहाड स्वयाः झःझः धाः,
 अले तसकं तःजि।

5 नुगः बल्लाःपिनिगु
 फुक्क ल्वाभः
 लाकाकाये धुंकल।
 इपि सी न्ह्यालय्
 लाये धुंकल।

बहादुरतय् सुं छम्हय्सिनं नं
 झीगु विरोधय्
 ल्हाः ल्हने मफये धुंकल।

6 हे याकूबया परमेश्वर!
 छिं छकः हक्कबलय्
 इमि फुक्क सल
 व सल गयाः वःपि
 सीपि थें जुल।

7 हे परमप्रभु,
 छि हे छम्ह जक खः
 भय काये बहःम्ह।

छि तंम्बइबलय्
 छिगु न्ह्यःने सु च्वने फु?

8-9 हे परमेश्वर,
 मभिंगु ज्या यानाच्चपिन्त
 सजाँय बीत
 व पृथ्वीइ क्वत्यय्का
 च्वनेमाःपिन्त बचय् यायेत
 स्वर्ग थःगु न्याय न्यंकेत

दनादीबलय्
पृथ्वी ग्यानाः सुम्क च्वन।

सेला

10 मनूतय्सं गुलि तं क्यनी,
उलि हे छिगु नां तःधनी।

लडाइँपाखें बचय् जूपिन्सं
छिगु नखः हनी।

11 छिमिसं छिमि
परमप्रभु परमेश्वरया नामय्
छु भाकल यानागु खः,
व पूर्वकि।

वय्कःया प्यखेरं च्वंपिं
सकसिनं भय काये बहःम्ह
वय्कःयात देछा छायेत हति।

12 वय्कलं शासकतय्गु
घमण्डयात नचुकादी।

पृथ्वीया जुजुत वय्कः
खनाः ग्याइ।

77

दुःखया इलय्
याउँक दइगु ग्वाहालि
आसापया भजन, लय् तइम्ह यदूतूनया नितिं

1 जिं ततःसलं
परमेश्वरयात
प्रार्थना याना।
जिगु सः न्यनादिल!

2 तःधंगु दुःख जूबलय्
जिं परमप्रभुयात मालाजुया।
चच्छि चच्छिं जिं ल्हाः ल्हनाः
प्रार्थना याना।
अय्नं जिगु मन

याउँसे मच्चं।
 3 परमेश्वरयागु बिचाः यायेबल्य
 जिं झसुकाः तये।
 ध्यान यायेबल्य
 नं जिगु नुगः क्वतुनावनी।

सेला

4 छिं जितः थ्यने नं मब्बू
 नुगः क्वतुनाः
 जिं नवाये तकं मफइ।
 5 जिं वने धुकूगु खँ लुमंके,
 यक्व न्हापाया दिया खँ।
 6 जिं बहनिइ थःगु म्ये लुमंका
 जिं ध्यानय् दुनाः थःत हे न्यना,

7 “परमेश्वरं झीत
 सदांया निंति हे
 त्वःतादी ला?
 वय्कलं आः जितः गुबलें हे
 दया यानादी मखुत ला?”
 8 “वय्कःयागु
 सदां दयाच्चनीगु माया
 सदांया निंति तन ला?
 वय्कःया बचं
 सदांया लागि फुत ला?
 9 परमेश्वरं दया माया यायेगु
 ल्वःमंकादिल ला?
 तमय् वयाः वय्कलं
 दया यायेगु त्वःतादिल ला?”

सेला

10 अले जिं बिचाः याना,
 “थ्व हे जिगु दुःख खः।
 दक्वसिबय् तःधंम्हय्सिया
 जव ल्हाः जिगु छेनं

चिला वन।”

- 11 अले जिं छिं यानादीगु
 फुक्क खँ लुमंका,
 हे परमप्रभु।
 छिं न्हापा यानादीगु
 अजू चायापुगु ज्या लुमंका।
- 12 जिं व फुक्क खँय् बिचाः याये।
 जिं छिं यानादीगु अजू चायापुगु
 ज्यायात ल्वःमंके मफु।

- 13 हे परमेश्वर,
 छिं यानादीगु फुक्क ज्या
 पवित्र जू।
 छिं थें तःधंम्ह परमेश्वर
 मेम्ह सु दइ?
- 14 छि अजू चायापुगु ज्या
 यानादीम्ह परमेश्वर खः।
 छिं थःगु शक्ति
 जाति जातियापिन्त क्यनादिल।
- 15 छिं थःगु शक्तिं थः मनुतय्त
 मू पुलाः त्वःतकादिल,
 याकूब व योसेफया सन्तानयात।

सेला

- 16 हे परमेश्वर,
 छितः खनाः समुद्र नं गयात।
 ततःजाःगु समुद्र नं दुनेनिसें
 वाराक्वारा सेन।
- 17 सुपाँचं वा गात,
 आकाशय् न न्यात
 प्यखें हाबलासा त्वल।
- 18 न न्याःगु सः
 आकाश न्यंक न्यन।
 हाबलासाया जलं प्यखें

जल्ल थित।
 पृथ्वीइ भवखाय् ब्वयाः
 लिगिलिगि सन।
 19 छिं समुद्रयात फायाः
 लँ दय्कादिल।
 तर छिगु पलाया चिं
 गनं खने मदु।
 20 छिं थः मनूतय्त फैजवालं थें
 लँ क्यनादिल।
 अले मोशा व हारूनयात
 इमि नायः यानादिल।

78

इस्त्राएलया पुलांगु खं
 ज्ञान काःगु
 आसापया मश्किल
 1 हे जि मनूत!
 जिगु खँ न्यँ,
 जिं धायेत्यनागु खँय्
 न्हायपं ब्यु।
 2 जिं उखान छुनाः
 स्यनेकने याये।
 जिं न्हापायागु सुलाच्चंगु
 खँयात उलाः
 उखान छुनाः क्यने।☆
 3 गुगु खँ झीसं न्यना तयागु खः,
 अले स्यू
 अले झी तापाःबाज्यापिन्सं
 झीत कनातःगु खः।
 4 परमप्रभुयागु शक्ति,
 वय्कलं यानादीगु

ततःधंगु ज्याखँ
 व अजू चायापुगु ज्याखँ
 झीसं थः सन्तानपाखें
 मसुचुके।
 झीसं झी लिपायापिन्त
 थ्व खँ कनाथके।

5 वय्कलं याकूबयात
 उजं दय्काः
 इस्राएलया मनूतयत् व्यवस्था
 बियादिल।
 वय्कलं झी तापाःबाज्यापिन्त
 थः मस्तयत्
 वय्कःयागु व्यवस्था स्यनेत
 उजं दय्कादिल।

6 लिपायापिन्सं नं थ्व खँ
 सीके फयेमा,
 अले इमिसं नं थः मस्तयत् कने
 फयेमा धकाः
 थथे यानादीगु खः।

7 थुकथं इपिं सकसिनं
 परमेश्वरयाके विश्वास
 याये फइ,
 अले वय्कलं यानादीगु ज्याखँ
 ल्वःमंकी मखु।

बरू सदां वय्कःयागु उजं न्यनी।

8 थुकथं इपिं परमेश्वरयात
 क्वातुक विश्वास मयाःपिं
 व थःगु नुगलय् परमेश्वरयात
 मतःपिं
 इमि तापाःबाज्यापि थें विद्रोही
 व धयागु खँ मन्यनीपिं
 जुइ मखु।

- 9 एफ्राइमयापि मनूत
थःपिन्के धनुष व वाण दय्कं
लडाईनं बिस्युं वन।
- 10 इमिसं वय्कःलिसे याःगु
बाचा पूमवंकल,
अले वय्कःयागु व्यवस्था
मानय् मयात।
- 11 इमिसं वय्कलं यानादीगु
ज्याखँ
व वय्कलं क्यनादीगु
अजू चायापुगु ज्याखँ
ल्वःमंकल।
- 12 वय्कलं मिश्र देशयागु सोअन
धाःगु थासय्
इमि तापाःबाज्यापिन्त
अजू चायापुगु ज्याखँ यानाः
क्यनादीगु खः।☆
- 13 वय्कलं समुद्रयात निब्ब
थलादिल,
अले इमित अनं हे
समुद्र छिकेबियादिल।
वय्कलं लःयात
पःखाः थें थनादिल।☆
- 14 न्हिनय् वय्कलं इमित सुपौचं
व चान्हय् मिया जलं लँ
क्यनादिल।☆
- 15 वय्कलं मस्भूमिइ
ल्वहँधी पालाः
लःधाः हाय्काः
इमित लः त्वंकादिल।
- 16 वय्कलं ल्वहँधिकं

लःधाः पिकयाः
खुसि थें बाः वयकादिल।☆

17 अयनं इमिसं वयकःया
विरोधय् पाप याना हे च्वन,
गंगु व लः मदुगु थासय्
दक्वसिबय् तःधंम्हयसिगु
विरोधय् विद्रोह यात।

18 इमिसं थःयत्थें नसात्वेँसा फ्वनाः
परमेश्वरयागु मन स्वयेत तक्
लिमचिल।

19 इमिसं परमेश्वरया विरोधय्
थुकथं नवात,
“छु परमेश्वरं मरुभूमिइ नं
नसात्वेँसा बियादी फु ला?

20 परमेश्वरं ल्वहंधी पालाः
लःधाः हायकूगु ला खः।

छु वयकलं जिमित मरि
व वयकःया थः मनूतय्त ला नं
दय्काबी फु ला?”

21 श्व न्यनाः परमप्रभु
तंचायादिल, अले वयकः
याकूबया सन्तान खनाः
मि जुयादिल।

इपि खनाः वयकःयागु तं
झन तच्चयावल।

22 छायाधाःसा इमिसं
वयकःयाके विश्वास मतः,
अले वयकलं

इमित बचय् याइ धयागु खँय् नं
पत्याः मयाः।

23 अयजूसां वयकलं

- आकाशयात उजं बियादिल,
 अले स्वर्गयागु लुखा
 चाय्कादिल।
 24 वय्कलं इमित नयेत मन्ना
 गाय्कादिल,
 वय्कलं इमित स्वर्गयागु अन्न
 बियादिल।✧
 25 थुकथं इमिसं स्वर्गदूततय्गु
 मरि नल,
 वय्कलं इमित इमिसं
 नयेफक्व नसा बियादिल।
 26 वय्कलं आकाशय् पुर्बयागु
 फय् त्वःतादिल,
 अले थःगु शक्तिं दच्छिनयागु
 फय् संकादिल।
 27 वय्कलं फिसलय् च्वंगु फि थें
 अल्याख् झंगःपंक्षी
 छवयाहयादिल।
 28 झंगःत फुक्क इपिं च्वच्वंगु
 लागाय् दुने
 व इमिगु पाल जःखः जूवल।
 29 थुकथं इमिसं लुध्क नल,
 वय्कलं नसिचापिन्त नकादिल।
 30 इमि लुधने मलावं
 इमिसं नयाच्चंबलय्
 31 परमेश्वर इपिं खनाः
 तंचायादिल,
 अले इमिगु पुचलय् च्वंपिं
 बल्लाःपिं मनूतय्त
 स्यानादिल।
 वय्कलं इस्राएलया ल्याय्म्ह-

ल्याय्म्हपि मनूतयत्
स्यानादिल।☆

32 अयजूसां इमिसं

पाप याना हे च्वन।
वयक्ःयागु अजू चायापुगु ज्याखँ
खंक खंक इमिसं परमेश्वरयात
विश्वास मयाः।

33 उकिं परमेश्वरं इमित

ज्याख्यलय् मजुइकाः
व गया जक ग्यानाः म्वाये
माय्काबिल।

34 गुबलय् परमेश्वरं

इमि मनूतयत् स्यानादिल,
उबलय् तिनि इपि वयक्ःयाथाय्
लिफः स्वयावल।
परमेश्वरयाथाय् लिहां वयाः
इमिसं दुनुगलंनिसें वयक्ःयात
पत्याः यात।

35 अले तिनि परमेश्वर

थःपिनि ल्वहंधी खः,
थः मनूतयत् मू पुलाः
त्वःतकादीम्ह दक्वसिबय्
तःधंम्ह परमेश्वर खः धकाः
इमि लुमन।

36 तर इमिसं वयक्ःयात

म्हुतुं जक तःधंकाच्वंगु खः,
दुनुगलंनिसें मखु।

37 इमिगु नुगः परमेश्वरपाखे

अज्ज नं मलीनि,
परमेश्वरं इपिलिसे
चिनादीगु बाचायागु नं

इमिसं वास्ता मयाः ।

38 वय्कः दयादुम्ह जूगुलि

वय्कलं इमित क्षमा यानादिल ।

वय्कलं इमित नाश यानामदी ।

वय्कलं तःकः मछि

थःगु तं क्वलाकादिल ।

वय्कलं थःगु तं प्वंकामदी ।

39 वय्कलं इपिं कमजोर

मनूत जक खः,

फय् थें वयाः वनीपि खः धकाः

लुमंकादिल ।

40 इमिसं ग्वःकःमछि ला

मस्भूमिइ वय्कःया विरोधय्

विद्रोह यात,

ग्वःकःमछि ला इमिसं

वय्कःयात दुःख बी धुंकल ।

41 इमिसं तःकः हे परमेश्वरयागु

मन स्वये धुंकल,

अले इस्राएलया पवित्रम्हय्सित

तं पिकायके बी धुंकल !

42 इमिसं वय्कःयागु शक्ति

ल्वःमंकल,

अले इमिसं इमित

क्वत्यलातःपिनिगु ल्हातं

त्वःतकादीगु नं ल्वःमंकल ।

43 अले मिश्र देशयागु

सोअन धाःगु थासय्

क्यनादीगु अजू चायापुगु चिं

व ज्या नं ल्वःमंकल ।

44 वय्कलं अन च्वंगु खुसिइ

हि बाः वय्कादिल,

- अले अन च्वंपिन्सं खुसिया लः
 त्वने मखन।☆
- 45 वय्कलं इमिथाय् भुजिं
 छवयाः दुःख बियादिल,
 वय्कलं इमिथाय् ब्यांचात
 छवयाः इमिगु बुँ
 नाश यानादिल।☆
- 46 वय्कलं इमिगु बाली व अन्न
 नाश यायेत क्वःबुँचात
 छवयादिल।☆
- 47 वय्कलं प्वँ गायकाः
 इमिगु दाखमा स्यंकादिल,
 अले पुगायकाः
 यःमरिमा स्यंकादिल।
- 48 वय्कलं इमिगु सा-द्वहंयात
 प्वँ गायकाः स्यानादिल,
 अले फैच्वलययात
 मलखं कय्काः स्यानादिल।☆
- 49 वय्कलं थः दूत थें यानाः
 इमित थःगु ग्यानापुगु
 तं प्वंकादिल।
- 50 वय्कःयागु तं क्वमलाः,
 वय्कलं इमित
 बचय् यानामदी।
 वय्कलं इमित महामारीं
 कय्काः स्यानादिल।
- 51 वय्कलं मिश्रीतय्
 तःधिकःपि कायपि
 फुक्कसित स्यानादिल।☆

☆ 78:44 ७८:४४ प्रस ७:१७-२१ ☆ 78:45 ७८:४५ प्रस ८:१-६, २०-२४ ☆ 78:46 ७८:४६ प्रस

१०:१२-१५ ☆ 78:48 ७८:४७-४८ प्रस ९:२२-२५ ☆ 78:51 ७८:५१ प्रस १२:२९

52 थः मनूतयूत धाःसा वयकलं
 फैतयूत ज्वये थें
 मरुभूमियागु लं
 पिने यंकादिल।☆

53 वयकलं इमित बांलाक
 बिचाःसंचाः यानाः यंकादिल,
 उकिं इपि मग्यासे वन।
 इमि शनूतयूत जक
 समुद्रं नुनाछवल।☆

54 वयकलं इमित
 थःगु पवित्र देशयू,
 थःगु हे जव ल्हाःया शक्तिं
 त्याकादीगु
 थ्व पहाडी देशयू हयादिल।☆

55 वयकलं थः मनूत न्हावांलिसे
 अनयापिं जात जातियापिं
 मनूतयूत ख्याना छवयादिल।
 अले इमिगु देश
 इस्राएलया कुलतयूत
 सर्बयकथं इनाबियादिल।
 इमिगु छैनं थः मनूतयूत
 बियादिल।☆

56 अयनं इमिसं दक्वसिबयू
 तःधंम्हयूसिया विरोधयू
 विद्रोह यानाः
 वयकःयागु मन स्वयांच्वन।
 इमिसं वयकःयागु आज्ञा मन्यं।☆

57 थः तापाःबाज्यापिं थें
 इपिं नं परमेश्वरयात

धोखा बीपि
व विश्वास मदुपि जुयाः जुल।
अले स्यंगु धनुष थें
भर मदुपि जुयाः जुल।

58 इमिसं मेपि घःतय्गु
पुजा यायेगुथाय् दय्काः
परमेश्वरयात तंम्बय्कल।

इमिसं थःगु मूर्तिपाखें
वय्कःयात नुगः मुइकाबिल।

59 थ्व खनाः परमेश्वरं
तं पिकयादिल,
अले वय्कलं इम्प्राएलीतय्त
त्वःतादिल।

60 वय्कलं शीलो धाःथाय्
च्वंगु नापलायेगु पाल तकं
त्वःतादिल,
वय्कः अन झीलिसे
च्वनादीगु खः।☆

61 वय्कलं थःगु शक्ति
व महिमायागु चिं,
बाचा चिनादीगु सनूयात
शत्रुतय्गु ल्हातय् लाके
बियादिल।☆

62 वय्कः थः मनूतलिसे
तंम्बयादिल।

अले थः सर्बययात
शत्रुतय्पाखें
स्याकेबियादिल।

63 मिं इमि ल्याय्म्हतय्त
भस्म यात।
ल्यासेतय्त ब्याहा यायेत

- मिजंत तकं मन्त।
 64 इमि पुजाहारीत
 तरवारं पालाः सित,
 इमि मिसातयसं
 ख्वये तकं मखन।
- 65 अले परमप्रभु न्ह्यलं दंम्ह थें
 दनादिल।
 वय्कः दाखमघं काःम्ह मनू थें
 दनादिल।
- 66 वय्कलं थः शत्रुतय्त
 ख्याना छवयादिल।
 वय्कलं इमित सदांया निति
 मछालापुसे च्वंकाबिल।
- 67 वय्कलं योसेफया कुलयात
 त्वःतादिल,
 अले एफ्राइमया कुलयात
 ल्ययामदिल।
- 68 बरु वय्कलं
 यहदाया कुलयात
 व सियोन पर्वतयात
 ल्ययादिल,
 थ्व वय्कलं ययकादीगु
 पर्वत खः।
- 69 वय्कलं थःगु पवित्रथाय्
 स्वर्ग थें तःजाय्क
 दयकादिल,
 अले पृथ्वी थें धिसिलाक्क
 व सदांया निति दयकादिल।
- 70 वय्कलं थः दास दाऊदयात
 ल्ययादिल।
 वय्कलं वयात
 फैत ज्वयाच्चंगु थासं हयाः

- 71 इस्राएलया जुजु यानादिल।
 वयक्लं दाऊदयात थः सर्बयया
 जवाः यानादिल।☆
- 72 दाऊदं इमित दुनुगलनिसैं
 बिचाःसंचाः यात।
 अले इमित बालाक
 न्ह्यज्याकाः यंकल।

79

- छि गुबलय् तक
 जिपिलिसैं तंम्बयाच्चवनादीगु?
 आसापया भजन।
 1 हे परमेश्वर,
 पिनें वःपिन्सं
 छिगु सर्बय त्याका काल।
 इमिसं छिगु पवित्र देगःयात
 अशुद्ध यानाबिल।
 इमिसं यरूशलेमयात
 नाश यानाथकल।☆
- 2 छिकपिनि दासतयगु
 सीम्हयात इमिसं
 गिद्धयात नकेत त्वःताथकल।
 छिकपिनि विश्वास याये
 बहःपिनिगु सीम्हयात
 इमिसं गुँपशुतय्त
 नकेत त्वःताथकल।
- 3 यरूशलेम न्यंक लः थें
 हिबाः वय्काथकल।
 सीपिन्त थुनेत तकं
 सुं हे मल्यन।

☆ 78:71 ७८:७०-७१ १ शमू १६:११-१२; २ शमू ७:८; १ इति १७:७
 इति ३६:१७-१९; यर ३२:१२-१४

☆ 79:1 ७९:१ २ राज २५:८-१०; २

4 जवंखवं च्वंपि जातितयसं
 झीत हिस्यानाच्चन।
 झीत हेबाय्चबाय् यानाः
 इपि न्हिलाच्चन।

5 हे परमप्रभु,
 छि गुबलय् तक जिपिलिसें
 तंम्बयाच्चनादीगु?
 छि न्ह्याबले तंम्बयादीगु ला?
 छिगु तं सह याये मफय्कः
 च्यानाच्चनी?

6 छिगु तं छितः नालामकाःपि
 जातियात प्वंकादिसँ।
 छिगु तं छितः प्रार्थना
 मयाइपिन्त प्वंकादिसँ।

7 छाय्धाःसा इमिसं याकूबया
 सन्तानतयत् स्याःगु दु,
 व छि च्वनीगु थाय्यात
 नाश यानाथकूगु दु।

8 जिमि पुर्खायागु पापयागु निति
 जिमित सज्जय बियादी मते।
 जिमित दया माया यानादिसँ।
 जिमिसं फुक्क आशा त्वःतेधुन।

9 हे परमेश्वर,
 जिमित ग्वाहालि यानाः
 बचय् यानादिसँ।
 थःगु नांया महिमाया निति
 जिमिगु पापयात

क्षमा यानादिसँ।

10 जाति जातियापिन्सं जिमिके
 “छिमि परमेश्वर गन दु”
 धकाः छाया न्यनाच्चन?
 छि जिमिगु मिखा न्ह्यःने

छिकपिनि दासतयगु हिबाः
वय्कूगुया ब्वला साइतिनि धकाः
जात जातियापिन्त क्यनादिसँ।

11 कुना तःपिनिगु दुःखयागु सः
न्यनादिसँ।

थःगु तःधंगु शक्तिं
स्यायेत क्वःछिनातःपिन्त
बचय् यानादिसँ।

12 हे परमप्रभु!
छितः हेस्याःपि जःलाखःलायात
न्हयदुगं अप्वः

ब्वला सायादिसँ।

13 अले छिकपिनि मनू,
छिकपिनि बथांया फै,
जिमिसं छितः सदां सदां
सुभाय् बियाच्चने,
पुस्तां पुस्ता तकं
छितः तःधंकाच्चने।

80

इस्त्राएल परमेश्वरया दाखमा

आसापया भजन, लय् तइम्हयसिगु निति –

“बाचाया लिली स्वांया” रागय्

1 हे इस्त्राएलया फैजवाः,

जिमिगु खँ न्यनादिसँ।

छिं हे योसेफया सन्तानयात

फैबथांयात थें ज्वयादीगु खः।

पपू दुपि करूबतय्

दथुइ च्वनादीम्ह

हे परमेश्वर,

मनूतयत् थःगु जः

क्यनादिसँ।☆

2 एफ्राइम, बेन्यामीन व मनश्शे
कुलयापिन्त
थःगु शक्ति क्यनाः
जिमित बचय् यानादिसँ।

3 हे परमेश्वर,
जिमित हाकनं छिपाखे
लित ब्वनाहयादिसँ।
जिमित थःगु ख्वाःया जलं
खय्कादिसँ।
अले जक जिपि बचय् जुइ।

4 हे परमप्रभु,
दक्व शक्ति दुम्ह परमेश्वर,
छि गुबलय् तक
थःमनूतयगु प्रार्थना खनाः
तंम्वयाच्चनादीगु?

5 छिं जिमित नयेत दुःख
बियादिल।
अले त्वनेत ख्वबि
बियादिल।

6 छिं जिमित जःलाखःलाया
जातितलिसे ल्वायेगु
ल्वापु पुसा जक यानादिल।
जिमि शन्नूतयसं जिमित
हेबाय्चबाय् याइगु।

7 दक्व शक्ति दुम्ह
परमेश्वर,
जिमित हाकनं छिपाखे

लित ब्वनाहयादिसँ।
 जिमित थःगु ख्वाःया जलं
 खय्कादिसँ।
 अले जक जिपिं बचय् जुइ।

8 छिं जिमित दाखमा थें
 मिश्रं हयादिल।
 छिं मेमेगु जातियापिन्त पिनिनाः
 जिमित थःगु देशय् पिनादिल।
 9 छिं जिमित ब्वलनेत छिंकादिल।
 जिमिगु हा बल्लात,
 अले देशन्यंक न्यनावना।

10 जिमिगु किचलं गुँत त्वपुल,
 जिमिगु कचां ततःमागु
 देवदास्या सिमात नं त्वपुल।

11 जिमिसं थःगु कचा
 भूमध्यसागर तक न्यंका,
 अले चुलि यूफ्रेटिस खुसि तक
 थयंका।

12 अयनं जिमिगु प्यखेंया पःखाः
 छाय् थुनादिया?
 आः थन न्ह्याम्हं दुहां वयाः
 दाख खुयाः यंके फु।

13 आः गुँफातय्सं वयाः न्हयाः
 सयंकाथके फु,
 अले गुँपशुतय्सं वयाः
 नयाः वने फु।

14 हे दक्व शक्ति दुम्ह
 परमेश्वर,
 जिपिपाखे हाकनं
 लिफः स्वयादिसँ।

स्वर्ग जिमित क्वःस्वयादिसँ,
 अले जिमिगु दुःख खंकादिसँ।
 थ्व दाखमाया सुसाःकुसाः
 यानादिसँ

15 छिं थःम्हं पिनादीगु
 दाखमायात बचय् यानादिसँ।

छिं थःगु लागिं
 बल्लाकादीगु कचायात
 बचय् यानादिसँ।

16 शत्रुतय्सं छिगु दाखमायात
 ध्यनाब्यूगु दु, मि तयाः
 छवय्काब्यूगु दु।

इमित तं क्यनादिसँ,
 अले नाश यानादिसँ।

17 छिं थःम्हं ल्ययादीपिं मनूतय्त
 सुसाःकुसाः यानाः
 बचय् यानादिसँ,
 छिं थःम्हं हे बल्लाकादीगु
 जातियात।

18 उकिं यानाः जिमिसं छितः
 गुबलें हे त्वःते मखु।

जिमित न्हगु जीवन बियादिसँ,
 जिमिसं छिगु नां काये।

19 हे परमप्रभु,
 दक्ख शक्ति दुम्ह परमेश्वर,
 जिमित हाकनं छिपाखे लित
 ब्वनाहयादिसँ।

जिमित थःगु ख्वाःया जलं
 खय्कादिसँ।

अले जक जिपिं बचय् जुइ।

81

नखःया भजन

आसापया भजन, लय् तइम्हय्सिगु निंति –
गित्तिया कथं

1 परमेश्वरयात तःधंकाः
ततःसलं म्ये हा।

वय्कः झीगु शक्ति खः।

ततःसलं याकूबया परमेश्वरया
जय या।

2 दम्फु व वीणा था,
सारंगी कियाः भजन हा।

3 अमै व पुन्हिखुन्हु चान्हय्
झीगु नखः हनेत तुरही पु।☆

4 थ्व इस्राएलयागु विधि खः,
याकूबया परमेश्वरयागु उजं खः।

5 वय्कलं मिश्र देशय्
हयक्काः वंबलय्
इस्राएलीतय्गु निंति
थ्व नियम बियादीगु खः।
जिं म्हमस्यूगु सलं
थथे धयाच्चंगु ताल,

6 “जिं छिमिगु ब्वहलं
कु चीकाबियागु दु,
जिं छिमित थाकुगु ज्यापाखें
छुत्काराबियागु दु।

7 छिमिसं थःपिन्त दुःख
जूबलय् जितः सःतल,
अले जिं छिमित
बचय् यानाबिया।

नँ न्याइगु सुपाँचं
 जिं छिमित लिसः बिया।
 अले मेरीबाया लखय्
 जिं छिमित
 जाँचय् याना।☆

सेला

8 हे जिमि मनूत, न्यँ,
 जिं छिमित ख्याच्चः बिया थके।
 हे इस्राएल,
 छिमिसं न्यना जक
 ब्यूगु जूसां गाः
 9 छिमिथाय् पिनेयापि घःत
 गुबलें मदयेमाः
 छिमिसं पिनेयापि
 घःतय्गु न्ह्यःने
 भ्वपुले हे मते।

10 मिश्र देशं छिमित लिगनाः
 हयाम्ह जि हे छिमि
 परमप्रभु परमेश्वर खः।
 छिमिसं थःपिनिगु म्हुतु चाय्कि,
 जिं जाय्काबी।☆

11 “तर जिमि मनूतयसं
 जिगु खँ मन्यं।
 इस्राएलं जिगु आज्ञा
 मानय् मयाः।

12 उकिं जिं इमित इमि यत्थे
 जुइमा धकाः त्वःताबिया।
 जिं इमित इमि जिराहा
 इच्छा कथं याकेबिया।

13 “जिमि मनूतयसं जिगु खँ

- न्यंगु जूसा
 इस्राएल जिं धाःथें जूगु जूसा
 14 जिं इमि शत्रुतयूत धायेवं
 बुकाछवयेगु खः।
 जिं इमित धायेवं त्याकेगु खः।
 15 जितः महीपिन्सं ग्यानाः
 जिगु न्ह्यःने भवपू वइगु खः।
 इमिगु सजाँय सदां सदांया नितिं
 जुइगु खः।
 16 इस्राएलीतयूत धाःसा
 दक्वसिबय् भिंगु छव नकेगु खः,
 ल्वहं कस्तिं
 छिमित लुधंकिगु खः।”

82

- परमेश्वर
 दकलय् तःधम्मह शासक
 आसापया भजन
 1 परमेश्वर स्वर्गया सभाया
 नायः जुयादी,
 घःतय् दथुइ वयक्लं
 फैसला यानादी।
 2 “छिमिसं गुबलय् तक
 अन्याय जुइक
 इन्साफ यानाच्चवनेगु,
 अले दुष्टतयगु
 पंलिनाच्चवनेगु?

- 3 मगाःमचाःपिं
 व मां बौ मदुपिन्त
 रक्षा या,
 चीमि व क्वत्यका च्वंपिनिगु

सेला

न्याय या।
 4 बमल्लाः व मगाःमचाःपिन्त
 बचय् या,
 इमित दुष्टतयगु ल्हातं
 त्वःतकि।

5 “इमिसं छुं नं मथ्,
 इमिसं छुं नं मस्य्,
 तर खिउंगुलिइ थुखे उखे
 जुयाच्चनी,
 पृथ्वीया फुक्क जग संगु दु।

6 “जिं धया, ‘छिपिं घः खः’,
 छिपिं सकलें दक्वसिबय्
 तःधंम्हयसिया कायपिं खः।☆

7 अय्न् छिपिं मनूत थें
 सिनावनी,
 अले मेमेपिं शासक थें
 छिमिगु जीवन सिधइ।”

8 हे परमेश्वर दनादिसैं,
 पृथ्वीया न्याय यानादिसैं
 छायाःसा छिं फुक्क
 जातितय्त
 अधिकार यानादी।

83

इस्त्राएलिया शत्रुतय्त बुकेत प्रार्थना
 आसापया भजन
 1 हे परमेश्वर,
 छि नमवासें च्वनादी मते!

- सुम्क च्वनादी मते!
 शान्त जुयादी मते,
 हे परमेश्वर!
- 2 छायाःसा छिकपिनि शत्रुत
 हाःह यानाच्चंगु दु,
 छितः मययकीपिन्सं
 थःगु छ्यं धस्वाकूगु दु।
- 3 इमिसं छिकपिनि
 मनूतयत् स्यंकेत
 दुनें दुनें ग्वसाः ग्वयाच्चंगु दु,
 इमिसं छिं ययकादीपि मनूतयगु
 विरोधय् जाः ग्वयाच्चंगु दु।
- 4 इमिसं धाल,
 “वा, झीसं इमित इमिगु जाति हे
 मदय्क नाश यानाबीनु,
 अले इस्राएलयात
 न्ह्यबलैया लागि
 सकसिनं ल्वःमंकी।”
- 5 इमिसं छप्पं जुयाः
 ग्वसाः ग्वःगु दु,
 अले छिगु हे विरोधय्
 सन्धि याःगु दु।
- 6 थुपि एदोम व
 इश्माएलयापि मनूत,
 मोआबीत व हग्रीत,
- 7 गबाली, अम्मोनी,
 अमालेकी, पलिशती
 व टुरोसयापि मनूत खः।
- 8 लोतया सन्तानतयत्
 ग्वाहालि बीत
 थुपिनापं अश्शूर नं

मिले जूग दु।

सेला

- 9 छिं मिघानीतयूत
अले कीशोन खुसिइ
सीसरा व याबीनयात
गथे यानादियागु खः,
अथे हे इमित नं यानादिसँ।☆
- 10 इपि एन्दोरय् नाश जुल,
अले जमिनया लागि
साः जुल।
- 11 इमि भारदारतयूत
ओरेब व जएब थें
यानादिसँ।
इमि सकलें राजकुमारतयूत
जेबह व सल्मुन्ना थें
यानादिसँ।☆
- 12 इमिसं “परमेश्वरया ख्यः
जिमिगु याये”
धकाः धाःगु खः।
- 13 हे जिमि परमेश्वर,
धू थें, फसं ब्वयेकूगु सुपः थें
इमित छ्यालब्याल यानादिसँ।
- 14 मि गुँ भस्म याःथें,
मिजलां पहाड छवयेकूगु थें
- 15 वाफय् व ग्यानापुगु फसं
इमित थरथर खाकाः
लितुलिनादिसँ।
- 16 हे परमप्रभु,
इमिगु ख्वाः लज्यां त्वःपुयादिसँ,
अले इमिसं छिगु नां मालेमा।

- 17 इपि न्ह्याबलेंया लागि बुइमा
अले न्ह्याबलेंया लागि ग्यायेमा,
इपि लज्या चायाः सीमा।
- 18 छिगु नां परमप्रभु खः,
इमिसं पृथ्वी न्यंकंयाम्ह
दक्वसिबय् तःधंम्ह शासक खः
धकाः म्हसीमा।

84

देगलय् आराधना याये यय्कूगु

कोरह वंशयापिनिगु भजन, लय् तइम्हय्सिगु निंति – गितिया कथं

- 1 हे दक्व शक्ति दुम्ह
परमप्रभु,
छि च्वनादीगु थाय्
गुलि यइपुसे च्वाँ!
- 2 जितः परमप्रभुया चुकय्
दुहां वने यः,
जितः परमप्रभुया देगलय्
च्वने मास्ति वः।
- दुनुगलंनिसें
जिं म्वाःम्ह परमेश्वरया लागि
लयतातां म्ये हाले।
- 3 चखुंचातय्सं नं
स्वः दय्कूगु दु,
इखुंचातय्गु नं
थःगु हे छें दु,
- इमिसं थः मस्तय्त
छिगु वेदी लिक्क तइ,
दक्व शक्ति दुम्ह परमप्रभु,
जिमि जुजु, जिमि परमेश्वर।

4 धन्य खः छिगु देगल्य् च्वनाः
 न्ह्याबलेँ प्रशंसाया म्ये
 हालीपि मनूत।

सेला

5 धन्य खः छिं बल बियादीपि
 अले सियोन पर्वतय् वने
 मास्ति वय्काच्चपिं मनूत।

6 इपिं बाकाया ब्यासिया* दथुइ
 जुयावनीबलय्
 इमिसं उकियात लः
 बुयावइगु थाय् यानाबी,
 न्हापा वःगु वां
 अन पुखूत जाइ।

7 इपिं लँय् वनाच्चनीबलय्
 झन बल्लाइ,
 अले सियोन पर्वतय्
 परमेश्वरया न्ह्यःने
 खनेदय्कः वइ।

8 हे परमप्रभु,
 दक्व शक्ति दुम्ह परमेश्वर,
 जिगु प्रार्थना न्यनादिसँ।
 हे याकूबया परमेश्वर,
 जिपाखे न्हाय्पं बियादिसँ।

सेला

9 हे परमेश्वर,
 जिमिगु ढाल,
 छिं अभिषेक जूम्ह
 जिमि जुजुयात
 सुवाः बियादिसँ।

* 84:6 ८४:६ बाकाया ब्यासिया अथे धइगु गंगु ब्यासि

- 10 हे परमेश्वर,
छन्ह छिगु चुकय् च्वनेगु
मेथाय् द्वःछिन्ह स्वयाः भिं।
दुष्टतयगु पालय् च्वनेगु स्वयाः
जिमि परमेश्वरया देगःया
ध्वाखा पिवाः जुइगु यः।
- 11 परमप्रभु परमेश्वर सूर्य
व ढाल खः,
परमप्रभुं दया माया यानादी
अले इज्जत बियादी।
भिंगु ज्या याइपिन्त
वय्कलं फुक्क भिंगु बियादी।
- 12 दक्व शक्ति दुम्ह परमप्रभु!
धन्य खः छितः
भरोसा याःपि मनूत।

85

- परमेश्वरया दयाया लागि प्रार्थना
कोरहतयगु भजन, लय् तइम्हय्सिगु निंति
- 1 हे परमप्रभु,
छिं थःगु देशयात
माया यानादीगु दु,
छिं इस्राएलयात हाकनं
भिं यानादीगु दु।
- 2 छिं थःमनूतयगु पाप
क्षमा यानादीगु दु,
इमिगु फुक्क मभिंगु ज्या
माफ यानादीगु दु।
- 3 छिं थःगु तं छखे चीकादीगु दु।

छि थःगु तःधंगु तंपाखें
लिहां झाःगु दु।

4 हे जिमित उद्धार
यानादीम्ह परमेश्वर,
जिमित हाकनं
स्वीकार यानादिसँ,
जिपि खनाः
तंचायादीगु त्वःतादिसँ।

5 छु छि जिपि खनाः
न्हाबलें
तंचायाच्चवनादीगु ला?
छिगु तं गुबलें
क्वलाइ मखु ला?

6 जिमित हाकनं
बल्लाकादिसँ,
थः मनूतय्त
लय्ताय्कादिसँ।

7 हे परमप्रभु!
जिमित थःगु सदां दयाच्चनीगु
माया क्यनादिसँ,
अले जिमित थःगु
उद्धार बियादिसँ।

8 परमप्रभु परमेश्वरं छु धयादी
व जिं न्यने।
छाय्धाःसा वय्कलं
थः विश्वास यायेबहःपिलिसे
शान्तिया खँ ल्हाइ।
तर इपि हाकनं मूर्ख लैय्
मवनेमा।

9 धात्थे हे वय्कःया उद्धार
वय्कःयात मानय् याइपिनिगु

न्ह्यःने हे दु,
अथे जुयाः वय्कःया महिमा
झीगु देशय् च्वनाच्चनेमा।

- 10 सदां दयाच्चनीगु दया माया
व विश्वास थःथवय्
मिलय् जूगु दु,
धार्मिकता व शान्ति
थवंथः चुप्पा नइ।
- 11 पृथ्वीं विश्वास पिहां वइ,
अले धार्मिकता
स्वर्ग क्वय् स्वइ।
- 12 छु भिं परमप्रभुं व हे बियादी,
अले झीगु जमिनं
थःगु बाली बी।
- 13 धार्मिकता परमप्रभुया
न्ह्यः न्ह्यः वनी,
अले वय्कःया निति
लँ दय्की।

86

ग्वाहालिया निति प्रार्थना

- दाऊदया प्रार्थना
1 हे परमप्रभु,
जिगु प्रार्थना न्यनादिसँ,
अले लिसः बियादिसँ,
छाय्धाःसा जि चीमि
व मगाःमचाःम्ह खः।
- 2 जितः रक्षा यानादिसँ,
छाय्धाःसा जि
विश्वास याये बहःम्ह खः।

छि जिमि परमेश्वर खः,
 उर्कि छितुः
 भरोसा यानाच्चवनाम्ह
 छिकपिनि दासयात
 उद्धार यानादिसँ।

3 हे परमप्रभु,
 जितः दया यानादिसँ,
 छायाःसा जिं न्हिच्छिं हे
 छितः प्रार्थना यानाच्चवनागु दु।

4 थः दासयात लयतायकादिसँ।
 छायाःसा हे परमप्रभु,
 जिं थःगु मन छिपाखे हे ल्हने।

5 हे परमप्रभु,
 छि भिंम्ह व क्षमा
 बियादीम्ह खः।
 अले गुलिसिनं
 ग्वाहालिया लागि
 छितः इनाप याइ,
 इपि सकसितं
 छिं सदां दया माया यानादी।

6 हे परमप्रभु,
 जिगु बिल्लि न्यनादिसँ।
 ग्वाहालिया लागि यानागु
 जिगु प्रार्थना न्यनादिसँ।

7 दुःखया इलय्
 जिं छितः प्रार्थना याये,
 छायाःसा छिं जितः
 लिसः बियादी।

8 हे परमप्रभु,

घःत मध्ये छि थें
 जाःम्ह सुं मदु,
 छिं यानादीगु थें
 मेपि सुनानं याये फइ मखु।

9 हे परमप्रभु,
 छिं गुलि जातितयत् दय्कादिल,
 इपि फुक्क वयाः
 छितः आराधना याइ।
 अले छिगु नांया प्रशंसा याइ।☆

10 छायाःसा छि तःधंम्ह
 व अजू चायापुगु ज्या
 यानादीम्ह खः,
 छि हे जक परमेश्वर खः।

11 हे परमप्रभु,
 जितः छिगु लँपु क्यनादिसँ,
 अले जिं दुनुगलनिसें
 छिगु आज्ञा मानय् याये,
 छिगु नांया भय कायेत
 जिगु मनयात छधी यानादिसँ।
 12 हे परमप्रभु, जिमि परमेश्वर,
 दुनुगलनिसें जिं छितः सुभाय् बी,
 अले छिगु नांया
 प्रशंसा न्ह्याबलें यानाच्चवने।

13 छायाःसा जि प्रति
 छिगु न्ह्याबलें दयाच्चनीगु
 दया माया तःधं,
 छिं जितः चिहानं
 बचय् यानादीगु दु।

14 हे परमेश्वर,
 घमण्डी मनूत जिगु

विरोधय् दंगु दु,
 अले दया माया मदुपि
 छपुचः मनूतय्सं
 जितः स्यायेत स्वयाच्चंगु दु।

इमिसं छितः वास्ता हे मया।

15 तर परमप्रभु,

छि दयादुम्ह, माया यानादीम्ह

परमेश्वर खः।

छि तंचायेत लिबाकादीम्ह,

सदां दया माया यानादीम्ह

व तसकं

विश्वास याये बहःम्ह खः।

16 जिपाखे लिहांझासँ,

अले जितः दया यानादिसँ,

जि, छिकपिनि दासयात

थःगु बल बियादिसँ,

थः दासीया काय्यात

उद्धार यानादिसँ।

17 हे परमप्रभु,

छिं जितः ग्वाहालि यानादी धइगु

छगू चिं क्यनादिसँ।

अले जितः मययकीपि

थ्व खनाः लज्या चायेमा।

छाय्धाःसा हे परमप्रभु,

छिं जितः

ग्वाहालि बियादीगु दु

अले जितः

ह्ययकादीगु दु।

87

- यरूशलेमया प्रशंसा
 कोरह वंशयापिनिगु भजन
 1 परमप्रभुं पवित्र पर्वत सियोनय्
 थःगु शहर दय्कादिल।
 2 इस्राएलया मेमेगु
 शहरयात स्वयाः
 वय्कलं यरूशलेम शहरयात
 अप्वः माया यानादी।
 3 हे परमेश्वरया शहर,
 परमेश्वरं छंगु बारे धयादीगु
 बांलाःगु खँ न्यँ –
 4 “जिगु आज्ञा पालन याइगु
 देशतय्गु धलखय्
 मिश्र व बेबिलोनया नां नं दइ।
 पलिशत, टुरोस व कूशयापि
 मनूतय्त
 यरूशलेमयापिं मनूतलिसें
 ल्याः खाइ।”
 5 सियोनया बारे थथे धाइ,
 “फुक्क मनूत अनया
 नागरिकता दयाः
 याउँक च्वनी”
 अले दक्वसिबय् तःधंम्हं
 वयात बल्लाकादी।
 6 परमप्रभुं जाति जातियापि
 मनूतय्गु छगू नां
 धलः दय्कादी
 अले उपिं सकसिगुं नां
 यरूशलेमय् च्वपिं मनूत
 कथं च्वयादी।

सेला

सेला

7 इपि प्याखं ल्हुइ अले म्ये हाली,
 “जिमिगु फुक्क सुवाःया मुहान
 सियोनय् दु।”

88

ग्वाहालिया लागि बिनति
 कोरहतयगु भजन। लय् तइम्हय्सिया निंति –
 “महलत लिन्नोत” रागय्, एज्जा वंशयाम्ह हेमानया मशिकल
 1 हे परमप्रभु,
 जितः मुक्ति बियादीम्ह
 परमेश्वर!
 जिं चान्हे छितः ततःसलं
 बिनति यानाच्चनागु दु।
 2 जिगु प्रार्थना न्यनादिसँ,
 ग्वाहालिया लागि
 जिं यानागु प्रार्थना न्यनादिसँ।

3 जिगु जीवन दुःखं जाःगु दु।
 जिगु जीवन पातालया
 लिक्क थ्यंगु दु।

4 सीत्यःम्ह मनू थें जि जूगु दु।
 बल हे मदुम्ह मनू
 थें जि जूगु दु।

5 इमिसं जितः सीम्हतय् दथुइ
 त्वःतूगु दु,
 अले जि सीम्ह थें
 क्वदलाः च्वनाच्चनागु दु।

छिं जितः ल्वःमंकादी धुंकल
 जितः छिगु ग्वाहालि नं मदु।

6 छिं जितः

दकलय् क्वययागु गालय्,

तसकं खिउँगु तःज्जाःगु थासय्

तयादीगु दु।

7 छिगु तमं जितः ल्हाकातःगु,

अले छिगु फुक्क लबुं

जितः त्वपू वःगु दु।

सेला

8 जिमि पासापिपाखें

छिं जितः तापाक तयादीगु दु,

इमिगु मिखाय् जितः

तसकं घच्चाइपूम्ह मनू

यानादीगु दु।

जितः कुनातःगु दु,

जि पिहां वयेमफु।

9 जितः जूगु दुःखया लागि

ख्वःख्वं जिगु मिखा

बुलुसे च्वने धुंकल।

हे परमप्रभु,

जिं छितः न्हियान्हिथं

प्रार्थना यानागु दु,

जिं थःगु ल्हाः

छिपाखे ल्हनागु दु।

10 छु छिं सीम्हतय्त

थःगु अजू चायापुगु ज्या

क्यनादी ला?

छु सी धुंकूपिं मनूत दनाः

छिगु प्रशंसा याइ ला?

सेला

11 छु छिगु दया मायाया बयान

मृत्यु लोकय् याइ ला?

छि सदां दया माया

दुम्ह खः धकाः

नाश लोकय् धाइ ला?

12 छु छिगु अजू चायापुगु ज्या
खिउँगु थासय्

व धार्मिकताया ज्या
फुक्क ल्वःमनिगु थासय्
सी ला?

13 हे परमप्रभु,
ग्वाहालिया लागि जिं ला
छितः बिन्ति याये,
अले सुथ न्हापां
जिं छितः प्रार्थना याये।

14 हे परमप्रभु,
छिं छाय् जितः
त्वःतादियागु?
छिं छाय् थःगु ख्वाः
जिपाखें फस्वय्कादीयागु?

15 ल्याय्म्हबल्य् निसैं हे
जि दुःख स्यूगु दु।
जि सीत्यंगु दु
छिं यानादीगु सजौयल्य्
जि ग्यानाः निराश जूगु दु।

16 छिगु ग्यानापुगु तमं
जितः त्वपूगु दु,
छिगु सजौयनं
जितः नाश यायेत्यंगु दु।

17 इमिसं बा वःगु खुसिं थें
न्हिच्छि हे जितः
घेरय् यानातःगु दु,
इमिसं प्यखेरं जितः त्वपुइ

धुंकल।

- 18 छिं जिमि पासापिं
व जिमि यःपिन्त जिपाखें
तापाकादीगु दु,
खिउँगु जिमि छम्ह पासा जूगु दु।

89

देशया संकटया इलय्

छपु भजन

दाऊद नाप परमेश्वरया बाचा व इस्त्राएलया दुर्दशा, लय् तइम्हय्सिगु निंति – एज्रा
एतानया मश्किल

- 1 जिं परमप्रभुया
सदां दयाच्चनीगु
दया मायाया
म्ये हालाच्चने,
छि पुस्तां पुस्ता तक
थः मनूत प्रति
विश्वास याये बहःम्ह जुयादी धकाः
जिं मनूतय्त कनाच्चने।

- 2 छिगु सदां दयाच्चनीगु
दया माया
अले छिगु विश्वास याये बहःसू
आकाश थें
थातं च्वनी धकाः जिं स्यू।

- 3 छिं धयादिल,
“जिं थःम्हं ल्ययाम्हनापं
बाचा चिनागु दु,
थः दास दाऊदलिसे
पाफयागु दु,

- 4 ‘छिमि छम्ह सन्तान न्ह्याबलें
जुजु जुयाच्चनी,

छंगु सिंहासनयात
पुस्तां पुस्ता
तक तये।' ” ☆

सेला

5 हे परमप्रभु,
स्वर्गय् छिगु अजू चायापुगु ज्याया
प्रशंसा जुइ,
स्वर्गदूततयगु पुचलय्
छि विश्वास याये बहःम्ह खः
धकाः प्रशंसा जुइ।

6 छाय्धाःसा
स्वर्गय् परमप्रभु थें
जाःम्ह सुं नं मदु,
परमप्रभुनापं ज्वःलाःम्ह
सुं नं स्वर्गयाम्ह प्राणी मदु।

7 परमेश्वर पवित्र मनुतयगु सभाय्
तसकं इज्जत यायेमाःम्ह
व थः जःखः च्वंपिं
फुक्क स्वयाः
अप्वः ग्याये माःम्ह खः।

8 हे दक्व शक्ति दुम्ह
परमप्रभु परमेश्वर,
छि थें ज्याःम्ह सु दु धकाः?
हे परमप्रभु,
फुक्क खँय् छि
विश्वास याये बहःम्ह खः।

9 छिं तःधंगु लबु
थाहां वयाच्चंगु समुद्रय्
राज्य यानादी,
उकियागु लबु थाहां वइबलय्

- छिं हे उकियात शान्त यानादी।
 10 छिं हे तःधिकःम्ह समुद्रया
 जन्तुयात काच्याक कुचुक
 यानादिल,
 छिं थः शत्रुतय्त
 थःगु ल्हाःया बलं
 छ्यालब्ब्याल यानादिल।
 11 आकाश व पृथ्वी छिगु हे खः,
 संसार व उकी दुगु फुक्क
 छिं हे दय्कादीगु खः।
 12 उत्तर व दच्छिन
 छिं दय्कादीगु खः,
 तबोर व हेर्मोन पर्वत
 छिगु नामय्
 लयल्यतातां म्ये हाली।
 13 छि गुलि बल्लाःम्ह खः!
 छिगु बल गुलि तःधं!
 14 धार्मिकता व न्याय
 छिगु सिंहासनया जग खः।
 छिगु सदां दइगु दया माया
 व विश्वास याये बहःसू
 छिकपिनि दूतत जुयाः
 छिगु न्ह्यः न्ह्यः वनी।
 15 हे परमप्रभु,
 धन्य खः भजन हालाः
 छिगु आराधना याइपि,
 व छिगु दयाया जलय्
 म्वानाच्चनिपि मनूत।
 16 इपि न्हिच्छि हे
 छिगु हे नामय् लय्ताइ।
 अले इपि छिगु हे

- धार्मिकताया कारणं
चव्य थाहां वनी।
- 17 छायाः सा छि हे
इमिगु महिमा व शक्ति खः।
अले छिगु हे दया मायां
जिमित बल्लाकादीगु दु।
- 18 हे परमप्रभु,
छिं जिमित रक्षा याइम्ह
ल्ययादिल,
छि इस्राएलया पवित्र परमेश्वरं हे
जिमित जुजु बियादिल।
- 19 यक्व न्हापा छिं
थः विश्वास यायेबहःपि
मनूतयत् दर्शन बियाः
थथे धयादिल,
“जिं छम्ह नांजाःम्ह सिपाईयात
ग्वाहालि यानागु दु,
जिं मनूतय दथुं ल्ययाम्ह
छम्ह मनूयात राज्ययागु
सिंहासन बियागु दु।
- 20 जिं जिमि दास दाऊदयात कयाः
थःगु पवित्र चिकनं
अभिषेक यानागु दु।☆
- 21 जिगु बल न्हाबलें
वयाके दयाचवनी।
जिगु शक्ति वयात
बल्लाकाबी।
- 22 सुं शत्रुं वयात झंगः लाये
खनी मखु,
सुं दुष्टं वयात क्वह्वंके

खनी मखु।

23 जिं वया शत्रुतय्त

वयागु न्ह्यःनं नाश यानाबी,
अले वयात मययकिपिन्के
विपत्ति हयाबी।

24 जिं वयात सदां दइगु

दया माया यानाच्चवने,
अले वनापं विश्वास याये
बहःम्ह जुयाच्चवने,
जिगु नांपाखें

वयागु शक्ति अप्वयावनी।

25 जिं वयागु राज्य

भूमध्यसागरनिसें यूफ्रेटिस
खुसि तक थ्यंकाबी।

26 वं जितः थथे धकाः सःती,

‘छि जिमि बाः,
जिमि परमेश्वर
व जिगु उद्धारया
ल्वहंधी खः।’

27 हाकनं जिं वयात

थः तःधिकःम्ह काय्
व पृथ्वीया जुजुपिनि
नायः दयकाबी।☆

28 जिगु सदां दयाच्चनीगु

दया माया वयाके दयाच्चनी,
अले जिं वनापं चिनागु बाचा
न्ह्याबलें दयाच्चनी।

29 जिं वया वंशयात न्ह्याबलें

तयातये,
अले आकाश दतले
वयागु सिंहासन दयाच्चनी।

- 30 वया सन्तानं जिगु
व्यवस्थायात त्वःतल धाःसा
जिगु नियमकथं मजुल धाःसा,
- 31 जिगु विधियात हाचांगाल धाःसा,
जिगु आज्ञा पालन मयात
धाःसा,
- 32 जिं इमिगु अपराधया सजौय
कथिं,
व इमिगु अधर्मया सजौय
कोरी बी।
- 33 अयूनं जिं जिगु माया
दाऊदपाखें चीकाछवये मखु।
अले जिं वयात बियागु
बचं पूमवकुसें
त्वःते मखु।
- 34 जिं थःगु बाचा त्वथुले नं मखु,
जिं थःगु म्हुतुं वयात बियागु
बचं लित काये नं मखु।
- 35 जिं थःगु पवित्र नामय्
न्ह्याबलेया लागि
बचं बियागु दु,
जिं दाऊदलिसे गुबले
मखुगु खँ ल्हाये मखु।
- 36 वयागु वंश न्ह्याबले
दयाच्चनी
अले जिगु न्ह्यःने
वयागु सिंहासन
सूर्य थें दयाच्चनी।
- 37 व तिमिला थें
न्ह्याबलेया लागि
पलिस्था जुइ,
आकाशया साक्षी ला
विश्वास यायेबहः जुइ।”

सेला

- 38 अयनं छिं थःम्हं
 अभिषेक यानादीम्हय्सित
 त्वःतादीगु दु,
 इन्कार यानादीगु दु,
 अले छि वलिसें
 तंचायादीगु दु।
- 39 छिं थः दासनापं
 चिनादीगु बाचायात
 त्वःतादीगु दु,
 छिं वयागु श्रीपेच
 बैय् वान्छवयाः
 अशुद्ध यानादीगु दु।
- 40 छिं वयागु शहरत
 रक्षा याइगु फुक्क पखाः
 थुनादीगु दु,
 अले वया किल्ला भज्यंक
 स्यंकादीगु दु।
- 41 अनं जुयाः वनीपि
 सकसिनं वयात
 लुतय याःगु दु,
 वया जःलाखःलातय्सं
 वयात हिस्याइगु।
- 42 छिं वया शत्रुतय्त
 बल्लाकादिल,
 वया फुक्क शत्रुतय्त
 लय्ताय्कादीगु दु।
- 43 हानं छिं वयागु तरवारया
 धाःयात हीकादीगु दु,
 अले छिं लडाइँलय् वयात
 ग्वाहालि यानादीगु मदु।
- 44 छिं वयागु गौरव

सिधयकादीगु दु,
अले वयागु सिंहासन
बैय् वांछवयादीगु दु।

45 वयागु ल्याय्म्हया दिं
छिं कम यानादीगु दु,
छिं वयात लज्यां
त्वपुयादीगु दु।

सेला

46 हे परमप्रभु, गुबलय् तक?
छु छिं न्ह्याबलें
जिमिगुपाखें थःगु ख्वाः
फस्वय्कादीगु ला?
छिगु तं गुबलय् तक
मि थें च्यानाच्चनीगु?

47 जिगु जीवन गुलि चिहाकः
धकाः लुमंकादिसँ।
छिं छाया मफतय् मनूतय्त
सृष्टि यानादियागु?

48 सु मनू न्ह्याबलें म्वानाच्चनी?
सुनां थःत कालया
शक्तिपाखें बचय् याये फइ?

सेला

49 हे परमप्रभु,
छिगु न्हापायागु सदां दइगु
दया माया गन वन?
छिं थःगु विश्वास याये बहःसुलिइ
दाऊदनापं पाफयादीगु गन दु?

50 लुमंकादिसँ हे परमप्रभु,
गथे मनूतय्सं छिकपिनि
दासयात बेइज्जत यात,
अले गथे यानाः जिं
छितः आराधना मयाइपिं

जातियापि मनूतयगु हेला
सह यानाच्चवना।

51 छिकपिनि शत्रुतयसं
जितः हिस्यागु दु,
हे परमप्रभु,
इमिसं छिं अभिषेक यानादीम्ह
जुजुयात
पला पलाखय् हिस्याइगु।

52 न्ह्याबले
परमप्रभुया प्रशंसा या!
आमेन! आमेन!

प्यंगू ब्व

90

भज ९०—१०६

परमेश्वरया मनू मोशाया प्रार्थना

1 हे परमप्रभु,
छि पुस्तां पुस्ता तक
जिमिगु च्वनेगु थाय्
जुयादीगु दु।

2 पहाडत दये न्ह्यः,
छिं पृथ्वी व संसारयात सृष्टि
यानादी न्ह्यः निसें,
अले शुस्निसें लिपा तकं
छि हे परमेश्वर खः।

3 छिं मनूयात हाकनं
धुलय् लित छवयादी।
अले धयादी,
“हे मनूया सन्तान, लिहां हूँ।”

4 छिगु लागि दूःछि दँ ला
 म्हिगः वंगु छन्हु थें जक खः,
 चान्हयसिगु चिहाकःगु ई थें
 जक खः।☆

5 बाः वःगु लखें थें
 छिं मनूतयत् चुइकायंकादी,
 इपिं म्हगस थें खः,
 इपिं सुथय् बुयावइगु
 घाँय् थें खः।

6 सुथय् बुँ ह्याः व थाहां वइ,
 तर बहनी गनाः
 सुकूचिनावनी।

7 छिगु तमं जिपिं नाश जुइ,
 छिगु तःधंगु तमं
 जिमित ख्याइ।

8 छिं जिमिगु पाप
 थःगु न्ह्यःने तयादी,
 जिमिगु सुलाच्चंगु पापयात
 थःम्हं खनीगु थासय्
 तयादी।

9 छिगु तमं जिमिगु आयु
 कम यानाबी।
 जिमिगु जीवन
 झसुकाः ततं फुनावनी।

10 जिपिं न्हयेदँ
 तक म्वाइ,
 बलं फत धाःसा
 चयदँ तक जुइफु,
 अयनं जिमिगु ई
 संकट व दुःखय् जक फुइ,
 छायाःसा जीवन याकनं फुइ

अले जिपिं ब्वयावनी।

11 छिगु तंया शक्ति

सुनां सीके फु?

छिगु तं नं छिगु भय कायेगु

ति हे तःधं धकाः

सुनां स्यू?

12 जिपिं बुद्धि दुपिं जुइत जिमित

थःगु दि ल्याः खायेगु

स्यनादिसँ।

13 अज्ज ग्वःन्हु तक छिगु तं

दयाचवनी?

हे परमप्रभु! थः दासतयूत

दया यानादिसँ।

14 सुथ पतिकं थःगु

सदां दयाचवनीगु दया मायां

जिमित जाय्कादिसँ।

अले जिमिसं भजन हाले फयेमा

व म्वानाच्वंतले लय्तायाचवने

फयेमा।

15 ग्वःन्हु तक छि जिमित

सास्ती बियादिल,

अले ग्वःदँ तक

जिमिसं दुःखसिया,

उलि हे दँ

जिमित लय्ताय्कादिसँ।

16 छिगु ज्या

छि दासतयूसं खनेमा,

छिगु महिमा

इमि सन्तानतयूसं खनेमा।

17 परमप्रभु, जिमि परमेश्वर,
छिगु दया माया जिमिके दयेमा,
जिमिसं यानागु फुक्क ज्याय्
जिमित ताःलाकादिसँ।

91

जिमित रक्षा यानादीम्ह

परमेश्वर

1 दक्वसिबय् तःधंम्ह परमप्रभुयागु
शरणय् च्वनीम्ह मनू
दक्व शक्ति दुम्ह परमेश्वरयागु
सुरक्षाय् च्वनी।

2 जिं परमप्रभुया बारे धाये,
“वय्कः जिगु शरण कायेगु थाय्
व किल्ला खः,
वय्कः जिमि परमेश्वर खः,
जिं वय्कःयात भरोसा याना।”

3 धात्थें वय्कलं छन्त
शिकारीया जालं
व ग्यानापुगु ल्वचं
बचय् यानादी।

4 वय्कलं छन्त
थःगु पपुति त्वपुयादी,
अले छन्त वय्कःया शरणय्
बांलाक च्वने दइ।
वय्कःया विश्वास याये
बहःगु बचं छंगु ढाल
व सुरक्षा खः।

5 न्हिनय् आकाझाकां
वइगु हमलापाखें

- वा चान्हय् जुइगु छुं नं
 खतरापाखें
 छ ग्याये माली मखु।
- 6 छ खिउँल्य् वइगु ल्वय् खनाः
 व न्हिनय् स्यंकीगु
 महामारी खनाः
 ग्याइ मखु।
- 7 छंगु न्ह्यःने द्रुःछिम्ह,
 अले छंगु जवपाखे झिद्रुम्ह
 क्वदलेफु
 अयनं छन्त छुं जुइ मखु।
- 8 दुष्टतयसं गथे यानाः
 सजाँय फइ, छं खनी।
- 9 परमप्रभुयात छं थः च्वनेगु थाय्
 दय्कल धाःसा,
 अले दक्वसिबय् तःधंम्हय्सित
 थःत रक्षा याइम्ह
 दय्कल धाःसा,
- 10 छन्त छुं मभिं जुइ मखु,
 छंगु छँया न्ह्यःने छुं विपत्ति
 वइ नं मखु।
- 11 छ न्ह्याथाय् वंसां रक्षा यायेत
 परमेश्वरं थः दूततय्त आज्ञा
 बियादी।☆
- 12 अले इमिसं छन्त ल्हातय्
 फया काइ।
 मखुसा छंगु तुति ल्वहँतय्
 न्याः वनी।☆
- 13 छं सिंह व गोमन सर्पयात तुति न्हुइ,
 ल्याय्म्हम्ह सिंह व सर्पयात

छं तुति न्हुतुन्हइ।☆

- 14 परमप्रभुं धयादी,
 “सुनां जितः माया याइ
 इमित जिं बचय् याये,
 अले सुनां जितः परमप्रभु धकाः
 स्वीकार याइ
 इमित जिं रक्षा याये।
- 15 इमिसं जितः सःतीबलय्
 जिं इमित लिसः बी,
 इमित दुःख जुइबलय्
 जिं इपिनापं च्वने,
 जिं इमित बचय् याये,
 अले इज्जत याये।
- 16 जिं इमित ताहाःगु आयु बी,
 जिं इमित बचय् याये।”

92

परमेश्वरया प्रशंसाया भजन

शबाथया निति छपु भजन

- 1 हे परमप्रभु परमेश्वर, दक्वसिबय्
 तःधंम्ह,
 छितः सुभाय् बीगु
 व छितः तःधंकाः
 भजन हालेगु बांलाःगु खँ खः।
- 2-3 तारयागु बाजं थानाः
 अले वीणाया लय् पिकयाः
 सुथय् सुथय्
 छिगु सदां दयाच्च्वनीगु
 दया मायाया बारे कनेगु

व चान्हय् चान्हय्
 छि गुलि विश्वास याये
 बहःम्ह खः धकाः
 न्यकेगु बांलाःगु खँ खः।

4 हे परमप्रभु,
 छिं जितः थःगु ज्यां
 लय्तायकादीगु दु।
 छिं यानादीगु ज्याया कारणं
 जि लय्लय्तातां म्ये हाले।

5 हे परमप्रभु,
 छिगु ज्या गुलि तःधं,
 छिगु बिचाः गुलि दुग्यं।

6 थ्व खँ बुद्धि मदुम्ह मनुखं
 सीके फइ मखु,
 मूर्ख थुइके नं फइ मखु,

7 दुष्ट मनूत घाँय् थें थाहां वयेफु,
 दुष्ट ज्या याइपिनिगु भिं जुइफु,
 तर इपिं सदांया लागि
 नाश जुयावनी।

8 हे परमप्रभु,
 छि सदांया लागि दक्वसिबय्
 तःधंम्ह खः।

9 हे परमप्रभु,
 छिक्पिनि शत्रुत नाश जुयावनी,
 अले दुष्टत उखेलाः थुखेलाः
 मदइ धकाः जिमिसं स्यू।

10 छिं जितः गुंयाम्ह द्रुहं थें
 बल्लाकादीगु दु,

छिं जितः लसताया चिकनं
अभिषेक यानादीगु दु।

11 जिं थः शत्रुत बूगु खनागु दु,
अले दुष्टतयगु ख्वःसः
न्यनागु दु।

12 धर्मीत तायगः
सिमा थें थाहां वइ,
अले लेबनानया देवदारु
सिमा थें बल्लानाः तःमा जुइ।

13 इपिं परमप्रभुया देगलय् प्युगु
सिमा थें जुइ,
इपिं झी परमेश्वरया चुकय्
च्वन्ह्याया वइ,

14 इपिं न्ह्याबलें वाउँसे च्वनी
अले बल्लाना च्वनी।
इमिसं बुरा जुयाः नं फल बी।

15 परमप्रभु भिंम्ह खः,
अले वय्कः जिमि त्वहंधी खः,
वय्कःयाके छुं अधर्म मदु।

93

परमेश्वर जुजु

1 परमप्रभु जुजु खः।
वय्कलं बल

व गौरवया वसः
फिनादीगु दु।

पृथ्वीयागु जग बल्लाः
व गुबलें लिगिलिगि सनी मखु।

2 हे परमप्रभु,
छिगु सिंहासन न्हापांनिसें दु।

- छि थः हे नं न्हापांनिसें दी।
 3 समुद्रय् लबु दनावःगु दु,
 समुद्रया लबुया सः
 तस्सः जूगु दु,
 समुद्रय् ग्यानापुक्क किसिद्वम्बः
 थाहां वःगु दु।
 4 समुद्रया सः स्वयाः
 अले समुद्रया लबु स्वयाः नं,
 दकलय् च्वय् च्वनादीम्ह
 परमप्रभु शक्ति दुम्ह खः।
 5 हे परमप्रभु,
 छिगु नियम न्हाबलें दयाच्चनी,
 छिगु देगः सदांया निति
 पवित्र जू।

94

परमप्रभु सकसिया न्यायाधीश

- 1 हे परमप्रभु,
 छि सजौंय बियादीम्ह
 परमेश्वर खः,
 थःगु तं क्यनादिसँ!
 2 छि सकल मनूतय् न्यायाधीश खः,
 दनादिसँ,
 अले घमण्डीतय्त
 छु यायेमाःगु खः यानादिसँ।
 3 हे परमप्रभु,
 दुष्टत गुबलय् तक
 लयतायाच्चनी?
 गुबलय् तक?
 4 इमिसं तःधंछुयाः खँ

ल्हानाजुइगु।
मभिपिं मनूत फुक्कसिनं
फुई यानाजुइगु।

5 हे परमप्रभु!
इमिसं छिकपिनि मनूतयूत
क्वत्यला जुइगु,
इमिसं छिं थः मनू धाःपिन्त
सास्ती यानाजुइगु।

6 इमिसं भाःत मदुपि मिस्त,
मां-बौ मदुपि मस्त
व परदेशीतयूत स्यानाबीगु।

7 इमिसं धाइ,
“परमप्रभुं झीत खनी मखु,
याकूबया परमेश्वरं वास्ता
यानादी मखु।”

8 अय् पशु थें ज्याःपिं मनूत,
होश या,
अय् मूर्खत, छिमिके
गुबलय बुद्धि दइगु?

9 छिमित न्हाय्पं ब्यूम्हय्सिनं
मताइ ला?
छिमित मिखा ब्यूम्हय्सिनं
मखनी ला?

10 वय्क्लं जाति जातियात
कजय् यानादी,
छु वय्क्लं छिमित
सजाँय बियामदी ला?
वय्कः सकल मनूतयूत स्यनेकने
यानादीम्ह खः,
छु वय्कःयाके थःगु ज्ञान
मदइ ला?

- 11 परमप्रभुं मनूतयगु बिचाः स्यू,
अले व बिचाः ज्यालगय् मजू
धकाः स्यू।☆
- 12 हे परमप्रभु, धन्यम्ह खः
छिं कजय् यानादीम्ह मनू,
अले छिं थःगु हे व्यवस्था
स्यनेकने यानातःम्ह मनू।
- 13 छिं वयात दुःखया इलंनिसें
दुष्टतयगु निति गाः म्हुइबलय्
तकं शान्ति बियादी।
- 14 परमप्रभुं थः प्रजायात
त्वःतादी मखु,
परमप्रभुं थःम्हं ल्ययादीगु
जातियात त्वःतादी मखु।
- 15 अदालतय् हाकनं न्याय दइ,
धर्मीं मनूतय्सं उकिया पॅली।
- 16 दुष्टतयगु विरोधय् जिनापं
सु दनी?
मभिंगु ज्या याइपिनिगु विरोधय्
जिगु निति सु दनी?
- 17 परमप्रभुं जितः ग्वाहालि
बियामदीगु जूसा ला
जि न्हापा हे सुनसान चिहानय्
च्वने धुंकीगु जुइ।
- 18 जिं धया,
“जिगु तुति चुलुयाच्चंगु दु,”
तर हे परमप्रभु,
छिगु सदां दयाच्चनीगु
दया मायां

- जितः तिबः बिल,
 19 जि तसकं नुगः मछिनीबलय्
 छिं जितः हःपाः बियाः
 लय्तायकादी।
- 20 छु दुष्ट शासकत छिनापं
 मिलय् जुइ फइ ला?
 इमिसं थःगु कानूनयात छ्यलाः
 स्यंकेगु ग्वसाः ग्वइगु।
- 21 इपिं धर्मीं मनूतय्गु विरोधय्
 छप्पे जुयाजुइ,
 अले छुं मस्यूपिन्त दूषं बियाः
 स्यानाजुइ।
- 22 तर परमप्रभु जिगु किल्ला खः,
 जिमि परमेश्वर जिगु
 शरण कायेगु ल्वहंधी खः।
- 23 परमेश्वरं इमिगु मभिंगु
 ज्याया पलेसा मभिं यानादी,
 इमिगु पापया लागि
 इमित नाश यानादी।
 परमप्रभु झी परमेश्वरं
 इमित नाश यानादी।

95

प्रशंसाया भजन

- 1 वा, परमप्रभुया निंति
 लय्तातां म्ये हालेनु,
 झी उद्धारया ल्वहंधीयात
 जयजय यायेनु।
- 2 सुभाय् ब्युब्बुं
 वय्कःया न्ह्यःने वनेनु,

भजन व म्ये हा हां
वय्कःयात प्रशंसा यायेनु।

3 परमप्रभु तःधंम्ह परमेश्वर खः,
फुक्क घःतय् च्वय् तःधंम्ह
जुजु खः।

4 पृथ्वीया ततःजाःगु थाय्
वय्कःया ल्हातय् दु।
पहाडया च्वका च्वका नं
वय्कःयागु हे खः।

5 समुद्र वय्कःयागु हे खः,
वय्कलं हे उकियात
दय्कादीगु खः,
वय्कलं गंगु बै नं
दय्कादीगु खः।

6 वा, झीसं छ्यं क्वछुकाः
वय्कःयात आराधना यायेनु,
झीत दय्कादीम्ह परमप्रभुया
न्ह्यःने पुलि चुयेनु।

7 वय्कः हे झी परमेश्वर खः,
अले झीपि वय्कःया प्रजा
व वय्कःया बथांयापि फै खः।☆☆

थौं छिमिसं परमेश्वरयागु सः
ताल धाःसा,

8 छिमि पुर्खा मेरीबाय्*
व छन्हु मस्साहया† मरूभूमिइ
जिद्दी जूगु थें
छिपि जिद्दी जुइ मते।☆

☆ 95:7 १५:७-८ हिब ३:१५; ४:७ ☆ 95:7 १५:७-११ हिब ३:७-११
अर्थ ल्वापु खः। † 95:8 १५:८ मस्साह थुकिया अर्थ जाँच खः।
गन्ती २०:२-१३

* 95:8 १५:८मेरीबा थुकिया
☆ 95:8 १५:८-९ प्रस १७:१-७;

- 9 जिं इमिगु लागि यानागु ज्या
 खंगु दुसां
 इमिसं जितः जाँचय् यात,
 जिगु मन स्वल।
- 10 पिइदँ तक जि इपिं खनाः
 तंचाया, अले जिं धया,
 “थुपिं जिपाखें फहिला वनीगु
 मनदुपिं खः,
 इमिसं जिगु लँ म्हसीके मफु।
- 11 उकिं जिं तमं पाफयाः धया,
 ‘छिपिं जिगु झासु लनेगु थासय्
 गुबलें दुहां वये फइ मखु।’ ”☆

96

परमेश्वर दकलय् तःधंम्ह जुजु

- 1 परमप्रभुया नितिं छपु न्हगु
 भजन हा,
 हे पृथ्वीयापि सकल मनूत,
 परमप्रभुया नितिं
 प्रशंसाया म्ये हा!
- 2 परमप्रभुया लागि भजन हा,
 वय्कःया नांया प्रशंसा या,
 न्हियान्हिथं वय्कलं यानादीगु
 उद्धारया भिगु खँ न्यंकि।☆
- 3 जाति जातियात
 वय्कःया महिमाया बारे न्यंकि,
 सकल मनूतय्त
 वय्कःया अजू चायापुगु
 ज्याया बारे कं।

☆ 95:11 १५:११ गन्ती १४:२०-२३; व्य १:३४-३६; १२:९-१०; हिब ४:३-५

☆ 96:2 १६:२-१३ १ इति

- 4 परमप्रभु तःधंम्ह व तसकं
 प्रशंसा याये बहःम्ह खः।
 मेपि घःतयूत स्वयाः
 वय्क्कःयात अप्वः
 मानय् यायेमाः।
- 5 जाति जातियापि घःत ला
 मूर्ति जक खः,
 तर परमप्रभुं ला
 स्वर्ग दयकादिल।
- 6 वय्क्कःया जःखः प्यखेरं
 महिमा व गौरवं झःझः
 धयाच्चंगु दु,
 वय्क्कःया देगः शक्ति जाः
 अले झःझः धाः।
- 7 अय् जाति जातिया छैजःपि,
 परमप्रभुया प्रशंसा या,
 वय्क्कःया महिमा व शक्तिया
 प्रशंसा या,
- 8 परमप्रभुया नांयात तःधंकेत
 वय्क्कःया प्रशंसा या,
 देछा ज्वनाः वय्क्कःया
 देगलय् वा।
- 9 पवित्रतां झःझः धाय्क्कः
 परमप्रभुया आराधना या।
 हे पृथ्वीयापि
 सकल मनूत,
 वय्क्कःया ग्याःभय का!☆
- 10 फुक्क जातितयूत धा,
 “परमप्रभु जुजु खः,”
 संसार धिसिलाक्क च्वंगु दु
 उकियात संके फइ मखु।

वय्कलं न्यायकथं

मनूतयगु इन्साफ यानादी।

11 पृथ्वी व आकाश लयतायेमा,

समुद्र व अन दुपिं

फुक्क प्राणीत लयतायाः

तसकं हालेमा।

12 बुँ व उकी सःगु फुक्क

लयतायेमा,

अले गुँयागु फुक्क सिमा

परमप्रभुया न्ह्यःने

लयतायाः म्ये हालेमा,

13 परमप्रभु पृथ्वीइ राज्य यायेत

झाइबलय्

वय्कलं न्याय व धार्मिकताकथं

संसारयापिं मनूतय्त

राज्य यानादी।

97

दक्व शक्ति दुम्ह परमप्रभुया महिमा

1 परमप्रभु जुजु खः।

पृथ्वी लयतायेमा,

समुद्रया टापुत लयतायेमा।

2 परमप्रभुया छचाःखेरं

ख्वातुक हाकुगु सुपौय् दु,

वय्कलं न्याय व धार्मिकतां

राज्य यानादी।

3 मि वय्कःया

न्ह्यःने न्ह्यःने वनी,

अले वय्कःया प्यखेरं च्वपिं

शनुतय्त नाश याइ।

4 वय्कःया हाबलासां

- संसारयात जः खय्काबी,
 थ्व खनाः
 पृथ्वी थरथर खाइ।
- 5 परमप्रभुया न्ह्यःने,
 फुक्क पृथ्वीयाम्ह
 प्रभुया न्ह्यःने
 पहाडत मैन थें नायावनी।
- 6 स्वर्ग वय्कःया
 धार्मिकता क्यनी,
 सकल मनूतय्सं वय्कःया
 महिमा खनी।
- 7 मूर्ति पुजा याइपि,
 मूर्तितय्गु बारे घमण्ड याइपि
 सकलें मछाले माली।
 परमप्रभुया न्ह्यःने
 फुक्क घःतय्सं छ्यं क्वछुकाः
 आराधना याइ।
- 8 हे परमप्रभु,
 छिगु न्यायया कारणं
 सियोनयापि मनूत लय्ताः,
 यहदाया गांत लय्ताः।
- 9 हे परमप्रभु, दक्कसिबय् तःधंम्ह,
 छि पृथ्वीयाम्ह शासक खः,
 छि फुक्क घःत स्वयाः
 तसकं तःधंम्ह खः।
- 10 परमप्रभुयात माया याइपिन्सं
 मभिगुयात ययकी मखु,
 वय्कलं थः विश्वास याये
 बहःपिनिगु प्राण रक्षा यानादी,
 वय्कलं इमित दुष्टतय्गु ल्हातं
 बचय् यानादी।

- 11 धर्मीतय्गु निति जः
ह्लातःगु दु,
अले भिंपि मनूतय्गु निति लसता।
- 12 हे धर्मी मनूत,
परमप्रभुलिसे लयता,
अले वय्कःया पवित्र नांयात
तःधकि।

98

परमेश्वर संसारयाम्ह शासक खः

- 1 परमप्रभुया निति
छपु न्हगु भजन हा,
वय्कलं अजू चायापुगु ज्या
यानादीगु दु,
थःगु शक्ति व पवित्र बलं
वय्कः त्याःगु दु।
- 2 परमप्रभुं थःगु उद्धारया ज्या
क्यनादीगु दु,
वय्कलं थःगु धार्मिकता
जाति जातितय्त
क्यनादीगु दु।
- 3 वय्कलं इस्राएलीतय्त सदां
दयाच्चनीगु दया माया
बी धकाः
चिनादीगु बाचा व विश्वास याये
बहःम्ह जुयेगु लुमकादीगु दु।
- पृथ्वीया कुंकलामय् च्वंपिन्सं
झी परमेश्वरं यानादीगु
उद्धार खंगु दु।
- 4 हे पृथ्वीयापि सकल मनूत,

लयतातां भजन हा,
 लयल्यतातां भजन हालाः
 वय्क्ःयात प्रशंसा या।

5 परमप्रभुया प्रशंसा या!

वीणा थानाः परमप्रभुया
 प्रशंसा या!

6 तुरही व नेकू पु,
 अले परमप्रभु झी जुजुयात
 लयतातां जयजय या।

7 समुद्र व उकी च्वंपि फुक्क
 प्राणीतयूत
 वय्क्ःयात तःधंकाः ततःसलं
 हालेब्यु!
 अले पृथ्वी व पृथ्वीइ च्वंपि
 सकसितं
 वय्क्ःयात तःधंकाः ततःसलं
 हालेब्यु!

8 खुसितयसं ल्हाःपा थायेमा,
 पहाडतयसं छक्वलं लसतां
 म्ये हालेमा।

9 थ्व परमप्रभुया न्ह्यःने जुइमा।
 छायाःसा वय्क्ः पृथ्वीइ
 राज्य यायेत झायादीत्यंगु दु।

वय्क्लं धार्मिकतां सुयागु
 पँ मलीसैं
 संसारयापिं मनूतयगु
 न्याय यानादी।

- 1 परमप्रभु जुजु खः, मनूत
ग्यायेमा।
वय्कः करूबतय्
दथुइ च्वनादीगु दु।
पृथ्वी लिगिलिगि सनेमा।☆
- 2 परमप्रभु सियोनय् दक्वसिबय्
तःधंम्ह खः,
वय्कः फुक्क जातितसिबय्
तःधंम्ह खः।
- 3 इमिसं छिगु तःधंगु व तःजिगु
नांया प्रशंसा यायेमा!
वय्कः पवित्र खः।
- 4 जुजु तःधंगु शक्ति दुम्ह खः,
वय्कलं न्याययात यय्कादी,
छिं इस्राएलय् न्यायया पलिस्था
यानादीगु दु,
न्याय व धार्मिकतां ज्या
यानादीगु दु।
- 5 परमप्रभु झी परमेश्वरया
प्रशंसा या
वय्कःया सिंहासनया न्ह्यःने
छ्यं क्वछुकि।
वय्कः पवित्र खः।
- 6 मोशा व हारून वय्कःया
पुजाहारीत खः,
अले वय्कःया नां कयाः प्रार्थना
याइम्ह छम्ह शमूएल खः।
इमिसं परमप्रभुयात
ग्वाहालिया निति इनाप यात,

अले वय्कलं इमित
 लिसः बियादिल।
 7 वय्कलं सुपौय्या थामं
 इपिलिसे नवानादिल,
 वय्कलं बियादीगु नियम
 व आज्ञा इमिसं पालन यात।☆

8 हे परमप्रभु जिमि परमेश्वर,
 छिं थः प्रजायात लिसः
 बियादिल।
 छिं इमित पापया सजाँय
 बियादीगु जूसां
 छि इमिगु लागि
 क्षमा बियादीम्ह परमेश्वर खः।

9 परमप्रभु झी परमेश्वरया
 प्रशंसा या,
 अले वय्कःया पवित्र पहाड्य्
 आराधना या!
 परमप्रभु झी परमेश्वर पवित्र खः।

100

सुभाय्या भजन

1 हे पृथ्वीयापिं
 सकलं मनूत,
 परमप्रभुया जयजय या।
 2 लय्तातां परमप्रभुया
 आराधना या,
 लसतां जाःगु भजन हालाः
 वय्कःया न्ह्यःने वा।

3 परमप्रभु हे परमेश्वर खः

धकाः सीकि।
 वय्कलं हे झीत दयकादिल,
 झीपिं वय्कःया हे खः।
 अले झीपि वय्कःया प्रजा
 व वय्कःया ख्यःयापि
 फैत खः।

4 सुभाय् ब्युब्युं देगःया
 ध्वाखाय् दुहां हूँ,
 प्रशंसा यायां वय्कःया
 चुकय् हूँ,
 वय्कःयात सुभाय् ब्यु,
 अले वय्कःया नांया
 प्रशंसा या।

5 परमप्रभु भिंम्ह खः,
 वय्कःया दया माया
 सदां दयाच्चनी।
 वय्कः न्ह्याबलेंया लागि
 विश्वास याये बहःम्ह खः।☆

101

जुजु व वया बचं
 दाऊदया भजन
 1 जिं छिगु सदां दयाच्चनीगु
 दया माया व न्याययागु
 म्ये हाले,
 हे परमप्रभु,
 जिं म्ये हालाः
 छिगु प्रशंसा याये।

☆ 100:5 १००:५ १ इति १६:३४; २ इति ५:१३; ७:३; एज ३:११; भज १०६:१; १०७:१; ११८:१; १३६:१; यर ३३:११

2 जिगु पहःचहः द्वं मदगु जुइ
छि जिथाय् गुबलय् झायेगु?
जिं थःगु छेंय् शुद्ध जीवन हने।

3 जिं मभिंयात
गुबलें सह याये मखु,
परमेश्वरपाखें फहिला
वनिपिनिगु ज्या
जितः तसकं मयः।

इपिं जिलिसें प्यपुनी मखु।
4 मभिंगु मति दुपि मनूतपाखें
जि तापाक च्वने।
जिं मभिं ज्या नाप
छुं स्वापु तये मखु।

5 थः जःलाखःलाया बारे
मखुगु खँ ल्हाइम्हयसित
जिं नाश यानाबी।
फुइँ यानाजुइपिं व घमण्डी
मनूतयत्
जिं सह याये मखु।

6 जिं परमेश्वरयात विश्वास याइपिं
मनूतयत् जक ल्ययाः
थःगु दरबारय् तये।
अले द्वं मदयकः जुइपिन्सं जक
जिगु सेवा याइ।

7 ध्वंलाइम्ह मनू जिगु छेंय्
च्वने दइ मखु।
मखुगु खँ ल्हाइम्ह मनू
जिगु मिखाया न्ह्यःने
च्वने दइ मखु।

8 जिं न्हियान्हिथं सुथ पतिकं

देशय् च्वंपि दुष्टतय्त
 न्हंकेगु याये।
 परमप्रभुया शहरं मभिं ज्या याइपिं
 सकसितं पितिनाछवये।

102

आपतय् लाःम्ह ल्याय्म्हया प्रार्थना

दुःखय् लाःम्ह मनूया प्रार्थना। तसकं दुःख जूबलय् परमप्रभुया न्ह्याःने वं थःगु दुःख
 प्वंकी।

1 हे परमप्रभु,
 जिगु प्रार्थना न्यनादिसँ,
 ग्वाहालिया नितिं यानागु
 जिगु इनाप न्यनादिसँ।

2 जितः आपत जूबलय्
 थःगु ख्वाः जिपाखें
 फस्वयकादी मते,
 जिं इनाप यायेबलय्
 न्यनादिसँ,
 अले याकनं लिसः बियादिसँ।

3 जिगु जीवन कुँ थें
 तनावनाच्चंगु दु,
 जिगु म्ह मि थें च्यानाच्चंगु दु,

4 जिगु नुगः घाँय् थें
 सुकूगनावंगु दु,
 जितः नये मास्ति मवः।

5 जि तस्सलं पिच्यानाः
 हालाच्चना।
 जि छेंगू व क्वय् जक जुइ धुन।

6 जि मरुभूमियाम्ह
 न्हिकांझंगः थें जुइ धुन,

झिजांमिजां दंगु थासय् च्वंम्ह
न्हिकांझंगः थें जुइ धुन।

7 जि न्ह्यः धयागु हे तनेधुंकल।
जि पलिइ च्वंम्ह
याकः झंगः थें जुइ धुन।

8 जिमि शत्रुतय्सं जितः
न्हिच्छिं हेस्याइगु।

जितः हेस्याइपिन्सं
सराः बी माल कि
जिगु नां कयाः सराः बीगु।

9 नउ जिगु नयेगु नसा जूगु दु,
अले जिं ख्वबि ल्वाकज्याःगु
लः त्वनेगु।

10 छायाःसा छि जिलिसें
तंम्वयादीगु दु,
अले जितः छखे
वांछवयादीगु दु।

11 जिगु जीवन बिनावंगु
निभाः थें जुयाब्यूगु दु।
अले जि गंगु घाँय् थें जुइ धुन।

12 तर हे परमप्रभु,
छि सदां थःगु सिंहासनय् च्वनादी।
छिगु नां पुस्तां पुस्ता तक
दयाचवनी।

13 पलाः ल्हनादिसैं!
सियोनयात दया यानादिसैं!
सियोनयात दया यायेगु ई
वये धुंकल।
थ्व हे पाय्छिगु ई खः।

14 छिकपिनि दासतय्त

सियोनया छगः छगः ल्वहं यः।
 अले उकिया छफुति छफुति धूयात
 इमिसं माया याः।

15 जाति जातियापि मनूतयसं
 परमप्रभुया नांयात च्वछाइ,
 अले पृथ्वीयापि सकलें जुजुपिन्सं
 वय्क्कःया महिमायात तःधंकी।

16 गुबलय् परमप्रभुं सियोनयात
 हानं दयकादी
 वय्क्कलं थः गुलि तःधंम्ह खः
 धइगु क्यनादी।

17 वय्क्कलं छुं मदुपिं मनूतयगु
 प्रार्थना न्यनादी,
 अले इमिगु इनापयात
 हेला यानादी मखु।

18 थ्व खँ लिपाया पुस्ताया
 निति च्वयाति,
 अले आः मबूनिपिन्सं नं
 परमप्रभुयात तःधंकी,

19 वय्क्कलं स्वर्गय् च्वय्च्वंगु
 थःगु पवित्रगु थासं
 क्वय् स्वयादिल।
 वय्क्कलं स्वर्ग पृथ्वीइ
 स्वयादिल।

20 वय्क्कलं कुना तःपिनिगु
 दुःखया सः न्यनादिल
 अले स्यायेगु सजॉय
 बियातःपिन्त
 छुत्कारा बियादिल।

21-22 थुकथं जाति जातियापि मनूत

व थीथी राज्य छप्पँ जुयाः
 वय्कःयात आराधना
 याःवइबलय्
 सियोनय् परमप्रभुया
 नांयात तःधंकी।
 अले यस्शलेमय्
 वय्कःयात तःधंकी।

23 ल्याय्म्हबलय् हे वय्कलं
 जितः कमजोर यानादीगु दु,
 अले जिगु आयु
 कम यानादीगु दु।

24 “हे जिमि परमेश्वर,
 ल्याय्म्हबलय् हे
 जितः यंकादी मते।
 छिगु दँ पुस्तां पुस्ता तक
 दयाच्चनी।”

25 दकलय् न्हापां
 छिं पृथ्वी सृष्टि यानादिल,
 अले थःगु हे ल्हातं
 आकाश दय्कादिल।

26 थुपि ला मदयावनी,
 तर छि सदां दयाच्चनी,
 थुपि फुक्क वसः थें
 भ्वाथः जुयावनी।
 छिं थुमित वसः थें हिलादी,
 अले थुपि मदयावनी।

27 छि न्हाबलें उत्थें जुयाच्चनी।
 छिगु आयु गुबलें फुइ मखु।☆

28 छिक्पिनि दासतय् मचाखाचा
 पुस्तां पुस्ता तक

छिगु न्ह्यःने सुरक्षित जुयाच्चनी।

103

परमेश्वरया माया

दाऊदया भजन

1 जिं दुनुगलंनिसें
परमप्रभुया

प्रशंसा याये।

जिं दुनुगलंनिसें वय्कःया

पवित्र नांया प्रशंसा याये।

2 जिं दुनुगलंनिसें परमप्रभुया

प्रशंसा याये।

वय्कलं यानादीगु भिंगु ज्या

जिं गुबले ल्वःमंके मखु।

3 वय्कलं जिगु फुक्क

पाप क्षमा यानादी

अले जिगु फुक्क

ल्वय् लंकादी

4 वय्कलं जितः सीगालं

त्वःतकादिल,

अले जितः सदां दइगु

दया माया व मायां

घेरय् यानादी।

5 वय्कलं जितः फुक्क

भिंगु खं पूवंकादी।

अले जिगु ल्याय्म्हस्

इमाया थे न्ह्धाः जुइ।

6 परमप्रभुं क्वत्यलातःपिन्त

न्याय यानादी,

अले इमिगु अधिकार इमित

- बियादी।
 7 वय्कलं थःगु लँ मोशाय़ात
 क्यनादिल,
 अले इस्राएलीतयूत थःगु ज्या
 क्यनादिल।
 8 परमप्रभु दयादुम्ह
 व माया यानादीम्ह खः।
 वय्कः काचाक्क
 तंम्बयादी मखु,
 अले सदां दयाच्चनीगु
 दया मायां जाःम्ह खः।☆
 9 वय्कलं न्ह्याबलें दोष
 बियाच्चनादी मखु,
 वय्कः न्ह्याबलें
 तंचाया च्वनादी मखु।
 10 वय्कलं झीत झीगु
 फुक्क पापया सजॉय
 बियादी मखु।
 वय्कलं झीगु अर्धमकथं सजॉय
 बियादी मखु।
 11 पृथ्वी स्वयां स्वर्ग गुलि तःजाः
 वय्कःया भय काइपि प्रति
 वय्कःया सदां दयाच्चनीगु
 दया माया नं उलि हे तःजाः।
 12 पच्छिमं पुर्ब गुलि तापाः
 उलि हे तापाक वय्कलं झीगु
 पाप झीपाखें चीकाछ्वयादी।
 13 बौन थःकाय् म्हाय्यात
 माया याःथें हे
 परमप्रभु वय्कःया भय

काइपिन्त माया यानादी।

- 14 झी गुकथं दुगु खः धकाः
वय्कलं स्यू।
झी धू जक खः धकाः
वय्कलं स्यू।

- 15 झी घाँय् थें जक खः,
जंगली स्वां थें
झी ह्वइ, अले इवाः जुइ।

- 16 फय् वयेवं झीत
व्वय्कायनी,
अले सुनानं खनी मखु।

- 17 तर परमप्रभुयागु सदां
दयाच्चनीगु दया माया
न्ह्याबलें वय्कःया
भय काइपिन्के दु।

इमि मस्त व छय्पिनिगु लागिं नं
वय्कः न्ह्याबलें
दयादुम्ह जुइ।

- 18 परमेश्वरं वय्कःया बाचा
मानय् याइपिन्त
व वय्कःया उपदेश पालन
याइपिन्त दया यानादी।

- 19 परमप्रभुं थःगु सिंहासन
स्वर्गय् स्वनादीगु दु।
अले वय्कलं सकसितं
शासन यानादी।

- 20 परमप्रभुया प्रशंसा या,
वय्कःया आज्ञा मानय् याइपिं
व वय्कलं धाःथें याइपिं
हे बल्लाःपिं स्वर्गदूतत!

- 21 हे स्वर्गया सिपाई,

अले वयकलं धाःथे याइपि
 वयकःया दासत,
 परमप्रभुया प्रशंसा या!
 22 हे वयकलं सृष्टि यानातःपि
 व वयकःया राज्यय्
 च्वंपि सकले,
 परमप्रभुया प्रशंसा या!

हे जिगु मन, परमप्रभुया प्रशंसा या!

104

सृष्टि यानादीम्ह परमेश्वरया प्रशंसा

- 1 जिं दुनुगलंनिसें
 परमप्रभुया
 प्रशंसा याये।
 हे परमप्रभु, जिमि परमेश्वर,
 छि तसकं तःधम्ह खः,
 महिमा व गौरवं छि झःझः
 धयाच्चंगु दु।
- 2 छिं थःत जलं त्वपुयादीगु दु।
 अले आकाशयात पाल थें
 चक्कंकादीगु दु।
- 3 छिं आकाशय् लःया घःने
 थःगु छें दयकादीगु दु,
 छिं सुपाँय्यात थःगु रथ
 यानादीगु दु
 अले फय्यात पपू यानाः
 ब्वयादी।
- 4 फय्यात छिं दूत यानादीगु दु,
 अले च्यानाच्चंगु मित्याःयात

थः दास यानादीगु दु।☆

- 5 छिं पृथ्वीयात बल्लाक जग
स्वनाः नीस्वनादीगु दु,
उकिं थ्व इकिधिकि हे
सनी मखु।
- 6 अले थुकिया च्वय्
छिं वसतं पुंके थें
समुद्र दय्कादिल।
अले पहाडया च्वय् च्वय्
थ्यंक नं लखं त्वपुल।
- 7 छिं हक्केवं लः बाः वन,
अले छिं तस्सलं उजं बीवं
इपि हथासं चिला वन।
- 8 अले पहाडं पहाडं
व गालं गालं जुयाः
इपि छिं इमिगु निंति धकाः
दय्कादीगु थासय् बाः वन।
- 9 लखं हाकनं पृथ्वीयात त्वपुइ
मफयेमा धकाः
छिं इमिसं पुलावने
मफयेक लागा चिनादिल।
- 10 छिं गुँच्चय् व गालय् गालय्
लःधाः हाय्कादिल।
- 11 थुकिं जंगली गधा
व फुक्क पशुतय्सं
थःगु प्याःचाः लंकी।
- 12 लःधाःया लिक्क लिक्क
झंगःतय्सं थःगु स्वँ दय्की,
अले सिमाकचाय् च्वनाः हाली।

- 13 छिं आकाशं पहाडय्
 वा गायकादी,
 अले छिगु आशिषं पृथ्वी
 बिलिबिलि जाइ।
- 14 छिं सा द्वहंया नितिं घाँय्
 व मनूतय्गु नितिं
 स्वां-सिमा सयकादी।
 अले इमिसं थःगु बाली
 सय्के फइ।
- 15 मनूतयत् लयत्ताय्केत दाखमघ,
 ख्वाः चक्कंकेत जैतूनया चिकं
 व ताकत् बीत मरि
 बियादीगु दु।
- 16 परमप्रभुं पिनादीगु वय्कःया
 थःगु हे सिमा
 लेबनानया देवदास्या सिमातयत्
 गाक्क लः दइ।
- 17 अन झंगःतय्सं
 थःगु स्वँ दय्की,
 थकुराःमाय्
 सलात्याः झंगतय्सं
 थःगु स्वँ दय्की।
- 18 ततःजाःगु पहाडय्
 गुँ दुगुचा च्वनी,
 अले नवःचा ल्वहंया
 कापिचाय् सुलाच्वनी।
- 19 छिं ऋतु क्वःछियेत
 तिमिला दय्कादिल,
 सूर्य थः लुकुंबीगु ई स्यू।
- 20 छिं चा दय्कादिल,

- अले खिउँबलय्
दक्व गुँपशुत पिहां वइ।
- 21 परमेश्वरं बियादीगु नसा
मामां शिकार याइबलय्
सिंहत श्वयक् हाली।
- 22 निभाः त्वइबलय् इपिं लिहांवनी
व थथःगु गुफाय् घनी।
- 23 अले सन्ध्या ई तक
ज्या यायेत मनूत पिहां वइ।
- 24 परमप्रभु, छिं फुक्क दय्कादीगु दु,
गज्याःगु तःधंगु बुद्धिं
छिं उपि फुक्क दय्कादिल,
छिगु सृष्टि श्व पृथ्वी जाःगु दु।
- 25 तःधिकःपिं व चिधिकःपिं
अल्याख जन्तुत च्वनेत
तःधंगु व मिखां न्ह्याये मदुगु
महासागर दु।
- 26 उकी जहाजत न्ह्याइ
छिं दय्कादीम्ह लः जन्तु
लिव्यातन् अन म्हिती।☆
- 27 पाय्छिगु इलय् छिं इमित
नयेगु नसा बियादी धकाः
इपिं सकसिनं छिगु हे लँ
स्वयाच्च्वनी।
- 28 छिं इमित नसा बियादी
अले इमिसं नइ,
छिं बियादीगु नसां इमिगु
प्वाः जाइ।
- 29 छिं थःगु ख्वाः

फस्वय्कादीबलय् इपिं ग्याइ,
छिं इमिगु सासः कयादीबलय्
इपिं सी अले धुलय् लिहांवनी।

30 छिं इमित थःगु सासः
बियादीबलय्
इमिगु सृष्टि जुइ,
छिं पृथ्वीयात
न्हगु जीवन बियादी।

31 परमप्रभुया महिमा न्हाबलें
दयाच्चवेमा।
परमप्रभु थःगु ज्याय्
लयतायादीमा।

32 छिं पृथ्वीयात स्वयादी
अले व थुरथुर खाइ,
छिं थीवं पहाडं कुँ पिहां वइ।

33 म्वाना च्वंतले
जिं परमप्रभुया म्ये हालाच्चवे,
जि दतले जिं जिमि परमेश्वरया
भजन हालाच्चवे।

34 जिं ध्यान यानागु वय्कलं
यय्कादीमा,
छाय्धाःसा जिगु लसता
वय्कःयापाखें वइ।

35 पापी मनूत पृथ्वी नाश
जुयावनेमा।

हे जिगु मन,
परमप्रभुया प्रशंसा या!
हल्लेलूयाह!

105

परमेश्वर व वय्क्ःया मनूत

1 परमप्रभुयात

सुभाय् देछा,

वय्क्ःया नां का,

जाति जातिया दथुइ

वय्क्लं छु यानादीगु खः

व न्यंकि।☆

2 वय्क्ःया निति भजन हा,

वय्क्ःया प्रशंसाया म्ये हा,

वय्क्ःया फुक्क अजू चायापुगु

ज्याया बारे कं।

3 वय्क्ःया पवित्र नांयात

तःधंकि,

परमप्रभुयात मालिपिनिगु नुगः

लयतायेमा।

4 परमप्रभु व वय्क्ःया

शक्तियात माला स्व,

वय्क्ःयात माला तुं च्वै।

5-6 अय्, वय्क्ःया दास

अब्राहामया सन्तान,

अय्, वय्क्लं ल्ययादीम्ह

याकूबया सन्तान,

वय्क्लं यानादीगु अजू चायापुगु

ज्या लुमंकि,

वय्क्ःया अजू चायापुगु ज्या

व वय्क्लं न्यंकादीगु

फैसलायात लुमंकि।

7 वय्क्ः हे परमप्रभु झी परमेश्वर खः।

वय्क्ःया न्यायया ज्या पृथ्वी न्यंकं जुइ।

8 वयक्लं थःगु बाचा न्ह्याबलें

लुमंकादी,

वयक्लं थःगु बाचा द्रुलंद्रुः

पुस्तायात बियादीगु खः।

9 व बाचा वयक्लं

अब्राहामलिसे चिनादिल,

अले उकिया बारे वयक्लं

इसहाकलिसे पाफयादिल।☆

10 परमप्रभुं याक्बलिसें पक्का

यानादिल,

अले इस्राएलनापं थथे धकाः

न्ह्याबलेंया लागि

बाचा चिनादिल।

11 “जिं छन्त हे कनान देश बी,

व छंगु सर्बय जुइ।”☆

12 अबलय् इपि ल्याख्य् कम,

कनान देशय् इपि

परदेशी जक खः।

13 इपि छगू देशं मेगु देशय्

छगू राज्यं मेगु राज्यय्

चाचाःहिलाजुइ।

14 वयक्लं सुयातं नं इमित

दुःख बीके मब्य्,

इमित रक्षा यायेत

वयक्लं जुजुपिन्त थथे धकाः

ख्याच्चः बियादिल,

15 “जिं ल्ययापिं मनूतय्त थी मते,

जिमि अगमवक्तातय्गु छुं

स्यंके मते।”☆

☆ 105:9 १०५:९ उत १२:७; १७:८; २६:३

☆ 105:11 १०५:१०-११ उत २८:१३

☆ 105:15

१०५:१४-१५ उत २०:३-७

- 16 परमप्रभुं इमिगु देशय्
अनिकाल छवयादिल,
अले इमिगु फुक्क
नयेगु नसा लाकाकयादिल।☆
- 17 वय्कलं इमिगु न्ह्यः न्ह्यः
छम्ह मनू छवयादिल,
उम्ह मनू दास यानाः
मियाछवःम्ह योसेफ खः।☆
- 18 वयागु तुतिइ इमिसं नेवः
न्ह्याकाः दुःख बिल,
अले वयागु गःपतय्
नँयागु सिखः तयाबिल,
- 19 वयागु म्हगस
पूरा जुइगु ई मवतले
व परमप्रभुया वचनं वयात
सत्य साबित मयातले☆
- 20 मिश्रयाम्ह जुजुं
वयात त्वःताबिल,
जाति जातियाम्ह शासकं
वयात छुत्कारा बिल।☆
- 21 वं वयात थःगु दरबारया
जिम्मा बिल,
अले देश न्यंकयाम्ह
हामा यानाबिल।☆
- 22 वं जुजुया हाकिमतय्त
कजय् यात
अले वया थकालितय्त
बुद्धिया खँ स्यन।

23 अले याकूब मिश्रय् वन,

☆ 105:16 १०५:१६ उत ४१:५३-५७ ☆ 105:17 १०५:१७ उत ३७:२८; ४५:५ ☆ 105:19
१०५:१८-१९ उत ३९:२०-४०:२३ ☆ 105:20 १०५:२० उत ४१:१४ ☆ 105:21 १०५:२१ उत ४१:३९-४१

- व हामया देशय्
परदेशी जुयाः च्वन।☆
- 24 परमप्रभुं थः मनूतयत्
यक्व मचाखाचा बियादिल,
अले इमित थः शन्नूत स्वयाः
बल्लाकादिल।
- 25 परमेश्वरं मिश्रीतय्गु मनयात
वय्कःया मनूतयत् मयय्केत
व वय्कःया दासतय्गु विरोधय्
ग्वसाः ग्वयेत हीकादिल।☆
- 26 अले वय्कलं थःम्हं ल्यःपि
दासत मोशा व हास्नयात
छवयादिल।☆
- 27 इमिसं इमिगु न्ह्यःने
वय्कःया अजू चायापुगु चिं,
अले हामया देशय्
अजू चायापुगु ज्या यात।
- 28 वय्कलं खिउँ छवयादिल,
अले देशन्यंक खिउँसे च्वन,
छाय्धाःसा इमिसं
वय्कःया वचनया
विरोध याःगु खः।☆
- 29 वय्कलं इमिगु लःयात
हि दय्कादिल।
अले इमि न्यात सित।☆
- 30 इमिगु देशय् ग्वाः ग्वाः
ब्यांचा वयाः
शासकतय्गु घनीगु क्वथाय्
तर्क वन।☆

☆ 105:23 १०५:२३ उत ४६:६; ४७:११ ☆ 105:25 १०५:२४-२५ प्रस १:७-१४ ☆ 105:26
१०५:२६ प्रस ३:१-४:१७ ☆ 105:28 १०५:२८ प्रस १०:२१-२३ ☆ 105:29 १०५:२९ प्रस ७:१७-२१
☆ 105:30 १०५:३० प्रस ८:१-६

- 31 वय्क्लं आज्ञा बियादिल
अले देश न्यंकं
भुजिं व भुयुपतिं जाल।☆
- 32 वय्क्लं आकाशं वइगु वायात
प्वें यानादिल,
अले इमिगु देश न्यंकं
हाबलासा थीकादिल।
- 33 वय्क्लं इमिगु दाख
व यःमरिमायात
नाश यानादिल,
अले इमिगु देशया
फुक्क सिमात त्वथुलादिल।☆
- 34 वय्क्लं आज्ञा बियादिल,
अले अल्याख क्वःबुइँचात
व बुइँचात वल।
- 35 उमिसं इमिगु देशया फुक्क
वाउंगु व अन्न नयाबिल।☆
- 36 वय्क्लं इमिगु देशयापि
सकलें न्हापां बूपिन्त,
फुक्क परिवारया गौरव
व लसतायात स्यानादिल।☆
- 37 वय्क्लं इस्त्राएलीतय्त
लुँ व वहःनापं
मिश्रं पित हयादिल।
इपि कुलयापि सुं नं धेधेमचू।
- 38 मिश्रीत इपि खनाः ग्यात,
मिश्रीत इपि पिहां वंबलय्
लय्ताल।☆

39 परमेश्वरं थः मनूतयत् त्वपुयेत
सुपाँय् तयादिल।

अले चान्हय् जः बीत
मि बियादिल।☆

40 इमिसं फ्वंबलय् वय्कलं
इमिथाय् बट्टाई झंगःत
छवयादिल।
वय्कलं स्वर्गं मरि बियाः
इमिगु प्वाः जाय्कादिल।☆

41 वय्कलं ल्वहं तछ्यानादिल,
अले अनं लः पिहां वल।
मरुभूमिइ लः खुसि थें न्हात।☆

42 वय्कलं थः दास
अब्राहामयात बियादीगु
पवित्र बचं लुमकादिल।

43 थुकथं वय्कलं थःमं
ल्ययादीपिं मनूतयत्
पित हयादिल।
इमिसं लय्लय्तातां म्ये हाल,
अले सः पिकाल।

44 वय्कलं इमित मेमेगु
जातियापिनिगु जमिन
बियादिल,
अले इमिसं मेमेगु जातियापिन्सं
मेहनत याःगुया फल
थःगु अधिकारय् काल।☆

45 थः मनूतयस्सं थःगु व्यवस्था
पालन यायेमा धकाः
व थःगु फुक्क खँ इमिसं

☆ 105:39 १०५:३९ प्रस १३:२१-२२

☆ 105:40 १०५:४० प्रस १६:२-१५

☆ 105:41 १०५:४१

प्रस १७:१-७; गन्ती २०:२-१३

☆ 105:44 १०५:४४ यहो ११:१६-२३

न्यनेमा धक्काः
परमेश्वरं थथे यानादिल।
हल्लेलूया!

106

थः प्रजाया लागि
परमेश्वरया भिगु ज्या
1 हल्लेलूयाह! परमप्रभुयात
सुभाय् ब्यु,
छाय्धाःसा वय्कः भिम्ह खः,
वय्कःया दया माया
सदां दयाच्चवनी।☆
2 परमप्रभुं यानादीगु ततःधंगु
ज्याया बयान सुनां याये फइ?
वय्कःयात सुनां
पूर्वक प्रशंसा याये फइ?
3 धन्य खः वय्कःया
आज्ञा मानय् याइपिं
व न्ह्याबलें खःगु ज्या याइपि।
4 हे परमप्रभु,
थः मनूतय्त दया माया
यानादीबल्य्
जितः लुमंकादिसँ।
इमित उद्धार यानादीबल्य्
जितः नं ग्वाहालि यानादिसँ।
5 अले छिं ल्ययातःपि मनूतय्गु
भिं जूगु खनाः
जि लय्ताये फयेमा।
छिगु जातिया लसताय्
जि नं लय्ताये फयेमा,

☆ 106:1 १०६:१ १ इति १६:३४; २ इति ५:१३; ७:३; एज्र ३:११; भज ११:५; १०७:१; ११८:१; १३६:१; यर ३३:११

अले छिकपिनि मनूतनापं
मिलय् जुयाः
छितः प्रशंसा याये फयेमा।

6 जिमिसं थः पुर्खातयसं
याःगु थें हे पाप यानागु दु,
जिपि मभिपि व दुष्ट जुयागु दु।

7 मिश्रय् दुबलय् जिमि पुर्खातयसं
छिगु अजू चायापुगु ज्याया
बिचाः हे मयाः।
इमिसं छिगु सदां दयाच्चनीगु
दयायात ल्वःमंकल,
अले लाल समुद्रया सिथय्
विद्रोह यात।☆

8 अयनं वय्कलं थःम्हं बचं
बियादीगु थें
थःगु तःधंगु शक्ति क्यनेत
इमित बचय् यानादिल।

9 वय्कलं लाल समुद्रयात
आज्ञा बियादिल
अले व सुनावन।
वय्कलं थः प्रजायात
गंगु बं पार यानादिल।

10 परमेश्वरं इमित
मयय्किपिनिगु ल्हातं
बचय् यानादिल,
वय्कलं इमित शत्रुतय्गु
ल्हातं त्वःतकादिल।

11 समुद्रया लखं इमि शत्रुतय्
त्वपुयाबिल,
इपि मध्ये छम्ह नं मम्वाः।

12 अले वय्कःया मनूतय्सं
 वय्कःया बचंयात
 विश्वास यात,
 वय्कःया प्रशंसाया
 भजन हाल।☆☆

13 अयनं वय्कलं यानादीगु ज्या
 इमिसं याकनं हे ल्वःमंकल।
 इमिसं वय्कःया सल्लाह
 पिया मच्चं।

14 मरुभूमिइ इमिसं नयेगु
 नसाया लोभ यात
 अले परमेश्वरयागु मन स्वल।

15 उकिं वय्कलं इमिसं फ्वंगु
 फुक्क खँ बियादिल,
 अयनं छगू ग्यानापुगु ल्वय् नं
 इमिथाय् छवयादिल।☆

16 छाउनीइ मोशा व परमप्रभुया
 पवित्र पुजाहारी हासून खनाः
 इमिसं नुगः मुइकल।

17 पृथ्वी चाल अले दातानयात
 घुर्काछवल,
 अबीरामया पुचःयात
 ल्हानाछवल।

18 इमिगु पुचलय् ह्वानाह्वाना
 मि च्यात,
 मिजलां दुष्टतय्त
 छवय्काबिल।☆

19 इमिसं होरेबय् द्वहंचा

☆ 106:12 १०६:१-१२ प्रस १४:२१-३१ ☆ 106:12 १०६:१२ प्रस १५:१-२१ ☆ 106:15 १०६:१४-१५
 गन्ती ११:४-३४ ☆ 106:18 १०६:१६-१८ गन्ती १६:१-३५

- दयक्ल,
अले लुँयाम्ह मूर्तियात
पुजा यात।
- 20 इमिसं महिमाया परमेश्वरयात
घौय् नइम्ह द्रुहया मूर्ति
नापं हिल।
- 21 मिश्र देशय् ततःधंगु
ज्या यानाः
इमित बचय् यानादीम्ह
परमेश्वरयात इमिसं
ल्वःमंकल,
- 22 गुम्हय्सिनं हामया देशय्
अजू चायापुगु ज्या
व लाल समुद्रय् ग्यानपुसे च्वंगु
ज्या यानादीगु खः।
- 23 उकिं वयक्लं इमित नाश याये
धकाः धयादीगु खः,
अयनं वयक्ःया नाश याइगु
तं चीकाछवयेत
वयक्ःया ल्ययातःम्ह मनू मोशा
वयक्ःया न्ह्यःने दन।☆
- 24 इपि व न्ह्याइपुगु देशय् दुहां
वनेत गयात।
इमित वास्ता याये धकाः
वयक्लं बियादीगु बचंयात
इमिसं विश्वास मयात।
- 25 इमिसं परमप्रभुया खँ मन्यन,
इपि थथःगु पालय्
भुनभुन हालाच्चन
- 26 उकिं वयक्लं इमित मस्भूमिइ,
नाश यानाबी धकाः

ल्हाः ल्हनाः पाफयादिल।☆

27 अले इमि सन्तानयात
जाति जातिया दथुइ
थुखे उखे छवयाबी
व इमित देश देशय्
छ्यालब्याल यानाबी
धकाः धयादिल।☆

28 इमिसं पोर धाःगु थाययाम्ह
बालघःयात पुजा यात,
अले जीवन मदुपि घःतय्त
बां ब्यूपि पशुतयगु ला नल।

29 थुकथं इमिसं थःगु ज्यां
वय्कःयात तंचाय्कल।
अले इमिथाय् महामारी वल।

30 अयनं पीनहासं दनाः
अपराधीयात सजॉय बिल।
उकिं महामारी दित।

31 अले वयात पुस्तां पुस्ता तक
धर्मीम्ह मनूकथं ल्याः खात।
अले न्ह्याबलें अथे हे
लुमंकेगु याइ।☆

32 इमिसं मेरीबाया
लःया न्ह्यःने नं
परमप्रभुयात तंचाय्कल।
इमिसं यानाः
मोशायात आपत जुल,

33 छायाःसा इमिसं
परमेश्वरयागु आत्माया
विरोधय् विद्रोह यात,
उकिं मोशां बिचाः मयासैं

नवात।☆

34 परमप्रभुं आज्ञा बियादीगु थें,
इमिसं अन च्वंपिं

जात जातितयत् नाश मयाः।

35 अयनं इपिं उपिनापं

भेलय पुनाजुल,

इमिगु चलन स्यनाकाल।

36 परमेश्वरया मनूतयसं

मूर्ति पुजा यात,

थुकिं यानाः इपिं स्यनावन।☆

37 कनान देशया मूर्तिया न्ह्यःने

इमिसं थःकाय् म्हायपिन्त

भोग बिल।☆

38 इमिसं द्वं मदुपिं काय्

म्हायपिनिगु हि बाः वय्कल,

इमिसं इमित कनान देशया

मूर्तितयगु नितिं भोग बिल,

थथे इमिगु हिं

देश अपवित्र जुल।☆

39 थुकथं इपिं थःगु हे ज्यां यानाः

अशुद्ध जुल।

थःगु हे ज्यापाखें परमेश्वर प्रति

विश्वास याये बहःमजूपिं जुल।

40 उकी परमप्रभु थः प्रजा खनाः

तंचायादिल,

वय्कलं थः सर्वययात

मययकादिल।

41 वय्कलं इमित मेमेगु

☆ 106:33 १०६:३२-३३ गन्ती २०:२-१३ ☆ 106:36 १०६:३४-३६ न्याय २:१-३; ३:५-६ ☆ 106:37

१०६:३७ २ इति १७:१७ ☆ 106:38 १०६:३८ गन्ती ३५:३३

- जातियापिनिगु
 ल्हातय् ब्रियादिल,
 इमि शन्नृतयस् इमित
 शासन यात।
 42 शन्नृतयस् इमित
 अत्याचार यात,
 इमित थःगु अधीनय् तल।
 43 तःकः मछि हे वय्कलं इमित
 उद्धार यानादिल,
 अय्त्नं इमिसं वय्क्कःया विरोधय्
 जुइगु हे यय्कल।
 अले इमिगु पापं यानाः
 इपिं नाश जुल।
 44 अय्त्नं वय्कलं इपिं पिच्यानाः
 हाःगु सः न्यनाः
 इमिगु दुःखय् च्यूताः तयादिल।
 45 वय्कलं इमिगु लागि
 थःगु बाचा लुमंकादिल,
 अले थःगु सदां दयाच्चनीगु
 दया मायाया कारणं
 वय्क्कः नरम जुयादिल।
 46 इमित ज्वनायंकूपिं सकसितं नं
 वय्कलं इमित माया याइपिं
 यानादिल।☆
 47 हे परमप्रभु जिमि परमेश्वर,
 जिमित बचय् यानादिसँ,
 जाति जातिया दथुं
 जिमित लितहयादिसँ,
 जिमिसं छितः सुभाय् बी,
 अले छिगु पवित्र नांया

प्रशंसा याये।

48 परमप्रभु इस्त्राएलयाम्ह
परमेश्वरया प्रशंसा
नह्याबलें जुयाच्चनेमा!
सकसिनं “आमेन” धायेमा।
हल्लेलूया! ☆

न्यागूगु ब्व

107

भज १०७-१५०

परमेश्वरया भिंगु ज्याया निति प्रशंसा

1 परमप्रभुयात
सुभाय् ब्यु

छाय्धाःसा वय्कः भिम्ह खः,
वय्कःया दया माया
सदां दयाच्चनी। ☆

2 परमप्रभुं बचय् यानादीपिन्सं
थथे धायेमा,

परमप्रभुं छिमित थः
शत्रुतयगु ल्हातं त्वःतकादिल।

3 वय्कलं छिमित पुर्ब-पच्छिमं,
उत्तर-दच्छिनं
अले देश देशं मुंकादिल।

4 छुं मनूत लँ लुइके मफइगु
मस्भूमिइ चाचाःहिला जुल,
इमिसं च्वनेत शहर मालाजुल
अयनं इमिसं लुइके मफुत।

5 इमि नये पित्याः, प्याःचाः,

☆ 106:48 १०६:४७-४८ १ इति १६:३५-३६ ☆ 107:1 १०७:१ १ इति १६:३४; २ इति ५:१३; ७:३; एज्
३:११; भज १००:५; १०६:१; ११८:१; १३६:१; यर ३३:११

इमिके आशा मदये धुंकूगु खः।

6 इमित दुःख जुल, उकिं इमिसं
परमप्रभुयात ग्वाहालिया लागि
प्रार्थना यात।

अले वय्कलं इमित फुक्क
दुःखकष्टं बचय् यानादिल।

7 परमेश्वरं इमित
इपि च्वने फइगु छगू शहरय्
तप्यंक यंकादिल।

8 इमिसं परमप्रभुयात वय्कःया
सदां दयाच्चनीगु
दया मायाया निति

व इमिगु निति
यानादीगु अजू चायापुगु
ज्याया निति
सुभाय् बीमाः।

9 छायाःसा वय्कलं
प्याःचाःपिन्त चित्त बुझे
यानादी,

अले नये पित्यापिन्त
भिंगु भिंगु चिजं लुधंकादी।

10 छुं मनूत तसकं खिउँगु
व कालया किपालुइ च्वन,
सिखलं चिकाः कैदी थें
इमिसं दुःख सियाच्च्वन।

11 छायाःसा इमिसं परमेश्वरया
आज्ञाया विरोध यात।
अले दक्वसिबय् तःधंम्हय्सिगु
सल्लाहयात हेला यात।

12 उकिं वय्कलं इमित
थाकुक्क ज्या याकादिल,

इपिं लुफि हायाः दल,
इमित ग्वाहालि बीपिं सुं मदु।

13 इमित दुःख जुल, उकिं इमिसं
परमप्रभुयात ग्वाहालिया नितिं
प्रार्थना यात।

अले वय्कलं इमित फुक्क
दुःखकष्टं बचय् यानादिल।

14 वय्कलं इमित तसकं खिउँगु
व कालया किपालुं पित
हयादिल,
अले इमिगु सिखः
कुचा कुचा यानादिल।

15 इमिसं परमप्रभुयात
वय्कःया सदां दयाच्चनीगु
दया मायाया नितिं
व इमिगु नितिं
यानादीगु अजू चायापुगु
ज्याया नितिं
सुभाय् बीमा।

16 वय्कलं कैययागु ध्वाखा
तछ्यानादी,
अले नैयागु गजबारत
त्वथुलादी।

17 छुं मनूत थःगु हे विद्रोही
पहलं यानाः मूर्ख जुल,
अले थःगु अपराधं यानाः
दुःख सिल।

18 इमिसं फुक्क कथंया
नसायात तसकं मयय्कल,
अले इपिं सीपिं थें जुल।

19 इमित दुःख जुल, उकिं इमिसं
परमप्रभुयात ग्वाहालिया लागिं
प्रार्थना यात।

अले वयकलं इमित फुक्क
दुःखकष्टं बचय् यानादिल।

20 वयकलं थःगु वचन छवयाः
इमित लंकादिल,
अले इमित सीगालं
बचय् यानादिल।

21 इमिसं परमप्रभुयात
वय्कःया सदां दयाच्चनीगु
दया मायाया निति

व इमिगु निति
यानादीगु अजू चायापुगु
ज्याया नितिं
सुभाय् बीमा।

22 इमिसं सुभाय्या बलि बीमा,
अले लसताया भजन हालाः
वयकलं यानादीगु
फुक्क ज्याया बयान यायेमा।

23 छुं मनूत जहाजय् च्वनाः
समुद्रय् वन,
अले तःधंगु समुद्रया उखे वनाः
बन्जाः ज्या यात।

24 इमिसं परमप्रभुया ज्या खन,
तज्जाःगु समुद्रय् इमिसं
वय्कःया अजू चायापुगु
ज्या खन।

25 वयकलं आज्ञा बियाः
ग्यानापुक वाफय्
वयकादिल।

उकिं समुद्रया लबु च्वय् तक

थाहां वल।

- 26 लबु आकाश तक थाहां वन,
 हाकनं क्वय्
 तज्जाःगु थासय् तक थ्यन।
 आपत वःगुलि
 इपि ग्यानाः कयकुन।

- 27 अय्लाःगुलुत थें
 इपि धेधेचुल, दल,
 इमिगु बुद्धि स्यनावन।

- 28 इमित दुःख जुल,
 उकि इमिसं परमप्रभुयात
 ग्वाहालिया लागि
 प्रार्थना यात।
 अले वय्कलं इमित
 फुक्क दुःखकष्टं
 बचय् यानादिल।

- 29 वय्कलं तसकं वःगु
 वाफय्यात शान्त यानादिल,
 गुकि यानाः
 समुद्रया लबु दित।

- 30 समुद्र शान्त जूगुलि
 इपि लयत्ताल
 अले परमेश्वरं इमित इपि
 वने मास्तिवय्कूगु
 बन्दरगाहय् हयादिल।

- 31 इमिसं परमप्रभुयात वय्कःया
 सदां दयाच्चवनीगु
 दया मायाया निति
 व इमिगु निति
 यानादीगु अजू चायापुगु
 ज्याया निति
 सुभाय् बीमा।

32 इमिसं मनूतयगु सभाय्
 वय्कःयात तःधक्केमा,
 अले थकालितयगु मुँज्याय्
 वय्कःया प्रशंसा यायेमा।

33 परमप्रभुं खुसित गंकादिल,
 अले लः बुयावःगु दिकादिल।

34 वय्कलं लखं लाःगु बुँयात
 चि दुगु मरुभूमि यानादिल।

थ्व धाःसा अन च्वपि मनूतयगु
 मभिगु ज्याया कारणं खः।

35 वय्कलं मरुभूमियात
 लःया पुख्बु,
 अले गंगु बुँयात
 लः बुयावःगु थाय् यानादिल।

36 वय्कलं अन नये
 पित्याःपिन्त तयादिल,
 अले इमिसं थः च्वनेत
 छगू शहर दय्कल।

37 इमिसं बुँइ पुसा हल,
 दाखक्यबय्
 दाखमा पित।
 उकिं गाक्क बाली लयाहल।

38 वय्कलं इमित
 सुवाः बियादिल,
 अले इमिगु ल्याः अप्वय्कादिल,
 वय्कलं इमि पशुत नं
 कम यानामदी।

39 हानं अत्याचार
 दुःखकष्टं यानाः
 इमिगु ल्याः कम जुयावन,
 इमित क्वह्यंकल।

- 40 वयक्लं शासकतयत्
 क्वह्वांकाः स्वयादी,
 अले इमित लँ हे मदुगु
 ज्याख्यलय् मदुगु थासय्
 चाचाःहीकादिल।
- 41 अयनं वयक्लं
 मगाःमचाःपिन्त दुःखं
 त्वःतकाः थकयादिल।
 अले इमि परिवारयात
 फैया बथां थें अप्वयकाबिल।
- 42 स्वजापिं मनूत थ्व खनाः लय्ताइ,
 अयनं फुक्क दुष्टत
 सुम्क च्वनी।
- 43 बुद्धि दुपिन्सं थ्व खँय्
 च्यूताः तयेमा।
 इमिसं परमप्रभुया सदां
 दयाच्वनीगु दया मायाया
 बारे बिचाः यायेमा।

108

- दुःखया इलय्
 ग्वाहालिया नितिं प्रार्थना
- 1 जिगु नुगः क्वातु,
 हे परमेश्वर,
 जिगु नुगः क्वातु।
 जिं दुनुगलंनिसें छितः
 तःधंकाः म्ये हालांच्वने,
 छितः तुं धंकाच्वने।☆
- 2 अय् वीणा दे, अय् सारंगी दे।

जिं सुथयात नं थनाबी।

3 जिं फुक्क मनूतयगु न्ह्यःने
छितः सुभाय् बी,
हे परमप्रभु।
जिं जात जातियापिनिगु न्ह्यःने
छितः तःधंकाः म्ये हाले।

4 छिगु सदां दयाच्चनीगु
दया माया
आकाश स्वयाः तःधं,
छिगु विश्वास याये बहःसू
आकाश तक थ्यनी।

5 हे परमेश्वर!
छि आकाश स्वयाः नं तःधनेमा।
छिगु महिमा पृथ्वी
ब्याक्क न्येनेमा।

6 छिं थःगु बल्लाःगु जव ल्हातं
जिमित बचय् यानादिसँ,
जिमिगु प्रार्थनाया
लिसः बियादिसँ।
छिं माया यानातःपिं मनूत
बचय् जुइमा।

7 परमेश्वरं थःगु पवित्र थासं
थथे धयादीगु दु,
“जिं त्याकेधुंकाः शकेमयात
ब्वथले।
अले सुक्कोतया गाःयात
थः मनूतयत् इनाबी।

8 गिलाद व मनश्शे नं
जिगु हे खः।
एफ्राइम जिगु
छ्यंया सुरक्षा खः।
यहूदा जिगु राजदण्ड खः।

9 मोआब जिगु

ल्हाः सिलेगु थल खः,
 एदोमय् जिं
 थःगु लाकां वांछवये।
 थुकथं थ्व जिगु खः
 धुकाः क्यने।
 पलिशत देशयात त्याकाः
 जि चिल्लाय् दनाः हाले।”

10 हे परमेश्वर!

सुनां जितः प्यखें पःखाः दुगु
 शहरय् यंकाबी?
 सुनां जितः एदोमय् यंकाबी?

11 हे परमेश्वर!

छु धात्थें हे छिं जिमित
 त्वःतादियागु ला?
 आः छि जिमि सेनालिसे
 जुइ मखुत ला?

12 शत्रुतलिसैं ल्वायेत जिमित

ग्वाहालि यानादिसैं।
 छायाःसा मनूतयगु ग्वाहालि
 ज्याख्यलय् मदु।

13 परमेश्वरया ग्वाहालि

जिमिसं त्याके,
 वयक्लं जिमि शत्रुतयत्
 बुकादी।☆

109

शत्रुतपाखें रक्षाया लागि प्रार्थना
 दाऊदया भजन, लय् तइम्हय्सिगु नितिं

- 1 हे जिं प्रशंसा यानाम्ह परमेश्वर,
छि सुम्क च्वनादी मते!
- 2 दुष्ट मनूत
व मखुगु खँ ल्हाइपिं मनूत
जिलिसें ल्वा: वःगु दु।
इमिसं जिगु बारे
मखुगु खँ ल्हाइगु।
- 3 इमिसं जिगु बारे मभिंगु
खँ ल्हाइगु।
म्वाय्कं म्वाय्कं जिलिसे
ल्वा:वइगु।
- 4 जिं इमित माया याना,
अले इमिगु लागि
प्रार्थना यानागु दु।
अय्न् इमिसं जिगु
विरोध याइगु।
- 5 जिं यानागु भिया पलेसा
इमिसं जित: मभिं याइगु
अले माया यानागुया पलेसा
जित: मयय्कीगु।
- 6 इमिसं थथे धाल,
वयागु न्याय यायेत सुं
दुष्ट न्यायाधीश ल्ययादिसँ,
अले वयात पा:या:म्ह मनू
वयागु जवपाखे दनाच्चवेनेमा।
- 7 वयागु न्याय जुइबलय्
व दोषी ठहरय् जुइमा।
वयागु प्रार्थना नं
अपराधय् ल्या:खायेमा।
- 8 वयागु जीवन याकनं फुइमा।
वयागु थाय्

मेम्हयसिनं कायेमा।☆

9 वया मस्त मांबौ मदुपि जुइमा,

अले वया कला:

विधवा जुइमा।

10 वया मस्त छें मदुपि

फवगि जुइमा

अले थःगु दुनाच्चंगु छेंनं

इमित पितिना छवयेमा।

11 वं ध्यबा पुलेमाःपि मनूतय्सं

वयागु फुक्क सम्पत्ति यकेमा।

परदेशीतय्सं वं याःगु

ज्याया फल लाका यकेमा।

12 वयात सुनां नं

दया माया मयायेमा,

मांबौ मदुपि वया

काय् म्हायपिन्त नं

दया याइपि सुं मदयेमा।

13 वया फुक्क मस्त सिनावनेमा,

अले मेगु पुस्तां वयात

ल्वःमंके धुंकूगु जुइमा।

14 परमप्रभुं वया पुर्खा याःगु

मभिंगु ज्या लुमंका तयादीमा

अले वया मामं याःगु पाप

गुबलें हुया छवयामदीमा।

15 परमप्रभुं इमिगु पाप

न्हाबलें लुमंका तयादीमा,

वय्कलं इमिगु लुमन्ति पृथ्वीं

सुचुक हुया छवयादीमा।

- 16 वं गुबले नं दया माया यायेगु
 बिचाः मया।
 वं चीमि, मगाःमचाः जूपि
 व नुगः ख्वःपिन्त
 सास्ती बियाः स्यात।
- 17 वं सराः बी ययकीगु,
 व सराः वयात हे लायेमा।
 वं सुवाः बी मययकल,
 वपाखें नं सुवाः
 तापाक च्वनेमा।
- 18 वं वसः फीगु थें सराः फिल।
 सराः वयागु प्वाथय् लः थें जाल,
 अले चिकं थें
 वयागु क्वचय् दुहां वन।
- 19 सराः वयागु लागि
 वसः थें जुइमा,
 वयागु जँय् मदिक्क
 चिनातइगु जँनी थें जुइमा।
- 20 जितः पाःयाइपिं
 व जिगु बारे मभिगु
 खँ ल्हाइपिन्त
 परमप्रभुं थज्याःगु हे
 सिरपाः बियादीमा।
- 21 अयनं हे परमप्रभु,
 थःगु बचं कथं
 जितः ग्वाहालि यानादिसँ।
 जितः बचय् यानादिसँ
 छायाःसा छिगु
 सदां दयाच्चनीगु दया माया भिं।
- 22 जि चीमि खः,
 मगाःमचाःम्ह खः,
 जिगु दुने जिगु नुगः

घाःपाः जूगु दु।

23 जि सन्ध्या किचः थें
तनावनाच्च्वंगु दु,
जितः क्वःबुईचा थें
व्वयेकाब्यूगु दु।

24 अपसं च्वँच्वं जिगु पुलि
बमलाय् धुकल,
जिगु म्हय् दाः मदयाः
जि गंसि जुइ धुकल।

25 जि खनाः मनूत न्हिलिगु
हेला यानाः
इमिसं थःगु छ्यं संकीगु।☆

26 परमप्रभु जिमि परमेश्वर,
जितः ग्वाहालि बियादिसँ,
छिगु सदां दयाच्च्वनीगु
दया मायां यानाः
जितः बचय् यानादिसँ।

27 थ्व ज्या यानादीम्ह
छि हे खः धकाः
जिमि शन्नृतय्त
सीकेबियादिसँ।

28 इमिसं जितः सराः बी फु,
अय्त्नं छिं जितः सुवाः बियादी।
जितः सास्ती बीपि मछालेमा
छिक्पिनि दास धाःसा
लय्ताये दयेमा।

29 जिमि शन्नृतय्त बदनामं त्वपुइमा,
इमिसं थःगु लज्या जामा थें
फीमा।

- 30 जिं तःसलं परमप्रभुयात
 सुभाय् बी,
 मनूतय्गु सभाय् जिं
 वयक्ःयात प्रशंसा याये।
- 31 छायाःसा वयक्लं
 चीमितयत् रक्षा यानादी
 अले वयक्लं वयात
 स्यायेत स्वःपिनिगु ल्हातं
 बचय् यानादी।

110

- परमप्रभुं ल्ययादीम्ह जुजु
 दाऊदया भजन
- 1 परमप्रभुं
 जिमि प्रभुयात
 धयादिल,
 “छं शत्रुतयत् छंगु पालि तःले
 मततले छ जिगु जवय् च्वँ।”☆
- 2 परमप्रभुं छिगु बल्लाःगु राज्य
 यरूशलेमं तःधं यानादी।
 छि छिकपिनि शत्रुतय्
 जुजु जुयादी।
- 3 छिं थः शत्रुतलिसें लडाँइ
 याःगु दिनय्
 छिकपिनि मनूत छिगु हे
 इच्छां न्ह्यःने वनी।
 सुथ न्हापांया सुतिलः थें
 छिकपिनि ल्याय्म्हपि
 पवित्र पहाडय् छिथाय् वइ।
- 4 परमप्रभुं पाफयादीगु दु,

☆ 110:1 ११०:१ मत्ती २२:४४; मर्क १२:२६; लूक २०:४२-४३; प्रे २:३४-३५; १ कोर १५:२५; एफि १:२०-२२;
 कल ३:१; हिब १:१३; ८:१; १०:१२-१३

अले उकिं थःगु
 मन हीकादी मखु,
 “मल्कीसेदेक थें
 छ न्ह्याबलेयात
 पुजाहारी खः।”☆

- 5 छंगु जवपाखे दीम्ह परमप्रभुं
 तया दिनय्
 जुजुपिन्त चुँचुं यानादी।
- 6 वय्कलं जाति जातितयगु
 न्याय यानादी,
 अले वय्कलं
 सीम्हयात द्वँचिनादी,
 अले पृथ्वी न्यंकयापि
 शासकतयत् चुँचुं यानादी।
- 7 जुजुं लँय् लिकसं लाःगु
 खुसिया लः त्वनी,
 अथे जुयाः वय्कलं
 थःगु छ्यं धस्वाकी।

111

परमप्रभुया प्रशंसा

- 1 हल्लेलूयाह!
 जिं धर्मीतयगु मुँज्याय्
 दुनुगालंनिसें
 परमप्रभुयात सुभाय् बी।
- 2 परमप्रभुं ततःधंगु ज्या
 यानादीगु दु,
 थ्व ज्या खनाः
 लय्ताःपि सकसिनं

☆ 110:4 ११०:४ हिब ५:६; ६:२०; ७:१७,२१

- थ्व थथःगु मतिइ तयातइ।
 3 वय्कःया ज्या इज्जत
 व गौरवं जाःगु जुइ,
 वय्कःया धार्मिकता
 न्ह्याबलें दयाच्चनी।
 4 वय्कलं थःगु अजू चायापुगु ज्या
 झीत लुमंका बियादीगु दु,
 परमप्रभु दयादुम्ह,
 माया यानादीम्ह खः।
 5 वय्कःयात इज्जत याइपिन्त
 वय्कलं नयेगु नसा बियादी,
 वय्कलं थःगु बाचा
 गुबलें ल्वःमंकादी मखु।
 6 वय्कलं थः मनुतय्त
 मेगु जातियापिनिगु देश बियाः
 इमित थःगु शक्ति क्यनादीगु दु।
 7 अले थःम्हं यानादीगु ज्याय्
 वय्कः विश्वास याये बहःम्ह
 व खःकथं
 न्याय यानादीम्ह खः।
 वय्कःया फुक्क आज्ञा
 विश्वास यायेबहः जु।
 8 उपि आज्ञा सत्य व पाय्छि जू।
 अले न्ह्याबलें दयाच्चनी,
 9 वय्कलं थः मनुतय्त
 मू पुलाः त्वःतकादिल,
 अले वय्कलं इपिलिसें
 न्ह्याबलेया बाचा चिनादिल।
 वय्कः पवित्र
 व मानय् यायेमाःम्ह खः।
 10 परमप्रभुया भय कायेगु हे
 बुद्धिया न्हापांगु पलाः खः।
 वय्कःया आज्ञा पालन

याइपिन्सं
 बांलाक थुइके फइ।
 वय्कःया प्रशंसा न्ह्याबलें
 जुइमा।☆

112

भिंम्ह मनूया लसता

1 हल्लेलूयाह!

धन्य खः व मनू

गुम्हय्सिनं परमप्रभुया

भय काइ,

गुम्ह परमप्रभुया आज्ञा

पालन यायेत लय्ताइ।

2 वया मस्त देशय् तःधनी,

भिंपिं मनूतय् सन्तानयात

आशिष दइ।

3 वयागु छेंय् धन-सम्पत्ति दइ,

वया धार्मिकता न्ह्याबलें

दयाच्चवनी।

4 भिंपिं मनूतयगु नितिं,

दया दुपिं व दया माया दुपिं

व धर्मीं मनूतयगु नितिं

खिउँगुलिइ जः थी।

5 नुगः चक्कंकाः त्यायेबीम्ह,

व विश्वास यायेबहः जुयाः

थःगु ज्या याइम्ह

मनूया भिं जुइ।

6 धर्मीं मनू गुबलें

लिचिले माली मखु,

वयागु लुमन्ति न्ह्याबलें
दयाच्चवनी।

7 बांमलाःगु खबर न्यनाः
व गयाइ मखु,
परमप्रभुयाके भरोसा तःगुलि
वयागु नुगः बल्लाः।

8 वयागु नुगः क्वातु,
उकिं व गयाइ मखु,
वं थः शत्रुत ब्रूगु खनी।

9 वं मगाःमचाःपिन्त नुगः
चक्कंकाः बी,
वयागु दया माया सदा
दयाच्चवनी।
व बल्लाइ
अले वयात इज्जत दइ।☆

10 थ्व खनाः दुष्टत तंचाइ,
इमिसं वाकु छी अले नाश जुइ,
दुष्टतयगु इच्छा पूवनी मखु।

113

परमप्रभुया भिंगु ज्याया प्रशंसा

1 हल्लेलूयाह!
अय् परमप्रभुया दासत,
वयकःया नांया प्रशंसा या!

2 आः व न्ह्याबलें
परमप्रभुया नांया प्रशंसा जुइमा!

3 सूर्य लुइगु पुर्बनिसें कयाः
सूर्य बिनावनीगु पच्छिम तक
परमप्रभुया नांया प्रशंसा याये!

- 4 परमप्रभु फुक्क जातित
स्वयाः तःधं,
वय्कःया महिमा आकाश
स्वयाः तःजाः।
- 5 इी परमप्रभु परमेश्वर थे
जाःम्ह सु दु?
वय्कः तसकं तःजाःगु थासय्
थःगु सिंहासनय् च्वनादी।
- 6 अय्नं वय्कः आकाश व पृथ्वी
स्वयेत क्वच्छनादी।
- 7 वय्कलं मगाःमचाःपिन्त
इमिगु दुःखं थकयादी,
वय्कलं छुं मदुपिन्त
फोहर मुनेगु थासं थकयादी।
- 8 अले इमित राजकुमारतनापं
वय्कःया थः हे मन्तय्
राजकुमारतनापं तयादी।
- 9 वय्कलं थारिम्ह मिसायात
वयागु हे छैय्
इज्जत बियादी,
वय्कलं वयात
मचाखाचा बियाः
लयताय्कादी।
हल्लेलूयाह!

114

छुत्काराया नखःया भजन

- 1 इस्राएलीतय्सं
मिश्र देश त्वःतूबलय्,
याकूबया सन्तान

मेगु भाय् ल्हाइपिं मनूतय्गु दथुं
पिहां वःबलय् ☆

2 यह्दा परमेश्वरया पवित्रथाय्
व इस्त्राएल वय्कःया राज्य जुल।

3 इमित खनाः
लाल समुद्र बिस्युं वन,
यर्दन खुसि लिखतं न्हात। ☆

4 पर्वतत भ्याःचा थें
व डाँडात फै थें तिन्हुल।

5 अय् समुद्र, छन्त छु जुल,
छाय् छ बिस्युं वनागु?
अय् यर्दन खुसि,
छाय् छ लिखतं न्हानागु?

6 अय् पर्वतत, छिपिं
छाय् भ्याःचात थें तिन्हुयागु?
अय् डाँडात,
छाय् छिपिं फैचात थें
तिन्हुयागु?

7 अय् पृथ्वी, परमप्रभुया न्ह्यःने
थरथर खा,
याकूबया परमेश्वरया न्ह्यःने
थरथर खा,

8 वय्कलं ल्वहंयात
लःया पुखुलिइ,
अले च्वल्वहंयात
लःया धालय् हीकादी।☆

☆ 114:1 ११४:१ प्रस १२:५१

☆ 114:3 ११४:३ प्रस १४:२१; यहो ३:१६

☆ 114:8 ११४:८ प्रस

१७:१-७; गन्ती २०:२-१३

115

परमप्रभु धातर्थेयाम्ह परमेश्वर

- 1 जिमिगु मखु,
 हे परमप्रभु,
 जिमिगु मखु,
 छिगु सदां दयाच्चनीगु
 दया माया
 व विश्वास याये बहःसूया निति
 छिगु थःगु हे
 नांया महिमा जुइमा।

- 2 जाति जातियापि मनूतयसं
 “छिमि परमेश्वर गन दु” धकाः
 छाय् न्यनीगु?

- 3 जिमि परमेश्वर ला स्वर्गय् दी,
 वयक्ःयात छु यः
 व हे यानादी।

- 4 इमि घःत ला लुँ व वहलं
 दयक्पि खः,
 मनूतयगु ल्हातं
 दयक्पि खः।

- 5 इमि म्हुतु ला दु
 तर नवाये मफु।
 इमि मिखा ला दु
 तर खंके मफु।

- 6 इमि न्हाय्पं ला दु
 तर न्यने मफु,
 इमि न्हाय् ला दु
 तर बास कायेमफु।

- 7 इमि ल्हाः ला दु
 तर ल्हातं थी मफु,

इमि तुति ला दु
 तर न्यासि वनेमफु।
 इमिसं कथुं नं
 सः पिकाय् मफु।

8 उपि मूर्तित दयक्पिं
 व उमिके भरोसा तःपि सकलें
 उपि ज्यालगय् मज्जु
 मूर्तित थे हे जुइ।☆

9 अय् इस्राएलयापि मनूत,
 परमप्रभुयाके भरोसा ति,
 वय्कलं छिमित
 ग्वाहालि बियादी
 अले रक्षा यानादी।

10 अय् हास्नया घराना,
 छिमिसं परमप्रभुयाके
 भरोसा ति,
 वय्कलं छिमित ग्वाहालि बियादी
 अले रक्षा यानादी।

11 परमप्रभुया भय काइपिं
 सकसिनं परमप्रभुयाके
 भरोसा ति,
 वय्कलं छिमित
 ग्वाहालि बियादी
 अले रक्षा यानादी।

12 परमप्रभुं झीत लुमंकादी
 अले झीत आशिष बियादी।
 वय्कलं इस्राएलया मनूत
 व हास्नया घरानायात
 आशिष बियादी।

13 परमप्रभुया भय काइपिं

चिधंपि व तःधंपि सकसितं
वयकलं आशिष बियादी।☆

14 परमप्रभुं मचाखाचात बियादीमा,
छन्त व छिमि काय्
छयपिन्त नं।

15 स्वर्ग व पृथ्वी दयकादीम्ह
परमप्रभुं
छिमित आशिष बियादीमा।

16 स्वर्ग ला परमप्रभुयागु हे खः,
पृथ्वी धाःसा वयकलं
मनूतयत् बियादीगु दु।

17 सी धुंकूपिन्सं
परमप्रभुया प्रशंसा याइ मखु,
क्वय् पातालय् थ्यंपिन्सं
वयकःया प्रशंसा याइ मखु।

18 तर झीसं ला आः व न्हाबलें
परमप्रभुया प्रशंसा याये।
हल्लेलूयाह!

116

सीगुपाखें बचय् जूम्ह मनूया प्रशंसा

1 जिं परमप्रभुयात
माया याना,
छाय्धाःसा वयकलं जिगु सः
न्यनादिल,
दयाया लागि जिगु प्रार्थना
न्यनादिल।

2 वयकलं थःगु न्हाय्पं जिपाखे
हीकादीगु दु,

उकिं म्वातले जिं वयकःया नां
कयाः हे च्वने।

3 कालया खिपतं
जितः ततमतःक्यंकल।
अले चिहानया सास्ती
जिके वूल।
दुःख व संकटं जितः त्वपुल।

4 अले जिं परमप्रभुया नां कयाः,
“हे परमप्रभु
जितः बचय् यानादिसँ।”

5 परमप्रभु दयादुम्ह व धर्मी खः,
जिमि परमेश्वर
दया माया दुम्ह खः।

6 परमप्रभुं स्वजापिं मनूतयत्
रक्षा यानादी,
खतराय् लाःबलय् वयकलं
जितः बचय् यानादिल।

7 हे जिगु मन, हाकनं शान्त जु।
परमप्रभुं छंगु भिं यानादीगु दु।

8 छायाधाःसा परमप्रभुं
जितः मृत्युपाखें,
जिगु मिखायात ख्वबि
हायकेगुपाखें
व जिगु तुतियात
लुफि हायेगुपाखें
बचय् यानादीगु दु।

9 म्वाःपिनिगु देशय्
जिं परमप्रभुया आज्ञा पालन
याना हे च्वने।

- 10 जिं विश्वास याना,
उकिं जिं धया,
“जितः तसकं सास्ती जूगु दु।”☆
- 11 जिं आयबुयाः धया,
“सकलें मनूत फताहा खः।”
- 12 परमप्रभुं जिगु लागि
गुलि भिं यानादीगु दु,
जिं उकिया पलेसा वय्कःयात छु बीगु?
- 13 जिं उद्धारया ख्वला कयाः
परमप्रभुया नां काये।
- 14 जिं परमप्रभुया लागि वय्कःया
सकलें मनूतयगु न्ह्यःने
थःगु भाकल धात्थें हे पूर्वके।
- 15 वय्कःया छम्ह विश्वास याये
बहःम्ह मनू सीबलय्,
परमप्रभुं तसकं च्यूता तयादी।
- 16 परमप्रभु, जि धात्थें
छिकपिनि दास खः।
जि छिगु हे छैय् बूम्ह खः,
जि छिकपिनि दास,
छिं जितः चिनातःगु सिखलं
त्वःतकादीगु दु।
- 17 जिं छितः सुभायया बलि छाये,
खः, जिं परमप्रभुया नां काये।
- 18 जिं परमप्रभुया लागि
वय्कःया सकलें
मनूतयगु न्ह्यःने
थःगु भाकल धात्थें हे पूर्वके।
- 19 परमप्रभुया देगःया चुक चुकय्,

अय् यरूशलेम,
छंगु हे दथुइ पूर्वके।
हल्लेलूयाह!

117

परमेश्वरया प्रशंसाया भजन

1 हे फुक्क
जातियापिं मनूत,
परमप्रभुयात जयजय या!
हे सकलें मनूत,
वय्कःया प्रशंसा या!☆

2 छायाधाःसा परमप्रभुं
झीत सदां दया माया
यानादी।
वय्कः न्ह्याबलें
विश्वास याये बहःम्ह खः।
हल्लेलूयाह!

118

भिंया निंति सुभाय्

1 परमप्रभुयात सुभाय् ब्यु,
छायाधाःसा वय्कः
भिंम्ह खः,
वय्कःया दया माया सदां
दयाच्चवनी।☆

2 इस्राएलं धायेमा,
“वय्कःया दया माया सदां

☆ 117:1 ११७:१ रोम १५:११ ☆ 118:1 ११८:१ १ इति १६:३४; २ इति ५:१३; ७:३; एज्र ३:११; भज
१००:५; १०६:१; १०७:१; १३६:१; यर ३३:११

दयाचवनी।”

3 हास्नया घरानां धायेमा,
“वय्क्ःया दया माया सदां
दयाचवनी।”

4 परमप्रभुया भय काइपिन्सं धायेमा,
“वय्क्ःया दया माया सदां
दयाचवनी।”

5 आपत जूबलय्
जिं परमप्रभुया नां कयाः
अले वय्कलं जितः
लिसः बियादिल,
जितः छुत्कारा बियादिल।

6 परमप्रभु जि नाप दी,
जितः गयाये माःगु मदु।
मनूतय्सं जितः
छुं हे याये फइ मखु।☆

7 परमप्रभु जि नाप दी,
वय्क्ः जितः ग्वाहालि
यानादीम्ह खः।
उकिं जिं थःगु मिखां
शत्रुत बूगु स्वये खनी।

8 मनूतय्त भरोसा यायेगु स्वयाः
परमप्रभुयागु शरण कायेगु बांलाः।

9 शासकतय्त भरोसा यायेगु स्वयाः
परमप्रभुयागु शरण
कायेगु बांलाः।

10 फुक्क जाति जितः घेरय् यात,
तर परमप्रभुया नामं
जिं इमित नाश याना।

- 11 इमिसं जितः फुक्क थासं
 घेरय् यात,
 तर परमप्रभुया नामं
 जिं इमित नाश याना।
- 12 इपिं जिथाय् हात थें भुं वल,
 तर कंमाय् च्याःगु मि थें
 इपिं झौ जुल।
 परमप्रभुया नामं
 जिं इमित नाश याना।
- 13 जितः घ्वाःगु खः,
 अले जि दयेत्यंगु खः,
 तर परमप्रभुं
 जितः ग्वाहालि यानादिल।
- 14 परमप्रभु जिगु शक्ति व भजन खः,
 जितः वय्कलं हे जक
 बचय् यानादिल।☆
- 15 धर्मीतय्गु पालय् लसता
 व त्याःगु सः थ्वइ।
 “परमप्रभुयागु जव ल्हातं
 तःधंगु ज्या यानादीगु दु।”
- 16 परमप्रभुया जव ल्हाः
 च्वय् थाहां वंगु दु,
 “परमप्रभुयागु जव ल्हातं
 तःधंगु ज्या यानादीगु दु।”
- 17 जि सी मखु, तर म्वानाच्चने,
 अले परमप्रभुं यानादीगु
 ज्याया खें न्यंकाच्चने।
- 18 परमप्रभुं जितः बाम्लाक्क

सजौंय बियादीगु दु,
तर वय्कलं जितः
कालया ल्हातय् बियामदी।

19 जिगु लागि
धर्मीत दुहां वनीगु ध्वाखा
चाय्कादिसँ,
अनं दुहां वनाः
जिं परमप्रभुयात सुभाय् बी।

20 परमप्रभुया ध्वाखा थ्व हे खः,
धर्मीत थुकी दुने दुहां वनी,

21 हे परमप्रभु, छिं जिगु प्रार्थनाया
लिसः बियादीगुलि
जिं छितः सुभाय् बी,
छिं जितः त्याकादिल।

22 दकःमितय्सं ज्यालगय्
मजूगु धकाः धाःगु
ल्वहं हे मू ल्वहं जुल।☆

23 परमप्रभुं हे थथे यानादीगु खः।
झीसं स्वयेबल्य्
थ्व तसकं अजू चायापु।☆

24 थौया दिं परमप्रभुं
दय्कादीगु खः।
थुकी झीपिं लय्तायेनु,
न्ह्यइपुकेनु।

25 हे परमप्रभु,
जिमित बचय् यानादिसँ,
हे परमप्रभु,

☆ 118:22 ११८:२२ लूक २०:१७; प्रे ४:११; १ पत्र २:७
१२:१०-११

☆ 118:23 ११८:२२-२३ मत्ती २१:४२; मार्क

जिमित ताःलाकादिसँ।☆

26 परमप्रभुया नामं झाःम्ह
धन्यम्ह खः।

जिमिसं वय्कःयात
परमप्रभुया देगलं
आशिष बी।☆

27 परमप्रभु हे परमेश्वर खः
वय्कलं झीत जः
बियादीगु दु।

ल्हातय् सिमा कचा ज्वनाः
लयल्यतातां यात्राय् न्ह्यज्या,
वेदीया नेकू तक हे हूँ।

28 हे परमप्रभु,
छि जिमि परमेश्वर खः,
जिं छितः सुभाय् बी,
छि जिमि परमेश्वर खः,
जिं छिगु प्रशंसा याये।

29 परमप्रभुयात सुभाय् ब्यु,
छाय्धाःसा वय्कः भिंम्ह खः,
वय्कःया दया माया सदां
दयाचवनी।

119

परमेश्वरया व्यवस्था

अलेफ*

1 धन्य खः दोष मदय्क
म्वानाच्वनिपिं

☆ 118:25 ११८:२५ मत्ती २१:९; मर्क ११:९; यह १२:१३ ☆ 118:26 ११८:२६ मत्ती २१:९; २३:३९; मर्क ११:९; लूक १३:३५; १९:३८; यह १२:१३ * 119: ११९:० अलेफ थ्व भजन आखः छगः छगः हनाः खँव जुइकथं च्वयातःगु चिनाखँ खः। थुनिया फुक्क ब्वया पद छगू हे हिब्रू आखलं शुरू जूगु दु।

- व परमप्रभुया स्यनातःगु खँ कथं
जुइपि मनूत।
- 2 धन्य खः वय्कःया नियम
पालन याइपि
व वय्कःयात दुनुगलंनिसें
मालिपि मनूत।
- 3 इमिसं छुं नं मभिं ज्या याइ मखु,
इपि वय्कःया लैपुइ वनी।
- 4 छिं जिमित छिगु उपदेश
बांलाक पालन यायेमाः
धकाः उजं बियादीगु दु।
- 5 छिगु व्यवस्था पालन यायेत
जिगु पहःचहः क्वातूगु जूसा
गुलि बांलाइगु।
- 6 अले छिगु फुक्क आज्ञाय्
ध्यान बियागुलि
जि मछालेमालि मखु।
- 7 छिगु धार्मिक विधि सय्का
काइबल्य्
जिं स्वजा मनं छितः सुभाय् बी।
- 8 जिं छिगु व्यवस्था पालन याये,
उकिं जितः त्वःतादी मते।
- 9 छम्ह ल्याय्म्हम्ह मनुखं
गथे थःगु जीवन
शुद्ध तये फइ?
- छिगु वचनकथं
म्वानाः हे खः।
- 10 जिं दुनुगलंनिसें छितः
माला च्वनागु दु,
छिगु आज्ञापाखें जितः
थुखे उखे वनेबियादी मते।

बेथ

- 11 छिगु विरोधय् पाप याये
 म्वालेमा धकाः
 छिगु बचं जिं थःगु नुगलय्
 तया तयागु दु।
- 12 हे परमप्रभु, छिगु प्रशंसा जुइमा,
 छिगु व्यवस्था जितः स्यनादिसँ।
- 13 जिं थःगु म्हुतुसिं
 छिगु म्हुतुं पिहां वःगु
 फुक्क विधि कनागु दु।
- 14 यक्व धन सम्पत्तिया कारणं
 लयताःगु थें
 जि छिगु नियम पालन यायेत
 लयताये।
- 15 छिगु उपदेशय् जिं ध्यान याये,
 अले छिं स्यनादीगु खँय्
 बिचाः याये।
- 16 छिगु व्यवस्था जि लयताये,
 छिगु वचनयात जिं
 ल्वःमंके मखु।

गिमेल्

- 17 थः दासयात भिं यानादिसँ,
 अले जि म्वानाच्चनी,
 अले छिगु वचन पालन याये।
- 18 छिं स्यनातःगु खँया
 अजू चायापुगु खँ खंकेत
 जिगु मिखा चाय्कादिसँ।
- 19 पृथ्वीइ जि छम्ह परदेशी
 जक खः,
 उकिं जिपाखें थःगु आज्ञा
 सुचुकादी मते।
- 20 छिगु विधि सीकेत
 जिगु मन सदां आय्ब्रयाच्चन।

21 सराः लाःपि व छिगु आज्ञा
पालन मयाइपि घमण्डीतयूत
छिं हक्कादी।

22 जिपाखें इमिगु हेला
व अपमान चीकादिसँ,
छाय्धाःसा जिं छिगु नियम
पालन यानागु दु।

23 शासकतनापुं च्वनाः
जिगु बारे मखुगु खँ ल्हाःसां
जिं छिगु व्यवस्थाय् ध्यान याये।

24 छिगु नियम जिगु लसता खः,
उपि जितः सल्लाहबीपि खः।

दालेथ

25 जिगु म्ह धुलय् प्यपुनाच्चंगु दु।
छिं थःगु वचनकथं जितः
हाकनं म्वाकादिसँ।

26 जिं जिगु पहःचहः छितः
कनागु दु,
अले छिं लिसः बियादिल।
जितः छिगु व्यवस्था
स्यनादिसँ।

27 जितः छिगु उपदेशया अर्थ
थुइके बियादिसँ,
अले जिं छिगु अजू चायापुगु
ज्याय् ध्यान याये।

28 नुगः मछिनाः जिगु प्राण
न्यलावनी,
छिगु वचनकथं जितः
बल्लाकादिसँ।

29 जिपाखें मखुगु लँ चीकादिसँ,
अले दया यानाः
जितः थःगु स्यनातःगु खँ

बियादिसँ।

30 जिं विश्वास यायेबहः जुइगु
ल्ययागु दु,
छिगु विधि जिं थःगु न्ह्यःने
तयागु दु।

31 जि छिगु नियमय्
प्यपुनाच्चवनागु दु, हे परमप्रभु,
जितः लज्याय् लाकादी मते।

32 जि छिगु आज्ञाया लैपुइ
ब्वाँय् वने,
छाय्धाःसा छि जिगु नुगःयात
स्वतन्त्र यानादीगु दु।

हे

33 हे परमप्रभु,
छिगु व्यवस्था पालन यायेगु
जितः स्यनादिसँ,
अले लिपाथ्यंक जिं
व पालन याये।

34 छिगु व्यवस्थाया अर्थ
थुइकादिसँ।
अले जिं व पालन याये,
दुनुगलंनिसें जिं
व पालन याये।

35 जितः थःगु आज्ञाया लैपुइ
यंकादिसँ,
छाय्धाःसा जि उकी हे
लय्ताये।

36 जिगु नुगःयात लोभपाखे मखु
छिगु नियमपाखे हीकादिसँ।

37 ज्यालगाय् मज्गू खँ
स्वयेगुपाखें
जिगु मिखायात हीकादिसँ,

- छिगु वचनकथं
जिगु प्राणयात रक्षा यानादिसँ।
- 38 छिगु भय काइम्ह छिकपिनि
दासया निंति
थःम्हं बियादीगु बचं
पूर्वकादिसँ।
- 39 जिपाखें इमिगु हेला व अपमान
चीकादिसँ,
छाय्धाःसा छिगु विधि भिं।
- 40 जितः छिगु आज्ञा यः,
छिगु धार्मिकताया कारणं
जितः म्वाका तयादिसँ।
- 41 हे परमप्रभु,
छिगु सदां दयाच्चवनीगु दया माया
व छिगु बचं कथं
छिगु उद्धार जिथाय् वयेमा।
- 42 अले जिं थःत हिस्याइपिन्त
लिसः बी फइ,
छाय्धाःसा छिगु वचनय्
जिगु भरोसा दु।
- 43 जिगु म्हुतुं सत्यया वचन
लाकाकयादी मते,
छाय्धाःसा जिं छिगु विधिइ
आशा तयागु दु।
- 44 छिं स्यनातःगु खँ
जिं सदां पालन याना हे च्वने।
- 45 अले जि स्वतन्त्र जुयाः म्वाये
छाय्धाःसा जिं छिगु उपदेश
मालागु दु।
- 46 अले जिं छिगु नियमया बारे
जुजुपिनिगु न्ह्यःने नवाये,

वाव

जि लज्या चाये मखु।

47 छायाःसा

जि छिगु आज्ञाया कारणं
लयता,

अले जिं उकियात
माया याना।

48 जिं थःम्हं माया यानागु

छिगु आज्ञापाखे

थःगु ल्हाः ल्हने,

अले छिगु व्यवस्थाय्
ध्यान याये।

जाइन्

49 थः दासयात बियादीगु वचन

लुमंकादिस्सँ,

छायाःसा छिं जितः

आशा बियादीगु दु।

50 जिगु दुःखय् जितः थुकिं हे

शान्ति दत,

छायाःसा छिगु बचंपाखें

जितः जीवन दत।

51 तःधंछु जुइपिन्सं जितः

यक्व हे हिस्याःगु दु,

अयनं छिगु व्यवस्थापाखें

जि लिचिलागु मदु।

52 हे परमप्रभु,

छिगु पुलांगु विधि

लुमंका च्वना,

उकिं जितः शान्ति दइ।

53 छिं स्यनातःगु खँ त्वःतूपिं

दुष्टतयसं यानाः

जितः तसकं तं पिहांवइगु।

54 जि न्ह्याथाय् च्वंसां

छिगु व्यवस्था हे
जिगु म्ये जूगु दु।

55 हे परमप्रभु,
जिं चान्हय छिगु नां
लुमंकेगु यानागु दु।
अले जिं छिगु व्यवस्था
पालन यानागु दु।

56 जिं उपदेश पालन यानागुलि हे
थ्व जितः जूगु खः।

हेथ

57 छि जिगु ब्व खः, हे परमप्रभु,
जिं छिगु वचनकथं
जुइगु क्वःछिनागु दु।

58 जिं दुनुगलंनिसें छिगु ख्वाः
मालागु दु,
छिगु बचंकथं
जितः दया यानादिसँ।

59 जिं थःगु पहःचहःया बारे
बिचाः यानागु दु,
अले छिगु नियमपाखे
थःगु पलाः न्ह्याकागु दु।

60 जिं छिगु आज्ञा पालन यायेत
लिबाकागु मदु
बरु हथाय् चायागु दु।

61 दुष्टतय्सं खिपतं च्यूसां
जिं छिगु स्यनातःगु खँयात
ल्वःमंके मखु।

62 छिगु धार्मिक विधिया लागि
जि बाचा इलय्
छितः सुभाय् बीत दने।

63 छिगु भय काइपिं व छिगु उपदेश
पालन याइपिं सकसिया

जि छम्ह पासा खः ।

- 64 हे परमप्रभु, छिगु
सदां दयाचवनीगु दया मायां
पृथ्वी जाःगु दु,
जितः छिगु व्यवस्था स्यनादिसँ ।

टेथ

- 65 हे परमप्रभु,
छिं थःगु वचनकथं
थः दासयात भिं यानादिसँ ।

- 66 जितः ज्ञान व बुद्धिया खँ
स्यनादिसँ,
छाय्धाःसा जिं छिगु आज्ञायात
विश्वास याना ।

- 67 जितः सजौय जुइ न्ह्यः
जिं लँ द्रुंकागु खः,
तर आः जिं छिगु वचन
पालन याना ।

- 68 छि भिंम्ह खः,
अले भिं यानादी,
जितः छिगु व्यवस्था
स्यनादिसँ ।

- 69 तःधंछुया जुइपिन्सं
जिगु विरोधय् मखुगु खँ
पिकाःगु दु,
अयनं जिं दुनुगलनिसें
छिगु उपदेश पालन याना ।

- 70 इमिगु नुगः छाःगु दु,
अयनं जि ला छिं स्यनातःगु
खँया कारणं लयताः ।

- 71 छिगु व्यवस्था सय्कागुलिं
जितः दुःख जूगु
जिगु लागि बां हे लात ।

72 छिं स्यनातःगु खँ
 जिगु निति लुँ व वहःयागु
 द्रलंद्रः कुचा स्वयाः मू वं।
 योध

73 छिगु हे ल्हातं जितः
 दय्कादीगु व समाः
 यानादीगु खः।
 जितः छिगु आज्ञा थुइकेत
 गाक्क बुद्धि बियादिसँ।

74 छिगु भय काइपि जितः खनाः
 लयतायेमा,
 छायाःसा जिं छिगु वचनय्
 आशा तयागु दु।

75 हे परमप्रभु, छिगु विधि
 धार्मिक खः धकाः जिं स्यु,
 छिं जितः दुःख बियादीगु
 पायछि खः धकाः जिं स्यू।

76 छिगु बचंकथं
 छिकपिनि दास जितः
 छिगु सदां दयाच्चनीगु
 दया मायां शान्ति दयेमा।

77 जि म्वानाच्चनेत जितः
 दया यानादिसँ,
 छायाःसा छिं स्यनातःगु खँ
 जिगु लसता खः।

78 तःधंछुया जुइपि लज्याय्
 लायेमा,
 छायाःसा इमिसं
 छुं हे कारण मदय्क
 जितः मखुगु द्वपं ब्यूगु दु।
 अयनं जिं ला
 छिगु उपदेशय् ध्यान बी।

79 छिगु भय काइपिं
व छिगु नियम थूपिं
जिपाखे फहिलेमा।

80 जिं दुनुगलंनिसें
छिगु व्यवस्था मानय्
याये फयेमा,
लज्या चाये म्वालेमा।

काफ

81 हे परमप्रभु,
जि छिपाखें उद्धार कायेत
प्या:चा:,
जिं छिगु वचनय् आशा
तयागु दु।

82 छिगु बचं पिया च्वँच्वं
जिगु मिखा बलुसे
च्वने धुकल।

जिं धाये,
“छिं गुबलय् शान्ति बियादी?”

83 कुँलय् तयात:गु छेगूया
म्हिचाय् दाखमघ तइगु थें
जि जुइ धुकूगु दु,
अयनं छिगु व्यवस्था जिं
ल्व:मंकागु मदुनि।

84 छिकपिनि दासं
अज्ज गुलि पी मानि?
जित: दु:ख बीपिन्त छिं गुबलय्
सजौंय बियादीगु?

85 छिगु स्यनात:गु खँ कथं
मजुइपिं त:धंछु जुइपिन्सं
जिगु निंतिं गा: म्हगु दु।

86 छिगु आज्ञा फुक्क
भरोसा यायेबह: जू।

जितः ग्वाहालि यानादिस्सँ,
मनूतयस्सं छुं कारण मदयेकं
जितः दुःख बीगु।

87 इमिसं जितः झन्दिले पृथ्वीं
नाश यानाबी धुंकूगु।
अयनं जिं छिगु उपदेश
त्वःतागु मदुनि।

88 छिगु सदां दयाच्चनीगु
दया मायाकथं
जिगु प्राणयात रक्षा यानादिस्सँ,
अले जिं छिगु म्हुतुं पिहां वःगु
नियम पालन याये।

लामेध

89 हे परमप्रभु,
छि न्ह्याबलें दयाच्चनी,
छिगु वचन न्ह्याबलें स्वर्ग्य
दयाच्चनी।
90 छिगु विश्वास याये बहःसू
पुस्तां पुस्ता तक दयाच्चनी।
छिं पृथ्वीयात थापं यानादीगु दु,
अले व दयाच्चनी।

91 छिगु विधि थौं तक नं
दयाच्चंगु दु,
छाय्धाःसा फुक्क सृष्टिं
छिगु सेवा याइ।

92 छिगु स्यनातःगु खं जि
लयमताःगु जूसा
दुःखया इलय्
जि नाश जुइधुंकीगु।

93 जिं गुबलें छिगु उपदेश
त्वःमंके मखु,
छाय्धाःसा छिं उपिपाखें हे

- जिगु जीवनयात रक्षा
यानादीगु दु।
- 94 जि छिकपिनिम्ह हे खः,
छिं जितः बचय् यानादिसँ,
जिं छिगु उपदेश मालागु दु।
- 95 दुष्टत जितः नाश यायेत
पियाच्चंगु दु,
तर जिं छिगु उपदेशय्
ध्यान याये।
- 96 फुक्क सृष्टियागु सीमा दु,
तर छिगु आज्ञाया सीमा मदु।
- 97 छिगु स्यनातःगु खँयात
जिं गुलि माया याना!
न्हिच्छि हे जिगु
ध्यान उकी हे वनाच्चनी।
- 98 छिगु आज्ञा न्हाबलें जिगु मनय् दु,
उकिं जितः जिमि शत्रुत स्वयाः
बुद्धि दुम्ह दय्की।
- 99 जिमि गुस्त स्वयाः यक्व जिं थु,
छाय्धाःसा जिं छिगु नियमय्
ध्यान बिया।
- 100 थकालिपिं मनूतय् स्वयाः
यक्व बुद्धि जिके दु,
छाय्धाःसा जिं छिगु उपदेश
पालन याना।
- 101 छिगु वचन पालन याये धकाः
जिं थःगु तृतियात फुक्क मभिंगु
लँपुपाखें अलग तयागु दु।
- 102 जिं छिगु विधि त्वःतागु मदु,
छाय्धाःसा छिं हे
जितः स्यनादीगु दु।

मेम

- 103 छिगु वचन जितः गुलि साः,
जिगु म्हुतुया निति
कस्ति स्वयाः नं साः।
104 छिगु उपदेशपाखें जितः
बुद्धि दुम्ह दयक्की,
उकि फुक्क मखुगु लैपु
जितः मयः।

नुन

- 105 छिगु वचन
जिगु तुतिया निति मत,
अले जिगु लैपुया निति
जः खुः।
106 छिगु धार्मिक विधि
पालन याये धकाः
जिं पाफयागु दु,
अले उकियात जिं पक्का
यानागु दु।
107 जिं तसकं दुःखसियागु दु,
हे परमप्रभु, थःगु वचनकथं
जितः म्वाका तयादिसँ।
108 हे परमप्रभु!
जिगु म्हुतुं पिहां वःगु
थःयसेंबलि
नाला कयादिसँ,
अले छिगु विधि
जितः स्यनादिसँ।
109 जिं थःगु जीवन पायेत तयार दु,
अयनं छिं स्यनातःगु खँ
जिं ल्वःमंके मखु।
110 दुष्टतयसं जिगु निति
जाः ग्वःगु दुसां
छिगु उपदेशपाखें

जि थुखे उखे वनागु मदु।

- 111 छिगु नियम न्ह्याबलेंया निंति
जिगु मू वंगु सम्पत्ति जूगु दु।
उकिं जिगु नुगःयात
लयतायकी।

- 112 छिगु व्यवस्था लिपाथ्यंक
पालन यायेगु
जिं क्वःछिनागु दु।

समेख

- 113 दोमन दुपिं मनूत जितः
तसकं मयः,
अयनं छिं स्यनातःगु खँयात
जिं माया याना।
114 छि जिगु शरण कायेगु थाय्
व ढाल खः,
जिं छिगु वचनय् आशा
तयागु दु।
115 हे मभिंगु ज्या याइपिं मनूत,
जिपाखें तापाक हुँ,
अले जिं जिमि परमेश्वरया आज्ञा
पालन याये फइ।

- 116 हे परमप्रभु,
जि म्वानाच्चने फयेमा धकाः
छिगु बचंकथं जितः लिधंसा
बियादिसँ,
अले जिगु आशाया लागि
जितः लज्याय् लाकादी मते।

- 117 जितः लिधंसा बियादिसँ,
अले जि म्वाइ।
छिगु व्यवस्थाय् जिं न्ह्याबलें
ध्यान यानाच्चने।

- 118 छिगु व्यवस्थापाखें

थुखे उखे वंपि सकसितं
छिं चीकादीगु दु,
छाय्धा:सा इमिगु छल
ज्यालगय् जुइ मखु।

119 पृथ्वीइ फुक्क दुष्टतयत्
छिं फोहर थें वान्छवयादी।
अथे जुया: छिगु नियमयात
जिं माया याना।

120 छिगु भयं याना:
जिगु म्ह खाइ,
अले छिगु विधि खना:
जि ग्याना।

एयिन

121 जिं ला धार्मिकता व न्यायया
ज्या यानागु दु,
छिं जित: शत्रुतयगु ल्हातय्
त्व:तादी मते।

122 छिकपिनि दासया भिंया लागि
जमानी जुयादिसँ,
त:धंछु जुइपिन्सं जित:
क्वत्यके बियादी मते।

123 छिगु उद्धार
व छिगु धार्मिकताया
बचंयात पिआ च्वँच्वं
जिगु मिखा बुलुसे च्वने धुंकल।

124 थ: दासनाप थ:गु
सदां दयाच्चनीगु दया माया
क्यनादिसँ,
अले छिगु व्यवस्था जित:
स्यनादिसँ।

125 जि छिकपिनि दास ख:,
छिगु नियम म्हसीकेत
जित: थुइकेगु शक्ति

- बियादिसँ।
 126 हे परमप्रभु, दनादिसँ!
 ई वःगु दु छिं ज्या यानादिसँ,
 इमिसं छिं स्यनातःगु खँ
 त्वथुले धुंकल।
 127 जिं छिगु आज्ञायात लुँ स्वयाः
 अप्वः भिगु लुँ स्वयाः
 नं अप्वः माया याना।
 128 उकिं जिं छिगु फुक्क उपदेश
 मानय् याना,
 अले फुक्क मखुगु लुँपु
 जितः तसकं मयः।
 पे
 129 छिगु नियम अजू चायापुसे च्वं,
 उकिं जिं दुनुगलंनिसँ
 उपि पालन याना।
 130 छिगु वचन थुइकाबीबलय्
 जिमित जः दइ।
 थुकिं छुं मस्यूपिन्त ज्ञान दइ।
 131 जिं म्हुतु चायकाः
 स्वां-स्वां वय्काः
 छायाःसा जि छिगु आज्ञाया
 लागि प्याःचाः।
 132 छिगु नांयात माया याइपिन्त
 छिं गथे यानादी,
 अथे हे जिपाखे फहिलाः जितः
 दया यानादिसँ।
 133 छिं थःगु बचंकथं जिगु पलाः
 बल्लाकादिसँ।
 छुं नं पापयात जितः शासन
 याकेबियादी मते।
 134 जितः क्वत्यलातःपिपाखें
 त्वःतकादिसँ,

- अले जिं छिगु उपदेश
पालन याये।
135 छि थःगु ख्वाःया जलं
जिमित खय्कादिसँ,
छिगु व्यवस्था जितः
स्यनादिसँ।
136 जिगु मिखां ख्वबिया धाः
हाया हे च्वनी,
छाय्धाःसा मन्तयसं छि
स्यनातःगु खँयात मानय्
याइ मखु।

साधे

- 137 हे परमप्रभु, छि धर्मी खः,
छिगु विधि सत्य खः।
138 छि बियादीगु नियम धार्मिक जू,
उपि तसकं
विश्वास यायेबहः जू।
139 जिगु जोशं जितः नयेधुंकल
छाय्धाःसा जिमि शत्रुतय्सं
छिगु वचन मानय् मयाः।
140 छिगु बचंयात पूर्वक
जाँचय् याःगु दु,
अले जिं उकियात
यक्व माया याना।
141 जि चिधंम्ह
व क्वह्यंम्ह खःसां
जिं छिगु उपदेशयात
ल्वःमंके मखु।
142 हे परमप्रभु!
छिगु धार्मिकता न्ह्याबलें
दयाच्च्वनी,
अले छिं स्यनातःगु खँ
सत्य खः।

143 जिके दुःख व संकट वःगु दु,
अयनं छिगु आज्ञां जितः
लयतायकी।

144 छिगु नियम न्ह्याबलेंया लागि
पाय्छि जु,
जितः थुइके बियादिसँ,
अले जि म्वानाच्चनी।

कोफ

145 हे परमप्रभु!
जिं दुनुगलंनिसँ छितः सःता
च्वनागु दु,
जितः लिसः बियादिसँ!
जिं छिगु व्यवस्था मानय् याये।

146 जिं छितः सःताच्चनागु दु,
जितः बचय् यानादिसँ,
अले जिं छिगु नियम
पालन याये।

147 सुथ जुइ न्ह्यः हे दनाः
जिं ग्वाहालिया लागि तसकं
हालाच्चनागु दु,
छिगु वचनया आशा
यानाच्चनागु दु।

148 छिगु बचनय् ध्यान यायेत
चच्छि हे जि मधंसे च्वनेगु।

149 हे परमप्रभु!
थःगु सदां दयाच्चनीगु
दया मायाकथं
जिगु बिन्ति न्यनादिसँ,
थःगु विधिकथं
जितः रक्षा यानादिसँ।

150 मभिगु बिचाः यानाः
जितः सास्ती बीपिं मनूत

- सतिक वये धुंकूगु दु।
 इपि छिं स्यनातःगु खं
 तापाक हे दु।
- 151 छि धाःसा जिगु सतिक दी,
 हे परमप्रभु,
 अले छिगु फुक्क आज्ञा
 सत्य खः।
- 152 यक्व न्हापानिसें हे जिं
 छिं न्ह्याबलेया लागि
 थापं यानादीगु छिगु नियम स्यू।
- 153 जिगु दुःखयात बिचाः यानाः
 जितः त्वःतकादिसैं।
 छायाःसा छिं स्यनातःगु खँयात
 जिं ल्वःमंकागु मदु।
- 154 जिगु मुद्दा ल्वानादिसैं,
 अले जितः त्वःतकादिसैं।
 थःगु बचंकथं
 जिगु जीवन रक्षा यानादिसैं।
- 155 उद्धार दुष्टतपाखें तापाः
 छायाःसा इमिसं छिगु
 व्यवस्था माली मखु।
- 156 हे परमप्रभु,
 छिगु दया तसकं तःधं,
 उकिं छिगु विधिकथं
 जिगु जीवन रक्षा यानादिसैं।
- 157 जितः दुःख बीपि
 यक्व शत्रुत दु,
 अयनं जिं छिगु नियम
 मानय् यायेगु त्वःतागु मदु।
- 158 ध्वंलाइपि खनाः
 जि तसकं घच्चाः,

रेश

- छाय्धाःसा इमिसं छिगु वचन
पालन मया।
159 स्वयादिसँ! छिगु उपदेशयात
जिं गुलि माया याना।
हे परमप्रभु! छिगु सदां
दयाचवनीगु दया मायाकथं
जिगु जीवन रक्षा यानादिसँ।
160 छिगु फुक्क वचन
सत्य हे खः,
छिगु फुक्क धार्मिक विधि
न्ह्याबलें दयाचवनी।
- शीन
- 161 शासकतय्सं छुं हे कारण
मदय्कं जितः सास्ती बी।
अयनं जिगु नुगलं छिगु वचनया
भय काइ।
162 गथे यक्व धन दयाः
मनू लय्ताइ
अथे हे जि छिगु बचंया कारणं
लय्ताये।
163 मखुगु खँ जितः तसकं मयः
तर छिं स्यनातःगु खँयात
माया याना।
164 छिगु धार्मिक विधिया कारणं
न्हिइ न्हयक्वः
जिं छिगु प्रशंसा याना।
165 छिगु स्यनातःगु खँयात माया
याइपिन्त तःधंगु शान्ति दइ,
इमित लुफि हाइगु
छुं कारण दइ मखु।
166 हे परमप्रभु,
जिं छिगु उद्धार पियाचवनागु दु,
छिगु आज्ञा पालन यानागु दु।

- 167 जिं छिगु नियम पालन
 यानागु दु,
 जिं उकियात दुनुगलंनिसें
 माया याना।
- 168 जिं छिगु उपदेश व नियम
 पालन यानागु दु,
 छायाःसा जिगु फुक्क
 पहःचहः छिगु हे न्हःने दु।
 ताव
- 169 हे परमप्रभु,
 जिगु इनाप छिगु न्हःने थ्यनेमा,
 छिगु वचनकथं जितः
 थुइके बियादिसँ।
- 170 जिगु बित्ति छिथाय् थ्यनेमा,
 छिगु बचंनकथं जितः छुत्कारा
 बियादिसँ।
- 171 जिगु म्हुतुसिं छिगु प्रशंसा
 यायेमा,
 छायाःसा छिं जितः
 छिगु व्यवस्था स्यनादीगु दु।
- 172 जिगु म्हुतुं छिगु बचंया
 भजन हालेमा,
 छायाःसा छिगु फुक्क
 आज्ञा भिं।
- 173 छिगु ल्हातं जितः ग्वाहालि
 यानादिसँ,
 छायाःसा जिं छिगु उपदेश
 ल्ययागु दु।
- 174 हे परमप्रभु!
 छिगु उद्धारया लागि जि प्याःचाः,
 अले छिं स्यनातःगु खँ
 जिगु लसता खः।
- 175 जितः रक्षा यानादिसँ,

अले जिं छिगु प्रशंसा याये,
 अले छिगु विधिपाखें जितः
 ग्वाहालि दयेमा।
 176 तंम्ह फै थें जि मखुगु लैय्
 वनागु दु,
 छिकपिनि दासयात मालादिसँ,
 छायाःसा जिं छिगु आज्ञा
 ल्वःमंकागु मदु।

120

ग्वाहालिया निंति प्रार्थना
 यरूशलेमय् थाहां वनेत हाःगु म्ये
 1 दुःखया इलय् जिं
 परमप्रभुयाके
 ग्वाहालि फ्वना,
 वय्कलं जितः लिसः बियादिल।
 2 हे परमप्रभु!
 मखुगु खँ ल्हाइपि
 व ध्वंलाइपिपाखें
 जितः बचय् यानादिसँ।
 3 अय् फताहा,
 परमेश्वरं छन्त छु यानादी?
 छन्त मेगु अप्वः छु यानादी?
 4 वय्कलं छन्त सिपाईया
 च्वामुगु वाणं
 अले च्यानाच्चंगु हेग्वं
 सजाय् बियादी।
 5 धिक्कार दु जितः,
 छायाःसा जि मेशेकय्
 परदेशी जुयाः च्वनेमाली,

- अले केदारया पालतय्गु दथुइ
 च्वनेमाःगु दु।
 6 शान्तियात मययकिपिनिगु दथुइ
 च्वनाच्च्वनागु यक्व दत।
 7 जितः ला शान्ति यः,
 तर जिं शान्तिया खँ ल्हाइबलय्
 इपिं लडाइँ यायेत तयार जुइगु।

121

- झीत रक्षा यानादीम्ह परमप्रभु
 यरूशलेमय् थाहां वनेत हाःगु म्ये
 1 गुँच्चकाय् च्वकाय्
 जिं मिखा ब्वये,
 गनं जितः ग्वाहालि वइ?
 2 जितः ग्वाहालि स्वर्ग व पृथ्वी
 दय्कादीम्ह परमप्रभुपाखें वइ।
 3 वय्कलं छंगु तुतियात
 चुलुके बी मखु,
 छन्त बिचाः यानादीम्ह न्ह्यलं
 ब्वानादी मखु।
 4 स्व, इस्राएलयात बिचाः
 यानादीम्ह
 गुब्सं न्ह्यलं ब्वानादी मखु,
 अले न्ह्यः वय्कादी नं मखु।
 5 परमप्रभु छन्त बिचाः
 यानादीम्ह खः,
 परमप्रभु छंगु जव ल्हाःपाखे
 छन्त रक्षा यानादीम्ह खः।
 6 छन्त न्हिनय् निभालं

स्यंकी मखु,
न त चान्हय् तिमिलां हे।

- 7 परमप्रभुं छन्त फुक्क मभिगु खं
बचय् यानादी,
वय्कलं छंगु बिचाः यानादी।
8 छ दुहां वःसां पिहां वंसां
परमप्रभुं छन्त
न्ह्याबलें बिचाः यानादी।

122

- यस्शलेमया शान्तिया निति प्रार्थना
दाऊदया भजन
यस्शलेमय् थाहां वनेत हाःगु म्ये
1 इमिसं जितः
“परमप्रभुया देगल्य् झीपिं वनेनु”
धकाः धाःबलय् जि लय्ताया।
2 अय् यस्शलेम,
जिपिं छंगु ध्वाखा दुने
दनाच्चवनागु दु।
3 यस्शलेम शहरयात बांलाक
मिलय् यानाः दय्कूगु दु।
4 परमप्रभुया कुलत इस्राएलयात
ब्यूगु व्यवस्थाकथं
परमप्रभुया नांयागु प्रशंसा यायेत
अन वनी।
5 अन न्यायया सिंहासन दु,
दाऊदया वंशया सिंहासन
अन दु।
6 यस्शलेमया शान्तिया निति
प्रार्थना या,

“छन्त माया याइपि याउँक
चवनेदयेमा।

7 छंगु पःखाः दुने नं
शान्ति दयेमा,
अले छंगु लायकू दुने नं
सुरक्षा दयेमा।”

8 जिमि दाजुकिजा
व जिमि पासापिनिगु निति
जिं धाये, “छन्त शान्ति जुइमा!”

9 परमप्रभु झी परमेश्वरया
देगःया निति
जिं छंगु भिया लागि
प्रार्थना याये।

123

परमप्रभुया दयाया निति प्रार्थना

यस्सशलेमय् थाहां वनेत हाःगु म्ये

1 हे स्वर्गया सिंहासनय्
चवनादीम्ह परमप्रभु,
जिं छिपाखे थःगु मिखा ब्वये।

2 गथे दासं थः मालिकपाखे
मिखा ब्वइ,
अले दासीं थः मालिकनीपाखे
मिखा ब्वइ,

अथे हे छिं जिमित दया माया
यानामदीतले
जिमिसं छि परमप्रभु जिमि परमेश्वरपाखे
मिखा ब्वयाचवने।

3 जिमित दया यानादिसँ,
हे परमप्रभु,
जिमित दया यानादिसँ।

जिपिं तसकं हे क्वह्यंकाः

चवनेमाःगु दु।

4 तःमिपिनिगु पाखें जिमिसं

हेबाय्चबाय् याकाचवने

माःगु दु।

अले तःधंछुया जुइपिनिपाखें

हिस्स्याका चवनेमाःगु दु।

124

छुत्काराया निंति सुभाय्

दाऊदया भजन, यस्सल्लेमय् थाहां वनेत हाःगु म्ये

1 परमप्रभु झीपाखे

मदीगु जूसा,

इस्त्राएलं आः धायेमा,

2 परमप्रभु झीपाखे मदीगु जूसा,

मनूतयसं झीत हमला याःबलय्

3 झीपि खनाः

इपिं मि थें तं चाःबलय्,

इमिसं झीत म्वाःम्वाकं

नुनाछवये धुंकीगु।

4 खुसिबालं झीत त्वपुये धुंकीगु,

अले लःधाः झीगु म्हया

चवयनं न्ह्याये धुंकीगु।

5 छवाःगु लखं झीत

चुइकायंके धुंकीगु।

6 झीत इमिगु वाया शिकार

जुइके बिया मदीम्ह

परमप्रभुया प्रशंसा जुइमा।

7 शिकारीया जालं

झंगः बचय् जूगु थें

झीपिं बचय् जुइ धुंकल।
 इमिगु जाः गुत
 अले झीपिं बचय् जुल।
 8 झीगु ग्वाहालि
 स्वर्ग व पृथ्वी सृष्टि यानादीम्ह
 परमप्रभुया नामय् दु।

125

थः प्रजाया छचाःखेरं परमप्रभु
 यस्सलेमय् थाहां वनेत हाःगु म्ये
 1 परमप्रभुयाके
 भरोसा तइपिं
 सकलें सियोन पर्वत थें खः,
 गुकियात संके फइ मखु
 तर न्ह्याबलें दनाच्चनी।
 2 पहाडत यस्सलेमया
 छचाःखेरं दु थें
 आवंलि अले न्ह्याबलें परमप्रभु
 थः मनूतय् छचाःखेरं दी।

3 दुष्टतय्सं परमप्रभुं थः मनूतय्
 बियादीगु देशय् न्ह्याबलें
 राज्य याइ मखु।
 मखुसा धर्मीतय्सं हे
 मभिं ज्या याइ।

4 हे परमप्रभु, भिंपिं मनूतय्
 व नुगः बांलाःपिन्त
 भिं हे यानादिसँ।

5 तर मखुगु लँपुइ वनिपिन्त
 दुष्टतनापं

हे परमप्रभुं
पितिना छवयादिसँ।
इस्त्राएलय् शान्ति जुइमा।

126

छुत्काराया लागि सुभाय्
यस्त्रालेमय् थाहां वनेत हाःगु म्ये
1 परमप्रभुं

लिहांवःपिन्त
सियोनय् लित हयादीबलय्
जिपिं ला म्हगस खंपिं थें जुल।

2 जिपिं न्हिला अले
जिमिसं लसताया म्ये हाला।
मेमेगु जाति जिमिगु बारे
थथे धाल,

“परमप्रभुं इमिगु निंति
तःधंगु ज्या यानादीगु दु।”

3 धात्थें परमप्रभुं जिमिगु निंति
तःधंगु ज्या यानादिल।
जिमित यक्व लय्ताः वल।

4 हे परमप्रभु!
नेगेवया गंगु बैय् खुसित
न्ह्याःगु थें हे
जिमिगु अवस्था हाकनं
बांलाकादिसँ।

5 ख्वःख्वं प्यूपिन्सं
लयलय्तातां म्ये हालाः
बाली लइ।

6 ख्वःख्वं पुसा ज्वनाः
ह्वलेत वंपिं मनूत

धातर्थे हे लयल्यतातां
 म्ये हालाः
 बालिथू ज्वनाः लिहां वइ।

127

परमेश्वरया आशिष मदुगु ज्या

सितिं वनी

सोलोमनया भजन,

यरूशलेमय् थाहां वनेत हाःगु म्ये

1 परमप्रभुं हे छैं दयकामदीसा,

दयक्कीपिन्सं याःगु ज्या

सितिं वनी।

परमप्रभुं हे शहरया रक्षा

यानामदीसा,

पालें पिवाच्चंगु सितिं वनी।

2 नसाया नितिं ज्या यायेत

छ सुथ न्हापां दनेगु

व चान्हय् लिबाक्क घवनेगु

सितिं खः।

छाय्धाःसा वयक्कलं थःत यःपिन्त

न्ह्यः बियादीगु दु।

3 स्व, काय्पिं परमप्रभुं

बियादीगु हकया सर्बय खः

अले काय्म्ह्याय्पिं

वय्कःया आशिष खः।

4 सिपाइया ल्हातय् दुगु वाण थें

ल्याय्म्हबल्लय् ब्रूपिं

काय्पिं जुइ।

5 धन्य खः व मनु,

गुम्हय्सिया यक्व काय्पिं दइ।

न्याय याइगु थासय्
 थः शत्रुतनापं सामना यायेमालीबिलय्
 शत्रुतय्‌सं वयात गुबलें बुकी मखु।

128

- परमप्रभुया आज्ञा न्यनीपिन्त सुवाः
 यरूशलेमय् थाहां वनेत हाःगु म्ये
- 1 धन्य खः परमप्रभुया
 भय काइपि
 व वय्‌कःया लैपुइ जुइपि
 फुक्क मनूत।
- 2 छं थःगु कमाइ नइबलय्
 छ लय्‌ताइ
 अले छन्त भिं जुइ।
- 3 छंगु छैय् छिमि कलाः
 यक्व फल दुगु दाखमा थें,
 अले छिमि काय्‌म्ह्याय्‌पि
 छंगु टेबिलया छचाःखेरं
 जैतूनया चुलित थें जुइ।
- 4 स्व, परमप्रभुया
 भय काइम्ह मनूयात
 थथे हे सुवाः दइ।
- 5 परमप्रभुं छ म्वानाच्चवंतले
 सियोनं छन्त सुवाः बियादीमा।
 छं यरूशलेम च्वन्हाःगु
 खनेमा।
- 6 छं थः छय्-छुइपिन्त नं खनेमा।
 इस्राएलय् शान्ति जुइमा!

129

इस्त्राएलया शत्रुतयत् त्याकेगु प्रार्थना
यस्त्रशलेमय् थाहां वनेत हाःगु म्ये

1 इमिसं इस्त्राएल ल्याय्म्ह
जूबलय् निसें हे
सास्ती बियावयाच्चंगु दु।

इस्त्राएलं थथे धायेमा,
2 “जि ल्याय्म्ह जूबलय् निसें हे
सास्ती बियावयाच्चंगु दु,
अयनं इमिसं जितः त्याकूगु मदु।

3 इमिसं जिगु जँन्धूफातय्
गाःवंक घाः यानाबिल
अले उकियात सा वाःगु बुं थें
यानाबिल।

4 तर परमप्रभु धर्मीम्ह खः,
वय्कलं दुष्टतपाखें
त्वःतकादिल।”

5 सियोनया फुक्क शत्रुत लज्या
चाये मालेमा
अले लिहां वनेमा।

6 इपिं छँया पलिइ दुगु घाँय् थें जुइमा
गुगु ताहाकः जुइ न्ह्यः हे
गनावनी।

7 सुनानं उकियात मुनाः
वा थू चिनाः यंके फइ मखु।

8 अनं जुयाः वइपिं वनिपिन्सं
सुनानं थथे धाइ मखु,

“परमप्रभुं छन्त सुवाः बियादीमा।
परमप्रभुया नामय् जिमिसं
छन्त सुवाः बी।”

130

क्षमा व दया मायाया लागि प्रार्थना
यस्सलेमय् थाहां वनेत हाःगु म्ये

1 हे परमप्रभु!

जि तसकं दुःख सियाच्चनागुलि
तःसलं हालाः छिगु नां
कयाच्चनागु दु।

2 हे प्रभु!

जिगु बिन्ति न्यनादिसँ।
दयाया लागि यानागु
जिगु बिन्ति न्यनादिसँ।

3 हे परमप्रभु!

छिं पापया ल्याःचा कयादीसा
सु दनाच्चने फइ?

4 तर छि क्षमा बियादीमह खः,
अथे जुयाः हे छिगु भय काइ।

5 जिं परमप्रभुयात पियाच्चना,
जिं दुनुगलंनिसें हे
वय्कःया लँ स्वयाच्चना।
अले जिगु आशा
वय्कःया वचनय् दु।

6 पालेतय्सं सुथय् पियाच्चंगु थें,
पालेतय्सं सुथय्
पियाच्चंगु स्वयाः अप्वः
जिं परमप्रभुयात पियाच्चना।

7 हे इस्राएल,

परमप्रभुयाके थःगु आशा तया च्वँ,
छाय्धाःसा परमप्रभु सदां
दयाच्चनीगु दया माया दुम्ह

व उद्गार यानादीम्ह खः।
 8 वयक्लं हे मू पुलाः
 इस्राएल्यात फुक्क पापं
 छुतय् यानादी।☆

131

तःधंछु मजुसे याःगु प्रार्थना
 दाऊदया भजन, यरुशलेमय् थाहां वनेत हाःगु म्ये
 1 हे परमप्रभु,
 जिगु नुगः फुईक्क
 च्वंगु मदु,
 जिगु मिखा नं तःधंछु मजू।
 तःधंगु व जिगु लागि
 थाक्कुगु खँनापं जिं
 स्वापु मतया।
 2 धात्थें हे, जिं थःगु मनयात
 शान्त व सुम्क तयागु दु,
 दुरु त्वःतकूम्ह मचा थें,
 दुरु त्वःतकूम्ह मचा
 थः मांया मुलय् सुम्क च्वंगु थें
 जिगु मन सुम्क च्वंगु दु।

3 हे इस्राएल,
 आवलि व न्ह्याबलें
 परमप्रभुयाके हे आशा तया च्वैं।

132

देगःया लागि प्रार्थना
 यरुशलेमय् थाहां वनेत हाःगु म्ये

☆ 130:8 १३०:८ मत्ती १:२१; तीति २:१४

- 1 हे परमप्रभु,
दाऊद व वं सह याःगु
फुक्क दुःख लुमंकादिसैं।
- 2 वं परमप्रभुलिसें पाफल,
अले याकूबया दक्वसिबय्
बल्लाःम्ह परमेश्वरलिसें
भाकल यात,
- 3 “जि अबलय् तक
थःगु छैं वने मखु,
लासाय् घं वने मखु,
- 4 न्ह्यः वय्के मखु,
अले आराम नं काये मखु,
- 5 गबले तक परमप्रभुया नितिं
छगूथाय्, याकूबया
दक्वसिबय् बल्लाःम्ह
परमेश्वरयागु नितिं छगः देगः
जिं दय्के फइ मखु।”

- 6 एप्राताय् जिमिसं
बाचाया सनूया बारे न्यना,
अले याआरया* ख्यलय्
जिमिसं व लुइका।☆
- 7 “वा, झीपिं परमप्रभुया
देगलय् वनेनु,
झीसं वय्कःया
सिंहासनया न्ह्यःने
आराधना यायेनु।”

- 8 हे परमप्रभु, दनादिसैं,
थःगु शक्तिया चिं
बाचाया सनूनापं

* 132:6 १३२:६ याआरया ख्यलय् थ्व किर्यत-यारीम खः ☆ 132:6 १३२:६-१० २ इति ६:४१-४२

देगल्य् झासँ
 अले अन न्ह्याबलें च्वनादिसँ।
 9 छिकपिनि पुजाहारीत धर्मी जुइमा।
 अले छिकपिनि
 विश्वास यायेबहःपि मन्तयसं
 लयल्यतातां म्ये हालेमा।

10 थः दास दाऊदया लागि,
 थःम्हं अभिषेक
 यानादीम्ह जुजुयात
 म्हाः धकाः धयादी मते।
 11 परमप्रभुं दाऊदलिसँ पाफयादिल,
 वय्कलं पाफयादीगु
 गुबलें लित कयादी मखु,
 “जिं छंगु सिंहासनय्
 छिमि सन्तान मध्ये
 छम्हय्सित तये।☆
 12 छिमि काय्पिन्सं जिगु बाचा
 व जिं इमित स्यनागु जिगु नियम
 पालन यात धाःसा
 इमि काय्पिं नं न्ह्याबलेंया लागि
 छंगु सिंहासनय् च्वनी।”

13 परमप्रभुं सियोनयात ल्ययादीगु दु।
 वय्कलं उकियात थः च्वनेगु
 थाय्या निति यय्कादीगु दु।
 14 वय्कलं धयादिल,
 “थ्व ला न्ह्याबलेंया लागि
 झासु लनेगु थाय् खः,
 जि थन सिंहासनय् च्वने,
 छायाःसा जितः थ्व हे यः।

☆ 132:11 १३२:११ २ शमू ७:१२-१६; १ इति १७:११-१४; भज ८९:३-४; प्रे २:३०

- 15 जिं थनयागु नयेगु सामानय्
गाक्क सुवाः बी,
थनयापि नये मखंपिन्तु नसां
प्वाः जाय्काबी।
- 16 थनयापि पुजाहारीतय्त
जिं उद्गारया वसः फीकाबी,
अले थनच्चंपि विश्वास
यायेबहःपिं मनुतय्सं
लय्लय्तातां म्ये हाली।
- 17 अन जिं दाऊदया
छम्ह सन्तानयात
तःधम्ह जुजु दय्काबी।
अन जिं थःम्हं अभिषेक यानाम्ह
जुजुया राज्य ल्यंकातये।☆
- 18 जिं वया शत्रुतय्त
लज्या चाय्काबी।
तर व छम्ह नांजाःम्ह जुजु जुइ।”

133

दाजुकिजापि मिलय् जुयाः च्वनेगु

दाऊदया भजन, यरूशलेमय् थाहां वनेत हाःगु म्ये

1 दाजुकिजापि

मिलय् जुयाः च्वनेगु

गुलि बांलाःगु

व न्ह्यइपुसे च्वंगु खँ खः।

2 थ्व ला हारूनया छेनय् तयाब्यूगु

व वया दारीइ न्ह्यानाः

वयागु वसःया

गःतां तक थ्यंगु

मू वंगु चिकं थें खः।

3 श्व सियोन पर्वतय्
 गाःगु हेर्मोनया सुतिलः थें खः,
 अन हे परमप्रभुं न्ह्याबलें
 जीवनया आशिष प्वंकादी।

134

चान्हय् परमप्रभुया प्रशंसा
 यरूशलेमय् थाहां वनेत हाःगु म्ये
 1 हे परमप्रभुया सेवा
 याइपिं सकलें,
 चान्हय् देगल्य् पिवाः च्वनीपि,
 परमप्रभुया प्रशंसा या।
 2 वय्कःया पवित्र थासय्
 थथःगु ल्हाः ल्हनाः
 परमप्रभुया प्रशंसा या।
 3 स्वर्ग व पृथ्वी सृष्टि
 यानादीम्ह परमप्रभुं
 छन्त सियोनं सुवाः
 बियादीमा।

135

झी परमप्रभु फुक्क स्वयाः तःधं
 1 हल्लेलूया!
 परमप्रभुया नांया
 प्रशंसा या!
 हे परमप्रभुया सेवा याइपिं,
 वय्कःया प्रशंसा या!
 2 छिपि परमप्रभुया देगल्य्,
 झी परमेश्वरया देगःया चुकय्
 सेवा याइपिं,

3 परमप्रभुया प्रशंसा या,
छाय्धाःसा परमप्रभु भिंम्ह खः।

वय्कःया नांया भजन हा,
छाय्धाःसा थ्व न्ह्यइपुसे च्वं।

4 परमप्रभुं याकूबयात थःगु निति,
इस्त्राएलयात मू वंगु थः प्रजा
जुइत ल्ययादीगु दु।

5 जिं स्यु,
परमप्रभु तःधंम्ह खः,
झी परमप्रभु
फुक्क घःत स्वयाः
तःधंम्ह खः।

6 परमप्रभुं छु छु याये
मास्ति वय्कादिल,
वय्कलं स्वर्ग, पृथ्वी
अले समुद्रयागु फुक्क
ततःजाःगु थासय् यानादी।

7 वय्कलं पृथ्वीया कुन्चां
सुपौय् थकयादी,
वानापं हाबलासा
छवयाहयादी,
अले थःगु धुकुति
फय् पिकयादी।

8 वय्कलं मिश्रय् मनूतय्
तःधिकः काय्पि
व पशुतय् न्हापां बूपि
नं स्यानादिल।

9 हे मिश्र, छन्थाय् वय्कलं
फारो व वया फुक्क
भारदारतय् दथुइ

- चिं व अजू चायापुगु ज्या
क्यनादिल।
- 10 वय्कलं यक्व जातितयत्
नाश यानादिल
अले ततःधंपि जुजुपिन्त
स्यानादिल।
- 11 वय्कलं एमोरीतय् जुजु सीहोन,
बाशानया जुजु ओग
व कनानयापि सकलें
जुजुपिन्त स्यानादिल।
- 12 अले इमिगु देश
वय्कलं थः प्रजायात
सर्बय कथं बियादिल।
- 13 हे परमप्रभु,
छिगु नां न्हाबलें दयाच्चनी।
हे परमप्रभु,
पुस्तां पुस्ता तक
छिगु नां कयाच्चनी।
- 14 परमप्रभुं थः प्रजाया न्याय
यानादी,
अले थः दासतयत् दया
यानादी।
- 15 जाति जातिया मूर्ति ला
लुँ व वहः खः,
उपि फुक्क मनूतय्सं
दय्कूगु खः।
- 16 इमि म्हुतु दु, तर नवाये मफु,
मिखा दु तर खंके मफु।
- 17 इमि न्हायपं दु, तर न्यने मफु,
इमिगु म्हुतुइ सासः हे मदु।

18 इमित दयक्पिं नं इपिं थें जुइ,
अले इमिके भरोसा तइपिं नं
सकलें अथे हे जुइ।

19 हे इस्राएलया घराना,
परमप्रभुया प्रशंसा या!
हे हारूनया घराना,
परमप्रभुया प्रशंसा या!

20 हे लेवीया घराना,
परमप्रभुया प्रशंसा या!
हे परमप्रभुया भय काइपिं,
परमप्रभुया प्रशंसा या!

21 यस्शलेमय् च्वनादीम्ह
परमप्रभुयात
सियोनय् प्रशंसा या!
हल्लेलूयाह!

136

परमप्रभुया
सदां दयाच्चनीगु दया माया
1 परमप्रभुयात सुभाय् ब्यु,
छाय्धाःसा वय्कः
भिंम्ह खः, ☆

2 घःतय् परमेश्वरयात सुभाय् ब्यु,

3 प्रभुतय् परमप्रभुयात सुभाय् ब्यु,

4 वय्कलं जक

वय्कःया दया माया सदां दयाच्चनी।

वय्कःया दया माया सदां दयाच्चनी।

वय्कःया दया माया सदां दयाच्चनी।

☆ 136:1 १३६:१ १ इति १६:३४; २ इति ५:१३; ७:३; एज ३:११; भज १००:५; १०६:१; १०७:१; ११८:१; यर ३३:११

- अजू चायापुगु ज्या यानादी,
 5 वय्कलं थःगु बुद्धिं
 आकाश दय्कादिल, ☆
 6 वय्कलं लःया च्वय्
 पृथ्वी चकंकादिल, ☆
 7 वय्कलं ततःधंगु जः
 दय्कादिल, ☆
 8 न्हिनय् शासन यायेत
 वय्कलं सूर्य दय्कादिल,
 9 चान्हय् शासन यायेत
 वय्कलं तिमिला
 व नगुत दय्कादिल,
 10 वय्कलं मिश्रीतय्
 न्हापा बूपिन्त स्यानादिल, ☆
 11 वय्कलं इमिगु दथुं
 इम्नाएलयात पित हयादिल, ☆
 12 वय्कलं बल्लाःगु ल्हातं
 व चकंगु लपुं
 इमित पित हयादिल,
 13 वय्कलं लाल समुद्रयात
- वय्कःया दया माया सदां दयाच्चनी।
 वय्कःया दया माया सदां दयाच्चनी।
 वय्कःया दया माया सदां दयाच्चनी।
 वय्कःया दया माया सदां दयाच्चनी।
 वय्कःया दया माया सदां दयाच्चनी।
 वय्कःया दया माया सदां दयाच्चनी।
 वय्कःया दया माया सदां दयाच्चनी।
 वय्कःया दया माया सदां दयाच्चनी।
 वय्कःया दया माया सदां दयाच्चनी।

☆ 136:5 १३६:५ उत १:१

☆ 136:6 १३६:६ उत १:२

☆ 136:7 १३६:७-९ उत १:१६

☆ 136:10 १३६:१० प्रस १२:२९

☆ 136:11 १३६:११ प्रस १२:५१

व्वथलादिल,

वय्कःया दया माया सदां दयाच्चनी।

14 अले इस्राएलयात लाल
समुद्रया दथुं पारि हयादिल,

वय्कःया दया माया सदां दयाच्चनी।

15 फारो व वया सेनायात धाःसा
लाल समुद्रय् वाछवयादिल,

वय्कःया दया माया सदां दयाच्चनी।☆

16 वय्कलं थः मनूतय्त
मरूमिइ लँ क्यनादिल,

वय्कःया दया माया सदां दयाच्चनी।

17 वय्कलं ततःधंपिं
जुजुपिन्त स्यानादिल,

वय्कःया दया माया सदां दयाच्चनी।

18 वय्कलं बबल्लाःपि
जुजुपिन्त स्यानादिल,

वय्कःया दया माया सदां दयाच्चनी।

19 एमोरीतय् जुजु
सीहोनयात स्यनादिल,☆

वय्कःया दया माया सदां दयाच्चनी।

20 बाशानयाम्ह जुजु
ओगयात स्यानादिल,☆

वय्कःया दया माया सदां दयाच्चनी।

21 इमिगु देश वय्कलं
थः प्रजायात सर्बय कथं
बियादिल,

वय्कःया दया माया सदां दयाच्चनी।

22 वय्कलं थः दास इस्राएलयात
वयागु सर्बय बियादिल,

वय्क्ःया दया माया सदां दयाच्चनी।

23 झीपिं लडाँल्लय् बूबलय्
वय्क्लं झीत लुमंकादिल,

वय्क्ःया दया माया सदां दयाच्चनी।

24 वय्क्लं झीत झी शन्नुतय्गु
ल्हातं त्वःतकादिल,

वय्क्ःया दया माया सदां दयाच्चनी।

25 वय्क्लं फुक्क प्राणीतयत्
नयेगु नसा बियादी,

वय्क्ःया दया माया सदां दयाच्चनी।

26 स्वर्गयाम्ह परमेश्वरयात
सुभाय् ब्यु,

वय्क्ःया दया माया सदां दयाच्चनी।

137

यस्सलेमयात गुबलें त्वःमंके मखु

1 बेबिलोनया खुसिया
सिथय् च्वनाः

सियोनयात लुमंकाः
जिपिं ख्वया।

2 अन लिक्क दुगु सिमाय्
जिमिसं थथःगु वीणा
यख्खानाबिया।

3 जिमित ज्वनायंकूपिन्सं
जिमित म्ये हाय्क्ल,

जिमित सास्ती ब्युपिन्सं
“जिमित लसताया म्ये हा!”

धकाः धाल।

इमिसं “जिमित सियोनया
म्ये हा!” धकाः धाल।

4 तर थन परदेशय् जिमिसं गथे
परमप्रभुया म्ये हाले फइ धकाः?

5 हे यरूशलेम,
जिं छन्त गुबलें ल्वःमंकागु दुसा
जिगु जव ल्हाः गनावेनेमा।

6 जिं छन्त लुमंकागु मदुसा,
जिं यरूशलेमयात
जिगु दकलय् तःधंगु लसता
भाःपियागु मदुसा
जिगु मे थक्वय् प्यपुनेमा।

7 हे परमप्रभु,
बेबिलोनयापिन्सं यरूशलेम त्याका
काःबलय् एदोमीतय्सं
छु ज्या यात लुमंकादिसैं।
इपिं थथे धयाः हाल, “थुकियात थुनाब्यु,
जगंनिसैं हे थुकियात
नाश यानाब्यु।”

8 हे नाश जुइगु बेबिलोन
छं जिमित छु छु यात
उकिया लागि
छन्त बदला काइम्ह
धन्य खुः। ☆

9 छिमि चिचीधिकपि
मस्तयत ज्वनाः
ल्वहँतय् बस्वाइम्ह धन्य खुः।

138

परमप्रभुया महिमा तःधं
दाऊदया भजन

1 हे परमप्रभु,
जिं दुनुगलनिसें छिगु

प्रशंसा याये।

घःतय् न्ह्यःने

जिं छिगु प्रशंसा याये।

2 छिगु पवित्र देगःपाखे स्वयाः
जिं पुलि चुयाः भवपुले।

अले छि सदां दया माया

यानादीम्ह

व विश्वास याये बहःम्ह जूगुलि

छिं थःगु नां व वचन फुक्क स्वयाः

चवय् लाः धकाः क्यनादीगुलि

छिगु नांया प्रशंसा याये।

3 जिं छितः ग्वाहालिया लागि

इनाप यानाबलय्

छिं जितः लिसः बियादिल।

छिं जितः बल बियाः

आँट बियादिल।

4 हे परमप्रभु,

छिगु वचन न्यनाः

पृथ्वीयापिं सकल जुजुपिन्सं

छितः सुभाय् बीमा,

5 अले इमिसं परमप्रभुं यानादीगु

ज्याया बारे म्ये हाली,

छाय्धाःसा परमप्रभुया

महिमा तःधं।

6 परमप्रभु तःधंम्ह जूसां

वय्कलं क्वत्यका

चवनेमाःपिन्त स्वयादी।

तःधंछुया जुइपिन्त धाःसा

वय्कलं तापाक्कं हे म्हस्यू।

7 जितः समस्यां घेरय् याःसां
 छिं जिगु जीवन रक्षा यानादी।
 छिं जिमि तम्बःपि शत्रुतयगु
 विरोध यानादी,
 अले थःगु जव ल्हातं जितः
 बचय् यानादी।

8 परमप्रभुं जिगु लागि
 थःगु उद्देश्य पूर्वकादी,
 हे परमप्रभु,
 छिगु दया माया
 न्ह्याबलेया लागि दयाच्चनी।
 थःगु ल्हातं दयकादीपिन्त
 त्वःतादी मते।

139

परमप्रभुं जितः म्हसीकादीगु दु
 दाऊदया भजन, लय् तइम्हयसिगु निंति
 1 हे परमप्रभु!
 छिं जितः
 जाँचय् यानादीगु दु,
 अले छिं जितः म्हस्यू।
 2 छिं जि फ्यतुनागु
 व दनागु तक् स्यू
 छिं तापाकंनिसें हे
 जिगु नुगःखँ स्यू।
 3 जि पिहां वनेगु
 व दुहां वयेगु छिं स्यू,
 जिगु फुक्क पहःचहः छिं स्यू।
 4 हे परमप्रभु!
 जिं धाये न्ह्यः हे

जिं छु धायेत्यंगु धकाः
छिं सीकादी।

5 छि जिगु जवखवं प्यखें दी,
छिं थःगु ल्हाः जिगु छैनय्
तयादीगु दु।

6 थज्याःगु ज्ञान जिगु निति
तसकं अजू चायापु,
थ्व तसकं तःधं,
अले जिं थुइके मफु।

7 छिगु मिखां जि
गन सुपिले फइ?
छिगु न्ह्यःनें जि
गन बिस्त्युं वने फइ?

8 स्वर्गय् थाहां वंसां,
छि अन दी,
पातालय् कुहां वंसां
छि अन नं दी।

9 पुर्बय् यक्व तापाक ब्वयावंसां
वा पच्छिमय् तापाक
समुद्रया सिथय् थ्यंक वंसां

10 छिगु हे ल्हातं जितः
न्यासि ब्वना यंकी
अले छिगु जव ल्हातं
जितः ज्वनातःगु दइ।

11 जिं खिउँगुयात “जितः सुचुकी”
धकाः धाःसां
अले जिगु प्यखेंया जःयात
“चा जुयाब्बु” धाःसां

12 खिउँगु छिगु निति

खिउँसे चवनी मखु
 अले चा नं छिगु निंति
 न्हि थें झल्ल थी।
 छिगु निंति
 चा व न्हि उत्थें खः।

- 13 छिं जिगु म्हया
 छता छता ब्व दयकादिल,
 छिं जितः जिमि मांया प्वाथय् हे
 ब्वलंकादिल।
- 14 जिं छितः सुभाय् बी,
 छायाःसा छिं जितः
 अजू चायापुक दयकादीगु दु।
 छिगु ज्या तसकं अजू चायापु,
 थ्व खँ जिं बांलाक स्यू।
- 15 खिउँसे च्वंगु मांया प्वाथय्
 जि ब्वलानाच्चवनाबल्य्
 अले जिगु छपु छपु
 क्वय् ब्वलनाः
 जायावयाच्च्वंगु इलय् नं
 छिं जि अन दु धकाः स्यू।
- 16 जि बुइ न्ह्यः हे
 छिं जितः खंगु दु।
 अले जिगु आयुया
 छन्हु छन्हुयागु खँ
 छिं थःगु सफुलिइ च्वयादीगु दु।

- 17 हे परमेश्वर!
 छिगु बिचाः गुलि मू वं
 अले इमिगु ल्याः
 गुलि अप्वः दु।

- 18 ल्याः जक खाःसां
 थव फि स्वयाः यक्व दइ।
 जि गुबलय् न्ह्यलं चाइ,
 उबलय् छि जिलिसें दइ।
 अथे खःसां
 छि जिलिसें दया हे च्वनी।
- 19 हे परमेश्वर!
 जिगु इच्छा ला थथे दु,
 दुष्टत फुककं छिगु ल्हातिं
 नाश जुइमा,
 अले ज्यानमारात
 जिपाखें तापाक हे च्वनेमा।
- 20 इमिसं न्ह्याबलें
 छितः क्वह्यंकाः खँ
 ल्हाना जुइ।
 शत्रुतय्सं म्वाःमदुथाय् नं
 छिगु नां कयाजुइ।
- 21 हे परमप्रभु!
 छितः महीपिन्त जिं छाया महिये!
 छिगु विरोधय् सनाजुइपिन्त जिं
 छाया क्वमह्यंके!
- 22 जिं इमित दुनुगलनिसें महिका,
 छिम्ह शत्रु जिम्ह नं शत्रु खः।
- 23 हे परमेश्वर!
 जितः जाँचय् यानादिसँ,
 अले जिगु नुगलय् छु छु दु
 सिइकादिसँ।
 जितः लनास्वयादिसँ,
 अले जिगु बिचाः सिइकादिसँ!
- 24 जिके गनं मभिगु खँ
 दुसा क्यनादिसँ।
 अले जितः सदांया लँपुइ यंकादिसँ।

140

रक्षाया लागि प्रार्थना

दाऊदया भजन, लय् तइम्हय्सिगु निंति

1 हे परमप्रभु,

जितः दुष्ट मनूतपाखें

बचय् यानादिसँ।

ग्यानापुपि मनूतपाखें

जितः रक्षा यानादिसँ।

2 इमिसं थःगु नुगलय्

मभिंगु ग्वःसा ग्वइ,

अले न्हियान्हिथं

ल्वापु थनाच्चनी।

3 इमिसं नवाइगु

सर्प न्याःगु थें खः।

इमिगु म्हुतुइ

बिख दुम्ह सर्पयागु बिख दइ।☆

सेला

4 हे परमप्रभु,

जितः दुष्टयागु ल्हातं

बचय् यानादिसँ।

ग्यानापुपि मनूतपाखें

जितः रक्षा यानादिसँ।

इमिसं जिगु तुतिइ

छेकीं तयेत ग्वसाः ग्वःगु दु।

5 तःधंछुया जुइपिन्सं

जिगु लागि जाः ग्वल।

जितः तक्व्यकेत

इमिसं जाः तल।

जिगु लँय् इमिसं स्वःतिपाँय्

तःगु दु।

सेला

6 हे परमप्रभु,
छि जिमि परमेश्वर खः धकाः
जिं छितः धयागु दु।

हे परमप्रभु,
छिं जिगु दयाया ख्वःसः
न्यनादिसँ।

7 हे परमप्रभु परमेश्वर,
जिगु उद्धारया बल
छिं लडाईया इलय्
जिगु छ्यंयात
रक्षा यानादीगु दु।

8 हे परमप्रभु,
दुष्टतय्सं यय्कूगु खँ
बियादी मते।
इमिगु ग्वसाः ताःमलायेमा,
मखुसा इपिं घमण्डी जुइ।

सेला

9 जितः घेरय् याइपिनिगु छेनय्
इमिसं हे बिचाः याःगु
मभिंगु ज्या जूवनेमा।

10 मि व गन्धक
इमिगु म्हय् गायेमा,
इमित मिइ
वान्छवया बीमा।

इमित गालय्
क्वफानाबीमा,
अले अनं गुबलें पिहां
वये मफयेमा।

11 मखुगु खँ ल्हाइपिन्त
पृथ्वीइ सुथांलाकादी मते।
ग्यानापुपि मनूत
याकनं हे नाश जुइमा।

- 12 हे परमप्रभु,
छिं दुःखय् लाःपिं
व मगाःमचाःपिनिगु
पंलिनाः न्याय यानादी
धकाः जिं स्यू।
- 13 धात्थें हे धर्मीतय्सं
छिगु नांयात सुभाय् बी,
भिंपिं मनूत छिगु न्ह्यःने च्वनी।

141

सन्ध्याया प्रार्थना

दाऊदया भजन

- 1 हे परमप्रभु,
जिं छितः इनाप याये,
जिथाय् छि याकनं झासँ।
- 2 जिगु प्रार्थना छिगु न्ह्यःने
नस्वाःगु धुपाँय् थें जुइमा,
अले जिं थःगु ल्हाः ल्हनीबलय्
व छिगु लागि
सन्ध्याया बलि थें जुइमा।☆

- 3 हे परमप्रभु,
जिगु म्हुतुइ पिवाः तयादिसँ,
जिगु म्हुतुसिइ तालं ग्वयादिसँ।
- 4 दुष्ट मनूतनापं
मभिंगु ज्या यायेत
जिगु मन मभिंगु
खँपाखे मवनेमा।
अले जितः इमिगु
साःगु नसा नये म्वालेमा।

5 धर्मीतयसं जितः दायेमा,
 व जिगु निति दया जुइ।
 इमिसं जितः ब्वः बीमा,
 व जिगु छयंया निति
 चिकं जुइ।
 जिगु छेनं मयय्की मखु।
 अयनं मभिपिं मनूतयसं याःगु
 ज्याखँया विरोधय्
 जिं प्रार्थना याना हे च्वने।

6 इमि शासकतयत्त पहाडया
 च्वकां क्वफाइबलय्
 इमिसं जिं धयागु खँ सत्य खः
 धकाः सी।

7 इमिसं धाइ,
 “बुँ पालिपिन्सं चापॉय्यात
 तछ्याःगु थें हे
 जिमिगु क्वँय् चिहानया सिथय्
 थुखे उखे ह्लाब्यूगु दु।”

8 हे दक्व शक्ति दुम्ह परमप्रभु,
 जिगु मिखा छिपाखे हे
 वनाच्चनी,
 जिं छिके शरण काये,
 जितः कालया म्हुतुइ
 वान्छवयादी मते।

9 इमिसं जिगु लागि
 हःगु जाःपाखें,
 मभिगु ज्या याइपिन्सं
 तःगु जाःपाखें
 जितः बचय् यानादिसँ।

10 दुष्टत इमिगु थःगु जालय्
 क्यनेमा,

अबलय् जि बचय् जुयाः
पिहां वये फयेमा।

142

परमप्रभु जिगु शरण कायेगु थाय्

दाऊदया मश्किल, दाऊद गुफाय् च्वनाच्चंबलय् याःगु प्रार्थना

1 हे परमप्रभु,

जिं छितः ख्वःसलं

इनाप याये,

जिं दयाया निंतिं तःसलं हालाः

परमप्रभुयात प्रार्थना याये।☆

2 जिगु फुक्क दुःख

वय्कःया न्ह्यःने प्वंके,

जिं थःगु सास्ती

वय्कःयात कने।

3 जि निराश जूबलय्

छिं जितः छु जुयाच्चंगु दु

धकाः स्यू।

जि वनेत्यनागु लँपुइ

जिमि शत्रुतय्सं जिगु लागि

जाः हःगु दु।

4 जिगु जवपाखे स्वयादिसँ।

जिगु धन्धा काइम्ह सं हे मदु।

जिं शरण कायेगु थाय् गनं मदु।

सुनानं जितः वास्ता याइ मखु।

5 हे परमप्रभु, जिं छितः

ख्वःसलं इनाप याये

जिं धाये,

“छि जिगु शरण कायेगु थाय्
व म्वाःपिनिगु देशय्
जिगु ब्व खः।”

6 हे परमप्रभु,
जिगु बिन्ति न्यनादिसँ।
छाय्धाःसा जिगु अवस्था
तसकं बांमलाय् धुंकल।
जिगु ल्युने ल्युने वःपि मन्तूतपाखें
जितः बचय् यानादिसँ,
छाय्धाःसा इपि जि स्वयाः
यक्व बल्लाः।
7 जितः कुनातःगु थासं
त्वःतकादिसँ,
अले जिं छिगु
प्रशंसा याये फयेमा।
धर्मीं जिगु प्यखें मुनी
छाय्धाःसा छिं जिगु लागि
भिंगु ज्या यानादीगु दु।

143

दुःखया इलय्
ग्वाहालिया लागि प्रार्थना
दाऊदया भजन
1 हे परमप्रभु,
जिगु प्रार्थना न्यनादिसँ,
दयाया लागि जिं यानागु
इनाप न्यनादिसँ।
छाय्धाःसा छि थःमन्तूतयगु लागि
धर्मींम्ह व विश्वास याये
बहःम्ह खः।
जिगु इनाप न्यनाः

ग्वाहालि यानादिसँ।

2 थः दासयात इन्साफय हयादी मते,
छिगु न्ह्यःने सुं नं धर्मी मदु।☆

3 शत्रुं जितः लितुली,
वं जितः बँय् न्हुतुमतु न्हइ।
यक्व न्हापा हे
सी धुंकूपि थें यानाः वं जितः
खिउँगु थासय् तःगु दु।

4 उकिं जि निराश जुयागु दु,
जिगु नुगः ख्वःगु दु।

5 अले जिं वने धुंकूगु खँ लुमंके।
जिं छिगु ज्याया बारे ध्यान याये।
अले छिगु ल्हातं याःगु ज्याया
बारे बिचाः याये।

6 जिं थःगु ल्हाः ल्हनाः
छितः प्रार्थना याये,
गंगु बँ थें जि छिगु लागि
प्याःचाःगु दु।

सेला

7 हे परमप्रभु,
याकनं लिसः बियादिसँ,
जिगु नुगः हे क्वतुने धुंकल।
थःगु ख्वाः जिपाखें
फस्वय्कादी मते,
मखुसा जि सीपि थें जुइ।

8 सुथया इलं
छिगु सदां दयाच्चनीगु
दया मायाया वचन हयेमा,
छाय्धाःसा छिके हे

जिं भलसा तयागु दु।
 जि वनेमाःगु लँ क्यनादिसँ,
 जिं थःगु मन छिपाखे हे ल्हने।

9 हे परमप्रभु,
 जितः जिमि शत्रुतपाखें
 बचय् यानादिसँ,
 जि सुलेत छिगु हे
 शरणय् वयागु दु।

10 छिगु इच्छा गथे यानाः
 पूर्वकेगु खः
 व जितः स्यनादिसँ।
 छायाःसा छि जिमि
 परमेश्वर खः।
 छिगु आत्मां जितः
 भिंगु लँपुइ यंकेमा।

11 हे परमप्रभु,
 छिगु नांया लागि जिगु
 जीवनयात रक्षा यानादिसँ।
 छिगु धार्मिकताया कारणं
 जितः थ्व दुःखपाखें
 पित हयादिसँ।

12 छिगु सदां दयाचवनीगु
 दया मायां यानाः
 जिमि शत्रुतयत्
 नाश यानादिसँ।
 अले जितः दुःख बीपिं
 सकसितं नाश यानादिसँ,
 जि छिकपिनि दास हे खः।

144

त्याकेगु लागि प्रार्थना

दाऊदया भजन

1 जितः रक्षा याइम्ह

परमप्रभुया

प्रशंसा जुइमा,

वय्कलं जिगु ल्हाः

व पतियात

ल्वायेगु सीप स्यनादी।

2 वय्कः जिगु निति

दया माया दुम्ह परमेश्वर

व किल्ला खः,

वय्कः जिगु निति ल्वहंधी

व जितः उद्धार याइम्ह खः,

वय्कः जिगु ढाल खः,

शरण कायेगु थाय् खः।

वय्कलं मनूतय्त

जिगु अधीनय् तयादी।

3 हे परमप्रभु,

मनूत छु हे खः धकाः

छिं बिचाः यानाच्च्वनेत?

सिनावनीपिन्त छु हे खः धकाः

छिं च्यूताः तयाच्च्वनेत?✧

4 मनू ला छम्ह सासः जक थें खः,

वयागु आयु मदयावनीगु

किचः थें जक खः।

5 हे परमप्रभु,

थःगु आकाशयात चाय्काः

क्वहां झासैं,

- पहाडतयत् थियादिसँ,
अले उकिं कुँ पिहां वयेमा।
- 6 हाबलासा त्वय्कादिसँ,
अले शनृतयत् छ्यालब्याल
यानादिसँ।
वाण कयका:
इमित लिनाछवयादिसँ।
- 7 स्वर्ग कुहां झासँ,
तःजाःगु समुद्रं साला:
जितः थकयादिसँ
अले बचय् यानादिसँ।
- परदेशीतय्गु ल्हातं
जितः त्वःतकादिसँ।
- 8 इपिं मखुगु खँ ल्हाइपिं खः।
खःगु खँ ल्हाये धकाः पाफयाः नं
इमिसं मखुगु खँ ल्हाइ।
- 9 हे परमेश्वर,
जिं छितः छपु न्हूगु भजन
हालाः न्यंके,
जिं वीणा थानाः
छितः भजन न्यंके।
- 10 छिं जुजुपिन्त त्याकादी,
छिं थः दास दाऊदयात
तरवारपाखें बचय् यानादी।
- 11 जितः बचय् यानादिसँ
अले परदेशीतय्गु ल्हातं
त्वःतकादिसँ।
इपिं मखुगु खँ ल्हाइपिं खः,
इमिसं खःगु खँ ल्हाये धकाः
पाफयाः नं मखुगु खँ ल्हाइ।
- 12 झी काय्पिं ल्याय्म्हबलय्

सिमा तःमा जूगु थें जुइ,
 अले झी म्हाय्पि दरबारया निति
 बुत्ता कियातःगु
 कुन्चाया थां थें जुइ।

13 झीगु भखारि
 फुक्क कथंयागु अन्नं जाइ,
 झीम्ह फै-च्वलय्
 द्रुलंद्रुः दुगं अप्वयावनी।
 झीगु ख्यलय् उपि
 लखंलख दइ।

14 झी सा द्रुहंया मचा छम्ह हे
 क्वहां मवय्क यक्व दयेमा।
 झीगु पखाः थुनी मखु,
 झीपि ज्वंकाः वनेमाली मखु,
 अले झीगु लैय्
 दुःखं जाःगु ख्वःसः
 ताये मदयेमा।

15 धन्य खः थुकथं
 आशिष काइपि मनूत,
 धन्य खः
 परमप्रभु परमेश्वरयात आराधना
 याइपि मनूत।

145

परमप्रभु सृष्टिकर्ता व जुजु खः
 दाऊदया भजन
 1 हे परमेश्वर,
 जिमि जुजु,
 जिं छितः तःधंके,
 जिं छिगु नांया
 न्हाबलें प्रशंसा याये।

- 2 न्हियान्हिथं जिं छिगु
 प्रशंसा याये, अले न्ह्याबलें
 छिगु नां तःधंके।
- 3 परमप्रभु तःधंम्ह खः
 अले प्रशंसा याये बहःम्ह खः।
 वय्कः गुलि तःधं धकाः
 झीसं शुइके हे फइ मखु।
- 4 छगू पुस्तां मेगु पुस्तांलिसें
 छिगु ज्याया प्रशंसा याइ,
 इमिसं छिगु बल्लाःगु
 ज्याया बारे कनी।
- 5 इमिसं छिगु महिमा
 व गौरवया बारे खँ ल्हाइ,
 अले जिं छिगु अजू चायापुगु
 ज्याय् ध्यान याये।
- 6 इमिसं छिगु ततःधंगु ज्यायागु
 शक्तिया बारे खँ ल्हाइ,
 अले जिं छिगु ततःधंगु
 ज्या कने।
- 7 इमिसं छिगु फुक्क
 भिंगु ज्याया नितिं लसता हनी।
 मनूतय्सं छिगु धार्मिकताया
 म्ये हाली।
- 8 परमप्रभु दया माया दुम्ह खः।
 वय्कः तंचायेत लिबाकादीम्ह
 व तसकं दया माया
 यानादीम्ह खः।
- 9 परमप्रभुं सकसितं भिं यानादी,
 वय्कःया दयां वय्कलं
 यानादीगु फुक्क ज्याय् दइ।

- 10 हे परमप्रभु,
 फुक्क सृष्टि छिगु प्रशंसा याइ,
 अले छिकपिनि
 विश्वास यायेबहःपि मनूतय्सं
 छितः सुभाय् बी।
- 11 इमिसं छिगु राज्यया
 महिमाया बारे खँ ल्हाइ,
 अले छिगु शक्तियागु
 बयान याइ।
- 12 अले मेपि मनूतय्सं
 छिं यानादीगु ततःधंगु
 ज्याया बारे सी।
 अले छिगु राज्यया
 महिमां जाःगु गौरव खनी।
- 13 हे परमप्रभु,
 छिगु राज्य न्हाबलें दयाच्चनी।
 छिं पुस्तां पुस्ता तक
 शासन यानादी।
 परमप्रभु थःमनूतयगु लागि
 विश्वास याये बहःम्ह खः,
 अले वय्कलं
 थःगु बचं पूर्वकादी।
 थःगु फुक्क ज्याय्
 वय्कः दयादुम्ह खः।
- 14 वय्कलं क्वत्यकाच्चने
 माःपिन्त ग्वाहालि बियादी,
 अले ग्वत्पिन्त थनादी।
- 15 फुक्क प्राणीतय्सं छिगु
 लँ स्वयाच्चनी,
 अले छिं इमित पाय्छिगु इलय्
 नयेगु नसा बियादी।

16 छिं थःगु ल्हातं
 फुक्क प्राणीं
 मनंतुनाच्चंगु खँ पूर्वकादी।

17 परमप्रभु थःम्हं यानादीगु
 फुक्क ज्याय् धर्मी खः,
 थःगु फुक्क ज्याय्
 वय्कः दयादुम्ह खः।

18 वय्कःयात आराधना याइपिं
 सकसिगुं न्ह्यःने परमप्रभु दी,
 वय्कःयात दुनुगलनिसें
 आराधना याइपिं
 सकसिगुं न्ह्यःने वय्कः दी।

19 वय्कःया ग्याःभय
 काःपिनिगु इच्छा
 वय्कलं पूर्वकादी,
 अले इमिगु बिन्ति न्यनाः
 इमित उद्धार यानादी।

20 परमप्रभुं थःत माया याइपिं
 सकसितं रक्षा यानादी,
 तर फुक्क मभिंपिन्त
 वय्कलं नाश यानादी।

21 जिं परमप्रभुया सदां प्रशंसा याये,
 अले फुक्क प्राणीं न्ह्याबलें
 वय्कःया पवित्र नांया
 प्रशंसा यायेमा।

- 1 हल्लेलूयाह! *
 हे जिगु मन,
 परमप्रभुया प्रशंसा या।
- 2 जिं जिवंकाछि
 परमप्रभुया प्रशंसा याये,
 जिं म्वातले जिमि परमेश्वरया
 भजन हाला हे च्वने।
- 3 शासकतयगु भलसा काये मते,
 सुं मनूयागु नं भलसा काये मते,
 छायाःसा छन्त सुं मनुखं
 बचय् याये फइ मखु।
- 4 इपि सीबलय् चाय् लिहांवनी।
 उखुन्हु इमिगु फुक्क
 ग्वसाः नाश जुइ।
- 5 धन्य खः व मनु,
 गुम्हयसिया ग्वाहालि
 याकूबया परमेश्वर खः,
 गुम्हयसिनं परमप्रभु
 परमेश्वरयागु भलसा काइ।
- 6 वय्कः स्वर्ग व पृथ्वी, समुद्र
 व उकी दुगु थीथी जीवजन्तु
 दय्कादीम्ह खः।
 वय्कलं न्ह्याबलें
 थःगु बचं पूर्वकादी। ☆
- 7 वय्कलं क्वत्यकाच्चने
 माःपिनिगु
 पंलिनाः न्याय यानादी,
 अले नये पित्याःपिन्त
 नयेगु नसा बियादी।

* 146:1 १४६:१ हल्लेलूयाह थुनिया अर्थ परमप्रभुया प्रशंसा जुइमा खः ☆ 146:6 १४६:६ प्रे ४:२४;

परमप्रभुं कुनातःपिन्त
 त्वःतकादी,
 8 परमप्रभुं मिखां मखंपिन्त
 मिखां खंकादी,
 परमप्रभुं ग्वतुलाच्चंपिन्त
 थनादी।
 परमप्रभुं भिंपिं मनूतयत्
 माया यानादी।
 9 परमप्रभुं झीगु देशय् दुपिं
 परदेशीतयत् रक्षा यानादी,
 वय्क्लं मां-बौ मदुपिं
 व भाःत मदुपिं मिस्तयत्
 वास्ता यानादी।
 तर मभिंपिं मनूतय्गु ग्वसाःयात
 ताःलाकादी मखु।

10 परमप्रभुं न्ह्याबलें
 राज्य यानादी,
 हे सियोन,
 छिमि परमेश्वरं पुस्तां
 पुस्ता तक राज्य यानादी।
 हल्लेलूयाह!

147

परमेश्वरं हाकनं यरूशलेम
 दयकादिल
 1 हल्लेलूयाह!
 झी परमेश्वरया
 भजन हालेगु
 गुलि बांलाःगु खँ खः।

वय्कःया प्रशंसा यायेगु
न्हाइपुगु

व पाय्छिगु खँ खः।

2 वय्कलं यस्शलेमयात

हानं दय्कादी,

ज्वनाः परदेशय् यंकूपिन्त

वय्कलं यस्शलेमय्

लित हयादी।

3 वय्कलं नुगः क्वतुंपिन्त

लाय्कादी,

अले इमिगु घालय्

पट्टी चिनादी।

4 वय्कलं नगुतय्गु

ल्याः क्वःछिनादी,

अले फुक्कसिगु नां तयादी।

5 झी परमप्रभु तःधंम्ह

व तसकं बल्लाःम्ह खः,

वय्कः फुक्क स्यूम्ह खः,

6 परमप्रभुं क्वत्यका

च्वनेमाःपिन्त थकयादी,

तर दुष्टतय्त् बँय् बस्वानादी।

7 सुभाय् ब्युब्बुं

परमप्रभुया निति म्ये हा,

वीणा थानाः

झी परमेश्वरया भजन हा,

8 वय्कलं आकाशयात

सुपाँचं त्वपुयादी,

पृथ्वीइ वा वय्कादी,

अले पहाड पहाडय्

घाँय् बुइकादी।

9 वय्कलं नये पित्याःपिं

पशुतय्त् व क्वःया मस्तय्त्

नयेगु नसा बियादी।

- 10 वय्कः सलयागु बलय्
व मनूयागु तुतिइ
लयतायादी मखु।
- 11 तर परमप्रभु वय्कःया भय
काइपिं खनाः
अले वय्कःया
सदां दइगु दया मायाय्
भलसा काइपिं खनाः
लयतायादी।

- 12 हे यरूशलेम,
परमप्रभुया प्रशंसा या!
हे सियोन,
थः परमेश्वरया प्रशंसा या!

- 13 छायाःसा वय्कलं
छंगु शहरया ध्वाखा
बल्लाकादी,
अले छन्थाय् च्वपिं मनूतय्त
सुवाः बियादी।

- 14 वय्कलं छंगु सिमानाय्
शान्ति हयादी,
वय्कलं भिंगु छवपाखें
छंगु पित्याः लंकादी।

- 15 वय्कलं पृथ्वीयात
आज्ञा बियादी
अले थत्थें वय्कःया
आज्ञायां पालन जुइ।

- 16 वय्कलं ऊन थें यानाः
च्वापु गाय्कादी,
वय्कलं पुगाःगुयात

- नौ थे ह्लादी।
 17 वय्कलं ल्वहंचात थे
 प्वे गाय्कादी,
 वय्कःया चिकुयात
 सुनानं सह याये फइ मखु।
 18 वय्कलं थःगु वचन छवयादी
 अले उमित नाय्कादी,
 वय्कलं फय् वय्कादी
 अले लः न्ह्याइ।
 19 वय्कलं थःगु आझा
 याकूबयात,
 अले थःगु नियम व विधि
 इस्राएलयात कनादीगु दु।
 20 मेगु छुं जातियात
 वय्कलं थथे यानादीगु मदु,
 वय्कःया नियम इमिसं मस्यू।
 हल्लेलूयाह!

148

- स्वर्ग व पृथ्वीइ परमेश्वरया प्रशंसा
 1 हल्लेलूयाह!
 स्वर्ग परमप्रभुया
 प्रशंसा या,
 ततःजाःगु थासय्
 वय्कःया प्रशंसा या!
 2 हे वय्कःया स्वर्गदूतत,
 वय्कःया प्रशंसा या!
 हे स्वर्गया सेना,
 वय्कःया प्रशंसा या!
 3 हे सूर्य व तिमिला,

- वय्कःया प्रशंसा या!
हे प्वालप्वाल थीगु नगु,
वय्कःया प्रशंसा या!
- 4 हे दकलय् तःजाःगु आकाश,
हे आकाशय् च्वय्च्वंगु लः
छिमिसं वय्कःया प्रशंसा या!
- 5 इमिसं परमप्रभुया नांया
प्रशंसा यायेमा,
छाय्धाःसा वय्कःया आज्ञां हे
उपि सृष्टि जुल।
- 6 वय्कलं इमित थथःगु थासय्
न्हाबलेया लागि तयादिल,
वय्कलं छगू
गुबले सिमधइगु नियम
बियादिल।
- 7 हे ततःधिकःपि लः जन्तुत,
व तःजाःगु समुद्र,
पृथ्वी परमप्रभुया प्रशंसा या!
- 8 हे हाबलासा व प्वे,
च्वापु व सुपाँय्,
वय्कःया वचन मानय् याइगु
वानाप वइगु वाफय्।
- 9 पहाडत व फुक्क डौंडात,
फल सय्कीगु सिमा
व फुक्क देवदारु,
- 10 गुँपशु व छेँय् लहीपि पशु,
घिसय् जुयाजुइपि जन्तु
व झंगःपंक्षीत,

- 11 पृथ्वीयापि जुजुपि व जातित,
 राजकुमार व पृथ्वीया शासकत,
 12 ल्यायम्हपि व मिसामस्त,
 बुरापि व मस्त,
 सकसिनं परमप्रभुया प्रशंसा या।

- 13 इपि सकसिनं परमप्रभुया
 नांया प्रशंसा यायेमा,
 छाय्धाःसा वय्कःयागु नां
 जक तःधं।

वय्कःया महिमा
 पृथ्वी व आकाश
 स्वयाः च्वय् दु।

- 14 वय्कलं थःगु
 देशयात बल्लाकादीगु दु,
 उकिं विश्वास यायेबहःपि
 वय्कःयात तसकं यःपिं,
 इस्राएलया मनूतय्सं
 वय्कःया प्रशंसा याइ।
 हल्लेलूयाह।

149

परमप्रभुया प्रशंसाया भजन

- 1 हल्लेलूयाह!
 परमप्रभुया निति
 छपु न्हगु भजन हा,
 विश्वास याये बहःपिनिगु
 सभाय् वय्कःया प्रशंसा या!
 2 इस्राएल थःत
 सृष्टि यानादीम्हय्सिया

कारणं लयतायेमा,
सियोनयापि मनूत थः जुजुया
कारणं लयतायेमा!

3 प्याखं ल्हुल्हुं इमिसं
वय्कःया नांया प्रशंसा यायेमा,
दम्फु व वीणा थानाः
इमिसं वय्कःया भजन हालेमा।

4 परमप्रभु थः मनूत खनाः लयताः,
वय्कलं क्वमिलुतय्त
मुक्ति बियाः हनादी।

5 विश्वास यायेबहःपि मनूत
महिमाया कारणं लयतायेमा,
अले थःगु लासाय् च्वनाः नं
इमिसं जयजय यायेमा।

6 इमिगु म्हुतुं परमेश्वरया
प्रशंसा जुइमा,
अले इमिगु ल्हातय्
निखें धाः दुगु तरवार दयेमा,

7 इमिसं जाति जातियात
बदला कायेमा,
देश देशयापि मनूतय्त
सजॉय बीमा,

8 इमि जुजुपिन्त सिखलं,
व इमि नायःतय्त नँयागु
न्यवलं चीमा।

9 अले इमित क्वःछिनातःगु
सजॉय बीमा।
विश्वास यायेबहःपि मनूत
महिमाया कारणं लयतायेमा।
हल्लेलूयाह!

150

परमप्रभुया प्रशंसा

1 हल्लेलूयाह!

वय्कःया पवित्र थासय्

परमेश्वरया प्रशंसा या,

वय्कःया तःधंगु आकाशय्

वय्कःया प्रशंसा या।

2 वय्कलं यानादीगु

ततःधंगु ज्याया निति

वय्कःया प्रशंसा या।

वय्कःया च्वन्द्वाःगु

महानताया निति

वय्कःया प्रशंसा या।

3 नेक् पुयाः

वय्कःया प्रशंसा या।

वीणा थानाः, सारंगी कियाः

वय्कःया प्रशंसा या।

4 दम्फु थाथां प्याखं ल्हुयाः

वय्कःया प्रशंसा या।

वीणा थानाः अले बाँसुरी पुयाः

वय्कःया प्रशंसा या।

5 भुस्याः थानाः

वय्कःया प्रशंसा या।

तसकं इयाई इयाई सःवइगु

भुस्याः थानाः

वय्कःया प्रशंसा या।

6 सासः दुपिं फुक्क प्राणीतय्सं

परमप्रभुया प्रशंसा यायेमा!

हल्लेलूयाह!

ccclxxxix

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 19 Dec 2025 from source files
dated 17 May 2025

838cc630-4ccf-5055-be45-10a98a141cc7